

海忠介公全集

海瑞

文硕阁

wenshuoge.com

目录

关于我们	3
目录	5
序	6
卷之一	8
卷之二	18
卷之三	32
卷之四	50
卷之五	69
卷之六	88
卷之七	108
卷之八	126
卷之九	142
卷之十	163
卷之十一	182
卷之十二	196

版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望能有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

如何联系我们？

网站：www.wenshuoge.com

邮箱：7sbook@duck.com



(扫码访问网站)



(扫码加客服微信)

目录

序

卷之一 论

卷之二 奏疏

卷之三 序一

卷之四 序二

卷之五 书一

卷之六 书二记杂说

卷之七

卷之八 淳安政事一

卷之九 淳安政事二

卷之十

卷之十一 四书义御制祭葬文一

卷之十二 御制祭葬文二挽诗行状赞传附三进士申救疏

序

序一

序二

○序一

予不佞自韶龄赴童子试即闻吾琼有刚峯海先生云而未尝亲见其为人也然孟氏不云乎读其书论其世可以知其人是为尚友先生生平直声振三朝惠政在东南没后而一切奏疏书札至贵洛阳纸予不佞间尝取而读之已慨然想见其为人况先生谢政里居家徒四壁囊无一钱而先生方娱游山水意融融乐也没之日族之人以先生家无厚赀逡巡未即嗣其知慕先生而嗣之者亦以家无厚赀即顷者圣天子鉴先生忠嘉与恩荫竟艰于赴铨曹则先生之清风真可起顽懦而师百世矣惟是世之高视先生者每以先生为祥麟威凤不可几及而南海兆瑚梁君令苍梧独毅然以先生为可师爰于公余取先生文集详加编摩备诸所未备予不佞与梁君均去先生之世未远而予近先生之居为尤甚即微梁君犹将为先生?不朽今梁君既以集成帙因名其编曰海忠介公全集用以公诸同学俾观之者是则是效且使人知祥麟威凤固宇宙间所不恒见之物亦宇宙间所必有之物不越一帙尚友千古则梁君之有功于先生与后人者大矣

天启丙寅初夏望日赐进士第中宪大夫广西按察司副使兼布政司右参议分守苍梧道紫贝后学邢祚昌顿首拜撰

○序二

孟氏以几希二字提醒战国之人心而曰庶民去之君子存之夫不存而去则禽兽而已矣舜禹汤文周孔无非欲天下人为君子不为禽兽其心皇皇而未有已者止在舍此趋彼之间而告戒丁宁未有不极其严者也吾粤海忠介先生挺然千仞之上璠生也晚不获覩其芳躅而得于故老之传闻遗篇之纪述愿为执鞭壬戌邸中吾乡诸前辈以先生集见委曾从广慧斋毕力订刻阅数月而集成第本藏会馆不能挈之而南其所订者乃兴国诸议居多而平黎等疏淳安政事及诸序牋俱未备载其中癸亥夏抵梧山办事之暇徧搜先生之备忘集续遗忘集与淳安南平诸刻合并而汇辑之复付梓以行于世夫世知先生者皆谓清风特节即一介而必严敢谏犯颜垂九死而不悔将以为齐芳于首阳而埒忠于逢比至问剔弊厘奸救民水火则又谓情急于饥溺禹稷不是过焉孰知其心性之学见之甚精而辨之甚晰乃先生所以独见其大乎观其朱陆之辩一则曰维天之命在人为性而具于心得此而先尧舜禹有危微精一允执厥中之传得此而后孟子有求放心先立乎大之论未有舍去本心别求圣人之道者又曰圣人不废学以为涵養是以中庸有尊德性而道问学之说贤人而下不废学以求复初是以孟子有学问之道求其放心之说则千圣相传之统与夫德性问学之功固先生之所会悟而超然有得者也今观其告戒叮咛不巽而直不婉而激无非欲天下人皆为君子而不

为禽兽有近于禽兽之行先生去之若浼有近于禽兽之心先生诛之必尽义正词严斩钉截铁务使污浊之世界返于清明贪毒之人类归于各得矫而正之即好辩不啻焉昔孟氏以泰山岩、气象欲举战国之习而矫之而总归孔氏之家法先生气象与岩、无异而恶乡原一节尤其学问最得力处正先生之能为孟氏处也后之有志于先生者端其趋向毋为阉媚之习正其心术毋为暧昧之藏检束其举动毋为贪黷之事严于微以防于显谨于细以积于巨夜气鸡鸣无非警省庶几不堕禽兽之归焉是则先生风教所为师表百世而兴起后人者乎孟子曰予未得为孔子徒也予私淑诸人也又曰高山仰止景行行止请以是而志私淑焉是为序

天启乙丑重阳日苍梧县知县南海后学梁子璠顿首谨书

卷之一

琼山刚峰海瑞着南海后学梁子璠汇订

论

出处

严光

朱陆

其嗟也可去

太伯论上

太伯论下

孟子为贫而仕

周公使管叔监殷

使毕战问井地

孟子道性善

乡愿乱德

○出处

君子处世昔人皆以不仕则隐出处二道对待言之谓不得于君则当处而隐逸性分之乐一彼一此皆是也其说定于孔子邦有道则仕邦无道则隐之辨然孔子有是言孔子终身事业谓之隐谓之仕春秋之时是亦无道而极者矣齐鲁蔡宋之郊流行辙环日不舍置其时以时而隐若丈人若荷簞长沮桀溺微生亩至以果哉未难洁已乱伦罪之夫子之道则又何在夫人生天地有是耳目口鼻之形付之以天地万物之性天地以生物为心生人之理尽生意也天地间尽此生意是故君子出而仕人不负天与性在是道在是人皆可为尧舜亦在于是丈人荷簞耳目口鼻之形而不知万物一体之义葆真抱一饥则食渴则饮保之何益见孺子将入于井而无怵惕惻隐之心非人矣余尝仰之赋与即之孔子终身之事其云有道之仕有定仕也其云无道之隐无定隐也意有所在截然对待之辞不可因之遂谓为截然对待之道出

处二字不可并论去就二字亦不可并论就者君子仕人之正去不得已为之出者君子立身正处不得已为之天下只是一道舍此则失道失道失性矣是以所就三所去三君子虽计较于毫厘礼节之间而万物一体天之与我则不以一时而辍天地间生生不息真机活泼自不得已之也曾子云仁以为己任死而后已解者以一息尚存此志不容少懈言之仁即天地生物之仁志即孟子得志与民由之不得志独行其道之志宋儒谓人君联属天下以成其身自有位之显言之耳自天子至于庶人德性赋予其得之天一也当理而无私一身一心曾子已任之仁如斯而已耶孔子无道则隐其隐也皇皇然有道则见之心孔子舍之则藏其藏也惓惓然用之则行之念虽有用舍行藏之判而舍之则藏即具于用之则行之中有定出无定处非二道也只一万物一体之仁故亦只一出而仕人之义说者又谓在圣人则可在贤人则不可其说尤不可晓尧让天下于许由而市道小人争半钱之利九牛毛之谕诚有之矣实则人生之后人自逆天人自为异谓靡不有初而又谓有可不可于后有之哉子路执无道而隐之言何必公山氏之说夫子晓之曰吾岂匏瓜也哉焉能系而不食孔子之身门弟子之法也圣贤君子之别大抵只是安利困勉判如于其间如孔子答哀公为政之问及其成功一也而已矣春秋之时武城弦歌夫子喜之漆雕开斯之未信夫子使之仕谓有可不可望贤之别耶然天下一君四海一国不得于一将无可入之二矣若之何孟子曰予然后浩然有归志虽然王如用予偁耳欲速其功五就汤五就桀一人之身一念一事今日明目别有悔悞君子得志与民由之不得志独行其道得不得时也志念如一志与时旋时其人不可而去时其人之可而圣贤之志又转之矣此正是有定仕无定隐之道大中至正通又下合人已孔子不遇终其粤六经垂宪七篇仁义孟子自许取法后王春秋战国之身尚欲置之为后千万世之仕身当其时恬然隐处秦越天下为一身不为天下计孔孟不为之矣曰出处去就截然对待之道君子思不出其位舍性命言时势宇宙无穷谁当负荷言长沮桀溺不言孔孟吾不信也

○严光

横足加帝腹天下视为奇事桐江一丝以古而今亦无不为之子陵高而贤之矣然高则高矣高而不实奇则奇矣奇而不中人生天地间只是一性分是所固有见之日用只是一职分惟所当为舍性分言高奇未见其能高能奇矣性分何在天地万物本同一体自天子以至途人一也性在是职分在是自天子以至途人作用一也故天地万物举而属之我一人之身举而任之为我一人日用常行之道人不用我然后退而守之虽退而守之而万物一体之心则未尝一日息也从古圣贤道盖如此孟子曰中天下而立定四海之民君子乐之子陵果如光武相助为理之念则光武之所立而定明良相逢治具毕张是即子陵之所立而定也真机实际子陵何故不乐为之孔子生丁春秋流行辙环日不舍置荷簣丈人知不可而不为之矣夫子罪之相对累日因共偃仰由古而来迭为宾主二女九男情分无间未之过也可以谓之不可为不为之耶孔子于荷簣责其果于微生责其固于丈人责其洁身乱伦就子陵言之其乱果而固有甚之矣有君无臣吾悲其为君苟有天下国家之志光武之时不为孔子孟轲之出可胜悲乎一时后世独于子陵贤之祠祭咏扬不一而足是所谓高而奇也三代而下蟬蛻汗秽之中以浮游尘埃之外权位名利若敝屣也谁其人哉谁其人哉苟可得之无所不至有扁斯石宦官宫妾甘其心而履之矣况天子之尊故人之厚彼自求之不与得之独非人间世一希阔事千仞之上翔之者乎甚矣人之好怪也又况足横帝腹古无有也今无有也天下后世无有

也骇人闻听然君子之于天下求尽其在我而已不必其高不必其不高不高而得我所性乃所以为高无裨于性高之何益寒不可衣饥不可食为珠玉宝器不为布帛菽粟子陵之高之谓矣且子陵不得于高卑而言之于此亦自可见苏东坡谓魏晋梁得之文王而终身不得皆吾之所轻者也大舜衿衣鼓琴若固有之君子内重而见外为轻盖如此有诸内形诸外不能餽也子陵苟有所得将富贵贫贱视之一也故人而故人之矣天子卿相浮云景色何所为而高下视之昔日故人则就之今日天子则不之就耶见王侯卿士而媚之俗心也见王侯卿士而轻之亦俗心也清浊不同见在人不见在己内轻而见外之为重则一光武称狂奴故态无乃子陵只是一味薄天子而不为之狂出此之外更无他长耶君子得志与民由之不得志独行其道不得志之志即得志之志苟有其志故人如光武不与行之未之有也子陵无其志是以无其具无其具是以只就平日之狂成一个后之咏钓台者出脱子陵云侯霸朱浮仅免归韩歆戴涉终见杀云胡君房留不住无乃平日窥其微夫有是臣则有是君自建武中三十年论之中兴事业止此而已尚不如子陵颐真抱一不为之高百姓怨气满腹羊裘懒散江湖无能优劣固也然子陵实有伊傅周吕之器不能辅成光武天下得有禹汤文武之泽耶事属后日如果言不听谏之不从如不我得于先亦不我力于后故人有其名无其实从而去之未晚也谨信如光武中兴如光武柰之何预逆其不可先自绝之伊尹之于汤传说之于高宗倾盖如故子陵之于光武贵贱易交白头而新言一人之交二人同心如兰断金未可言也辅世而长天下之民可言之乎老子谓修之身其德乃真修之天下其德乃普身心天下德之在我为之区区然桐江烟水富春风月有一节之偏缺全体之正可以言德之真也哉范文正谓子陵之风山高水长山则高矣无草木水则长矣不能水气上兴云雨无取焉狂奴故态子陵之论定于是矣而天下之人独于子陵称贤是则好高好奇之过绝无之中仅有一醒人耳目也

○朱陆

朱陆之论定久矣何自而辨之辨之以吾之心而已维天之命其在人则为性而具于心古今共之圣愚同之得此而先尧舜禹有危微精一允执厥中之传得此而后孟子有求放心先立乎其大之论未有舍去本心别求之外而曰圣人之道者辄之死不得其传而人心之天则在也孟子曰大人者不失其赤子之心者也恃有赤子之心故虽出之千百载之前其事千百载之下可以一言而定陆子门人问陆子学以何进曰得之孟子则精一执中之旨陆子得之矣乃朱子其学则异于是大学致知在格物借之为诚意正心之用也犹之惟精乃惟一之功明善乃诚身之功功在格致道在诚正朱子笃信大学平生欲读尽天下之书议尽天下之事引而伸之触类而长之天下之事毕矣天下之书可得而尽读之乎事可得而尽议之乎韩退之原道言诚正不及格致朱子指为无头学问是以格物致知为大学头一事矣入门一差是以终身只做得大学先之之功不尽得大学后之之益无得于心所知反限王阳明谓晦翁气魄极大合下便要继往开来少年已着了许多书然则此非其误认之故亮厘之差而为千里之谬者乎夫颜子曾有一著述乎圣人以其躬行心得之余出之于威仪文辞之末富于中见于外不可强而亦不得而餽也心斋坐忘不迁不贰颜子之著述大矣舍去本心日从事于古本册子章章句句之好胜之私心好名之为累据此发念之初已不可以入尧舜之道矣圣人不废学以为涵養是以中庸有尊德生而道问学之说贤人而下不废学以求复初是以孟子有

学问之道求其放心之说子思孟子传自尧舜陆子识之然陆子不免应举子业即其语录文集年谱可见余力学文尚不如是也自传心之法视之犹俗学也朱子反谓其专务践履尽废讲学轮对五札言涵心性乃自其所心知者出之如孔子荅哀公修道诚身孟子告齐梁仁义孝弟亦推本之论也朱子荅之书而戏之云这些子恐是葱岭带得来天下之人只一性命而事物在焉朱子只要人读书讲说研究于外予不知朱子之所谓矣儒学禅宗其判不啻千里而要其初只是毫忽儒道寂守其心中涵事物有天下国家之用禅宗废弃百应徒为空虚寂灭之养朱子指陆为禅然则将不讲其心就外为天下国家之用呻吟其占毕而曰某章某句如此某章某句如彼然后为能学欤颜子终日不违如愚夫子以道统寄之生丁朱子之时言论相及不知其如之何而为禅之诋矣陆子不免少溺于俗然心知其然平日拳拳以求放心先立其大为教闻彼也自闻而已见彼也自见而已犹有得之朱子则楚辞阴符参同契韩文皆其年年月月训诂之册不知此一训诂何日而已也末年之悔谓令此心全体都奔在册子上若有得矣而先入之深读书为主而待其余未见其真能脱去旧习收功一原也危疾一日前犹解诚意章在溺于诵说没身不复圣人六经躬行心得之余为之养盛之克因着其用朱子则先意于此读书为先求心反为后茧丝牛毛识者以集大成归之谓择诸家之训什而纂其长则亦可矣谓道在是则周元公或可而朱不然矣说者又谓朱子羽翼六经嘉惠后学其功不浅夫朱子自少至长无一日不在经书子史间平生精力尽于训诂而其所训又多圣人之经贤人之传也夫岂得无功于后圣真以此破碎道一由此支离又不能不为后人之误功过并之而使人繁于枝叶昧厥本原其过为大三代而后学之陷溺如朱者比比然也朱子欲以其学为天下宗天下亦以此信宗于朱子故予不及其它独指朱子为过陆子谓此老平生志向不汨于利禄当今诚难其匹夫朱子岂不知心之为大而求之心哉误认格致为入门指著述为功业途辙既乖所得随之韩退之因文以见道而非明道以为文日月至焉而已矣无乃朱子过欤欲往京师心识国都之所在行远自迩计日可到懵于定向执途之人而讯之岐路之中又有岐焉讯之所不及失之矣大抵天下得意忘言区区于文义讲说之间真趣薄矣深造自得者当见之颜子默契道体孔子予欲无言天渊禅学而其致虚之笃一而已矣然则朱子无乃得言而自薄于其意欤自得之则有居之安资之深之益日从事于故纸堆中外强中干吕东莱谓铄铄而析之寸寸而较之无复有诗矣朱子之谓矣朱子平生误在误格物为入门而不知大学之道诚正乃其实地以故一意解书其解书其论人心术见焉谓司马温公只恁行将去无致知一段朱子日日经史其不满于实心实事无私无党有余力而后学文之君实无足怪矣大凡人言语文字皆心为之阳明致良知其什经不取朱子之说者多说在心性上朱子什经全说在多学而识上阳明鹮突其说诚有之然犹不失为本原之养也犹第一义也朱子则落而下之离而去之矣道问学之功为尊德性而设正与孟子学问求放心同义朱子解之曰非存心无以致知而存心者又不可以不致知崇礼中庸行也以属之知姑勿论所云致知非程子进学则在致知根心着己之知亦姑勿论乃其意则全重致知矣细玩尊德性而道问学曾有此口气乎存疑录谓朱子平生所得在是所失亦在是见非于陆子静亦在是得之矣其训中庸分章分句分为相属明费隐天道人道小德大德分中分和道不可离此言素位此言不愿太极通书此言阳之动此言阴之静支离为甚默而识之识言知之于心平声字朱子作去声解音志谓记之于心不以圣贤说圣贤以已之所误说之能说之耶得人之得适人之适难言之矣自得其得自适其适天机之观不言之喻将能之也哉然又非止言语文字之间鹅湖白鹿往返议论之差而已荆公祠记千百年大公案也学问偏枯识见昏昧之

故其诋之不遗余力与初之指为禅会无异今世之儒士自谓得正心诚意之学者皆风痹不知痛痒之人也举一世安于君父之大孰而方且扬眉拱手以谈性命不知何者谓之性命乎正诸儒人膏肓之病也使在周邵闻之喜过而乐与之矣孝弟忠信常不足以应天下之变而才术辨智常不足以定天下之经亦此意也朱子遗蔡人书乃谓诸君子聚头磕额理会何事乃致有此等怪论少见朱唐交恶录齐则失矣楚亦未为得也光风霁月洒落襟怀有如周兀公邵康节其人者宁有此言说举措耶情见乎辞行如其心涵養未融克伐为崇晦庵不能无大不满于后学之意矣后人为朱陆之议聂双江以党同伐异挟胜崇私言之然当其时门弟子则已然矣岂非朱子身自作则一时门下习气而又因以貽之后乎自宋至今五百余年是朱非陆所在群如也正双江党伐挟崇之谓阳明之所称今之尊信晦翁无异于战国之尊信杨墨也抑何从而辨之乎孟子曰是非之心人皆有之请以是为朱陆之辨

○其嗟也可去

天下孰为重德义为重德义孰有之君子之身有之合仁与人谓之道有此身然后有此德义是人身为重非人身之为重德义身有之之为重非德之德非义之义自视此身之为轻是不知有此身而后有此德义身之为重孔子曰自古皆有死民无信不立身有轻焉者矣孟子曰取食之重与礼之轻者而比之奚翅食重身有重焉者矣去身言德义德义当酌之去德义言身身当酌之天下一德义而已曰酌之酌之云者言当用中而行不可见一偏执为德义不顾其有甚焉者身之为重也饥者不食嗟来之食黔敖从而谢焉终不食而死曾子曰微与微言小节细故得之矣至谓嗟可去谢可食则又不然夫人一身宇宙内事其分儒行言爱其死以有待養其身以有为饥者之身何身独非天地之性人为贵宇宙分内事之身耶身有重焉者矣嗟来从谢区间于我何与孟子云与礼之轻礼非有轻观会通以行之之谓礼非德非义而俗执之礼之为轻曾可得而与我天地之身一较量哉诚不啻食之为重也毫厘之差千里之谬此等处天渊悬远诚不可以其小加大者之上也饥者之死姑就其近易晓者言之饥者独无父母妻孥吾非斯人之徒而谁与者哉一不食死则死矣亡矣不复见矣嗟不嗟谢不谢何所干系自安沟壑何心哉何心哉饥者父则不念子不慈之父饥者子则不念父不孝之子饥者为夫则不念其妻不义之心此亦宇宙分中之事谓之近浅姑就常人孺子皆有不忍之心言之常人孺子皆有不忍之心饥者独无大戕天地近戕一身饥者之操无可言矣易曰苦节贞凶其道穷也圣人无取焉此惟陈仲子并李三咽柴子羔不窆入于室尚全其生可以当之孔子谓子羔为愚饥者以愚而死不得其贞穷而凶之道也一父母天地之身生生不息草木同仁忍弃之耶其故起于讲之不明知有一事之义而不知有一身一心天地与立之全谳于其大是以徒执于其小苟有见焉会有向为身死不受之一端又会有奚翅食重之大体变而通之与时宜之轻其轻重其重嗟来食头风过耳从而谢浮云触目其谢我不感之以为恩其嗟我不藏之以为怨时适凶荒不食则死出此入彼我知身有大焉岂计其它禋祀有日偶失于防牛羊抵触可以改卜牛羊无知可以废祭乎哉仲尼之徒无道桓文之事者管仲曾西之所不为也如其仁如其仁夫子与之岂若匹夫匹妇之谅一匡天下民到于今受其赐之为大也夫子取其功略其陋是一道也造化生乎身之身父母妻孥所仰望而终身也七尺之躯可忽乎哉责人与责己不同管仲无足取者为酌量大小之说借明之疾固也予无取于饥者之操无改于谢则亦不食而死矣曾子谢也可食之言无取焉虽然人有不为笃信之美然

后可以望他日有为恢宏之大饥者则误矣志趣胸曲行一不义杀一不辜而得天下不为人物也得圣人依归之此其最高者欤后之乞墦啜羹奔趋势利日无休息生不如死母以饥者为口实

○太伯论上

太王剪商之志金仁山胡双湖辩之详矣愚窃谓太王实有是志太伯去之夫子亦不当以至德许夫太王当祖甲之时去高宗中兴未远后一百有余年殷始亡则当太王时乃商家盛强之末衰弱之始其天命人心尚完固未动所谓剪商亦言乎其志焉耳非爰整其旅如观兵孟津陈师牧野之为也泰伯无荆蛮之逃则国属之泰伯矣属之泰伯而泰伯以不取为心则翦商之志蓄于太王者息之泰伯季历不得位日后无武王事纣无灭亡之理此其以天下让商更为何如太王欲传位季历则翦商之志季历从之矣太王启于先季历从于后父作子述事必有可成无难者君臣之义泰伯不以此身维持其间而托于采药之去我虽不杀伯仁伯仁由我而死充类至义之尽泰伯其得为有君也哉且弑君天下大恶也幸而成之公议凜于斧钺不幸不成大则身首异处破坏家门小则贬削投荒流离终世王述之子坦之欲以女与桓温述怒排坦之曰汝真痴耶乃欲以女与兵坦之是以不与桓温之祸窃以为泰伯之爱太王不如述之爱其子矣圣贤之论曰君有过三谏而不听则逃之父有过三谏而不听则号泣而随之夫子臣异道非止谓其天合人合义当如此也子之于父一体而生比之异姓君臣情分有别以光明正大之义投一气相通之亲婉顺号泣至三至再无不可以感通而挽回焉者父有诤子则身不陷于不义无君一念此其事为何如可逆料其不可反而遂逃之耶仁杰周旋于则天之朝双陆不胜之兆姑侄子母之言且能动之俾天下复为唐有太王固非昏暗之武后也仁杰能行于异姓之妇人伯不能行于至亲之父子且朱子之论伯曰德足以朝诸侯而有天下夫足以朝诸侯有天下而不能以大义回父心吾不信之矣以子事父情有可为而不为身为世子权有可为而不为以事父言则不孝以事商言则不忠启天下无君之祸贻家门弑逆之羞皆荆蛮一逃为之也夫子旁通事物之变酌见义理之原而顾以至德称之哉

○泰伯论下

果如翦商说则泰伯洁身而去仅得与申生之恭为类质美未学谓之德且不可矣况可谓之至乎盖采药一去使太王果成翦商之事则商家天下不得于太王当得于季历是泰伯不取商家之天下而任父与弟取之也春秋书赵盾弑其君任父与弟取之不以此身维持其间绳以春秋法泰伯罪不可逃矣仁杰周旋于女主之朝君子取焉盖君子期于成天下之事而不必于明己之志苟谓惟求无愧直遂径行可以维持左右使不至于成其逆者皆不为之泰伯不得为多贤矣朱子以遂成吴国事料太伯于商周之际足以朝诸侯有天下太王邑于岐山之下从如归市不能以有天下乎太王可有天下而泰伯洁身去之谓让天下于商可乎且朝诸侯有天下之说尤不可晓说者谓周之顽民为商忠臣观多方多士训殷民者详矣必三纪而后风俗移易牧野之师虽殷民有倒戈之志然犹有前途交战之人孟子曰其故家遗俗流风善政犹有存者是以难也泰伯虽盛德当不过于文王文王值罪恶贯盈之纣不能为之泰伯当祖甲世去高宗中兴未远又焉能朝诸侯有天下易易耶三分有二以服事殷说者谓九

州岛所以不遽叛者皆小心翼翼延焉夫纣犹有可延之势以泰伯不从之德当祖甲盛时为天下倡率民可知方商室太山而四维之矣朝诸侯有天下此必无之事也孟子曰继世而有天下者天之所废必若桀纣故益伊尹周公不有天下适圣贤六七作之后而天遽弃之耶以德言泰伯无取天下之理以时言泰伯无取天下之几徒见夫遂成吴国之迹谓可以朝诸侯有天下夫归泰伯之人正邠人从太王之人也其心知有君臣之义故见夫可君者翕然归之又跻我于天下一君之上恐知有仁人之人不如是也归市之太王不能即遂翦商之心遂成吴国之泰伯能朝诸侯有天下乎且推己之物以与人谓之让指商家未败之天下为泰伯当得而不取之恩是何以异于盗贼指所未刼之家其所积为已有而姑让与积财者所用耶大禹太甲成王之天下不可谓为益伊尹周公旦所让周之天下不可谓为泰伯所让尤可知矣夫子之言当不如是朱子凭史记之语而想象推之于太王泰伯心事皆不得其实而其时其事并夫子称许之言有相悖戾不可强通者不若止以让国季历说武王终有天下故以让天下推许之无碍也

○孟子为贫而仕

人生天地间曰士曰农曰工曰商皆男子事也其事虽一然士在行道天地间惟道最大故士居四民首士当斯世既贫而无养矣曰农曰工曰商无非资身策也此其事之在我者一仕于人则制于人制于人则不得以自由制于人而望于人者惟禄焉且云非出处之正吁非其正者而可以谓之出乎以不正之出悬望禄之思此其心何如也君子之仕所以行其义臣子之义分无彼此而以言高行道自诿失君子出仕义矣天地间无可以生此身者为之可也舍农工商之养自己出区区于抱关击柝之禄由人制者焉大贤君子之所为宁若此哉孔子平日进以礼难于进也退以义易于退也乘田委吏安然受之而不辞盖亦顺其举授者而无容心焉亦且行道之端所系耳事君敬其事而后其食为贫以进宁复能后其食耶孟子平日执不见诸侯之义分庭抗礼直若壁立万仞之不可即者莫非刚且大者为之斯言一出吾恐气体亦有所不充集义所生者或不能长江大河浩浩然而来矣

○周公使管叔监殷

周公之处管蔡诸家皆以为不忍逆探其兄之恶而弃之愚窃谓不然舜之处象虽云封之有庠而天子之吏实理所以然者正以全吾亲爱之心又使之不得少肆其恶其为家国臣民之计详而密矣人必有惻隐之心惻隐之心于亲切人必有是非之心是非之心于亲真谓之真者非独详于此也日夕周旋心术之善否见事之明暗才调之大与小莫不毕照于我而非若他人之日月一至见其一二而未见其千万也古称知子莫若父知弟子莫若师群居终日而以知友称亦以亲比不离之故木谓蔽于爱兄之心然则舜何以不蔽四端必有随感异应举天下皆然而周公独何以得此失彼大学称莫知其子之恶责溺爱者之不明也古称诤子为贤子教以义方为贤父胤子朱启明臣民称焉尧且以囂讼弃之见有真否之别也将谓过恶未着而其志其才有可取者知人则哲维帝其艰四凶不去于尧而去于舜人心之藏不可测度虽明圣亦有未能先为之别者奚必兄弟间而后然哉立亡国之子而求所以监之此其关系若何当何如以计之者监以亲亲之兄周公虑事之详亦可想矣若夫日后之事则所谓维

帝之艰圣人之不幸也而其初之必使焉者正其才志之可观兄弟之真见今观金縢之册公之爱武王何若恩斯勤斯之咏公之爱成王何若孩提之童无不知爱其兄在彼犹在此者附孰人以背懿亲管所为有出于天理人情之外者而公安得逆知之窃以为监殷之举公毛自庆以为得安国之计矣而宁意其后之至此耶周公弟也管叔兄也周公之过不亦宜乎孟子意或如此无取我子鬻子之闵斯之言哀而切所谓垂涕泣而道之也败露之后其亲爱之情尚如此阅墙御侮之亲而使之监我孰人焉独非圣人之至计也乎天理人情周公之所不能不过也若谓蔽于爱兄以至今日稽之古今反之人心不能以强通矣

○使毕战问井地

不井田而能致天下之治者无是理也何也人必衣食有所资然后为善之心以生日夕有所事然后淫侈之念不作井田者衣食之资日夕之事返朴还淳之道去盗绝讼之原举赖于此故尝以为一井田而天下之事毕矣然自三代而下垂数千载而莫之行者何井田所以为民而亦兼以足国自秦汉而下其心于为民者能几人哉间有欲为民隐之恤久远之计者又苦于考究之不详变通之无法彼见夫天下若此其大夺富民之田以畀贫者纷纷籍籍无从下手其讲学之臣多词章记诵之士议及井田懵然不知所以行之之故或见其莫已利也因不举之以为君诵者亦有之举世相安于因循之习竟无经久之计望治之思胶柱鼓瑟宜乎其卒不可行也考之后之称稽古博识者莫如端临马氏其为井田之议谓后之君子每慨叹世主不能复三代之法以利其民使豪强坐擅兼并之利其说固正矣至于斟酌古今究竟利病则莫老泉水心二公之论最为确实其出二公之外而为之议者必能备知闾里之利病详悉然后授受可以无弊然则自周而下吏于民者举不欲知其利病也耶不知民间之利病用民之脂膏以泰之何用设官分职旁午而纵横之者何为守令之迁除其岁月有限独不可举而久任之乎污吏黠胥能舞文以乱簿书田里之一一可覩丈尺可凭或不可乱还授之奸敝无穷今则然矣井田既行之后而民犹有无穷之弊耶商君决裂井田废坏阡陌以静百姓之业而一其志果若斯言则三代之贡助彻法将不静而一乎不反其静一之故而见夫末流之弊遂举而弃之不揣其本而齐于末端临于是为失言矣我朝丘文庄有取于苏叶之论而其言曰可于国初人寡之时为之承平日久生齿日繁之后终归于隳废程子谓天地间决无人多地少之理今之糜费五谷计当数倍吾民日夕之食而犹可以取给事可知矣随时制宜而不失先王之制历举贡助以为滕文诵孟子之所云润泽不如是也丁田相配取效于数百年之后井田以渐为之而俟其成独不可举而行之乎谓张载处之有术之言惜其要妙隐而未发吁三代行之其为日若此其久也地里举目可见量度反掌而行宁能隐之耶文庄之见亦端临之见也误之者苏叶而二公之言尤自可笑周礼遂人凡治野夫间有遂遂上有径十夫有沟沟上有畛百夫有洫洫上有涂千夫有浍浍上有道万夫有川川上有路以达于畿郑康成谓此乡遂用沟洫之法也用之近郊乡遂匠人九夫为井井间广四尺深四尺谓之沟方十里为成成间广八尺深八尺谓之洫方百里为同同间广二寻深二仞谓之涂专达于川康成以此都鄙用井田之法也用之野外县都此盖以平原旷野之地行助法以山林陵麓之地行贡法然非贡助一定于此而不易也昔朱子论建国谓必依山川形势无截然可方之理孟子若夫润泽正此意也必若塞溪壑平涧谷夷丘陵破坟墓坏庐舍徙城郭易疆隴而后可为圣王之井田将塞之平之夷之坏之易之而后为之也耶为高必因丘陵为下必因川泽谓圣人也

而所行之事宁若此愚痴不通耶必九百亩而后井必方百里而后同不足于九夫之地百里之人同而可耕可植者弃之乎随田之广狭而为多少之受可井则井不可井则一夫二夫当之可同则同不可同则百夫千夫当之助不必野而行赋不必国中而行此圣人之法也二氏以不通之见而议古法难乎其为古矣所见之舛若此则其谓井田成而民之死其骨已朽驱天下之人端天下之粮穷数百年专力于此不治他事宜乎其然矣井田者井田之名也人必有田而不必于井者井田之实也观野行助法国中十一自赋圣人变通之权可想见矣为今之计不必访求故堰遗陂之已废者按今日之土田随地区画举周礼大司徒所谓不易之地家百亩小司徒上地家七人与夫大宰九职任万民者而酌用之守宰县令一以井田为事其纤悉又属之一里之长不以今日纷纷之病而沮其必行之心必委曲以力行而求为久远之计既定之后举簿书以验田土度地不足则吏胥之奸弊可稽正不必慈祥如龚黄精明如张赵而亦可以济斯世于虞周之盛区斯民于乐乐利利之中矣横渠曰世之病难行者未始不以亟夺富人之田为辞盖谓其或以召乱也然天下富人多乎贫人多乎田井而贫者得免奴佃富家之苦吾知其欣从必矣王者固有灭人之族没人之产而束手听者取其有余之田而不夺其上下之养彼亦安得而违之窃以为井田之决可复于后世者谅夫有同然之心而不必恤其众多之口反复晓谕委曲变通必无召乱之事也然则数世之后而其子孙众多不可以死徙无出乡之法行之者若何曰物之不齐物之情也自夏后以至八百年之周其间独无若此者乎然要在必有田宅而不失所养化裁变通之而已要之不能以一一如意而较之田不井授一遇灾旱而民之辗转沟壑白骨遍野平时则奸伪朋兴有故则群横寇盗其相去万万矣愚故以为断然必在可行而无疑也

古今论井田之难者惟强夺民田以召怨讟一语为稍近似举今日吏胥无穷之弊守宰迁徙不常之由乃不揣其本而齐其末之论若夫执沟洫井同之法而谓今日之地非古昔平原之区者以胶柱鼓瑟而论圣人不通之甚者也夫人贫富不相耀以和其心而后天下之治可定今日太平之业必世后仁之化举须于此彼夫心所同然而口之怨讟固不必恤也力而行之而民可与乐成矣然封建所以维持井田者也田欲井授亦将举封建而行之乎曰久守宰之任而一里之长长子孙于其中者复为之维持焉井田之可行也必矣制度一定则心志一习俗成其所以维持之者不难矣然则奚必封建为哉

人皆以井田为圣王之养庠序为圣王之教养民于先教民于后有养而后教行焉若井田自为养庠序自为教不相涉矣然易履卦君子象之以辩上下定民志上下辩民志定教之成也一夫百亩之田百亩外不能加毫末五亩之宅五亩外不能加毫末上下四旁长短广狭彼此如一而无不方民志之定何如程伊川传履叹后世自士庶至于公卿日志于尊荣农工商贾日志于富侈亿兆之心交骛于利天下纷然如之何其可一也吹其不乱难矣降至今日较伊川言殆有甚焉所称名人贤士口谈道义者皆不能绝去为富不仁之心小民持此为观法借此为口实用是风俗日流莫知纪极法不能止大抵皆厚田宅丰衣食美妻妾一念使之有此一念又皆田宅无分界人人得以自买自卖致焉井田行则民贫富不相耀而心和矣生长所习见而志定矣汉人以富人观欲天下为悲止此田宅更何欲可观汉人以彼民情见美则悦为叹止此田宅更何美可悦富者欲过贫者欲企虽有其心而盖无其由也无其由而过企之心灭矣井田未尝教民而域民于教教道之妙有若此尝谓井田立而先王之教斯过半矣天

下之治井田为之学校不过辅翼之先王之教井田教于始学校不过成教于终一井田而天下之事毕矣后世纷纷然交骛于利彼身当教化之责者亦惟利是驰制度非不详教戒非不切也以言相禁实则别以意相传夫曰教之夫曰教之云者是亦空言而已天下如之何其能治耶井田尽天下之事与其竭力为庠序为教约百端鼓舞民志不定迄无成功不若竭力为一井田以复唐虞三代之治不可以王莽王田增纷扰借口也

○孟子道性善

孔子论性曰性相近习相远虽未一一剖析而天命气质实兼于中程子所谓二之则不是相近一言尽之矣论性不论气无以见其生稟之异论气不论性无以见夫义理之同言性不可不析而为二无气则此理无处安顿曰理曰气无离合无先后性即在气质中非二物也言性又不可不合而为一合之而未尝不分浑然之中灿然者着焉圣人之言妙矣孟子论性区区然执一性善之说夫人之所以信服于人服其心也服其心者彼亦有所验之于心证之天下也程张生于战国一言而告子服矣告子不为孟子服者实孟子言之执于一辩之不能详使之非告子诸人故屡变以求胜也说者谓孟子时当战国人欲横流不得不执性善之说矫焉春秋时俗较去战国不远孔子称性相近继之曰惟上智与下愚不移周流不舍孔子救世之心亦均切矣将不欲矫正之耶不正言以屈其心欲反言而矫其失不可得而矫矣告子所谓仁内义外乃不知仁义二字字义所谓非知仁义二字义固欲反之孟子不曰心之德爱之理谓之仁心之制事之宜谓之义区区执敬酌汤水之说辩之不详亦徒多言而无益也

孟子有命也有性焉君子不谓命之说于气质之性既知之矣荅告子诸人独不一言及之盖孟子意欲伸此抑彼如说夜气欲人知涵养此性说四端说扩充欲人知体认此性充广此性谆谆然不一而止无非为性善谋也孟子之功大矣然理气不相离而离言之知为性善谋不能使人信吾性善之说是则孟子之过也

○乡愿乱德

从古未有言及养气者而孟子言之古有诡随上容之说即乡愿意也亦无有若孟子之论剜切痛快者盖乡愿馁其浩然之气以从俗浩然之气孟子身有之见乡愿若为身害故言之详恶之痛今天下惟乡愿之教入人最深凡处已待人事上治下一以乡愿道行之世俗群然称僻性称所行大过者多是中行之士谓如此然后得中道善处世则必乡愿之为而已所称贤士大夫不免正道乡愿调停行之乡愿去大奸恶不甚远今人不为大恶必为乡愿事在一时毒流后世乡愿之害如此说者谓孟子扩前圣所未发指养气言也孟子之功不在禹下当以恶乡愿为第一

卷之二

奏疏

治安疏

乞终养疏

自陈不职疏

改折禄米仓粮疏

开吴淞江疏

开白茆河疏

处补练兵银疏

革募兵疏

被论自陈不职疏

告养病疏

乞治党邪言官疏

平黎疏

上兵部图说

治黎策

○治安疏

户部云南清吏司主事臣海瑞谨奏为直言天下第一事以正君道明臣职求万世治安事君者天下臣民万物之主也惟其为天下臣民万物之主责任至重凡民生利癘一有所不闻将一有所不得知而行其任为不称是故养君之道宜无不备而以其责寄臣工使尽言焉臣工尽言而君道斯称矣昔之务为容悦谀顺曲从致使实祸蔽塞主不上闻焉无足言矣过为计者则又曰君子危明主忧治世夫世则治矣以不治忧之主则明矣以不明危之母乃使之反

求眩瞽失趋舍矣乎非通论也臣受国恩厚矣请执有犯无隐之义美曰美不一毫虐美过曰过不一毫讳过不为悦不过计披肝胆为陛下言之汉贾谊陈政事于文帝曰进言者皆曰天下已安已治矣臣独以为未也曰安且治者非愚则谀夫文帝汉贤君也贾谊非苛责备也文帝性仁类柔慈恕恭俭虽有近民之美优游退逊尚多怠废之政不究其弊所不免槩以安且治当之愚也不究其才所不能槩以致安治颂之谀也陛下自视于汉文帝何如陛下天质英断睿识绝人可为尧舜可为禹汤文武下之如汉宣帝之励精光武之大度唐太宗之英武无敌宪宗之志平僭乱宋仁宗之仁恕举一节可取者陛下优为之即位初年则除积弊焕然与天下更始举其略如箴敬一以养心定冠履以辩分除圣贤土木之像夺宦官内外之权元世祖毁不与祀祀孔子推及所生天下忻忻然以大有作为仰之识者谓辅相得人太平指日可期也非虚语也高汉文帝远甚然文帝能充其仁顺之性节用爱人吕祖谦称其不尽人之财力情是也一时天下虽未可尽以治安予之而贯朽粟陈民少康阜三代下称贤君焉陛下则锐情未久忘念牵之而去矣反刚明而错用之谓遥兴可得而一意玄修富有四海不曰民之脂膏在是也而侈兴土木二十余年不视朝纲纪弛矣数行推广事例名爵滥矣二王不相见人以为薄于父子以猜疑诽谤戮辱臣下人以为薄于君臣乐西苑而不返宫人以为薄于夫妇天下吏贪将弱民不聊生水旱靡时盗贼滋炽自陛下登极初年亦有之而未甚也今赋役增常万方则效陛下破产礼佛日甚室如悬磬十余年来极矣天下因即陛下改元之号而亿之曰嘉靖者言家家皆净而无财用也迺者严嵩罢黜世蕃极刑差快人意一时称清时焉然严嵩罢相之后犹之严嵩未相之先而已非大清明世界也不及汉文帝远甚天下之人不直陛下久矣内外臣工之所知也知之不可谓愚诗云衮职有阙惟仲山甫补之今日所赖以弼棐匡救格非而归之正诸臣责也夫以圣人而绝无过举哉古昔设官亮采惠畴足矣不必责之以谏保氏掌谏王恶不必设也木绳金砺圣贤不必言之也乃醺修相率进香天桃天药相率表贺兴宫室工部极力经营取香觅宝户部差求四出陛下误举诸臣误顺无一人为陛下一正言焉都俞吁咈之风陈善闭邪之义邈无闻矣谀之甚也然愧心馁气退有后言以从陛下昧没本心以歌颂陛下欺君之罪何如夫天下者陛下之家也人未有不顾其家者内外臣工其官守其言责皆所以奠陛下之家而盘石之也一意玄修是陛下心之惑也过于苛断是陛下情之偏也而谓陛下不顾其家人情乎诸臣顾身念重得一官多以欺败赃败不事事败有不足以当陛下之心者其不然者君心臣心偶不相值也遂谓陛下为贱薄臣工诸臣正心之学微所言或不免已私或失详审诚如胡寅挠乱政事之说有不足以当陛下之心者其不然者君意臣言偶不相值也遂谓陛下为是已拒谏执陛下一二事不当之形迹亿陛下千百事之尽然陷陛下误终不复诸臣欺君之罪大矣记曰上人疑则百姓惑下难知则君长劳今日之谓也为身家心与惧心合臣职不明臣一二事形迹说既为诸臣解之矣求长生心与惑心合有辞于臣君道不正臣请再为陛下开之陛下之误多矣大端在修醺修醺所以求长生也自古圣贤止说修身立命止说顺受其正盖天地赋予于人而为性命者此尽之矣尧舜禹汤文武之君圣之盛也未能久世不终下之亦未见方外士汉唐宋存至今日使陛下得以访其术者陶仲文陛下以师呼之仲文则既死矣仲文不能长生而陛下独何求之至谓天赐仙桃药丸恠妄尤甚昔伏羲氏王天下龙马出河因则其文以画八卦禹治水时伸龟负文而列于背因而第之以成九畴河图洛书实有此瑞物泄此万古不传之秘天不爱道而显之圣人藉圣人以开示天下犹之日月星辰之布列而历数成焉非虚妄事也宋真宗获天书于干佑山孙奭进曰天何言哉岂有书也桃言采而得药人工捣合以成者也无因而至桃药有足行

耶天赐之者有手执而付之耶陛下玄修多年矣一无所得至今日左右奸人逆陛下悬思念区区桃药中之长生理之所无而玄修之无益可知矣陛下又将谓悬刑赏以督率臣下分理有人天下无不可治而玄修无害矣乎夫人幼而学无致君泽民异事之学壮而行亦无致君泽民殊用之心太甲曰有言逆于汝心必求诸道有言逊于汝志必求诸非道言顺者之未必为道也即近事观严嵩有一不顺陛下者乎昔为贪窃今为逆本梁材守官守道陛下以为逆者也历任有声官户部者至今首称之虽近日严嵩抄没百官有惕心焉无用于积贿求迁稍自洗涤然严嵩罢相之后犹严嵩未相之先而已诸臣为严嵩之顺不为梁材之执今甚者贪求未甚者挨日见称于人者亦廊庙山林交战热中鶻突依违苟举故事洁已格物任天下重使社稷灵长终必赖之者未见其人焉得非有所牵掣其心未能纯然精白使然乎陛下欲诸臣惟予行而莫逆也而责之效忠付之以翼为明听也又欲其顺吾玄修土木之误是股肱耳目不为腹心卫也而自为视听持行之用有臣如仪衍焉可以成得志与民由之之业矣无是理也陛下诚知玄修无益臣之改行民之效尤天下之不安不治由之翻然悔悟日视正朝与宰辅九卿侍从言官讲求天下利害洗数十年道君之误置其身于尧舜禹汤文武之上使其臣亦得洗数十年阿君之耻置身与皋夔伊傅相后先明良喜起都俞吁咈内之宦官宫妾外之光禄寺厨役锦衣卫恩荫诸衙门带俸举凡无事而官亦多矣上之内仓内库下之户工部光禄寺诸厂藏段绢粮料珠宝器用木材诸物多而积于无用用之非所宜用亦多矣诸臣必有为陛下言者诸臣言之陛下行之此则在陛下一节省间而已京师之一金田野之百金也一节省而国有余用民有盖藏不知其几也而陛下何不为之官有臧掌先年臧守之正臧守之全而未之行今日臧守之废臧守之苟且因循不认真不尽法而自以为是敦本行以端士习止上纳以清仕途久任吏将以责成功练选军士以免召募驱縑黄游食使归四民责府州县兼举富教使成礼俗复屯塩本色以裕边储均田赋丁差以苏困敝举天下官之侵渔将之怯懦吏之为奸刑之无少姑息焉必世之仁溥厚高明悠远之业诸臣必有为陛下言者诸臣言之陛下行之此则在陛下一振作间而已一振作而百废具举百弊划绝唐虞三代之治粲然复兴矣而陛下何不为之节省之振作之又非有所劳于陛下也九卿总其纲百臧分其绪抚按科道糾率肃清于其间陛下持大纲稽治要而责成焉劳于求贤逸于任用如天运于上而四时六气各得其序恭已无为之道也天地万物为一体固有之性也民物熙浹熏为太和而陛下性分中有真乐矣可以赞天地之化育则可以与天地参道与天通命由我立而陛下性分中有真寿矣此理之所有可旋至而立有效者也若夫服食不终之药遥兴轻举理之所无者也理所无而切切然散爵禄竦精神玄修求之悬思凿想系风捕影终其身如斯而已矣求之其可得乎君道不正臣臧不明此天下第一事也于此不言更复何言大臣持禄而外为谀小臣畏罪而面为顺陛下诚有不得知而改之行之者臣每恨焉是以昧死竭卷卷为陛下一言之一反情易向之间而天下之治与不治民物之安与不安系焉决焉伏惟陛下留神宗社幸甚天下幸甚臣不胜战慄恐惧之至为此具本亲赍谨具奏闻

○乞终养疏

尚宝司司丞臣海瑞谨奏为恳乞天恩容令终养事臣原广东海南卫籍番禺县人臣甫四岁父瀚不幸蚤世时母谢氏年二十八誓自砺守勉针指纺绩资之育臣教臣至有今日原父止生臣一人别无以次兄弟母念父嗣如线爱臣尤笃臣由嘉靖二十八年举人三十二年闰三

月内授南平县儒学教谕三十七年五月内升淳安县知县四十一年十二月内调兴国县知县三任十一年母皆随禄就养母之待臣虽年当强仕日夕相依不殊襁褓后因寒嗽成衰自忧不堪北地寒苦是以四十三年十月内臣当朝觐升户部主事臣母涕泣别臣回乡调疾四十四年十月内臣以建言值先帝震怒臣母风闻臣罪必诛痛臣念臣前病转剧后法司拟臣罪取决招请先帝留中不下旋于四十五年十二月十五日遗诏复职此出臣望外诸臣前无所得而得之恩出臣母望外以为必死而今日复得生之想也先帝厚恩出臣望外伏读盖愆成美端仗后贤之诏则今日亮采献纳输躯图报于陛下以为先帝报犹恐万分之一未有济也陛下新服厥政之初正励精求助之日遂欲求去可言之乎忍言之乎但臣所值有甚不得已者臣母今年七十八矣臣年五十有四以计之正李密尽臣节之日长报刘之日短之谓长者可以补酬短者不容于多得况臣家琼山县去京师九千四百九十里旁无兄弟以调母疾下无男嗣以纾母怀止是一母一子而母思子悬心天涯之北子思母悬心天涯之南忧思衰病百端攻心老人风前烛也气血几何可堪此苦我祖宗以孝治天下大明令凡官员父母年七十果无以次人丁自愿离职就养者听伏望皇上怜臣母子孤苦之情察臣今日不得不归之故勅下该部照例放臣回籍奉侍老母俟母养获终臣照旧赴部供职则臣母子未死之年皆陛下所赐也臣感恩益深图报益切致身捐命所甘心矣臣心恳切干冒天威无任惶恐战栗之至为此具本亲赍谨具奏闻伏候勅旨

○改折禄米仓粮疏

钦差总理粮储提督军务兼巡抚应天等处地方都察院右佥都御史臣海瑞谨题为恳乞皇恩赐改折以苏节被灾伤地方事臣奉命巡抚江南各州县被灾所在甚多分数应题请者臣照例题请已蒙皇上覃敷洪恩赐之改折赐之蠲免小民欢忻鼓舞感恩无穷极矣臣复何言但今年水灾实是异常往年霪雨为害霜降后水渐消涸今大不然江南地气湿热冬至后不能播麦种播之不生今距冬至九日耳常年播麦之地尚十有五六渰深水中来夏麦秋预绝望于今日矣且灾止一方犹有转输可望今则北之淮杨徐邳南而浙东西西而应天太平广德等府州莫非水灾之地旁郡无可转输本地无可借贷查得嘉靖四十年水灾先皇帝准将五府六部等衙门米悉与改折止论水灾则嘉靖四十年稍甚若论近冬至水不消涸来年二麦缺收则比嘉靖四十年之灾又过之今除内府白熟米系上用所需臣不敢言矣其禄米仓诸臣随朝米并吏役监生乐舞生天文生医生儒士月米伏乞皇上轸念江南今岁之穷比照嘉靖四十年例勅下该部复议尽与改折其折银即部运官同白熟米齐解留米以济江南之饥折银以济诸员役之用况禄米仓每岁约该米五万九千石上下大约每岁支放五万四千余五千嘉靖四十四年总督仓场侍郎张守直题奉钦依照漕粮一尖一平收两平放又加耗米二升为七升除去三升脚米尚有四升禄米随收随放与漕粮久贮有消耗不同以羨余之积合支销之存计今五年矣约可再足一年支放皇上虽与尽折一年旧米将尽新米又登又非缺然无米可兼支也事无窒碍可行民切饥苦当恤绿系恳乞皇恩赐改折以苏节被灾伤地方事理未敢擅便为此具本专差承差赍捧谨题请旨

○自陈不职疏

南京通政使司右通政臣海瑞谨奏为自陈不职乞赐罢斥以严考察事臣年伍拾陆岁广东海南卫籍番禺县人由嘉靖二十八年举人历任福建南平县儒学教谕浙江淳安县知县江西兴国县知县户部主事兵部主事尚宝司司丞大理寺右寺丞左寺丞隆庆元年十一月内复蒙圣恩超任今职近该南京吏部札付准吏部咨该本部题奉钦依考察在京五品以下官员臣忝官四品例当自陈念惟皇上先释臣为再生之恩后用臣又不次之擢是矢心图报群臣中当莫有如臣者矣而臣禀质庸愚才猷浅薄感德之情无穷报德之才不称言思供职有负初心夫我祖宗惟留都以右通政员掌司事辩验公文词状而发送之无出纳惟允重寄也此不称事他复何称是抡幽而黜群臣中亦莫如有臣者矣伏望宸聪俯察将臣罢归海滨别栋英才以充斯任进贤退否大舒干断庶几乎政事无微不举而圣治益隆矣臣无任悚惧待罪之至绿系自陈不职乞赐罢斥以严考察事理为此具本专差辨事官江大斌赍捧谨具奏闻伏惟勅旨

○开吴淞江疏

题为修复水利以济迫切饥民事禹贡称三江既入震泽底定三吴水利当浚之使入于海从古而然也娄江东江系是入海小道惟吴淞江尽泄太湖之水由黄浦入海事起近年以来水利臣旷职不修抚按亦不留心惟此督责日至潮泥日有积累日月继嗣运道填淤虽曰水势就下而无下可为就矣时遭久潦震荡太湖因之奔涌四溢势所必至为害之大滄溟禾亩如嘉靖四十年今隆庆三年是也而小为淹没漂涸之患亦时有之是吴淞江一水国计所需民生攸赖修之举之不可一日缓也臣于旧岁十二月巡历上海县亲行相视旋委上海县知县张寅率领沿江住居父老按行故道量得淤塞当浚地长该一万四千三百三十七丈二尺原江面阔三十丈今议开十五丈计该用工银七万六千一百二两二钱九分今以水荒缺秋收兼之二麦未布时方春正月之初米每石价银已捌钱伍分矣饥民动以千百告求赈济臣已计将节年导河夫银臣本衙门赃罚银两各仓储米谷并漂阳县乡官太仆寺少卿史际义出赈济谷二万石率此告济饥民按工给与银米于今正月初三日按江故道兴工挑浚委松江府同知黄成乐督率上海县知县张寅嘉定县知县邵一本分理兴工之中兼行赈济千万饥民稍安戢矣但工程浩大银两不敷饥谨频仍变故叵测官储民积计至二月间尽矣江南四面皆荒湖广江西有收成府县又执行闭籴无从取米伏望皇上轸念民饥当恤吴淞江水道国计所关勅下该部酌议量留苏松常三府漕粮二十万石准照前旨银数改折凡应天等十一府州县库贮不拘各院道诸臣项下无碍赃罚银两听臣调用浙江杭嘉湖三府与苏松常三府共此太湖之水吴淞江开则六府均蒙其利塞则六府同受其害其库藏银亦如应天等府一例取用彼处饥民亦听上工就食吴淞借饥民之力而故道可通民借银米之需而荒歉有济一举两利地方不胜幸甚

○开白茆河疏

题为再浚常熟县入海河道兼行赈济饥民事臣于正月初三日开挑吴淞江已经题请外臣于二十七日巡历常熟县地方父老乡官举监生员人等纷纷告称本县白茆河道虽经隆庆二年开挑止是一线之路是以隆庆三年水患不能流泄三吴靠北一带县分均受其害常熟

去吴淞江尚有四日之程饥民之能赴工于吴淞者十之一二而已若是兴工之中兼行赈济一举两利当开白茆臣旋于二十八日亲行相视丈验阔者不过四丈水深不过四尺狭者不及二丈深不及三尺果然浅狭考之三吴水利禹贡称三江既入震泽底定今三吴入海之道南止吴淞江北止白茆河刘家河居其中三处而已刘家河原通达无滞若止开吴淞而不开挑白茆诚为缺事难免水患臣又酌计臣先所题请吴淞江工银尚有余剩可充他用吴淞江河因饥民云集计在二月二十日前后告成决矣青黄不接饥民尚苦无处趁食官发银米赈济势之所必然也臣思与其空行济饥而无益于后不若仍照吴淞江事例兴工之中兼行赈济既有利于目前之饥民河道开通且有望今秋之成熟臣已责令署县事常州府通判姜国华丈量约长该五千七丈七尺因旧河道广狭浅深不一通融牵搭计该用人夫一百六十四万九千五百三十六工计该用工银四万一千二百三十八两四钱一照吴淞江例不取之民不损之官止以仓库之积给之尚可成此一河道也饥民告济不散不止臣已行令县丞夏佐典史锺应亨各分工专督通判姜国华总行稽察于二月初九日兴工矣伏望皇上轸念饥民当赈水利当兴勅下该部复议俯赐俞允地方不胜幸甚

○处补练兵银疏

题为河工告成乞赐处补钱粮兼图后效事臣于旧岁十二月巡历上海县勘得吴松江淤为平地约有八十余里三吴水利此为第一各县民告饥甚急臣思昔人兴工救荒旋于今正月初三日破土起工实自初八日以后人工方集二月二十日后渐收工二十九日告成臣亲行相视量得开深该一丈六尺面阔十五丈下阔七丈五尺前估计题请该工食银七万六千一百二两止用过银六万八千三百九十七两东西二堤未开并近堤一里内再议开深三尺以受堤外浑泥并管工犒赏开堤造桥等项共再用一千余金可完事工成之速工费良不尽用其估计之数人夫以饥趋事连月不雨有天幸也又勘得内出之水系清流外入之潮涌带泥土若内水急流则足以冲荡潮泥免于淤塞父老皆称太湖水道节有拦壅计有嘉定县夏家口吴县长桥长洲县宝带桥吴县胥□□处行委同知黄成乐吴宗吉踏勘凡可通流入吴淞江去处逐为疏浚毕后方行开堤又臣于正月二十七日巡历常熟县勘得白茆一河果是浅狭亦于二月初九日兴工估计该工银四万一千二百三十八两该县于三月初报完工六分计至二十以后亦可渐次收工完工不过月尽矣其吴淞江工候旨未下臣权宜借发松江府苏州府练兵银各一万两镇江府银二万两白茆河借发常州府练兵银一万两苏州府银四千两先因各方水灾臣令徧修圩岸塘浦支河堰堤赈济原查导河贙罚银两听各该府县充用是以鲜至吴淞江白茆者其数不多今松江府银一万两补足余四万四千两未补伏望皇上将臣二次题请俯赐俞允借发未补银两容接任抚臣如数调取补足白茆河未完工并夏家口长桥宝带等处及四府圩岸塘浦支河等项巡盐御史吴从宪见在巡率约至三月尽可成功矣夫事贵善始尤当善终若使先年时加修浚吴淞白茆岂至淤塞自臣到任之后查得水利官皆分管别事别差委问之水利茫然无知水利之事与已若不关涉上司不以为旷官本官不以为失职水利不兴其所由来久矣伏望皇上勅下该部凡河道圩岸塘浦等处着令时加修理抚按以此殿最府县部院以此殿最抚按庶乎旱涝有备年谷登民获秋收之利而国计亦有攸赖矣

○革募兵疏

题为复兵制以省冗费安地方事自古圣贤论兵止是言教之坐作进退之方教之亲上死长之义自此之外无他道也以故寓兵于农田猎讲武我祖宗初设旗军继后复设民壮即古遗意为之不知起自何时流弊至今专行招募夫本地兵今人呼为主兵自他招募呼客兵亦既明知其有主客之别矣谓之主人未有不顾其家者宾客忽然来忽然去视今所主之家固传舍也其长其上其将领部率传舍中主人也一朝一夕可以使之亲久于平时可以使之死于有事乎出力以养军出力以养民壮加之饷兵今告病矣赋敛于民日增日重害在百姓之身未足言也二三十年以来闽广浙直之变大抵生自募兵召之则为兵散兵则为贼再有招募又不过即此前日之贼应之往往来来外援内间当事诸臣亦非尽暗其莫可测度之心不之知也为是小民偷逸成习一介为兵载涂怨讟驱之守战事有难为之者转之招募苟应目前不讲之祖宗之初不设为今日之法则诚误矣处中秉钧轴者亦不以其所为之为误此一误也关系地方非小误也臣奉命巡抚江南披阅册籍募兵于千于万不可谓无御侮人矣然不求之本家之主而资之他方之客二心之人入我堂室有兵之忧过于无兵臣已行各行省发厚给路费回籍一应关要原把守地方金军旗民壮顶补家自为守人自为战责之彼地居民保甲保长夫平时无养兵之用则一时所费犒赏行粮无多事也仓谷可给纸赎银可支其先年苏松常镇军饷及应天等府协济银每年计该银一十八万九千四百二十八两四钱四分九厘七毫四丝六微三纤一沙并徽州府协济近给本地方用充兵费计每年一万一千六百一十八两四钱六分八厘民以为厉有损于民而无丝毫补益者合无候命下之日自隆庆三年起一并停免永不征派剪绝祸乱之萌一纾饷兵之困此民之幸一方之利亦国家之利也然臣所言者系是江南事势通之天下事当改行令亦如是臣籍琼山县亲见两广兵事年四十入官历福建浙江江西南直隶等处正当寇乱时节闻之识者听之道路未有不称募兵贻害地方亦未有不称养兵之费有损无益者人心同然祖制当复伏望皇上勅下该部凡臣所言及其它地方事体类臣所言一并复议速与施行若谓俟我兵练成然后渐去招募二十年前曾有此议迄今未见练成一兵未见去一应募一言截断而事定矣事定而祖宗之制千载一日矣支吾之说臣不敢为皇上道亦不愿该部复作此等议论也

○被论自陈不职疏

奏为自陈不职恳乞天恩亟赐罪斥别选贤能以当重任事臣于今三月初二日见邸报该吏科给事中戴凤翔论臣沽名乱政大乖宪体臣即所计闻逐一思省无一字是臣本心无一事是臣所行事迹言官诬妄臣请为皇上陈之苏松常镇四府路当冲要府县官日以迎送过客为事小民冤抑虽有欲为分理之心而日无暇时往往弃置不理事涉乡官举监又惮势豪寝阁不行臣闻之久矣臣到任之后所准状果是比前任抚臣为多通民隐抑强横也江南民风刁伪每放告日状动以三四千计臣所准行二十分中之一而已循旧规月以初二十六二日放告非无日期也惟人命强盗贪官不拘日抱牌诉然三五日约止准一二状尽批府县情重解审非臣自问自十一月以后则告人减前所准极少惟巡历所至县分准多如前谓越诉不答有之诬告未尝不加重刑驳允招卷历可查考种肥田不如告瘦状苏松常镇有此民谣久矣府县官召呈往往两可调停诬告拟罪辄曰姑念贫民愚民改轻拟诘之各官则曰一向如

此江南民刁好胜非此不能解争而息臣披先年招卷果若所言谓非法也曾援肥田瘦状之说刊告示以禁之臣援先日民谣以禁府县凤翔乃涅谓民为臣兴谣臣列为告示乃自彰其过使凤翔今日得为借口耶五年田土祖宗之制谓实有断卖文契也苏松四府乡官贤者固多其人厉民致富者诚不为少为富不仁为仁不富自然之理也果有实卖文契耶臣于他府县告系白夺之状间行一二惟华亭县告乡官状所准颇多盖华亭乡官田宅之多奴仆之众小民詈怨而恨两京十二省无有也臣于十二月内巡历松江告乡官夺产者几万人向府县官问故群举而告曰夫民今而后得反之也向诸生员问故则又群声而曰民今而后得反久也乡官之黷者亦对臣言曰二十年以来府县官偏听乡官举监嘱事民产渐消乡官渐富再后状不准理民亦畏不告诉日积月累致有今日事可恨叹先年士风不如是也为富不仁人心同愤乃凤翔系嘉兴府人嘉湖与苏松接壤婚姻交际如一府一县之人然乡官富横则既知之素矣凤翔果有为民为国之心不私亲故举而闻之皇上无不可也今本内隐下乡官不说止说壮民隐下实卖契书不说止说五年巧为言说为乡官立一赤帜不为小民伸理多年莫诉冤抑可以为言官哉乡官自行清退田宅松江府申报数册到臣见在天理人心不容泯灭凤翔独无是心耶凤翔不考其初据今日论谓民为虎乡官为肉不知乡官二十余年为虎小民二十余年为肉今日乡官之肉乃小民原有之肉先夺之今还之原非乡官之肉况先夺其十百今偿其所偿无几情见乎词臣窃恐凤翔居乡亦是此等乡官也祖宗设有军士民壮今日别行召募成法之坏久矣臣于到任之后与各该管兵官计议计其不可骤散亦计其系是汛毕时分除去土兵福浙兵数不多聚论则多而散守十余处地方分数则少散之不难水行者送至定海关陆行者送至杭州方给路费娶妻置产者原议不散谓其与土著无异也选练军舍以充把守又革去供过客吹手护送并拘解犯人脆弱不堪敌寇民壮以存兵补之原议如此案卷具在赖各官计议停妥是以散兵虽多了无言说闻报之日排入都院赖汤兵备权宜救解不知凤翔何闻何据也原练兵银十一府州岁共二十万两奉旨留五万两每十两内计免其三征其一十一府州俱如此派奉旨如是非各府置不理也十一府州一体而行何谓偏累止照旨共派五万两何谓兵粮仍派仍有加派征之民输之官臣必行文府县必有册卷臣能隐之耶凤翔捏无作有不知何故连结倭寇攻陷城池誓血为盟刳库斩关行旅不通烟火断绝事干地方非小小也臣欲自为遮盖巡按御史张问明巡盐御史吴从宪巡江御史李绍先时常巡历苏松四府与有责焉纵重任在臣其彼不言为罪不小肯为臣遮盖耶凤翔欲陷臣而捏为危言以欺皇上凤翔之罪大矣苏松四府水荒为甚是以臣议开吴淞江白茆杨家浜等河各州县偏修圩岸塘浦支河兴工赈济江北之荒比苏松尤甚刳掠之多其经奏闻屡矣谓亦募兵所致耶建德县原无驿递非正路也二十年来行者惮江西驿传道九江兵备道二衙门挂号裁革其路始通臣闻之久矣臣初到任即行池州府查议并移文江西九江道申复相同彼不爱彼江西之民而反欲臣行之耶诈称勅访民事乳臭童子此可欺之当路之官非妇人童子也府县官稟说今年水灾富家欲照往例取租佃户称无收拖赖臣令之酌量灾数二家均认哥矣富人哀此茆独又当再酌口说如此未有禁示先年粮长往往于收粮时先除还自己平日私债后筭官数富豪亦乘出米之时伺逼偿债公私并举钱粮难完臣因府县官之言有告示禁革谓待完粮后方私下取偿非禁不许还债也臣官南通政日妾死于七月十五夜系自缢妻病死于二十四夜妾死于十一日之先妻死于十一日之后无妻先妾后妾殴妻一日致死之事锦绣参谒臣二为部属见堂官皆然未闻人谓堂官为僭居尊之分也臣未尝差人越境拏人讨船之辱臣所未谕皂隶说事少者五十金多者百金出金何人

祸且立至何人被害狎慢士夫何官爵何名姓其它事端臣不敢一一烦琐以渎天听凤翔论臣捏有指实谓臣自德州而下用夫一百名则驿递有循环簿谓臣柴烛取足本乡有司则番禺二县有用度数欺天玩圣臣查所准状并问之府县绝无此语招案皆在升任同知李世藩被皂隶索二十金李世藩见任南户部员外王司业被皂隶索三十金放免王锡爵见转北司业抬轿直入二司中道致害夫皂拏责三十臣当时所遇二司今熊汝达张尚大周舜岳罗元祯见官广西云南广田人口可问者臣不能籍其口使不言文卷在官者臣不能灭其迹使无征验臣所以谓无一字是臣本心无一事是臣所行事迹臣诚查省之久非敢上欺圣明强为辩说也皇上勅下该部逐一查勘可以知凤翔之妄矣然凤翔论臣每言其小愚臣负国其罪实大夫总理提督皇上畀臣重权行无不可而足以有为矣贤能当之二三月而治化改观无难事也苏松常镇赋役不均是第一事臣任九个月矣而赋役未见均平次是军务而军兵未闻强壮禁诬告而刁讼未息禁浮靡而侈僭如初谓扶弱被侵夺而贫者自贫谓抑强肆侵夺而富者自富有臣如此负国之罪可胜言哉可胜言哉凤翔论臣诬捏其小遗忘其大是非不明则政事惑乱近日科道诸臣奉公建言者固有其人其不公者往往逞已邪思点污善类不为鹰鹯以报国过为蝇口以行私营营止樊人增惧惮阁部臣明知其非亦两可议覆而曰畏其口之继也窝蜂难犯不得不然臣窃谓畏其口之公则可畏其口之不公则不可是非淆乱则国家之理乱由之三四年来公私并行议论腾沸贤否莫辩人无定趋有识者曰诗人之訛訛滂滂也臣愿质虚实以明国是两可败正死不愿闻伏望皇上亟夺臣官别选英贤以代其任而又大舒干断别白是非微臣负国凤翔欺君两不宽贷诗云君子如怒乱庶遄沮宗社幸甚臣不胜幸甚

○告养病疏

奏为衰病不能供职恳恩曲赐归田以延残喘事科臣戴凤翔论臣沾名乱政大乖宪体臣近见邸报皇上不加罪责着臣以原官总督粮储圣恩广大无可报矣臣复何言臣尝谓今诸臣全犯一因循苟且之病皇上虽有锐然望治之心群臣绝无毅然当事之念互为掣肘互为排奖而又动自诿曰时势则然哲人通变人无奋志治功不兴国俗民风日就颓敝臣二经论劾众口呶呶臣尚执已为是臣实见得是也孔子谓施于有政是亦为政总督巡抚推行之大小不同而施于有政事功则一臣尚欲以身为障回既倒之狂澜以身为标开复古之门路苏轼有言曰破庸人之论开功名之门而后天下可为臣曰夕念之职任所到执臣而行补报吾皇或可万分一二也但任事在君臣孚契犹在年力精强臣气体原弱从来疾病相仍古人称五十始衰臣今年五十七去六十仅三年耳天道一周人身亦一变新春增年又觉衰惫目今痰气交作血气益虚每一动发昏迷半日勉强视事不知臣者谓臣未衰臣之自视外强中愈衰弱为甚况臣母今年八十一一向随任视事之余得以左右侍养而老人乐所自生日念乡井臣报君事母交战胷中论臣衰年义当奉母伏望皇上察臣苦情臣前自陈俯伏俟罪万一皇上宽恩不加罪谴赐臣回籍永终田里臣广东琼山县人琼山万里京师微臣忠悃无日可达臣再有一言焉臣叨任巡抚凡所施为竭尽心力一皆采访民言考求成法民利与兴民害与除不可易也伏愿皇上仍勅新任抚臣勿以臣受谤而轻改臣事忠信之事蛮貊可行勿谓乡官过客口大难犯不可不厚小民口小口碑不得上闻而不恤小民仍勅阁部大小臣工不得如前虚应故事不得如前挨日待迁必求仰副皇上求治之心毋负平生学古之志不求合俗

事必认真九分之真一分放过不谓之真况半真半假者乎阁部臣之志定而言官之是非公矣阁部臣如不以臣言为然自以徇人为是是庸臣也是不以尧舜之道事皇上者也宰相奉行台谏风旨多议论少成功遂阶宋室不竞之祸我皇上何赖焉胡铨之告孝宗曰诗云勿听妇人之言今举朝之士皆妇人也皇上勿听之可也宗社幸甚愚臣幸甚

○乞治党邪言官疏

大理寺右寺丞臣海瑞谨奏为恳乞圣明赐干断重治党邪言官以定国是以正人心以扶宗社事古昔圣王谓天子君临天下一已闻见不能及远以其责寄之台谏之臣故台谏之臣为天子耳目夫人一身必目而后能视必耳而后能听官名耳目重任也切任也台谏膺此重任切任是以苟有论列必随天下公议公议所是台谏亦是之非天下之公是不敢是也公议所非台谏亦非之非天下之公非不敢非也广东道试监察御史斋康正皇上耳目所寄也其论辅臣徐阶备载贪秽实迹中外传闻人人骇异夫徐阶辅弼先帝十五年无能改于先帝神仙土木之误律之大臣以道事君之义阶诚歉然矣然阶与恶嵩同相十一年嵩以其贪阶以其廉嵩以其邪阶以其正恶嵩父子迄不加害罢黜恶嵩以来阶为首相天下兢兢然有向治之渐谓非徐阶翼赞之力不可也今以老臣复相陛下陛下信而任之其才与德谅亦昭然莫逃于圣鉴下矣孟子第人臣品类谓有事是君则为容悦者有安社稷臣者以安社稷为悦者也徐阶心在社稷是虽畏威保位间不免于容悦顺从而随事调和足小补于天下且其不招权不纳贿素所亲厚事在当斥而不为之容素所怨恶事在可取而不为斥逐古之所谓休休有容克伐怨欲不行焉阶亦有之有臣如阶者天民大人品题不及谓非一时之选社稷之卫也哉臣之所言中外公议徐阶一太公断案也齐康身为御史任陛下耳目之寄乃敢不顾公是公非捏架无影虚词污辱宰辅次相李春芳清勤慎守保惜名节均之可必其为善不为恶人也康奏连及焉善人君子齐康一网打之矣康将以其狡且凶如高拱者谓有才力而遗之以辅陛下祸天下乎盗贼资性凶强刀矢惯熟故杀人劫财无所不至小人非才不能动人小人非才不能乱国今天下动极而疲正宜崇惇大养和平续一线之脉以跻之生全之区其汲汲也复付凶医再施毒剂识者知其不可康乃以是为非以非为是欲陛下斥阶而用拱焉臣不知康之心何心也恶如高拱诚不可一日使居辅弼以当钧轴备在南北科道十三疏中中外共知臣不必赘论所可恨者齐康甘为鹰犬受高拱指使搏噬善类顾一己爵禄不顾天下安危罪浮于拱矣宋杨甲试邑有声部使者以不降意诬劾之时有猫噬鹦鹉罪无可恕之说康职为御史不咋如鼠高拱反噬鹦鹉徐阶情可恕乎伏望皇上细加体察如果臣言不谬速赐干断罢斥高拱将齐康重加刑治以为人臣党邪不忠之戒庶阶春芳得以安位行志朝无小人君子道长天下幸甚宗社幸甚臣不胜战栗恐惧之至为此具本亲赍附记一时误听人言说二公心事俱未的确中玄是个安贫守清介宰相是个用血气不能为委曲循人之人一时保留存翁攻中玄者颇多中玄叹曰非乡愿不可以得人圣人中和气象行无过差有不得人者乎中玄说于责已不是世俗习为和同论世俗则是耿楚侗以贪戾二字论说戾之害大以戾病中玄最当其它大抵出私见党同不然也然中玄后出首相吏部可为之权一旦在已何如哉何如哉人言啧啧纵中玄果无入已之赃不能防闲觉察以致有是入已入人其罪不大相远纵舍此一节不论首相设施吏部黜陟犹夫人而已兴利除弊亦未见其有以当人心合天道比隆虞夏反我国初良法守而行之中玄其得为贤哉瑞尝先谓存翁不如中玄之高

玄不如存翁之稳悔已一言之误于中玄有深望焉非以伊傅周召望之也我朝诸公稍陟高位便是全然模棱养望因循循循度日保官孟子谓自以为是而不可以入尧舜之道今之谓也国无幸矣民无望矣中玄鬱火强阳犹可藉之进饮食嗜味调摄真阳反手而之太和元气或可完复比之存翁一味甘草不为乌头附子亦不为参苓耆术无大利益相远也今则又如此矣岂高者虚曠无用稳者犹绩蜜顾前顾后无大失少有济耶存公为富中玄守贫此未论及人之难得人之难知如此哉天下有非礼非义人情世态牢不可破未易挽而回之者居今之世欲成天下之事不得已似亦不可不为调和之剂然甘草国老为佐为使则可存翁以之为君和柔之义胜直方之德微此其所以误也产业之厚亦坐此病彼非不为富贵人也然天资近善害人为富彼必不为优柔不断人为之彼亦听之亦不免掩耳盗钟之心迩近日赞成遗诏谓之伊傅周召可也而前后不称居家致富尤大为累可惜可惜存翁之论定于是矣中玄再相远未详知大槩血气用事较之存翁得失无大相远均之无足取也

○平黎疏

广东举人臣海瑞谨奏为区处兵后地方以绝后患图久安事臣窃见琼州一府颛颛独居海中其地绵亘二千余里黎岐中盘州县滨海旋于外譬之人黎岐心腹州县四肢黎岐为寇是心腹之疾也心腹之疾不除将必浸淫四溃而为四肢之患州县无久安之理古先圣王之治夷狄寇乱征讨去不穷追盖施之要荒之外与吾中国有所限隔之地若琼则内之黎岐与外州县百姓鸡犬相闻鱼盐米货相通其间虽多峻岭丛林彼之出入往来自有坦夷道路自国初以至今日除戍守军民兵截杀并整飭兵备道督兵剿剿不计外两广巡抚都御史上请弘治十四年征儋州昌化县黎嘉靖二十年征陵水县崖州黎嘉靖二十九年征感恩县崖州黎凡三大举矣每举调两广官兵十余万费银数十万两前后屯兵防守骚扰居民或三年或四年后止然竟不能使黎寇誓服迄今劫村杀人无岁月无有臣生长于琼饫闻黎患痛琼民岁月罹害虐费陛下兵粮迄无一臣为地方长久计以纾陛下南顾之忧者请为陛下言之夫琼地琼山县处其北崖州处其南万州处其东昌化县处其西自琼山县转西历澄迈县临高县儋州昌化县感恩县至崖州计程一千一百里自崖州转东历陵水县万州乐会县会同县文昌县复之琼山县计程九百四十里是琼州府自南徂北向东徂西以围三径一计之大约七百里程也臣尝博访附黎居惯行黎村人氏近日大征踏路官兵皆称自崖州罗活岗抵琼山县大坡头营三日可至是黎岐盘踞地不过方四百里而已区区方四百里地自国初以至今日残害国家赤子若此之毒而无已调用国家官兵若此之众费用国家银粮若此之多两广有巡抚都御史总其权琼州有兵备副使专其事嘉靖十九年以来又有守备参将之设迄不能一施剿抚安辑吾民何故武臣惮难畏寇文臣養望待迁图目前苟安不为地方永久谋虑黎小寇害则隐匿不申请大寇害调兵又苟且奏功姑以应事塞责琼郡志书历载识者开道立邑之议又载弘治十四年大征议及此而未行为深憾彼非不明知之也而莫或行焉间有志立功业者亦虑事掣肘难行邀功起衅之讒我随可惧欲举而止无一人竭材力尽忠实心为琼远计为陛下担当事者黎寇稔知之习窃卑笑之是以大兵一退即旋转耕其田处其地数年生长积聚仍前为州县寇害不少衰止若使兵威震迭不曰此亦可以奏功蒙显赏擢从而计久长开通十字道路设县所城池中峙参将府兵备道则立犄角之形成蚕食之势矣日磨月化今日宁复有黎乎夫得黎无益于地方处黎或剧于计划谓不足州县置之可也黎人

居处皆宽广岗场耕作皆膏腴田地非得地不可耕而食文昌县斩脚岗等黎琼山县南岐岗等黎今悉输赋听役与吾治地百姓无异儋州七方岗今亦习书句能正语以此例之非得人不可畜而使黎固方四百里地也凡我兵征讨无一次不捣巢穴无一次不收成功时异事殊则又不可以危丛险阻如贾捐之雾露气湿多毒草虫蛇水土之害人未见虏战士自死请罢疏所称视之故臣尝以为弘治十四年开道立县可无嘉靖二十年大征嘉靖二十年开道立县可无二十九年大征大征后开道立县可无岁岁鵬剿年年守戍倭之曰地土险恶劳师无功借口圣王不治夷狄之说者皆庸人苟禄偷安不肯身为地方当事托词也往不可谏矣今距大征仅三岁兵威之震慑于黎人尚存遗黎之生聚犹寡开道立县今日可及为也不然数年后必一大变一大变必用兵十余万必费银数十万两必残破地方必毒痛赤子功亏一篑坐失事机陛下将奚取哉臣虽未尝手操矢刃地方变故区处事宜则习闻知矣倘得专任其事驰驱兵革之间俾黎土尽为治地黎岐动变尽为良民臣亦能之事如不効请甘服上刑以谢欺罔虚费兵粮之罪第臣平昔濡染翰墨之人一旦言及军旅似可骇听夫琼固有兵备副使之设矣于此不为是谓虚位伏乞陛下明勅群臣中知识事机力可大任不贪富贵志在立功者以之充兵备副使以专治黎之任琼去京师万里当事请裁或致迟误设县立所限其大槩乘机审势听其便宜凡一切招民置军设里建学迁创县所屯田巡司驿递诸事皆许抚按臣等从中节制年年借用许其调用西土兵广东汉达官军打手约四千人值变故许其调用约万人量拨一次大征银粮之半以克其费陛下三年考其成立之功七年稽其变化之効彼得专任之柄宽其行事而又功少不完不迁其官事少不効必重其罪欲不尽心力而为之不可得也永绝祸根遗安万代省国家无已之费纾陛下拊髀之忧可计日见矣经略琼州计无有过于此者诸臣无有一为陛下言之一为陛下任之臣每痛焉伏望皇上采纳臣言勅兵部咨行两广抚镇衙门会同巡按守巡等官从长计处如果臣言不谬速赐举行则地方幸甚生灵幸甚臣不胜战栗恐惧之至不避斧钺具本亲赍谨具奏闻

○上兵部图说

上兵部图说中十字画乃开十字路处开十字路自琼州至崖州道里长自万州至昌化县道里短图形不如此者限于纸也

一琼州府历海旁州县周围行其程计二千四十里各州县治除定安会同二县外去海远者约十四五里近者六七里

一各州县去黎岗远者二百余里近者一百里亦有二三十里者黎岐盘踞之地绝长补短大约方四百里周围一千二百里

一岗乃黎村总名每岗皆有数十村图所载村乃村之大者其中村分属土舍管者为熟黎不属土舍管者为生黎其生熟亦不定有旧熟而今反生者有旧生而今反向化为熟者有居傍内层山而熟者有居傍外层山而生者

一琼州府地其山势环生似有此二层其实由各州县进各黎岗不必皆越山巅经过其各山

边有大路可行其内层山所包为岐黎其各山边亦有大路可行此岐黎与外之生熟黎皆结婚通有无但与州县隔远故足迹少到民间其凡阳岗近被罗活人诱出行劫故大兵征剿其岗

一黎岐所居之地虽有高山峻岭而亦多平衍岗场膏腴田地其村岗可立县所者甚多今据大征剿平及人所常行共见者则崖州罗活岗抱显村感恩县古镇州陵水县郎温岗琼山县大坡头营儋州七坊岗凡立县迁县必先置所移屯其不必立所者亦宜拨军兵数百名防守俟黎平后议撤其凡阳磨赞二村之间乃东西南北之中可立一大县迁海南卫并兵备道参将府于中使东西南北皆可以控制黎岐且与新立县所为虎豹在山之势

一感恩县土瘠民苦耕作亦非要害可迁于古镇州会同澄迈二县亦非要害似可迁于附近黎岗一各州县巡检司凡非要害者皆可迁于新立县所近地或冲要里社以为防卫

一海南卫十一所屯田正以防黎寇也今其地附近黎登版籍为良民久矣屯军一无所为可拨其田为民田迁军余别营屯田于黎岗中

一崖州昌化二所在州县中其傍州县居民熟弓矢常时皆能自御海寇无俟于本所官军今若迁崖州所于罗活岗则去崖州只一百里迁昌化所于古镇州则去昌化县只七十里内可以威制黎岐外亦可以防御海寇

一黎人虽有犷悍不肯归化者然去州县远欲向化而无由并为奸人所阻隔者亦多今若区处群黎当先其易而后其难既得其易辄立县所则难者欲为乱而无羽翼我势既壮彼当向化矣

一黎岐归化当编其岗首村首为里长所属之黎为甲首出入不许仍持弓矢原耕居田地听从其便其山林可开垦并绝黎田地招外方无业民耕作结为里社与黎岐错居以上七条此区处黎岐大略也若审势相地润泽在人则又有不能尽一一如图说者奏疏图说中间用参将俞虚江处黎图说语盖虚江守备琼崖日久熟于黎事其语不可易也虚江谓志书元人平黎之后割琼山之南乐会之北添绝黎田土增立会同定安二县今之抱显独不可以立县乎此犹足以破庸人谓不可惹祸之谬奏疏图说中里数此就广东铺通言之也近行北方多次屡问北人大约北方每三十里止可有广东二十里地若如北方则琼州府周围行又不止三千里矣

○治黎策【此愚己酉科中式策也于奏疏图说有相发明者附记于此】

天下之事图之固贵于有其法而尤在于得其人何谓法经画而条理之卓有成绪可考者法之谓也何谓人所以经画而条理之卓以成绩自许者人之谓也得其人而不得其法则事必不能行得其法而不得其人则法必不能济人法兼资而天下之治成则夫今之琼黎其处置之法固所当讲而以身任事之人又非琼人之所深望者乎夫执事之间革心宣化之图山川

夷險之勢叛服失得之由愚生固曰得其人之為貴何也誠見夫蠡茲有眾可以一鼓而擒而直為是廩廩者亦曰地險不可以馳驅兵強不可以御敵不知自古及今之寇未嘗不據險以為強自古及今之師亦未嘗畏險而長寇苟我不弱天下無強兵苟我術周天下無險地瑯崖衛所之兵自丘文莊奏不許征調以來今日已如驕子其不足以應敵也明矣故前郎溫之敗皆未戰怯聞千里臨敵先期于敗為之也先哨去而后哨改彼欲進而此欲退為之也今日之禍虽有以激之使然然猖獗二年崖民死徙將盡未有能剿絕而安輯之者尚得謂之有人乎今上命赫然舉兵誅之夫以萬全之力視此直狐兔耳其束身系頸計日可待也然愚生之所忧者元至元屯田立學復起文河之忧毛伏羗提師壓境不開十字之道欲為目前苟安之圖不思萬世無窮之利根株之不拔則未必後日之不如今也夫瑯黎中處環海州縣譬之人則心腹之疾也失今不治恐將浸淫四潰而為四肢之患皇甫規所謂虺蛇入室不可一日安焉者也故愚生以為今日之計不過堅持開十字道之心固執立州縣之計而已自此之外雖議之之盡其方處之之盡其術皆下策也何者昔之議者謂盡殲其類為忍而究其所以為說不過曰禁商人之貿易則黎無以為矢刃之資夫利之所在人共趨之雖死有所不顧而況于鐵首其戎者乎是奸商雖不可不禁而有不容于盡禁者矣不過曰禁軍民之逃亡則黎無以深劫奪之毒夫徭役不扰俯仰足資固有樂之者況于州縣復為之毆乎是逃亡雖不可不禁而有不容于終禁者矣不過曰治土酋之刻削則黎無以為變亂之激夫讀書知禮義者浚剥良民雖廉耻有所不顧而況于土酋之无知者乎是貪酋雖不可不懲而有不容盡懲者矣始終悞宋者在一和字姑為一時撫綏之計不可以策黎也革心宣化效且迟于百年官吏之迂陟不常人性之貪暴不一以一人之身而思一以德化之不可以策黎也所宜乘今日大軍之勢首惡既平之後開通十字大路州縣所之可移者移之屯田之可徙者徙之遷良民之無田者佃其中其不宜剿滅者徙之于外夫然後為百年之計而瑯民享無窮之福矣不然今日赫然之舉復如前日收兵之速剿除雖盡于小民無所益也又安知後日之不如今而復為民害乎又不然而徒曰革心宣化云者吾未見州縣之不立十道之未通而可以革心宣化也嗚呼此所以得其人之為難而非得其法之為難也愚生之所忧者如此而已矣而其所以策于執事者亦不過如此而已若夫山川夷險之勢叛服得失之由瑯志历历如照愚生欲語而未暇焉狂瞽之見惟執事進而教之

卷之三

序一

贺贰守陈后溪荣奖序

贺大尹赵三山荣奖序

贺李东城荣奖序

赠东梧马侯荣奖序

寿顾母何氏八十三序

赠顾肖坡荣奖序

赠顾弘宇荣奖序

贺兵宪见庵陈公荣膺三朝锡命序

赠养斋蔡太守抚黎序

赠参戎以吾晏公改西海序

赠恒所刘侯膺荣奖序

汴水寻源卷序

贺卫赵侯军政视篆兼督屯序

赠郡侯肖野郭公膺保荐序

赠郡节推大东刘侯膺荣奖序

赠定安博莫君署澄邑事膺保荐序

赠总督府洋山凌公平罗旁序

淳安县政事序

赠陈侯署遂邑事得代回府序

寿王尧山六十一序

赠赖节推署贵县

赠鍾从吾晋灌阳掌教序

郭封君寿卷序

赠昌化唐鲁斋得奖劝序

赠陈侯丈亩成功序

注唐诗鼓吹序

赠文昌大尹罗近云入覲序

赠李太守母七十寿诞序

○贺贰守陈后溪荣奖序

国家建官正佐僚属一取虞廷寅协和衷之义惟其人亦惟其备流弊至今下諂上抗长官稍得专行其志贰佐僚属则唐人所云漫不可否事余不负丞而丞负余府之贰县之丞无以异也抚按藩臬颛制于上贰佐既与府正员惟命是听同之而贰佐又复制于其守土生斯世不幸而不得为长欲行其志难矣神而通之存乎其人其为功其取效又反有出于正员之上者后溪陈侯贰琼郡计今七载虽未尝以同寅協恭之道过望于人亦未尝以靖共尔位之义自废于已握篆视事七载中数居其半侯亦惟尽其在我而已矣民情多争喜讼府县事大槩五听功居他事十之九侯非乞于威惟乞于货惟明惟断民好民恶曲中其情争于野者望讼于侯丁口猺赋诸出纳令出而施事至而酌惟侯所定民则安之其它不然侯何以得此于民哉侯有淡泊养心之功是以得之为明通公溥之用侯昔与予官浙同为令继晋建水州太守侍御刘紫山至今以年例不及章荐为恨建水廉平之声视永康无异侯既明且平侯之介实为之且侯之节又非可以易时易事鲜克有终侯之者琼去京师万里而遥珠厓虚名至今为梗即侯所代亦既以得利置富雄閭里矣有风声气习而侯不染民之来者不能拒侯听讼多于他人百醵之入若可利矣大者月报上闻事情可恕其小者与民有之不为公敛怨不于已充囊七载一日惟介惟明惟公惟德于民之中侯之政则然也狱讼者不之他而之侯讴歌者不讴歌他而讴歌侯夫岂一时一事违道干誉偶然之故哉侯兼理海防事有主之至今迄无成绩然即其不已于行之心小有警闻兴言出宿而民已信其为御灾捍患之大矣何也民之信于侯者深也诗云肆不殄厥愠亦不隕厥问我侯以之其事功其取效先后正员有过于侯哉

化巡燕山杨公复命有日大计粤东群吏之治驰檄奖侯其语曰器宇冲和才猷练达海上堤防惟谨郡中惠爱尤多历仕已经六年操持有如一日视士民輿议予所闻知无异一时州县属教范于侯循例乞言以张其美予悬辞不得次第言之诸君曰惟廉惟明惟公惟断勤慎兼之居官之道无越于此矣侯谏应得章荐不然而人无憾焉公道尚有明也诸君信予不为佞予亦信诸君不我欺遂书以贺

○贺大尹赵三山荣奖序

有仕于此承上交下动见尤怨诿之曰时势之不可宜者非也夫士患无万物一体之心尔万物一体之心人皆有之以我之心将无不协之心众人之母解衣推食无逆于人不必要言矣大而刑罪之加小而呵谴之及风雨霜露莫非同人于道意也同人于道有不得于人者乎孟子曰以善服人未有能服人者也以善养人然后能服天下三山赵君令琮今日月计三季代巡杨燕山公不及章荐驰檄奖之三尹张子奉文行事揖予乞一言以张其美先无是例而张子心欲之二百年来无今尹言之不可以已也夫三尹与丞同称佐贰韩退之所云漫不可否事为长官之惟听今日体貌大都然也三山县百务一以家有长兄无二上自与宜乎同寅协恭之意微嚙沓背憎之风炽也乃三尹惓惓然道三山美不啻口出盖三山誓不贪泉改心帝命三十六字养之既有素矣志在厚民生民服化从义日辞讼中哀哀赤子呼冤案前不忍舍之而曰别为一教道也因彼竞争谕之礼义由慰日勤罔不勤或戒且农桑风化日淳淳焉实心实政细大兼举俗吏视迂阔事三山直前为之此何心哉万物一体之仁不得已也百蠹攸除百利与兴见之日行莫非万物一体之仁盖由蓄之中藏莫非万物一体之义不获乎上竟之上之人与其共不获乎下竟之下之人仰其泽僚友同归于道以弟称不俗道厚士隆士于义不于私诸士子喁喁以悃悃颂张尹大道为公渊源有自家声见于是矣而实则三山心感心使之也面谋象恭不如是也然则曰难乎免于今之世矣不已之求而人之责其得为论心之当也哉虽然三山政尚节气言冲和尚减分数天地万物吾一体有得于光明正大之功无得于和融浑纯之用大之似矣而未始融之也入人心则如此矣又此而上其为感将如之何三山勉之哉天地万物为一体仁道也成已治人道无上于是矣书之复张三尹意为三山贺勉

○贺李东城荣奖序

今世官于其地者治下人往往粉饰词说借贵人为文架无为有增细以巨裂彩书其言进之谀风行而天下无公议矣事之可以已其一也然亦有出于人心之公情不容已者出于公则不出于谀或德在人心远迩同及或饥食渴饮临深为高目前之功身后千百禩之泽大小不同德之不忘于一也且颂德之中匪戒存焉益于其人因以益于其民情在是义又有大焉予于东城李君见之言之不可以已东城隆庆六年冬任临高县代巡杨燕山信东城初政循例奖之时未及期月也耆老王廷器吴应第等造予征言为贺其言曰临称富饶邑先后令以富饶利之今日之临又一临而非昔日矣我国家官民财法有界限官自为俸禄柴马民自为民盖藏衣粟柴马俸禄外毫发属民枉法不枉法其为赃一也赃在官者法无赦今也不然我民日就腴削见促生不见苏息尽由于此郡有守邑有令圣天子以牧养寄之如保赤子义也

设官分职不为不多有以其子视其民者乎见尹而戚天下然也而临远方为甚东城李侯百有为为民为之惟猺赋惟出纳听断视若切已事一有不恊恫瘝在身一朝夕不能安也燕山之奖侯曰督撙造册籍为之一清增城垣捍御为之永赖侯心无不尽之心事无不宜于民之事燕山之所未及知者事视城册大率相等埒民颂其才去冬计今期月日矣暮夜入衙未之有闻也审册不言常例听讼不入醵金民予其节居官之道清慎勤三者东城兼而有之邑人有乐利之欢念东城为乐利之德然则是赠也得非情不可已出于公不为谀者乎二老又即先后尹比方今日曰其人往矣政声秽迹播人心口若今日事侯与先贤列难其人而今有之解倒悬就衽席民之不能忘也瘳其恶而章其善二老之言凛凛然监戒存焉常目在之如临师保裨于其人因以裨于其民诚在是矣情在是义又有大焉诗云高朗令终令终有淑用是予其请书之彩以为贺

○赠东梧马侯荣奖序

圣天子日为天下求才官惟其备矣事不立于天下者才之不足于天下哉古人言才于德今人舍去本心别自为才以不才言才应天子还治其人之身不于其入之道天下坐是为害甚矣哉世习之谬道术为裂而中流之砥难乎其入矣隆庆三年秋予自北归海上乡人日有东梧侯之誉谓侯秋毫无染钩巨操切机事可用而侯不为与侯之德又若不满于侯之才予心异之然犹未卜侯中心之愿何如也今既肆载于兹矣所得于侯月旦评侯得闻之者日详日益有验乃知侯独见本心不狃于俗立异于一时求名于一事非所以言侯也明心见性今天下士动辟佛老日流于机械变诈而莫之反纯白不备神生不定又佛老之所羞称陋之而不为者侯先立其大独认本心与俗见迥异人误以无用于世认之侯莅事临民应于其心有规为有挥霍讲信修睦息民争而不示之伪则佛老之心而吾儒家法也内藏其浑纯真一之体而外不失其因应变化之用至诚临下洁已格物古先圣王合内通外纪纲造化经理人物有其心不背于用侯庶几焉居今之世有人如侯者其可以易而得之也哉天地万物性分足焉举此措之天下之事毕矣诗云谁将西归怀之好音予尝欲侯扩充分量以尽其才持侯本真破天下伪应天子求才意归老山林奖侯而进之未能也燕山杨公奉命旌侯知侯之才未尽于侯之德用因学师生请微显阐幽为侯赠且以坚侯复古之念云

○寿顾母何氏八十三序

天地间和气致祥乖气为异此理之必然也然和气孰为大曰孝于亲为大人能孝弟则其心和顺即此和顺之心洞然八荒皆在我闕一和之所感召而天下之能事毕矣尝以弘宇顾君家庭事观之其和之气之大萃于一门者乎弘字母何氏相夫事姑克尽妇道先自益和于身矣天地间和气之祥固有事适其幸心迹并之其不然则惟心之和而迹不与焉何也心可以言和心不必于其迹迹亦可以言和而不能以兼乎其心也韩昌黎谓欧阳詹生舍朝夕之养而来京师其心将以有得于是为父母荣虽其父母之心亦然詹在侧虽无离忧其心不乐也詹在京师虽有离忧其心乐也太孺人始就建安之养母和于上子和于下不必言矣先官浙庠今澄邑令子宦游数千里外母留安成乖违若无甚于此矣然太孺人愿子道济四方不愿子为儿女温清膝下母剥民母利已上无负君下无负学母以老妇为念之训顾君朝朝夕夕周

旋以之视无形听无声恍若母氏日临在上已身日临母氏之旁若是慈训和顺兴焉用为澄民一邑之利有子如此母心诚不能无快于是也古称父母俱存俯仰不愧为君子三乐之要心契心感融融泄泄虽隔千万里外如日见之矣天下之和有大于是者乎澄邑士民僚属谓弘宇君为祥于兹有自来矣万历甲戌春正九日太孺人八十三诞辰也先期乞予言以纪一时之盛予母太恭人今八十四一则以喜一则以惧闻言不觉色动平治天下舍我其谁孟子之志未能或之先矣所养所发不过守先王之道出弟入孝以待后之学者亲亲长长而天下平道无越于是矣予日侍父母与顾君同衰病林泉无复为天下念风自火出容保无疆举于顾君属之用是半轩父严州教授祖后先繼美伍祖姑家有严君奕叶顾氏长发其祥无庸及也正月之吉为此春酒数千里母子意特书其一时之和为眉寿介云

○赠顾肖坡荣奖序

昔李平廖立诸葛武侯论法废之终身垂念武侯没世如在素有恩贷及已者不至是也武侯何以得此于人哉习凿齿谓武侯水鉴无私观武侯者盖不必求之恢复之心开济之业即武侯之不忘于人者而武侯王佐之才尽之矣天下凡章程号令或可以声音笑貌为于一时以心感心不待吾言而自能晓吾意者不可强也肖坡顾君以隆庆六年冬尹文昌阅月即有兴工筑城之役张生世望以别丁粮争不得于尹土筑二月完工一时抚按司道以城工信肖坡初政交奖之人心同然张生一旦将郡邑士夫意乞予言为赠夫三代而下人心私憾攻讦爱憎毁誉有言而不足为言之信久矣张生曰肖坡毫发于民无染百应迎刃而解庖丁新发于硎不是过也惟性气高急兴筑事用法惟峻民不可与虑始如是尔过此则慈祥恺悦沛然如初政矣庭无留事民享深仁貌肖坡心政不一而足大都不出廉明且断三者与予所闻知及诸士夫意无异成阳君穷处于齐秦太后为弟魏冉计收穷翕心王听之卒之五国之成赖以不废七雄时事务成功尚权变不足道也肖坡气刚守定土筑豪弱无异清改南溪买犊飞诡百凡抑强扶弱豪家群然挠之不恤也强项破柱则有素矣宁曰一介儒生能持口舌短长迁擢利不利因之破吏岸捭阖谬恭敬得其心耶肖坡不然也张君读书为儒不然也大抵肖坡之得此于生有本焉武侯有淡泊宁静之学是以有李平廖立之感李平廖立之感于其心不于其事也以心感心是以能终武侯终其身不忘其德生之诵尹必曰秋毫无犯秋毫无犯然则肖坡之心服于生谓不有由哉干阳坎水相背而行遂有天渊之隔肖坡需有孚张生复即命安贞其大则顾君之仁一邑之人有永赖焉言之不可以已用是书其书以为赠

○赠顾弘宇荣奖序

曾子谓君子爱人以德细人之爱人以姑息华晬之策有取于大夫之言无取于旦易之说石犹生我疾之美者其毒滋多君子之爱人君子之自爱道盖如此弘宇顾君以乡荐繼改令澄邑仅期代巡燕山杨公驰檄奖之谓弘宇能于其官也耆民某某等循例乞言以赠仁养义教所以称说弘宇君不一而足澄民有言弘宇君则诚无愧于今日之令矣宋儒谓伊吕之道得一县亦可小试言君相父母天下守令父母一区大小不同其责广也一人有罪我陷之一人饥寒我饥寒之是其可以易称也哉况今天下士舍其行道行志之义幸应举为家图庆得官为已利曰要做官则不得不随此俗夺圣贤入宫之道即一日也做不得每借口事之无害于

义从俗可也吁今之所谓从倍宁古之所谓从倍也哉士而入官举止语默动与民关举止语默动为民累其事其心盖不止于未仕之前失已而已而于人无与焉者也柴马俸禄外以一毫充已用以一毫市已私不免即此一毫为亲民殃门皂胥吏外以一人充已役以一人市已私不免即此一人为部民害仅一人一毫已非居官之正仁民之道矣况日积一毫积一毫成千百积一人成千万人哉文王视民如伤望道而未之见治岐之政天下无有也古今无有也且以如伤为视下视岐政不及一二者视之又当何如圣贤之道因人自考方人有言居吾身自方之半今也是非倒置其间道以为是而不可以入尧舜之道借六艺文奸言乱正失真何可胜纪听之使人眩瞽出入反不若信吾本心之真信我圣贤之道之为得也荆公执拗谓人言不足恤居今之世当有取焉弘宇君志出伊吕之上小试澄邑方以行志为幸予亦幸圣贤之道率是有明于今也文王视民望道公旦逊硕肤而不居弘宇君其法焉东莱谓狼瞫之烈岂仆仆乞怜而求人之誉者哉予于顾君亦云用是澄民之言未据及也君子爱人以德特书其可规者以为赠焉

○贺兵宪见庵陈公荣膺三朝锡命序

先王有至德要道以顺天下所敬者寡所悦者众我祖宗因之万历初天子率祖攸行加惠寓内爰命内外臣工得封父母如已官而及其配先时黜陟幽明大计群吏其无功德忝官常不遂其媾者不与也见庵陈公至是盖荣膺三朝之命矣公世闽长乐人封君太夫人又奉玺书猋豸曳绣族戚称觴以庆国人遥为见庵公荣之卫指挥某某日以其事为予诵祈言以贺予惟士君子立身天地间孰不欲其亲偕老一时金章紫绶荷天宠光也哉顾德不足以使媚于天子因之秩不足以悦于其亲裕后昭先孝子不匮已则然也公由进士服官所至有闻于人尝阅李三州初稿所为赠公之文公平生行业恍如见之公能于其官不待今日之赘矣令终有俶其亮功熙载休扬于世以显父母有可为公言者东坡氏谓才满于天下而事不立天下之所少者非才也气也气之所加无大无小无往不济治公兵备我琼入境之初正寇酋肆行之际特抚而骄祸机叵测人众以此观公然尚以秀才官虚文无胆千人一律疑公也公叱咤间群豪丧胆俯首约束置汹汹水火之人而措之衽席之上公何以得此言异于人哉人徒以其见畏蜀如虎公以其才公以其气已大物小不见其为虎也天下而无大事也天下而有大事非其气之过人者谁则辩之诗方孝德羽翼四方为则然则公之所以荷螭百禄显扬二亲以承王休率此措之内则慊心外无掩袭其所及宁可涯哉国人数其事而称之如革金壮丁官当驿传丁粮民壮反初日之不均者与民均之民之利也予独区区于海酋之一言之其大也率海之滨卫所布列寇无畏焉气不足以守其才坐是为累若公所为鲜不为则矣用是书之以以为贺

○赠养斋蔡太守抚黎序

自国初至今言官琼者必以治黎人为一急事然卒未有以得黎人之治者孟子曰至诚而不动未之有也龚遂得之以安渤海张纲得之以说张婴卒之有以服其心而戢其祸况在黎岐质文机变吾中国不知其几更易也自有天地至今尚存太古风致然诺信义死而不移天性之真独有存焉者乎动以弓刃相向自昔记之盖以弓刃为雪雠之具不能自至守令之庭曲

曲直直势使之然无他意也苟有以开导其心剖其不平彼无不听予尝谓恃有人心小则息争大则开通十地道为郡邑人入版图百千万年无不可者所恨知此道者之难其人也而又赋役繁难官吏刻削彼自为诚我自为诈有以灰其心而格其至至诚之为难乎其为动矣微启其端谓可见之行事者吾于养斋蔡侯见之尝迹蔡侯澄海先声崖州初政大抵事从其真由其质有其内学于诚而欲求其至比之俗吏矫饬外貌学于诈而务为名高者不类也有是涵养有是作用方抱宥四村鹺杀旁村效尤祸变事机浸浸滋蔓正侯莅任未久之日也单车往谕侯信侯之心士民未之有许者乃侯为之近不叵测之为凶远不曰岚瘴之为毒心何心哉曲曲而直直之不过数语卒有以得其心平其夙忿解怨为欢村村如故事与张纲龚遂后先无异然则不曰已之无诚也诚不足为动也而曰犷悍之不可为驯古昔则然可信也哉即小推大则州县中苟有以中彼之愿无碍其生版籍而郡县之无难事也予尝以为黎人之不我向也乃我之无以致其向其为乱则始事于州县之民长养成就于无良之吏黎势固不能以至州县言曲直者无以剖别其不平之端而仅欲使之不为不得其平则鸣之举嘉靖间二勤王师予未敢曰师出之为名也此则太守不能处分之罪非其人之过也尝欲执侯今日之功破先后黎议之谬为开道郡邑之渐一日崖士民以赠言问予曰吾意也虽未为千万世之功而心情启达向化可为兆于是矣中孚豚鱼吉九二之象曰其子和之中心愿也信在言前不言而信变诈之世而得有如侯者黎人得以抒发本真民士宁适其可以易而得之也哉苟朝廷之上薄赋轻徭承宣之吏还淳返朴举蔡侯而为之无不可矣单车之谕侯得为而为之矣权不在侯而侯侯之势也刘安之谏伐闽越曰以十万之师为一使之任蔡侯以一使之任当十万之师回视庚子巳酉大师两及荆棘生焉崖至今生气未完复也何如哉何如哉曲突徙薪之功诚能动物之道侯胥得之用是不辞而为之序其谕抚颠末月日具在周贡生实状中不为赘

○贈參戎以吾晏公改西海序

琼独居一海中外通闽广接诸番诸不逞之徒便风帆一息辄抵州县城下鹵民业加毒之民仓卒不及为计万历改元参戎以吾晏公奉命书督其事专区保护随变便宜琼人幸之无几惠潮寇徙巢而出不安于东图复起事于西洋洋风涛倭艫如旧依倚声势必然也督府石汀殷公计度身堪多故望洋而勇其人上请天子俞之羊海以西付公调度海南卫指挥某某千户某等念惟北驻阳江不免于岁月之间也乞言为赠予惟诸君之意言之曰夫自倭夷之为梗也我中国不逞之徒因之盖自嘉靖中尝试台宁突如其来志满气得三十年矣天子之灵中国之大迄无一人王功为庸扬氛海上其故起于恋官踵俗中外同风内无许国不二之忠临变应兵又不晓于司马孙吴虚实避趋之法死生利钝吾有命焉自倭于武人而莫之讲也瓦合结私冒权借誉外此未之有闻矣三年来予接以吾之貌听以吾之言矣将欲以有为也大方报国每一为兵牵肘热中迄无如愿枕席过师繼嗣斩获计自今亦既功于前人矣然非公称心作用不足为公言之也先者从事浙中督府赵剑门温张侍御惟公属意闻之上曰敬慎谋略沉毅才猷事实心以求济务图全胜之谋敌果敢以争先不为观望之计素谙夷情熟闲水战忠信足以动人恩威而能得士吁参错于数公之言观之而见其嫩于公矣诗云匪直也人秉心渊塞然则殄灭妖祥救宁海岱指今日之危而注意焉匪公属谁属哉人苟不以死生利钝入心矧方纳私冒功罔上昔见其可今视为妄悔无用之心澄气劲义集而天下无不

可为矣人患有其外无其内质有其内事从其欺知之而不与行之乎公必不然告之而不以实嫌讳夸毗薄之也用是书此以为赠极诸卫所官意

○赠恒所刘侯膺荣奖序

天子在上举天下无一物无不欲其入我生全之中按抚藩宪海内外统之既有其人矣郡为守邑为令有其人必有其人之选者以任其生人之责经野设官用为民极日久法纵而入官之人计身家言利矣我琼万里京师天子生生下流之恩壅滞尤甚据刘侯入境之初一百年矣言念刘侯温其如玉识者易心以消厄运无负天子生远氓非先日比属之由一日至期年节用爱人果奴识者之料督府石汀殷公采民风奖之曰安详处事平易近民听断无冤催科亦善品藻如见弟子员幸焉诣予征言以赠夫诸弟子治于侯皆其所以望生全于侯者也望侯以为生者深责侯以为生者必备一有不及而生全之道缺如矣请言之未晦翁谓具此生理自然便有惻怛慈爱之意人于人无不爱矣况又有今日治人之责爱人其职者乎然官于人得丧毁誉机在人动心于人则我之心不我作主固有惟上之听惟人之徇百姓不欲于我之所为而为之矣无问大小显微如一果能如父母之于子以其满腔子尽是惻隐纳交要誉无之也而施之者乎今有暮夜受人之金人指而疵之矣柴马俸钱过此皆法之所不宥也常例里甲上下相安何所据而行之圣贤义利之辩士子一入官而昏心焉俗论也官一郡者以一郡事为任官一县者以一县事为任初无大小难易之别今人曰不明之罪有之而无不公子太叔问政于子产子产曰政如农功日夜以思之思其始而图其终如农之有畔如之何无能明之不公不明其罪不大相远职在是罪亦在是甚矣小之为害也况又有积小成大甚矣一之为害也况又有失于一害不止于一者乎昔人得官而仕于县令独有取焉言亲民也吴临川谓禹稷伊尹之志得县可试公孤守令大小别焉仁道在中事行则一舍伊傅言县官一县之人有一不被尧舜之泽皆苟道也刘侯志安天下发轫琼山内重而见外之为轻舍侯无足与有为学者师弟子爱侯以德诗云庶几夙夜以永终誉今之谓矣用是推言之用为赠

○汴水寻源卷序

汴梁杞邑之屈盖自纘祖让至今凡十有二世矣无虑数百人汴称瓜瓞巨族虽亲尽戚单而崇古修睦伏腊祭祀婚丧酒食以时会焉一本之情未之有改也夫人情聚则乐乐则心系之四海之内一旦而聚于道途之间初非先日之亲岁月论交之故也燕谈笑傲有乐之者况在同宗之系自厥初至今一体骨肉有以联而属之者乎诗云燕笑语兮是以有誉处兮情也而亦势也屈自襄坦公洪武中谪戍于琼杞邑之屈至是分而为二苏老泉自叙其宗之谱曰服尽则亲尽亲尽则情尽途人也吾所以相视如途人者其初兄弟也兄弟其初一人之身也夫夫眉山一地之聚长公有势无如何之叹矣况事殊势别分而为二而又隔之以万里之途难乎其为情者哉虽然天下所得而间之者事也心则旷百世而相通所得而别之者迹也气则跨百里而相合屈勿轩以庠序之英心笃礼义生长于琼妻帑俱焉子姓有人而汴水之北杞夏之墟切切在念其心其气祖先宗戚则既无间然矣一旦作而思曰神交梦与者之为同不若见形听声者之为切吾心所存吾气所发尚恨无以为依据之地也念兹厥初匆匆行色祀先合族今日得以不徒为想象之托有期日矣士友辈相与义之遂歌矢诗海门为别因问弁

首之言于予予之心亦士友辈之心也孔子云君子笃于亲则民兴于仁勿轩昔日之同于宗也以心今日之同于宗也又得以不悖于其迹事有依据其道光矣观斯行也而孝弟之心有不油然而生者乎时例宗人从戎其不从戎者置军庄焉往返行囊须此为赠厚道也而利在焉勿轩孝弟充于中发于外不在是也用是不辞而为之说且以为杞人告焉

○贺卫赵侯军政视篆兼督屯序

军政例五年一推万历三年冬忽报卫赵侯思梅如前军政军余人色喜欣欣举贺侯之文诣予为问夫事无系于君国无系于州若县地方不之言可也祖宗列土而言无能举于其职有甚于今日之武人者乎弧矢之利以威天下无武难乎其国矣请言之黑子孤悬内黎外海窥衅有人四面敌而诸不遑矣文政何施燕雀处堂中无倚赖有甚于此三千里地十一所而卫者乎请言之由琼而北十三布政京师济济布列有难言矣特于思梅一武人言之言之何如时也流弊也文武衣冠诚自别于祖宗之旧矣不有天之与我三代直道求自得师在人者乎今天下事由书生矣书生自党特无有天理人心振古可恃其大者又无有天之与我圣则圣贤则贤在我而已可死可辱彼书生无得而夺之者乎战国争雄孟子有二者天也之说师文王大五小七有斡而旋之矣一王法度卫使司其品三所其品五俯首听命有扁斯石典章律例曾有之乎前无所闻尚当自我知能如百卉结实敷华酬生造化目前人不有清水王我辈武人立之标焉可以望而趋之者乎瑞平生仰止一人而已师王而行惟恐不及名宦乡贤琼人无出清水之右其袭职署印在武宗皇帝初年武人未至今日之衰而衰之始也清水能之于先曾几何时今日乃不可能之于后孟子谓挟太山以超北海是诚不能清水行义峻绝风采无一时俗气矣要之只是一尘不染一私无容闻其攻暇便观书史绝不为今武人酒食嬉群之习诗文无一传示于人善读书者也无搜摘章句之劳坦然自得其性情之正谓之非人能也可乎哉一时屯政军行无一不当人心之举一人倡率十一所肃如也虽以之警百之道也我太祖得天下起自侧微未受天命以儆官邪三十一年之中重典峻法正巧言沮乱之方而君子之怒也人有畏心天下安义狐疑骤急于始姑息优容于后而今坐是为累用小弁之舒行国初之法上握审势之权下有吏习而民安之益远方憔悴圣天子瞻言百里之中润泽而出脱之矣此在廊庙诸君子加之意因蔡太守有深感焉僭及之以俟

○赠郡侯肖野郭公膺保荐序

君子之于天下立已治人而已矣立已治人孰为之心为之心为之心自知之得若失心自致之虽天下之理无微不彰而人之视我终不若我之自视无遁形者之为的不取信于我所自知之真取决于人不尽我知之迹失之矣肖野郭公登壬戌进士十五年扬历中外在以才闻守琼岁余代巡柳坡马公剡荐于上听铨司不次之用光及寮案三府赵侯四府刘侯因希予言以赠将举柳坡之言发明肖野平生之素夫肖野平生之素俟于柳坡始发明之耶肖野终已学业俟于人言之及乃致其力人不我与撤而不复前耶性分无待于外有待于外而为之非性分也肖野公之心五□有以得之郡百凡迎刃而解言一知府无难事矣而日夕皇皇常若不给今人有未能而事与之共同官之义尚当奖而进之况在肖野望治之勤日之升川之至西土怙冒文王视若有伤光武中兴两汉中贤后也以百姓怨气满腹谁欺自责彼予一人

□□如是言今日事三州十邑能处之无不如其则环海而为民能使之无不被圣明之泽矣乎一之为累承流宣化之职缺如矣肖野能安之乎我无安于是人誉我于是誉我于形骸之外孰与我自谤我于肯綮之中君子戒自欺求自慊二侯今日相与聚会精神一堂之上共而为之真机实际犹恐无能自改于其故民已家国犹间然也又况分之以毁誉得丧之私渎于耳因以滑于内内无纯心安得外有纯政夫吾心有定若乃毁誉得丧则亦何常之有御史持宪为天下公柳坡言之矣今日言肖野之心今日成肖野之美姑置之所愿二侯上体肖野寅恭之心同寅協恭为已责自体吕祖谦谓狼暉之烈岂仆仆乞怜而求人之誉者哉予于肖野公亦云区区真有以见公以伤视民之心于青天白日之下而无间知必不以予之言非美盛德之颂也梦中呼其人之名人则应之呼他人之名则不应以其真也二侯曰然书为赠

○贈郡节推大东刘侯膺荣奖序

今之入官而仕者庠序学古之人也然往往不满于识者之意天下之人不见官人之利特见官人之扰者岂其人之初尽不贤则然哉未仕学古既仕则参之今日仕人之论平生之学不尽用之今人之论正今人居官之利是故其说易以溺人始有今古之岐终入从今之谬大抵以正入者以邪出矣万历三年□月大东刘侯自邑博擢推吾郡视事之初抗然有执已守法不混于俗之意是虽未能事事中则由其事逆其心胷中若有特操有俗指为薄侯行之者有俗指为胶固侯行之者道全是也今人误认为胶为薄于此有特见焉我自行之出入于风靡波荡之中欲自比于屹立中流之主侯能久安于是矣乎秀才初官移其心而左移其心而右未可知也诗云谁将西归怀之好音常欲小申已说勉侯未至坚侯已然一旦代巡柳坡马公檄旌所属意有大者侯与焉僚属师弟子因以贈侯之言为问予欲有进于侯未及行而意不为颂诸君子有爱人之德存于中是以今日有贈言之举于外夫感我而厚必有受其薄者矣受其薄者怨之矣有怱慝我之为通莫为胶者矣通大抵在财货礼貌今日出之自己亦先日取之自民变通圆活官有时誉民之不当其害无有也圣天子为民设官今人入官于可以为干名进阶之助则庸心焉为民之心置之计毁誉得丧之外失之矣然则欲侯节推佐郡举于其职宁复有过于簿为厚胶为通勉所未至坚所已然扩充之以尽其大无自画于发见之初者乎失职分则失道矣失道失心矣无一可者用是特书先日之意复诸君请特上为贈侯根本在是扩充终始之而节目无不周矣柳坡旌侯止于节目不详及云

○贈定安博莫君署澄邑事膺保荐序

澄邑去郡城六十里琼万里京师三州十邑同一荒远僻地澄土瘠民贫好争喜讼尤称难治贪泉易心尹难其人而士民亦鲜有以尹之贤而声称之者万历三年缺尹以定安县教谕莫君署其事士民翕然与之代巡柳坡马公兼政教事荐君于上谓君异才当不次用協士民意相卒征予一言以贈予问其所以则又同声而曰自莫君握篆之后词讼清而村落无追拘之扰催科缓而事事存抚恤之恩事无稽留人无缘弊里甲省约一邑晏然究君之心盖仁人长者之心其不为贪暴苛刻之为终身之远亦可以占之一日之近夫澄讼事独多于他方无实之词最小民之情所难平者今首以清讼颂莫君且莫君于澄暂署其事耳今人凡暂署官府之事称权官百凡姑应先日之为随人之后初非创立规则垂久远也乃上得抚按藩臬之称

下不失抚绥之誉数月之间当疲敝难为之时惟士民惟声称如一君何以得此于人哉盖君有立已讲学之功体立用行是以出之自能为宜士宜民之政先自定安学谕督府石汀殷公首荐之矣政与孔门弟子言偃出武城而有弦歌之效子贱不下堂而单父称治道相近似然则今士子一入官遽以簿书礼节苛暴因循各就其资之近而自许已蹶其本矣天下只此人心天理而曰某方之民易治某方之民难治可信也哉旱麓之诗云岂弟君子遐不作人莫君之教定邑以之澗酌之诗云岂弟君子民之父母莫君之署事于澄以之莫君无愧二诗用是赓之复士民请若夫前途事业方兴未艾此特其发轫之初耳大都于此可见未详及云

○贈總督府洋山凌公平羅旁序

国家统一六合虽自外声教者无不欲其入我覆育生全之中粤东西设重臣便宜以控诸寇列圣相仍用此道也即如罗旁一隅之患耳跳梁门庭昔者亦不一创之以致复有今议开府计二百年地方廩廩不殊初日母乃覆育之道讲之有未至重臣奉行故事多阔略欵夫兵武国之大事有七德焉急在戢兵安民保大定功不计区区献捷之事也太仓凌洋山公得命开府代石汀公之后奋然曰罗旁之请今日亦后时矣门庭示弱而我又从而缓之也可乎遂申前议日咨访夕筹划诸凡调集兵饷练选才武相机肃令暨分哨道定所往虽行军故事则然昔之人有行之而公益加详慎矣诗云有严有翼共武之服公其有之曩公兵备密云予于湾辱倾盖一时倚马谈九边事而公亹亹悬河曲折显微罔不条贯天下事北难南易公不难其事于边云朔雪之际矣今日之役十万众若运之掌斧钺所加势如破竹夫岂偶然之故哉吉甫之薄伐方叔之来威人人举此比方为颂而公且認認若思若画有歉然无满于是之意非公无满于是也公之初意别有所为而不在是也藉一时之雷霆收百世之云雨奏捷之令将行而县所之请遽上公之为心为计具于是矣方且自计便宜有命彻土度方阨险隘安置降人历历善后皆有成画非苟言之实允蹈之王阳明既克八寨欲改宾之南丹卫镇其中事竣而请当事者认为缓情因成寝阁今日有此举有此后悔耶阳明平八寨而八寨存公平罗旁而县所设阳明之于公何如哉何如哉夫粤东西事有缺一指画弃前功者上首功则已之谓也有因一指画收千万世绩者得其地疆理其地之谓也故予于是役不以震惊徐方周程伯为公许特以彻我疆土召虎为公德使若当公之任者惟公之为至今日宁复有猺獞之梗宁复有年复年兵行之毒已乎公之功着在一时公之功垂及后日惟公不以久近便不便二其心是以能为国家计长远图其大周书曰乃心罔不在王室用奉恤厥若公之谓矣琼府太守唐可封同知杨继文府判黄与俦节推刘学易荷公威泽鼓舞不能自己愿予一言予亦泽及中人也念惟得有大焉大有自来因綴之以为贺且用为后公者告其兵行颠未当有纪其盛者矣不详及云

○淳安县政事序

君子何为而仕于人哉天生一物即所以生万物之理故一人之身万物之理无不备焉万物之理备于一人故举凡天下之人见天下之有饥寒疾苦者必哀之见天下之有冤抑沉鬱不得其平者必为忿之哀之忿之情不能已仕之所由来也然君子居穷应一身一家其事易及应举入官事为轡轡人为奸欺日临于前而不能操吾明且刚者以应之谓能应事之善焉不

可也且身当利害得丧之冲始于执义终于舍义随俗宾客之怱慙室人之交谪始于为人终于舍人为己初仕良心扩充之未能私心之桔丧而可哀可忿之在民者与我不相关矣吁仕云乎哉瑞自演海入田州知淳县事初阅册籍民之逃亡者过半问之则曰惫困不能堪赋役朴直不能胜奸强使之而予之心惻然痛矣剥民以媚人多科而厚费使之可为民忿可为民慨之事日临于目日闻于耳而吾不平之气愤然生矣问识者以所处之方则曰在今日不可能也在今日又不可为也宁可刻民不可取怒于上宁薄下不可不厚于过往彼自为一说而不能当于予心也尝欲自为一编以妃钱粮以节财费以酌事使节文昭国制日月之明扩吾心体备万物之理使淳得户晓乌吏不能缘为奸弊民得安业乐生而予亦得以常目在之俨有师法而又私念秀才发轫仕途知识有几将笔复辄迟疑三年有奇矣壬戌入覲归缘道咏思恍如有得归取故籍参考博访以订所思自信或可以究竟利弊粹乎圣贤中正之道公已公人之理我祖宗颁行画一之制一毫世俗之论不与焉民风土习藉此发明回心而向道或有在也夫彼上司彼过客万物之理付予于适化犹之我也独无为民哀忿之心哉时乎为已见已不见人一觉悟焉而同归于道矣政之大者曰政政之小者曰事是帙淳利弊兼有巨细因撮其要名曰淳安县政事辟则坊与如师予儆前此曾为之说政事有记亦严师教戒意也淳淳然欲吾民去其竞利争胜私已罔上之故而以善新焉是亦与吾民为严师教戒也益已益人举于是册赖之其可得而已乎用是粹之复为之序以告吾民使知是编之意

○赠陈侯署遂邑事得代回府序

雷琼自昔指为贪泉之地雷山海货不及琼遂溪在雷又小邑地瘠无别产一岁之耕仅足一邑人一岁衣食之用无可贪地然同以贪泉得名同一万里君门之地生斯长斯同一孤臣孽子日月照临有所蔽隔而不能及之人府州县俸割借天子之威以行其志者视其景同此美心履其地同此肆意先后异时守令如一吕东莱谓夺粮于陈蔡之间攫金于原曾之室何以堪之遂溪之谓矣予琼人也习知琼府州县之害习闻遂溪同受其害之尤一旦其邑庠生梁有守吴一桂等将庠师生意揖予进之曰郡陈节推侯权邑篆计今正尹将至当代愿一言壮其行彰其美有龚黄卓鲁之誉有扳辕卧辙不能自已之情究二生不一而足之称槩二生不一而足之意只今便民之利侯兴之矣只今不便民之害侯绝之矣其澹泊自养不易心于贪泉其敬事临民集本临渊又不谓食禄之方天颜万里夫雷琼之人生不幸为孤远臣绝意天泽百年矣百年间阔之久出望外其一得之意者气数乘除无往而不返之日记云天降时雨山川出云遂处上游其气先至而先得之坎况今天纵圣明瞻言百里海内外喁喁承德出之水火危垫之中置之枕席安全之上惟侯行之规尽在案诵习在人老成人亦有典刑今之谓矣标准立而人趋之雷琼近壤得无先被之为幸也哉旱麓之章曰岂弟君子遐不作人洞酌之章曰岂弟君子民之父母靖共守令道无过此侯摄邑事无愧二诗用是不辞师弟子请书其槩以为赠且以志雷琼开先之喜云

○寿王尧山六十一序

尧山自幼与予同师友为学业其神气之灵诸童稚中识者异之予亦歉然于予谓得天之美不尧山若稍长业举子文论文宗诸大家盛有称许清逸之气不混尘俗而别为一局其文类

之以故不能俯就时调决科第科第之文非尧山所不能攻尧山所不与事也经世论今事不平之愤有发焉亦古人好静无为上一层意也隆庆庚午予罢官归别尧山廿年矣场屋中尧山终不得一捷晚充挨食廩日岁贡生又弃去不就家居万山之中即此采山钓水还以物与人风浴咏归随地而乐夫一岁贡生亦庠序士途穷而不得不安于小希之不可得者尧山弃之惟我所愿我则行之古之人在混芒之中与一世而得淡莫焉傍花随柳鸢飞鱼跃尧山有焉说反屠羊每闻人说及尧山万山中木石居鹿豕游翛然有脱去世故凌云气游天地间意唐人之咏怀有曰方同战胜者去剪北山菜予去尧山居三百里许梦想神交方醉尧山之乐意尧山载营魄抱其一静之徐清形可长生也今丁丑九月十有一日为尧山再甲子诞辰且室人同生一堂偕老宗党戚里争持酒币走贺谓冀缺梁鸿庞鹿门天作之合于今罕有因问颂言于予予惟尧山先年下帷经史百家其学博作为文章包罗万象其气豪谈今不平疾苦其志愤经略人间世曲畅旁通其识精今时命大谬反之身而谋之神者回视前日之所有事者又若无有焉专气致柔与鱼鸟花木忘其形于天壤之内古之得道术者盖如此心与天游天为培之夫岂曰不知其雄守其雌聚埃积块之守岂曰以期年耆而无经纬本末无以先人也哉夫妇直今六十又平格伊始而众心戴焉诗云令终有俶公尸嘉告用是不辞其恳备及尧山自幼而今天眷之隆不偶然也书为尧山千百岁寿

○赠赖节推署贵县

圣天子计安天下求守令如不及而天下守若令每不能以计安天下应圣人记曰心诚求之虽不中不远矣今人士一入官初心大抵循俗而伪日见之事事匪其心盖自宋人诈高位高之习流至今日沦肌浹髓不可破矣欲希天下一日之安外其心而安之其可安乎当流风坏于功名富贵之会而曰纯心任事之有人难矣吴生泗崖自贵邑一旦遣人致书而来盛称其司府赖肖泉之贤通后先任言之不一而足泗崖平生志气不妄语不谀人言无可疑虽予亲履其地目见耳闻不过如是中有不能尽什然者今天下士大抵迹是心则不如是范心之告楚子曰晋君少心不在诸侯也上方可图若心不在民而徒有在民之迹无补于民矣丑女而粉其面老人而乌其髭泗崖其知之乎俸读及终有不求人求吾心之真是不求人知求无愧此心之良知之说忽吾心有戚戚焉偶忘而记则今日泗崖之言正嘉靖乙丑予初官户部幸一邂逅眉宇间可考而见塞渊温朴君子人也昔者逆覩于肖泉今得泗崖之状而验百来年不可得见之人一旦忽亲覩之凡事不可认真真则祸随焉今天下入官人之议则然也天下不一日见天子计安天下之功日相寻于天子分之守分之令之害坐此为累良法美意盖不止曰亦如无有而已赖侯以直道之行发挥我祖宗曰守曰令之政泗崖之状侯曰视府事吏畏民怀署桂平二县平易近民查盘庆恩二府不挠不扰再之吾贵兴学听讼保甲催科改条编复里甲历历可书而民以为惟已之便实便之也实心实政虽不中不远焉者况肖泉今日事正守令职分事无不中焉者乎以心感心得民因各得其固有之心以为心且诚心直道用是有明于天下今之世舍肖泉而无与谁与哉督府洋山凌公以侯运饷课最闻按院敬斋陆公以侯贤能闻天子俞之属下吏循例有形容盛美之颂扬王休意也义也不辞而为之说若夫群小间调今职泗崖亦得之传闻云尔欲此文亦如肖泉求吾心之真是略而不录云

○赠鍾从吾晋灌阳掌教序

长汀鍾君从吾文昌邑司训也官四年得晋全之灌阳掌教门下士某某谋所以赠其行者谓非文不可诣予征言予悬辞之诸门下复曰鍾师必欲得子之文慕子者也予辞之不得因言之记称仕而优则学学而优则仕仕学融会孔门未尝废仕亦未尝专言学胡定安有得于是经义治事并举之为苏湖之教夫古之经典今之人事索之经典天下之事具于是矣而别于治事之中求之盖经典言事中之理而未能一一尽及事中之变事中之变百千万端君子之应如之譬之医者随症用药而又因其一时之所传变改方因革损益本末先后轻重缓急浅深长短广狭盈缩有剂量焉毫厘之差千里为谬苟不知其变之所以然而应之以其理之所当然于以用之其不至败乃公事鲜矣传称执一理贯天下之事人非生知之圣平日无讲明融会之功则所谓寂然不动之中而万象森然已具之体昏如矣抑何通之故予尝谓圣天子为天下择官地无缺官天下不见官为天下利独见官为天下扰大端在不晓于官民义利之辩先无以洗其心身家在念贪取毒焉下及其日应之政则又先事而讲明之未有得也夫从事经典而日求之纸上之文事之义理而已若夫有其事而又有其事之变则必于经典所及之内加深求焉于经典所不及之外加深求焉而后可以尽其故苏湖教法至今称之正以其门下人用之而效者以其能预讲之未用之先而其所以讲之者尽变也我国家设有府县藩臬百司庶府士得此谓之仕内国学外府县庠官亦谓之仕国学府县庠谓之仕仕焉而兼乎其学者也鍾君司训文昌经义治事兼有之矣署定安县事一年再署文昌县事计七月庠序治事之后又得以履于其事而为之夫引而伸触类而长之天下之事毕矣天下事岂能一身亲见之哉然身亲之所备尝与口耳之所谈说意趣自别以躬行之所自见之于事示之于人真切有味为从为悦必然矣鍾君之于二邑不徒随在仰其独清之高而且随在有从事独贤之颂身教言教灌阳士子今而后特无多幸乎哉教成十人为国家造十方之福教成百人为国家造百方之福诸门下以鍾师且无得于府县之秩为铨司不知人不满庸讎知以人事君鍾君所得多矣乎况今天子在上求贤若饥渴而铨司又能上体圣心教官显陟邸报选选有之又安知公道之不可掩不有如印以贿得由贿固介如石如吾从吾亦有以得之乎由小而之大由闲散而之权要予于鍾君拭目俟之矣昔人谓锱铢而较之至石必差寸寸而度之至丈必谬石称丈量径而寡矢陆象山谓此可为观人之法言大节可以兼乎其小也予于鍾君则锱铢寸寸且从而得之矣何疑乎书为赠

○郭封君寿卷序

嘉礼教天下亲初亦岂强之人情有是节文度数之繁也哉第外心之文既盛内之存主不无所効杜少陵直指熏狐之笔阶厉有由然也以今回视干元之唐礼者忠信之薄尤甚穷上反下苟有天下国家之志者文若无可于今之世也而岑司训卷序之请又及自潮之琼万历甲申王正日也曰封君青螺太守之父于予心有戚戚焉手卷为封君而作隐约闻不及予方咤其可无又诈其可有何以信信之于潮人称愿青螺之子也青螺之子何如古之月旦人物者大端信小节今天下一大议论天下安不安有系焉非太岳张今日事乎公室大张青螺四言而太岳之罪一字春秋矣太岳今日法当家国两截断案数年来纷纭攻击大抵入瑜之瑕非张本有名实大学有洁矩天下之道所恶于民从宽于士难乎为天下人矣雷发声而物同应之青螺不然约束十一府县至今不改相公考成先日人曰操切青螺曰闾茸青鱼之谓谓论文如此人品必高今日果然今天下尚是从头到底差错礼乐文物罢罄天下因之然亦有自

而来之远承示条约计六凜凜古之人明作气度岑生又曰公极简淡无一毫扰而湖人便之则从前而来之差公又不如其辙行矣子贱弹琴不下堂李耳之无为清静公先得之瑞何言哉瑞何言哉诗云报之以琼瑶琼瑶公身有之瑞无从取为报矣岑子旋付空空爱意复寿卷序文草草具公视不可令置之外雷葛二端小刻十册将敬希叱入

○赠昌化唐鲁斋得奖劝序

士子侯选京师官非繁华之县则不喜者非也君子将以移易天下然亦有受变天下之疑陈傅良习俗移人贤者不免之说是也府州县官今称俗吏狱讼钱谷周旋其间而莫能解去上官有驱使下民有仰赖能不因之而俗乎今之山州草县大抵尚存古风繁华著名之方全然今习气矣昌化为琼州府属人田之数不满十里不来也罢谣言从昔有之非徒有州县之名所有仅山而草乎鲁斋台先生初晋昌化上高相夫之退何若不知自其初官以迄三年今日间或余会一会则曰孔子里仁为美之言吾之昌化是也有喜心无愠色韩退之谓柳宗元不鄙夷柳州之民今称柳柳州是宗元再造柳州也鲁斋特不鄙夷柳州之民已哉鲁斋二年之中顺昌化之故而加之涵濡之养务使昌化里仁不失天与初性视苏胶西予既乐其风俗之淳士民亦安予之拙无异也子瞻岂拙于为政者哉天下拙刑政彻风清弊绝鲁斋之为道可知矣东莱吕氏有言入单父之野而见弃鱼已知子贱之政矣入中矣之野而见驯雉已知鲁恭之政矣弃鱼驯雉是正孔门作用而循良功力也弃鱼驯雉之外别言政事古之善觐人物者必不如是今观鲁斋之政其有出于随昌化之故直道而行之民随以直道安之也耶惟鲁斋先此淡漠之心故有昌化而喜惟昌化素称古朴故得鲁斋而合闻之昌感二县嘉靖之未古风不无少变得有唐侯目击道存而今也纯然初习矣是鲁斋之在今即柳宗元之再造柳州也唐侯因昌化而为昌化动变之功不露按院闻野罗公徒举政事之小盖钱粮刑罚亦唐侯所不废闻野无及其大因师生赠言之请书之用补闻野之所未备

○赠陈侯丈亩成功序

万历八年部割天下有司彻田为粮再举洪武三年令典也天子有均平之旨天下同然诚择公正书筭于未事之先画里界田埏于将事之际约日起手用日一报流水鱼鳞县官秉有公廉勤慎四道行之一里公正书筭之人了一里归号归粮之数至简而亦至详初无难事计之虽久不出三月四月外之功而今也三年行之行之三年百姓以为三年之害独临高一县称许不然盖有治法先须治人临高一县不然有由然也夫曰公虽乡土夫亦不敢干之谓夫曰廉富人亦不能贿之谓勤时时田里之中慎一字不入吏书手目也他州县曾有之乎而振源陈侯自入临而来则已然矣今谓丈田为国家之重典民事之急务四道之有于身日益加笃一县之人得有千百年均平之美有其田方有其粮举赖于侯刻骨之感忽一日耆老吴应朝士子林士直谢尚宾辈将合县意求言赠余辞焉辞之者谓衰老之年而文又素非所能也既而又自思曰圣天子霄旌之切付之州县不得观有成功有甚于今者乎自初官迄丈田事视国如家民若子非陈侯其人乎汉司马迁历览天下之胜说者谓史笔之奇山川为助龚黄卓鲁彼其四逸政声亦此得之好是彝德之心不可谓独太史公当有也匪风之诗曰谁将西归怀之好音陈侯之在今日能西归矣于此不言他尚何言用是改辞复为求言之口者复独云

临高一县不然他州县奚为后我之望也良工心独若此独非宇宙事乎赠侯并为侯问

○注唐诗鼓吹序

古先王成就人才由今考之大抵六经并行诗教为首夫教以言行诗亦言尔何以益人而先之若是盖人禀天地之精言语文字之间天地精神之发也约而为诗不多言而内见蕴籍外着风韵天地精神以诗而骋骋则袭物感人变化因之礼称人声在上长啸中宵胡骑因之而北有矣诗兴入人往往而是时扬九歌之方兴诗游艺之道百世以俟圣人不可易也锦台廖先生有得于是丁丑会试中乙榜来署琼山学事课弟子员因出所注唐诗鼓吹八卷示之夫宋一代抡士用时义论策我朝因之先宋而唐则以诗赋锦台日课生徒遵时制也乃以先日于鼓吹中有见并之前人之注鼓吹多矣章什句解究其事之所自来探其意之所含议较锦台不及为甚余谓同一文章取士如以其文而已兼唐及宋为得我朝之阙亦宋人之阙也使文不为使之诗文且可以为全乎哉锦台造精学博得我心之然矣虽然锦台新会人昔公甫陈先生讲学白沙天下企仰其品题以前诗人曰子美诗之圣尧夫有别传向来称作者三妙罕能兼唐而下学诗匪杜人卑其诗未有许可及康节者乃公甫又若于康节独推焉少陵爱君忧国兼之于野之获发之视彼流连光景漫无邑居为据诚一人矣吟哦浩歌胸中造化一动一静之间天地人之妙也少陵能之乎盖不特文彩动君之夸随尘冷炙不用为愧一二不足道拳拳君国之念尧夫亦奴仆而命之矣宋进士许洞诗会九僧约以山水风云竹石花草雪霜禽日星鸟无犯其一九僧阁笔夫天光物色抑亦一时之触尔本真在我因触而悦故亦因触而诗假若周朱张程有洞之约性真之悦出之矣无待于外能困之乎子美除却君国诸作一时曳白料必九僧同之可圣取哉严沧浪说诗方之妙悟禅道曰诗有别材非关书也诗有别趣非关理也羚羊挂角万里庵鄙焉夫水月镜象言若荒诞水诚有不可执着之月镜诚有不可执着之象而非诞也文泥矣以诗之曲畅旁通随乐而兴济之文之妙也履庵直据文理或则古诗人同物之趣无深会乎伊川程子指穿花点水之句闲言无用惜工部一生之心自少而老止有三诗绝句是亦履庵之见也余尝谓唐宋诗人均尔一知半解之悟孰为唐高孰为宋下欲定说于沧浪履庵之间仿佛二妙合去取焉而未之及荆川唐子履庵之师也履庵尝以其意附刘因于邵子之后谓天资学力若未足然已为庄陈权舆矣吁礼义无穷人心有觉况赓歌风雅颂诗法在焉自是而后又安知无有兼庄陈静修出且入二妙而上之者乎余时以注白沙古近叩之锦台锦台谦曰无得也夫锦台生长新会时去白沙无几有得于白沙权舆后学有在矣权舆于白沙鼓吹不必言矣透彻之悟锦台其尚求之

○赠文昌大尹罗近云入覲序

易冒天下之道图从中起中起言心也天下未有一物一事出心之外者心何以得曰得之寡欲圣天子思得寡欲之才与天下共宵旰尤切文昌地滨海独称硗瘠贡役之繁反甚其它州县硕鼠食苗天子需才才不我顾亦惟文昌为剧以今时事言之盖非大过人之才不足以为大过栋挠之济也自昔宦游琼土惟江右人士民则宜之然资禀近民求如豊城伯辅之涂天下坚无不可破深无不可入又不可得近云罗君来自宜黄一时邂逅余犹妄意君一江右之才而已矣任事无几绝无之中得仅有之见邑人远迩不约而同颂究其所以则曰当年里甲逐

辰罪及一切非县官所可有时呼常例前人未有不特秋毫无犯之者侯独不然质之天日无愧心无赧色罗侯也彼阌生白尘尽鉴空见之行事不足以称其心之所存天下无有文昌非人穷而诈百年来鼠穴不可诘不可止者乎君惩一儆百之余意气所加一朝如洗大抵惟民之利君不见亦无不兴惟民之孽君不见亦无不革乃更仆未可悉数君何以得此于民哉君之心为之也集义所生是非义袭而取以故可大可小可常可变一里之城切近清澜抱凌等方剽寇往来之藪非前人付之无可奈何急则抱印而村者乎君无所不尽之心战守得地林道干所向无敌视之若无有焉远近恃为无恐一邑安堵大抵近云侯一人之力民苦衣食转徙他资空存籍版名户亦既有年岁矣识微君子不能无日后子遗之虑也前人亦非不曰当务为急招来有文复业无一近而三年之内告归于故者源源可计久当何如天下事心感心应者有原有机毫发掩袭之而不可得鸿鴈于飞集于中泽言尹如君吁贤矣哉君趋庚辰王正之覲以已卯八月去任急王事也邑人不能朝夕去君邑庠教谕某训导某生员某将其意恳一言为赠述职者述所职也守令六事对扬上休君无愧矣虽然无非事者而今视为故事矣反以书帕之礼用为入京之急内京谓之礼外京谓之贐君行之乎书为贐用为君省

○赠李太守母七十寿诞序

天下有亲如子于父母者乎念其子念及父母情之不得而已也通之天下皆然清江检斋李先生起官桐芦己卯夏有命晋任万州太守月日无几一州一县是虽山谷以为居者亦无不有德守之心焉人无异心守何以得此于人哉德守之深日夕思所以为守报庚辰王正二十又七其母七十初度之辰运周而始人子一则以喜之日也庠士某某将郡士夫师生意乞言望清江之浒拜云端以致其孝报守也报守而止于世类之系言之夸张而不当其实母子一气有待而成事言必其事请为诸人士言之今圣天子代天理物设有百官官必其备无一而非为斯民地也士读书文入式而后授之以官谓言如是行不然哉初不然终则大谬有然大抵牵于外持之不坚不免变于中也牵外变中孟子以三可已不已当之此在已可父母之际难母又难之难者闺门人见俗尚如是谓义理恰是如是子之爱亲命也不可解于心李侯亦当乎难而难矣汉有行已其人或亦君子与可之中毛义是也初心何心捧檄安阳不觉喜动颜面万以香藤板葛先年枉羨于人小民衣食并指樨榔海舶利为之耕蚕不足以供不得已而赖之者也他方之人一官此方不知其方愁苦十人九人满载而北惟侯今日盖不止曰于事应事自恻隐中发之见德于人已也退食委蛇羔羊之皮又一州一县之人老老少少谈不容口有从容自得之美无牵掣难心之态非先得其母脱然于财帛之中能得有脱然无累之子出世俗外其隐之之心其心也哉诗有不遑将母四牡之使父母何尝羽觞之臣一时里仁为美家庭之中不止一陟岵之母不恤其纬之嫠可以想见然春秋而上人物无足异也今此何时桑柔之篇曰其何能淑载胥及溺有母如此吁不贤而能之乎先有母氏之贤然后从子之后颂母之美有言不为虚涉言之可矣犹有进于是者养生家谓怡怡为保元和上寿之自家不入民怨之钱欧阳詹生虽有离忧亲心乐也母和于清江之原矣民怨钱不以养母朱晦庵谓日用三牲不足以为孝子心乐也子和于今日牧民之堂矣聚州县之欢声将望云之喜意孟子曰父母俱存俯仰不愧二者之乐李氏一门以之为此春酒以介眉寿酒之可以为介也和气也天地和气萃于一人吁盛矣用是不辞人士之请书之以为贐若夫行道扬名召伯

甘棠勿剪伐拜孝大而远俟他日与侯记之不先及云

海忠介公全集卷之三

卷之四

序二

赠总督府凝斋刘公平八寨序

赠廖锦台膺首荐序

赠高将军升指挥使序

内江龚氏族谱序

赠吴颐庵二尹句容序

赠大尹吴秋塘德政序

赠丁敬宇父封君寿诞序

赠霜栢陈先生得奖劝序

赠罗近云代丈定安田序

赠黄体斋升南京国子助教序

赠喻遂川奖劝序

赠喻遂川膺抚按奖劝序

赠罗近云升钦州太守序

赠毛带江升天台大尹序

贺景竹王千兵荣膺军政序

贺屈元礼生子序

赠林东皋考绩序

赞萧氏一门二节

赠黄村赵先生升靖安大尹序

赠蒙生德范还遗金序

赠史方斋升浙藩大参序

黄广台思亲百咏序

赠王朋江升宁波府太守序

赠史方斋升浙藩大参序

寿南瀛吴公八十一序

赠周柳塘入覲序

赠陈元山任古田司训序

赠顾怀东晋京兆丞序

赠赵三山德政序

淳安藁序

○赠总督府凝斋刘公平八寨序

萧望之谓民莫不有仁义欲利之心虽桀在上不能去民好义之心道之不可不慎粤东西万山中生聚之众倚险作害其人习气亦如其山之险然同函阴阳之气得生天地非他类也远人不服夫子以修文德以来之为策夫亦无以来之而已祖宗兼设文武重臣控制其众后又革去征蛮将军之任总其事于都御史一人吾夫子意也列圣奉运二百年余矣不见文德之修日寻用兵之害何故夫自其不尽向化恃有山以自雄诚横矣然北仰九重曰天朝知有天子如天之尊谓督府天朝选择而来天下人也视如神明望为标準羈縻去留大抵督府之命惟听威畏朝廷威畏及督府先后坐开府而一其人何如督府日有政令仁义之言不绝人耳可谓曰贤然言在仁义者十之一事不在仁义在利欲者十之九军门得以便行事天下谓握权重故宦囊特多两广贪泉其多又居天下之一夫止此柴马止此俸钱出此之外一文一分赃证也经曰怀恶而讨虽死不服军门罪我刼掠军门刼掠犹我山中之言也非瑞经行苍梧等处数十年前耳饫闻者乎流至今日其言尚存标準之地先自坏之欲持之以服山中之人难言之矣臣子之权有重于军门者乎荣身及亲一时称最荅恩报主当亦无过于军门济济在列时事至今回首天朝言之可为愧口湖湘凝斋刘公当风靡波荡之中超然千人一

律之外百事如新姑即其切近之小特言之督府兼有巡抚兵事其急故曰军门决胜千里大抵身不亲行籍总参而下将领于外运用晚唐债帅宋南渡而下殖私财以自结于私人今日踵之行焉自痿痹其手足之用余不知其所谓公下车初政突然反之贿门不开将领生气所在有李光弼八营调发间精采百倍之象八寨之举瑞时以先事之端倪占后事之成就师不愆期果尔捷奏天颜有喜远近欢声先公而行如公之举有之而纸笔间功级不同也先事一方用兵百方枯骨府县民牧不得安于其牧矣一将功成琼州府知府唐可封同知杨繼文通判黎九皋悬一言以志今日之喜夫天下有清其心不能以清于事者乎天下有养成此气不能以驾驭一时游其刃于天下者乎万古人心又有虽之蚩蚩无能行之者乎不图今日复见威仪书为赠

○贈廖锦台膺首荐序

天下事如斯而已谓今无经学士大有为于天下哉国朝以经术造士士非此无以进其身迨得官则又有今时应官之道经术之在圣人刍狗矣有儒官焉薄收而薄出之人无望焉而奔走奉迎故事虚文视热衙门无异人之所以责官人之所以责士判然两途矣然天下有称善读书者又不如是吾省新会锦台廖先生富有经学文翰擅名于时即彼小试琼山而言丁丑落第乙榜而琼非今人为贫之仕借此自暇逸者乎举人教官又今以一过路譬之上下所不深责者锦台自做秀才攻坟典而举人日矣比今仕有职掌寒暑灯窗无殊先日非干干惕若中有实趣者不能课士子不废文论为时制也孝弟礼义尤所课中淳切之急道有本末教有后先誉髦士于鸢鱼得所之中一不见其崖岸自居严师尊道必人为敬学之日旱麓之三章心有天游之圣也锦台会之矣然即此而论不过即事论事得锦台之小尚无得于内蕴之多所以为他日设施之大尝自督府凌洋山公之荐言之锦台盖茧丝牛毛之学天高海阔之心矣简编之在今日盖前百千万年事也前百千万年事莫不有于方寸之中举此而措今日之应酬莫非已往之成效措之而有不当焉者乎夫士子读经为文又经史正道中出乃入仕则背而驰若戴圣祝钦明之流谓其初不过假此以为阶禄之地真心本不如此锦台不变塞于今日之官矣不变于既闲且逸人不深责之官变之于遗艰投大人所属心之日乎又不不然若荆公以一执拗得之始败之终锦台温如玉不然也然则锦台非如心之经学有用之文华也乎洋山意欲廊庙上大用锦台使得尽展底蕴不负初学言其大略其小言学问富有兼见其小盖经学文章其精神心术之蕴今日举行教事其精神心术中小小之余也老子谓朴散而为器故大制不割今日与其言锦台于一官一事之中孰若论之于不出户知天下之上洋山之见有大焉者矣因言之内之廊庙百执事谓外抚按荐章为据外有荐章之美大行其志机会也庠弟子欣欣有此相与问言于余余养痾简人事有闻见不尽有闻见衍而文章因人言也若其当不当则非余之所及矣书为赠

○贈高将军升指挥使序

指挥同知高前江死于儋之神尖三载矣死以王事天子恤焉加其子一级指挥使世袭卫僚属某某谓天恩所及生死光荣也问言于余为今肇南君贈余惟神尖之役前江迫于兵巡道不得已而非其本心子加之级何将在外君命有所不受史方斋不知有此陷前江为不知彼

已之死前江冤矣然兵发有期方斋至儋前江不至前江得当而后进非畏死也方斋不谅其心然方斋灭此而后食之心其急如火初非有讎于前江前江知之小不胜大而以二小舟突二十七舟前江不爱其死至此欲以平生不顾身家心事为后人计白之史方斋也死于迫不死于义赠其子以其父之义何以赠卫指挥及军余先后前江日寇未到股栗先之不能前发矢者比比万一不然亦大抵顾有身家之心无死绥封疆之念虽卢和高手饮之乌附数百未易起其陷下气也前江度越此等百千万倍余尝谓使方翁若能少谅其心谋勇兼资前江非徒死者无神尖事得不死将不为虎豹在山之壮乎外海内黎方斋之功尤大前江原领兵前进方斋迫不为无因君命不受将终执之于义或可今日始知狱吏之贵乎不可为也有此二难前江受迫即死之轻志无异先日虑胜死绥之慎心卒之李贼破胆俯首听招一死而地方之受益多矣前江之勇于是可见时以其事上闻隐此不及其实前江白日青天心当厚典无歉夫厚既死之身可子可否其父未见也何以及之天下有有其父子不如其父者乎一血脉之亲而又气习风声之近子不其父千百之一从古而然以目所见言千户崇升能无惧而已骁雄之将也今其子名维绩者他何观法气槩大抵近之今高将军夫苟无能如绩近似其父夫独非前江之子耶古称父作子述子不其父人以不肖子呼之今高将军得阶一级圣天子亦以有其父有其子也得天之荣当思所以保有其荣孟子曰事亲若曾子耶可谓能养其志保荣之道也市井人一时之忿有甘以其身偿人之死不顾者职分内事不尽国法乡评柰之何独无忿心猛烈而死之人气之壮者也其精爽英灵常存天地间一气子孙寔有依附昔人自责何面目见先人于地下高将军苟无识朝廷加今官之意能见前江于依附之间也哉家有祠堂郊有墟墓随入随出可怆可感父倡子和天机有必然者僚属赠言之乞有闻者莫不兴起况于亲炙之之趣焉故不辞而为之说言长矣一言以蔽之曰肇南今将军是则前江之子而已书为赠

○内江龚氏族谱序

蜀之内江有龚氏焉其先人福一郎避元末乱逃楚之蜀家内江遂为内江龚氏始迁之祖发祥及今以其子姓之远于先人言之九世矣枝干蕃衍而皆端朴淳谨言义不言利故虽代无中人百金之产科贡寥寥有人未及仕始自怀川父子兄懋赏方入仕籍而内江之言名族则公井之龚氏预焉七世希遂汉臣八世以荐文魁亦尝合心断自可知之祖商具传次图谱聚合礼文附见图谱之末不幸未就继前人之志述前人之事怀川登甲科及今奔走王事未尝不一日并怀念也搜猎多年具有成稿万历丁丑得持天子节按吾广其历事国子生受吾王氏文学家传史才也出而托之讨论润色遂得完帙怀川幸今继述之有成而又念无一言以引其端族人未知为谱由来之意导而化之无因也属之余余惟秦汉而下天下无世卿不复能为五宗法士君子记其家人名历传次标初一人之始谓之谱事不师古矣然人心有真经称万物本乎天本乎祖水本原之地人心真切之机也族谱执以故兴物之迹示子姓于视无形听无声之中其机神矣有子所称立本生道之原孟子所称人人亲其亲长其长而天下平之大此机为之宗法执纲纪于宗人之事族谱见纲纪于族人之心心有切近精实之原孝弟有充周无穷之用谱握其机族谱之功于是为大我祖宗孝治天下士大夫稍言诗礼其家大抵有谱纯心忠义出自孝子之门不多见有谱之文主张作谱之人非孝弟忠顺之身无谱之实也子孙以虐文视谱则祖先之名次不神御史代天巡守二百年来琼人未有见突

于怀川见之邂逅间怀川三复旱麓之三章酬予言念怀川鸢鱼会心其温如玉锐意多年创有此谱龚氏谱得其实矣福一郎之神可以如见子孙継序思不忘翊国家日升之运龚氏亦日之东君子执龚氏之谱见拔茅茹之象焉事在家庭之中道关天下之大为是不辞怀川请具所以为之序

○贈吳頤庵二尹句容序

頤庵吳子二尹句容三年矣其親友人某某自京行別以至於今日有思慕思慕何謂意氣不時人物也入官有年不失初意又敬字丁進士為之長官賢而知賢可有顯擢乞余遙致一言以見其愛頤庵于余親故時有會晤曾以一二言一二事高之謁選將行廵崖邂逅托馬鞍于余回舟之上日久不復詳其時酬答所以大槩指今官而有得丑狀戲之供一笑也頤庵變聲色而曰公人品高矣乃允賢決則不然有友同行曰顯顯戲談回言如是友人亦雷同余許之而終以為愚戇犯執滯之病不可官吁非也言念頤庵地芥青紫自幼而志有大焉不遂有日一旦曠典恩貢人意必頤庵之得果然然候選天官所授不過縣尹事有堂長主之而為其貳南都上下京師瑯人必由且止之地也句容去之不远鄉人一接頤庵而歸曰衙中空空如也柴馬俸錢外无从有毫厘之入事自堂付之彼盡心如法而行不貪不酷不自巧諛不自為情无殊先日秀才之氣時事二尹于今罕有人有同言余信之有不盡然于余心者頤庵句容而今三启于余矣大抵卑抑无聊之情因之有怀乡挂冠之想夫吾平日有取于頤庵取于氣之直也直氣即孟子知言養氣之氣行則慊心之功乃其有事勿忘之驗氣之所加无大无小无不荣无不逸乘田委吏孔孟无一日為歸与之兴行道之氣充如不暇為心也頤庵三書于余向家如切大抵見小官之亦有榮又見還鄉之反為适不能遂不能退是以三思蘇氏發明慊心之驗曰卒然遇之王公失其貴王公失所貴之常心服于吾可見之氣心服其所本然之理也今由歲貢而出之人偶授知縣府判推猶有向前氣槩降此而下自視小矣其言曰如此官阶所由如是侍之諸進士大官之下譬之云泥纵使出群其才誰則我与泰山壓卵因而頽廢頤庵歸心或亦然矣夫人豈其尽无仁義之良哉吾能不見官之為小養成此氣由中發外而天下之人神肯之矣謂世无不好諛之人諛幸少安夫豈其不然然而自謂熟是人情上官又有其說曰一為資格所限見可侵漁不為侵漁之計无有也鞭策不前十人而十余以為二說皆是做成今天下有其事无立事之人天下靡靡國家无賴人不能重已以致无人有之已不能自重致人輕已有之在彼在此均当分任其咎使吾职掌无缺不爱一文其心好諛之人彼亦人尔绝无一服义心哉不然矣句容堂長丁敬宇之賢也有知于頤庵必不以堂長崖岸繩頤庵不繩之必能揚之至此而頤庵无不可為之丞矣虽然吾人浩然之氣不因物而亡有不依形而立吾執其是彼峻其權鸛鵲蚊虻相过乎前也浩然于天地之間其大无外圣贤论在我不论在入道又如此頤庵素有方直之氣入仕途不免動其心于榮辱得喪之來轉步移身余忧之君子爱人防所未見書為贈世尚圓活圓活私意之所自起也敗尽天下頤庵能如先日之執滯而天下无不可為矣頤庵勉之

○贈大尹吳秋塘德政序

學為已仕為人其義不講久矣以故天下之人坐受仕人之害瑯州號為嶺南百粵益南之远

陵地连崖州山海货比郡治下为胜其地又居郡城之尽有仕于此为贪为肆实为已百方文
餽傅为人又毒于郡治中人矣自非介石之守豪杰自命未有不以地变者浮梁秋塘吴侯由
恩贡国子生初授万州判判为州守之贰韩昌黎谓漫不可否事者无得自见之怀虽有识者
亦无不曰其有不为有制之尔三载考绩得晋其州属陵水尹言陵则无有出尹之上矣其贪
其作用有制之而不得逞乎乃侯履任又二载奇矣无意于香仔无索于海泊里甲纸续征收
火耗有事于官而为暮夜之入其非已所有不为已入不必言矣虽出村至府饭食供需前人
无不求办于里甲中者侯亦不然其清节有过人者以言其才则昔日漫不可否今则可者可
否者否有猷有为毅然身独当之勤事厉精吏胥无能为弊行乡约辨争讼百凡有为民则便
之利无不兴弊无不革曾不得已捐俸二十金充蛋户额课虽谓之满腔子恻隐之心可也然
皆未足为异事也白面书生出人意料牛岭剽夺非百来年前尹以为无如何事哉招抚劝谕
诚信有以服其心营堡屯戍先人而险又有以屈其力小则深田归心大则万州咙吟岗二十
余村雄桀不受控驭亦惟侯所指无不如意洋贼林道干扬帆掳掠非犯则无敌者哉防御有
严士气百倍打水六七人先试而侯众突擒其一道干反以畏途视陵转洋他去侯盖不特牧
民有政才课士子有文事内黎外海四百里内民胥仗侯武事而安亦先年诸尹之上人也大
抵天下人必内有涵養然后外有施設侯仕能为人侯学能为已为之若侯者其可以今日仕
途中人物视之哉予杜门谢事如前所云大抵多出一时耳闻予历世故多于人情亦熟尝谓
人心不古毁誉难信然酌量于彼此公私之间参之以尚书听词于差之法百与而百无失矣
况今巡道锡崖舒公日时廉访尤加之意者府州县正官也激浊扬清于侯许与民牧若侯也
而又何疑乎虽然州县亲民琐屑暖昧日杂然尹前府及守巡抚按千百端其难为亦付州县
草创十室之邑自昔难之侯果能曲当于应学优外无歉然不满吾当官之怀哉反吾歉而求
之分尽于所求之中矣用是因士民图侯抚黎事并德政大端乞言以彰其美据所说附已意
书为赠

○赠丁敬字父封君寿诞序

夫天下有亲如父子者乎一气脉而流传之形虽二而不可以二言父子也况日夕家庭又有
风声气习之近苏氏谓称人之善必本其父兄师友夫岂以子弟故为父兄隐如直在其中之
为厚也哉子不如父人以不肖子呼之谓子必其父也子必如其父乃其父先如其子为之矣
其不尽然万一不至瞽叟丹朱言动易入大人能格君心之非天下有不陷亲为不义之子天
下有陷身不义之父乎百端言之未有子贤父不贤者今封君七十有一之老敬字丁君之父
也余于封君一无闻焉于敬字子则尝闻之敬字之于句容何如哉大抵百度具举满腔子尽
是恻隐政又足以发越之而无遗其才也一尘不染六年一日其节也目见耳闻一时循良声
称天下未有若此尹者然人之贤不贤亦有自来余意度之苟非先有封君然后得有敬字则
必敬字有执而行父子情亲封君顺之二端之中苟处一焉君子曰父之能贤也犹有可言者
今之时何时哉子得一官之荣又望子满为足家之计财帛世界见可欲而心无止足焉又富
家习气也若曾子则可谓能養志亦未有弃口体不为父母计者敬字六年之中人一不见其
有内累于家意气吁非封君之能贤敬字能若是乎余于敬字完美于六年之中见封君近有
义方之大封君于是乎大非时俗人物矣时礼于人父母有生之辰一则以喜同其子而庆之
今已卯孟秋朔日封君七十初度之辰也夫亦诚可为敬字庆矣然一人有向隅之泣满堂燕

笑不能为心况居官则有民责明有百姓之非幽则有吾心无能于职之愧封君父子能为敬宇一日安之乎不安于是日用三牲之养不能乐矣得子敬宇人称大尹之贤六年之久甘雨和风邑无异议是今日班烂之衣莫非一邑欢娱久色特觴庆祝子拜稽首子为之亦一邑之人为之也天地和气萃于一门吁盛矣文林封诰锡之天子七十有一之寿平格自天夫岂偶然之故哉人间乐事无越于此用是不辞其僚属师生请书所以可庆之实为之赠

○赠霜栢陈先生得奖劝序

士子入官曰教官人则卑之何卑吏部亦一资格而已这资格格了许多贤者使不上迁格了许多不贤者亦有进步人心排下进上资格限焉而气因之孔门在得之戒为戒无有也御史怀川龚公百年波荡之后屹然执焉曰教职有初周元公朝廷正天下治之言教官之所自来也非诬也正名正义关系不小三谕之文行于一十七条之外谕教官较府县特详责教官较府县独切责之详人之应之或不及至乃岁贡出三仕不脱于儒吾郡霜栢先生上肩乡科之士奖荐亦有与焉诸弟子谓此希阔遇也乞一言为先生庆吾观霜栢于未得奖荐之先究霜栢于既得奖荐之后大抵即霜栢之言貌可以得霜栢之心胥古人指闪烁狡狴之辈不可方物曰小人霜栢内虽文理有别外别宽易舒夷口不伐功行其口苟非素养之正定静之衷当不及此诸弟子之言曰事师三年二经帮补入学矣不一见有计利言色先后进生自行束修以上均此海心待之不满怀翁充类之望固也轻重厚薄听之人我无与其间其心清矣内有清心外自有清应教官无府县吏事之繁习读考课外无几也霜栢之素行之而有不至乎人各有师霜栢初谓不可撓人就我来不拒不来不迫锡崖舒公条约既行之后一槩取必若与已异而霜栢奉行之谨不啻已出已不夸名是以人亦不见其有事之迹今士人日有成就锡崖振刷之功抑亦霜栢奉行之力也不见物我之分霜栢之贤于是为大余故曰苟非其素养之至亦必其生质之美夫师取模范弟子已矣道不在于言语文字之粗在于身心性情之际古人有先之者兀者三胎温伯雪子是也霜栢如之虚而往实而归模范有过之者乎虽然一先生事都人士赖之矣其它何有不脱吏部资格之外积次程功霜栢可一县尹刘方未有他异吏民同声谓之不烦霜栢事也过此以往得志以鸣国家之盛未敢言矣何也吏部有三途并用之言终实不然仅此复弟子爱师之意借之赠

○赠罗近云代丈定安田序

东坡苏子有言古之所谓从众者非从众多之口从其所同然之心古今有不曰井田之为美法者乎汉初限民名田今日廊庙有人遍举均粮新例是虽贫无立锥犹自先日而可以已一时飞诡之痛千百而取其一是亦井田之遗也发令之初家之田连阡陌亦曰此一均平美事贫富心口同然余喜之谓事行可立见也迟而今日则又有大谬不然部题有曰以国初流水鱼鳞老册为主名曰流水鱼鳞盖有其义今不讲此而别臆为之开端既差末流之弊莫可禁止东扶西倾朝更暮改百病之所由生今日随贫富而言怨有由然也独临高会同文昌三县人以彼善于此分之文昌者近云罗先生今晋钦州太守旧治也文昌丈事方中上官久知美才复付之为定安之丈近云不辞委于始不昏懈于终大抵事本易简古称治乱丝有法有田则丈显显条绪非乱丝也近云坐得易简之道是以得之定安之事余未之有闻也然观其彼

善于文昌可以卜于定安亦必有善心力不能以两见任人为而理其绪闻其后一得间亲行核奸匿不丈之家二十有一准之改补完报虽曰安知其无尚有出于二十一家之外而近云精明果毅之才亦可见矣近云才大过人爱人之仁一介之操又足以镇之排难解纷乃其余绪道有出于丈田之上不可以其一尽者是宜乎朱尹忠斋神服而乐与之也忠斋必余言为近云赠秦穆之誓曰人之有技若已有之忠斋有焉均之义不得辞书之赠

○赠黄体斋升南京国子助教序

感恩掌学事黄生仁甫别号体斋余署教南平之日门下人也自幼苦心文学而行已亦自谨饬不风气自苟余素谓是亦科第人数也顾屡试无幸挨贡得分新淦之教后三年晋掌琮之感恩三州十邑之中感恩邑之至小者也弟子员数计亦诸州邑之后乡荐寥寥百年不一人与若不足为人师中留意者仁甫以丁丑之夏任特愤愤而起曰孔子不诬十室也存乎其人焉耳虽小有大者讽庠序规件祖宗先年之定日寻纲目提数十生耳而新之不责货于岁时拜见之间意实志恳师道无愧焉一时御史有贤曰怀川先生巴蜀内江之杰也三谕详婉复之巡约通行之外千载一时声倡于上仁甫亦克千载一时和之然诸人联翩有年月日而仁甫助教之请则今壬午五年后事也士之素重仁甫者曰吏部三途借口之言今见行事之实色喜征文言赠夫士苟无会于锡崖之为高赠之诚是也夫亦知京师之所为美观而四方极乎两京天子之耿光今流之弊名利风生而诡随因循之病丛如矣冯道胡广之区蕪味道娄师德之地崔亮裴光庭一切辈会而合之之乡井家室也首善人耳到此则染京师人人出得口京师人人出得头茫茫乎天下之是也达可行于天下后行之到此无望虽今振作有人进之寸而退尺祖宗逋升积分之法及格方许出身且曰未也未也夫途辙亦不免岐惑欤往北京而南行终身无到北京之日新淦感恩初脱井中之见错之科甲济济之间十手指摘发言盈庭爱仁甫者为仁甫喜吁能执之乎无能执之乎有师道朝廷有治平笃其实而艺者书之天下之达道如是书曰矧曰其有能稽谋自天请诵之为行色之壮立已于大请自舒锡官至今无一帐文始

○赠喻遂川奖劝序

言有出于一人之私可信为天下之公者澄迈大尹遂川喻先生任甫五月按院凝初公有奖耆老洪以让雷一诚辛巳季冬之朔揖予而曰我尹二以不获上有今日今得之矣得上有道先自得民而来造福于澄当不至如富阳建安年月不多指屈也愿得一言将阖县人意志其喜言若止于二人之私矣澄去琼山不远余简出亦有所闻尚不能无私意结民民与之惑姑诘之曰县官日与百姓亲古称此之谓民之父母子之于父母寒求衣饥求食苟有不得求与有一焉致子于不得其所之地父母之责缺如矣二老之言曰徭差之均当听断之公明称收先后之弊无有也先时吏胥作奸今若无有待民接土法不废而以仁礼济之盖无一不当人心之举有尹如喻可以无愧牧堂之上而吾民福矣举澄迈事言语错乱而说尹之贤终不离口且曰有大焉人曰暮夜无知我尹杨伯起四知也其贿赂不行不必言称收不为火耗之借名纸罪不为深文之充囊先后尹不及二老谓将一县人意若出于自为私而借之口矣汉人谓处士纯盗虚声夫处士无事可见名则可盗县官日与民亲日与民酬应乃其本职有一事

则有及一人之恩有千百事则有及千百人之恩亦有一事而千百人受恩者安得以一人之言掩一县人之见二老之言皆遂川日日行事之的正苏老泉某也贤以某事知其贤某也能以某事知其能之谓盖不特一县人意言实不实即一一行事之据可信其为一县人意而非私矣二老欲县官念此之故此而后刮目非一县人之公也安知县官不谓衙门出入之积笼络之为术也刮目之乎以其时与事考之信二老之言不妄洪武三十一年定八十贯赃绞罪之律我太祖爱民之深与初年皮场设庙无异同一处死姑以其峻厉之形改从和缓之象盖亦使人士覩典刑而有惮心严之于先全之于后刑期无刑也自托钦定事例改杂犯失初意而刑法繁矣民不蒙惠瑞自出仕至今往返所到大抵唐人寇来尚可尹来杀我之怨祸此琼为甚澄迈治不附郭又甚寇来言刼财也遂川能不为刼财之政当祖法废弛之后且不远遗特非无待犹兴之杰与庄生谓嗜欲深天机浅遂川无今仕为已之心清本原而心在民矣天下未有贪鄙之心能假为在民之事亦未有心在民由中可见之迹民不宜之正本而万事出焉余于是益信二老之言为一县之公言而非妄言矣虽然君子之德必本于父兄师友余巡抚应天十一府州俗之美朴近古惟太平靖江公自历官而巡抚南赣政声在人过庭诗礼风声气习宜遂川之有今日也政宜民而一县人宜之其妄乎一二人之言可信为天下之公是可书也书之

○赠喻遂川膺抚按奖劝序

圣天子作天下君师势所不及外设府州县官共而理之府州县于民曰父母官天子之君道天下也于凡民之俊秀则不曰父母改称提调别之言提调者立之标焉礼义廉耻曰提撕而调度之如人之爱其子必思劳其子期之远大进之圣贤天子之师道天下也师天下与君天下徒衣食之听之由不强使知不同今府县官有顾父母提调之名而思之义者乎模不模范不范言提调失官则百来年视父母为甚起于厚学校之为私谬于借士誉之为累事之牢不可破其大也御史有贤学校三谕特严之出巡条约之外而今学校之中圣人之经贤人之传也二年之中不见有一堪能怀川之应余以为终焉已矣天下以虚器视学校天下之提调为之壬午春初忽一日澄土揖余而曰今有贤尹梅刘二公不约同奖愿言为今获上有道之赠先是老幼亦同此请而余言之矣遂川新政大槩具举学校尤未详得也诸人士之言姚师之状则曰今县之先年有异乡先生投刺之难非公事未尝至于偃之室也此子羽之自守则然今有欲至之而不能先日嘱托之风今日消绝夫曰投刺曰出入请托非人所蒂芥人士有口不为逆而听之者乎履任之初正其要誉之棘观之蒋公政训时好尚可见遂川特自为执无期会也上与怀川之谕符合如一提撕调度握大纲而夫子教我正矣陆九渊谓丈度石量径而寡失可为论人之法然则有贤遂川待士执之矣其它之小而不能执乎仁父母不能为提调之严有之提调称官不能父母之仁无有虽然执之是也道有出于有执之上不得不足以执耆老未及人士能道其详请再言之夫琼事出十年之近人称破家亡身莫得伸吁非强盗扳扯事乎盖官中以得盗为功奇货可居富户也遂川初任特忿然曰盗人何心有自扳其党乎置不问上人先日风旨不顾也未几别得实有赃物真犯十人脱然无累苏子瞻谓孙君介夫刚者也不仁而能以一言脱十二人于必死乎余于遂川亦云夫执今人所不执过此而往何所不执明今时人所不明过此而往何所不明先之明成就其执后之执完美其明父母提调人何间言且事若薄土而士反归之曰厚大夫士能相与以有成也皆可书也用是不辞其

请书之赠

○赠罗近云升钦州太守序

辛巳孟冬之初邸报文昌尹近云先生秩晋廉之钦州太守邑士夫辈欣欣色喜同以邑人之情来乞言贺余惟士子一旦宾之王国则非复庠序日一无为矣苟知一县一县事无一不属之为尹一人之身其难在才尹与民亲则亦日与民财临财有苟得之者矣其难在守近云尹文昌今五年矣一有不宜于其人之政一不满其民父母之责矣乎五年一日之守则又田近而远无不曰道莫先于义利之辨官民界限百年来惟近云惟能别之古之一介不以取之人不过如此谋克壮而民事有济操若砺而民业如安周吕之道得县可试为之今之谓矣士人辈愿得一言为别文之行赠夫钦视文昌难易之远不啻千百近云为难于所难人与之矣即今亦有论说曾足于钦太守中有益之乎虽然事有出于寻常法度之外而济者天下之变何所不有请以先甲时事言之天下有有粮额无其田亦有田之所入不充粮差之半有甚于文昌者乎琼称逖流之多寅卯辰年之早有甚于文昌者乎易穷而变观之会通其时也庖丁之庖十九年矣所解数千牛而刃若新发之硎无厚入有间也万里京师之琼广东西中亦役赋之无几何者三州十邑一土而文昌特以供官称困谓节之无间可乎粮额不可减固矣军章程不能一日而缓固矣轻并重分大抵今古同心先之为崖陵昌感者借计绵花槟榔诸利编入差徭敬亭唐公因今丈田之举又三州十邑推比而行一视同仁士君子哿矣富人而变通之道也余先日三过南雄雄人所深喜幸而言有曰六七十年来赖是三千桥银二县无田而有粮民不告惫是又不止是徭差之小补之云也军门司府诸亦人心君子诚能类推以尽其余今之文昌无必不可为之事近云窘于一年之住支军门法有大焉五年爱民一旦不能为心之甚一切应之时有讥言有怨说讥谓民父母不如是怨谓又有大父母主持于上县官所得自专吏胥不能作奸之才可对天日不有秤头之入也不寸剥肤尚亦有幸夫地无丝亮之入而一不免其三年如故之输鸿鴈于飞集于中泽今不然矣我虽不杀伯仁孰与民不见杀之为恩亦有一曲之说借宽于人孰与浑全先日之仁之为大县官催科钱粮思不出位朝廷法度中事也出于寻常法度之外为之为国家济变事也近云精明果毅过越人才数等以此济天下无不可为矣诗云杨园之道猗于亩丘谨赠

○赠毛带江升天台大尹序

古之君子急欲得君而仕之广土众民中定天下孟轲氏之言君子意也夫天下有声色臭味焉无屑欲也必此而后欲之天下有声色臭味焉无屑乐也必此而后乐之今之君子急得君与古同意所自来则古异今出身之途三言举人无促于下第后教官例矣今之将仕者顾曰历事后亦有例纵使卑之不失减县正官之数如之何去终身之热就一世之冷苏东坡出守河东其诗有酒肉淋漓浑舍喜之句此正冷热之别也士君子性分内事何事初登仕路便孜孜然此念横耶带江毛先生近古风味吾取焉带江长于文学岂甲科蹶步人哉落名丁丑遂忻如于乐会之就四年冷官安之一日周元公师道之立会之心矣分巡道舒公问以割鸡小可试之俗称权官如刼沉香皮木之旧带江不与刼也感恩七里之民素不习为官府逢迎之事不远千里之难而有今日保留之再君子之善覩人物者石量丈度之而亦有以尽带江之

槩矣万历辛巳之秋吏部特以带江拟长天台之缺天语俞允先导有感恩今日之天台熟路也世有谈天台山水其幽邃清绝之胜者言之如画人人有凌空欲去之意谋野则获带江坐而得之士子问余一言为今日之行贺信若四年履历之状遥指他日山光水色之胸情虽列之竹帛而非夸言矣然余有仅见古心之许不尽什然一信千百之定诸葛孔明之言曰学以广才二邑天下之小也可以广言之乎人之相去若九牛毛先儒以天地江海锺鼎斗筲别之象山不取天台大于二邑天台而上十百千万有大于天台人有改行而非其先日者许邵每月更为题品名之曰月旦评一人之身后先异议无负执冷之初心学与日新廓是二邑之小试余于带江日有望焉若火之始然泉之始达感恩乐会县往事也苟能充之不能充之天台今日而上后事也用是略诸弟子之详详他日望中不及见事书之赠

○贺景竹王千兵荣膺军政序

圣天子分天下职下都司卫而立之所焉所与州县错峙盖五品秩也兵以千一百计余人倍蓰之所管辖有戎务有屯粮讼狱是其以卫封圉翊我圣明之治实兼牧养允厘役焉行道遂志视州县有大者今守令下民莫敢仰视人视之不胜其崇且荣所则不然其故起于秩袭父祖不由问学于官守义懵无所识且其无理德以和心气也动辄强悍残厉以凌剥其下抚按藩臬用是从而抑之抑之诚是也沿以成习遂致厚相党与者牢以坐受爵冕致斥显显然中秩之崇反出文杂流下居之者恒亦愀然不乐曰此奴隶冠裳尔其间志有所尚者竟亦以莫可柰何付之莫知所以致此之由去此之道夫人之参其身于天地中者岂必人之荣我而后能立哉执义以往天下有莫能御者况五品之秩森然明也吾得执国制以为倚公理之在人心未尝泯也势之亟重有甚焉者吾得以执人心之公而反之理可以张屈抑之势制足以振品爵之崇故愚尝以为今日之武受抑于文者十一我之莫能自立十九也且其所取以自范者缪戾尤甚既以威莫如州县诿叹矣乃曰剥媚之行州县固名文士也我何人斯而独不然抚按藩臬之我督者固伟然名进士断断然天下望也彼亦州县之为尔我何人斯而独不然效殖货利以求容媚方以为庶或可申一二不然甚矣计之良也孟子曰小国师大国而耻受命焉是犹弟子而耻受命于先师也然则武秩之邈乎其卑而谓尽由于文士之私者其然乎其不然乎如耻之莫若师文王为今之策亦曰执制以自守据义以行制而已毅然不诿于莫与之微斩然不牵于剥媚之习则吾固参天地区人也彼之并且上乎我者将唾秽而奴视之矣吁独与之角也与哉独求不我抑也与哉千兵景竹亦有志而付叹者抚按请于廷而军政及焉反此而遂有由矣愚惧其莫知所执也因军士之请用是书之以贺天下事亦为之而已矣景竹尚勉之

○贺屈元礼生子序

屈子年三十余矣仲秋之夕得嘉梦觉而生子众咸欣欣于余庆之说相率征予言以贺焉予曰人生而无以嗣于其身者能几言之抑可以已也或者教以成子之贵乎然今之教者于圣贤之道则戾盖自门左之悬久废马援之遗王昶柳玘之诫特书于司马氏者与乡习之愿符节遂脍炙焉夫天地四方之事举而属之男子之身矣其负荷若之何也顾沉默之名而精若义者能堪之乎是故孟子善养浩然之气正以为天地四方之射也汉人因有生男如虎犹恐

其鼠之说予非敢以汉人为适中见也第中人之性振其气而挽之中也易抑其气而企之中则难中行不得惟过中之狂士属心焉仲尼之所以善于造就也矧今所取当于天下之教者何如哉爱其子而深为之计顾以守雌之道进焉以水济水血肉虽可保永于世而德义之有于身者去贤圣或邈矣谓之能成其子也然乎哉疏少傅不以财遗自谓为子孙念光奕史册矣而犯者屡焉矧道之见颂于君实而世又率以为是者谁则挽之诸友耸然曰元礼少学礼知此义者也予亦欣欣然赓余庆焉幸天地四方事于此子乎攸寄也用是次之以为贺

○赠林东皋考绩序

予于东皋先生均业儒友也然东皋令琼山计七年于此矣实有大丈夫义焉古之人有曰君子居是邦不非其大夫自斯言之出也故凡有莅于人者虽心暂淑慝纪事执春秋笔焉其显诵于人裂采而赠之者必掩咎为美增细以巨虽以龚黄召杜显显然拟之者实反出严来下用是善恶诋冒莫可凭倚君子习见其然故凡采而书之扬歌而休颂之者皆将曰此不非其大夫义也虽历历可按者莫之听焉夫以善恶之相冒若此声乃底实莫能白之君子之心又若此今欲侈言以为东皋赠也亦奚益哉是故东皋惠泽着于人心政声播于行口绩业留于郡邑之志瑞不必多为之赘然东皋此以奏绩行也行将擢而之他郡陟而之科之道其统领有大于琼山者统领大则其绩之所奏随之东皋以其迎刃而解之才乘迎刃可解之力随职业之所到执平日之所学者毅然行之罔徇身以忘国母私已而弃民小之琼山大之天下则闻誉达于遐迩功烈着于不刊循良宪诤映耀今古予得以从而鼓舞于其后矣吁岂不盛哉岂不快哉昔子路去鲁谓颜渊曰何以赠我曰吾闻之也去国则哭于墓而后行反其国不哭展墓而入谓子路曰何以处我子路曰吾闻之也过墓则式过祀则下有见善以相示者东皋先生何以复我

○赞萧氏一门二节

予读东洲李太仆所为双节传观二母寡于华年依孙子为命历三四纪而念夫之心迄如其始矢志天日苦志丝枲未尝不壮其竟于守而可为顽懦者寓激劝也嗟夫人之自立于天地间能以其身为天地万物之依者其道有五焉五教贯三才而为一君子重之然圣王制世御俗所急而且先者惟臣之良妇之节崇显褒异拳拳然持此以为天下励者是则何故盖以义合者而能不悖其心可以改醮而他从者顾终守于一志行类无往非其自立之地焉矣况夫遇有常变君子覩人恒于久近间求之昔人谓慷慨杀身易从容就义难久近之谓也是故夫亡则无所为矣无所为而一从不移虽金石之坚未能远过彼夫存之备妇顺而家理宁未足为难矣士之从事于上多者计三四十岁少者亦不下十余岁承于显或悖于幽毅然誓不以所戕负吾君者竟于始或渝于后历年所而心一焉彼殉君于日月未足为难矣藩宣不悖可以见臣义之终孀守克坚足以辩妇行之备故君子论人廷之效忠闺之着节无轩轾焉而厉世振俗独于此拳拳焉者亦以其久且大者身有之五教于斯贯焉故尔虽然彼士尝学问知礼义以应上求者亲师友以撤蔽酌古今以达疑谓能尽所事焉可也闺中之见视此何若矧士之布列在位考其所以受人策命之宕而不贰乃心者则或鲜焉易于闺门女子之间难于多士讲学之际二贞并萃独非君子之所歆扬而不容自己者乎孟子曰百世之下闻者莫不

兴起也况于亲炙之者窃慨臣义之衰节守之坏有如三才所籍以立者而仅于二妇焉寄之则夫祇念母氏不改之心奋臣子不悖之义侍御公之造福南粤有必然矣予粤人也鼓舞之怀不能自已用是书之以颂

○赠黄村赵先生升靖安大尹序

黄村赵先生楚之枣阳人也以巳未岁中乙榜署淳学教事始至进谒于予视其貌忠信温裕若有道然顷接言议又欣然若以是官为幸者夫官教则呵从不足禄入不豐徒寄空名于诸士子之上一切纪纲程约不克自树立且严戢时俗薄之师严道尊之实义善人多朝廷正天下治之实功世不知有此久矣先生独欣欣然若加荣焉自非心有独见其行之也将举百余年既废之绪而直任之也能之乎心窃异之阅数月见其模范端严程约整戢道德为师文课不废凡一言一动足为士子楷法士习稍稍丕变计至壬戌二岁有奇矣先生之教无怠于始弟子服先生之化不岐于初教用有成卒如予所料人心同然先后巡按际岩周公罗岩袁公春洲崔公均以志向高洁模范严整奖之盖先生忠信淳一则行之外必能如其中先生以此职为荣则知此职之不小其行之也必能尽此职之为大师道立而善人多于淳有成效矣正朝廷治天下方日望焉先生归自会试铨部以绩最荐进靖安县令天子俞之夫令控有一邑禄入稍裕呵从塞途经百凡出纳苟效鼠狗计行之可以厚囊橐夸耀闾里即所当事巧便吏书习于计簿欺谩苛暴勇猛操切百姓违道干名雷同上下上府每每右之将有显擢故凡职列于教者人恒以不可以府县以藩臬以风纪几务短之盖谓所司之繁简异事所理之巧直异功有司事在巧迎善伺同时沉而沉时浮而浮与司教者之迂然礼义抱守区区相悬也时俗之薄于教君荣之矣有司过峻厉夸声势父母斯民之道幼学壮行之守邈乎未之有闻也世俗荣焉君知反而为之乎孔子之蒲以恭敬以信忠信而宽明察以断为子路颂夫治蒲三善非俗人所以荣令者圣贤每加意焉先生忠信淳一温裕不苛即所肃诸士子推之则其见效于不偷不扰者特余事耳见礼知政时俗所荣先生弗为之必矣虽然道一而已矣道行于教者道之分量浅浅在于能充君子之守亦一而已守贞于教者守之分量小小贵于能执令萃有百责大抵刑教十之一理财十之九百职惟令临财惟琐惟多民之黠者讼讼必求胜窥衅隙以投所好靡攸弗至先生操持于始能无变于终乎今日而上而下而旁交百凡垂涎于令小不如意辄怪言怒色坠渊之计行焉得丧利害李少卿谓肠一日而九回有之先生无恐于一二能恐于十百千万其人乎真西山大儒也刘平国谓与余景瞻并用必有可观县事簿书山积狱讼丛委奸人倚以变化为利鼠穴其间窒于此则通于彼市狡挟公符以暴于乡豪横胥朋比以威剥于良善一不加意民有不得伸吁而死者先生能勤察于幽且险刚断其祸福于民者与其可祸福于已乎扩充未至则道之分量有不尽执持未坚则守之分量有不充世俗之所薄所荣终将出入于其间矣吁道云乎哉吁守云乎哉予于先生宦游于淳见善相示闻过相告旧矣故于诸弟子之需一言以为先生赠也窃効颜由二子之相与赠处也备述县教难易以为先生诵

○赠蒙生德范还遗金序

今天下何世哉予筮仕得游中都历天下既归乡间叹世君子每有财帛世界今不如昔之说

予始闻而疑之以为此特市井小人自为风格性中只有个仁义礼知我辈读书知礼义辨别素明天光焕发当不如此已而交与益众更历既多乃知我辈出没于声色货利之场不得不已奔走于富贵利达之际老死不休蚁之附腥膻蛾之投燭火无以异也视市井辈反为过之古昔公道大同利无彼已下此小康下此人渐浇漓叔世季世利趋便夺发冢诗书诗云曾是掊克曾是在位此直叔季之下者耳讲明于读书穷理之时不自欺心于暗室屋漏之际难乎其入又不必言矣攘攘利往天下皆然也而谁与易之予之诵此言久矣一旦乡龙岐父老抵予舍揖而言曰村蒙生端字德范县庠弟子员也素有行义问厥所以则曰先辛未三月海寇犯村举村挈家奔散家用百凡无暇为顾余达妻特持包袱裹银肆拾两及余物匆匆失之生后至左右前后无有见焉生亦不知得之者远近间人物也数日得失主人氏当官众完璧归之包袱内藏纤芥无失先是张氏讼官疑似扳指官迫为急乃生心事白日青天有是举也不徒决疑狱于一朝而因得以脱周隆张衡鬭争不已之患不为利己不为祸人分金酬复生视之若将浼焉余达之恳求村众之怱慫生原非我有原无此义之言又若义利之辨有以豫明于先取舍之分不待今日虑之而后得之者吁贤矣失主未明迟回有待今日虑事之周先今居家以礼孝友无间姑勿悉只今财帛世界居财帛世界之中独能自脱于财帛世界之外义利之辨别不爽屋漏之昭监如见有之乎不复有斯人也而今或有之诗云谁将西归怀之好音因乡父老请不辞而为之序府县奖生喻义学宪王公进生廩膳生加优礼上人之所自为可矣生志趣远大举此措之何所不可区区见与于人生之初心不如是也不详及云

○贈史方齋升浙藩大参序【为乡土夫作】

琼去京师万里而遥国初以宪臣遥制至宪宗纯皇帝始令分巡道兼饬兵坐按识者以权重势专补按轺之所不及民之幸也然贤者藉是权以安民不肖者则藉是权便已甚者不必言矣贤者不免大抵杂雅俗半真假行已清浊有養望待迁之心而无毅然有为之念官则利矣民无利焉至今我生不辰田里差怨人思国初之安不见今日之利勅諭事理天颜咫尺瑞未之有闻也闽晋江史公以嘉靖乙丑守琼旋晋兵备今七载不贪一节已出土民望外矣其政事则又井井条理胥吏不得援为奸蠹省徭费清符牒详讼狱宽捶楚三州十邑之人前所不便及所愿欲而不得宜天下并宜于璠者公先后皆罢行之大者文详小者立变琼内黎外海寇乱频仍民自视无一日宁矣当事者动以闭城退守为策残野饱食去来听之平时无保障之功际变无御敌之勇几不知兵备道为何职矣今昔异位公独毅然以身迎敌为士众先昔之骄子儿戏尽法律之与守琼日持法不阿无异虽经败衄不易初心士之不以成败论人者知公认真之心而奉行勅諭庶几矣士论谓周殿山之方正方松崖之才守胡嶺泉之峭直胡南山之和易公节有之勤训练似顾洞阳志平寇乱似涂伯辅今晋秩参浙藩政愿得一言以贈夫公昔以宜天下者宜琼矣以宜琼者行之虽天下可也何有于浙昭昭政绩具在口碑不为悉焉可也所愿于公者无替克修之功益广涵弘之度无私党矣行之有未至率真道矣扩之有未周皆性分中不满分也诗云如彼飞虫时亦弋获用书以贈

○黃广台思亲百咏序

孟子以善養浩然之气自许集义慊心以入则孝出则弟守先王之道以待后之学者自任修

此孝弟養成此浩然泰山岩岩塞于天地孟子之所以充滿于其身者不徒然矣斯道也堯舜開之史臣約之曰惟精惟一允執厥中舜以徽典繼堯孟子以養氣上接堯舜無以異也然二典隱而不發知言養氣憤激人心源無異也而孟子益為之擴其流焉韓愈氏嘗推尊孟氏以為功不在禹下以此而已自是而後上之人無數譽髦斯士每以士氣言之鼓舞誘掖言氣不言義配道與義而義存乎其中矣義氣節氣之說大抵宗旨孟子以浩然之氣養士以繼往開來之責道德性命之微屬之士也故聖君賢相百爾有作得士為功而今之士下應上求則有大謬不然者誦孟子養氣之言不知求之入則孝出則弟之義職在庠序朝廷官之曰弟子師弟子師云者無能可否于諸士子之間建空名于諸士子之上弟子行之師和之去孟子粹然仁義道德之言別為一種無謙遜無長上竟利鬪狠世俗之氣唐代肅而下大學生丑行無賴今日如之商賈之心屠儉之行乃留更仆未可言也是舉也是義也至大至剛配義與道有之乎其最高焉者決狀元進士于科第之榮而亦不出于貪饕富貴之念有秀才之名無士氣之實顛昂蹇蹻較之孟子雖若毫厘之差義利邪正較之孟子不啻千里之謬過大學之門而不敢局顧尚何能仰視其學徒者哉濟濟多士瑞嘗目擊一方反之天下思及天下驗之一方同流合轍為我國家二百年養士痛而曰浩然之氣將絕响于今日也安得孝弟之人語之以師長之職一旦廣台黃先生執思親咏刻示予更祈櫟括以為弁曰將執之令諸弟子見其端知其悉循循善誘有依據也先生教長沙長陵水名人士皆有端范貞教之頌先聲有在非苟祿建空名于諸士子上人也身言兼之回道術于既倒返士氣之方顏師道立善人多朝廷正而天下治有望矣用是不辭而為之序詩云孝子不匱永錫爾類廣台錫之真正大英雄却于戰兢兢兢臨深履薄得之晦庵之說得統孟子諸士子慎毋以予言為不然云

○贈王朋江升寧波府太守序

自秦而下天子奉天撫有天下內公卿外守令殷輔參陪官惟備矣君子謂惟守令為重蓋先王以其不能獨理者付之諸侯今以其不能獨理者付之守令今之守令古之諸侯也我祖宗待守令加隆繩守令之法亦加嚴悉日久法玩皇上御宇吏治一新銓部諸臣拳拳然守令為念然迄無如孔門由偃漢世卓魯龔黃應上求者起于官為傳舍不如私士子人之專入仕之初有異心矣而又聖賢之言不足以破世俗好官之論患得失為初心善承迎為完計理不勝欲而卒之民之于守漠然不相關矣論者欲為核實之方久任之法久之誠是也此自國法為良言之耳法有所不及君子一體萬物不以時而加損率性而行不因人為作輟是故立本于田宅樹畜之先和心于庠序孝弟之後文為經綸武以保障仁興利明誥奸隨事而應应于其方莫非為民計也亦莫非自性而來也彼居然世俗之論無忤于撫按無忤于鄉士大夫而又欲無拂于民簿書催科儀文獄訟富與教無聞焉性中曾有是來乎傳曰心誠求之雖不中不遠矣言保民也保民而分所保之念于干譽之人此時此心為誠為偽心誠求之自性而求之也性無是來君子率性是故上欲官之執此以往同所性于人上不欲官之執此以歸守所性于己聖賢之道也道自聖賢參于天地故愚嘗以為據孔孟盜說而行之官之善也別為一種巧宦之說圓變自今不自古昔不善官者也而未易與俗人言也隆慶三年春寧波守缺銓部以朋江請天子俞之朋江能于性者也乃浙溺女貪詐之風淫靡游食之俗今得以改于其旧一人標準而世俗之論破矣用是因同鄉輩欲為贈忻然書之若夫縣令之政御史之真君子曰青夢先生為不亡者古人愛人不以頌而以規言可略也

○贈史方齋升浙藩大參序【為兩學師生作】

琮古珠崖郡今敝區矣貨饒之名尚在人耳有吏于此後視今今視昔未涉鯨波先營囊蠹甚者蓄貨積實如餓豺狼上率下法貪濟貪而民日居割剥吞噬中矣且地去京師萬里按輶不及毀譽易淆甚哉賢者之難也莫能久于其位而貪者酷者焉能無者比比巧彌縫蒙私庇無利于民有愧于上謝令去不亟上官不我亟也中人值此干譽動心百計逢迎無恤人已暮夜無知瓜子海物不可得而言矣奪諸彼以予此且惟藉譽口則申媚之士子鄉官之奉一需之民而民愈難乎其為生矣遐陬肆意貪泉負心嗟嗟遠民蘇息何日閩方齋史公來自晉江守琮旋晉兵備七載一日如節省民費嚴勅吏胥謂民冤之所及也天水違行雖小而慎姑不為悉珠琮之名人所忻得公習觀之矣饋遺先例公無犯焉土貨民財不入胸次脫于其俗慊人心矣燕喜課士訓先仁禮得一善惓惓然獎而納之惟法所至則又小民同公不士故異愛民愛士有權衡焉先例貨若土而遺民不與行也持法不持私後先政事大率如此書曰罔違道以干百姓之譽罔拂百姓以從己之欲公其有焉以此益民民得蘇息先時兒戲論兵公身先士卒寇來迎敵退蹶踪士驕將慢不奉命舊矣公一以法律之事有誅之不可勝誅者不得已存化行以漸之心而實執孫武宮嬪之法屢經敗衄益厲初心士之不以成敗論人者反公重焉知公也志紀黎亂屬之涂淝之才與志十字郡邑公日夕未忘也外寇方殷業未暇及可謂有其志矣士論上周柳塘殿山次及公言兵則謂公發揮之可涂上下今晉參浙政乞言以頌夫公奉職不恤身執法不為黨淡泊養心不見貨利是道也普之天下可也何有于浙士心鏡善惡無系于私可念也用是不辭其請且使後公者知有士論公普及有日亦思為璫計云儒有高不臨深言無忌也今日私恩明日公法漢人之母替發揚之功益廣兼包之度一體萬物蕩蕩平平又諸士終惟厥初之望頌不忌規意也并書以贈

○壽南瀛吳公八十一序

南瀛先生吳公家郭南自幼以忠信之美聞于黨里雖溺于世俗華靡之中不安于世俗華靡之習谷神不死謂天地根庄老發之世之言養生者宗焉公得天之美不期近似已而業郡庠賓上國交及天下貌古心實識者器之藏其虛寂之體而不能顯其因應之用師庄老而失焉世有之矣嬰兒未孩玄與完固然區區內守無補于人无裨于天下國家君子無取焉弱志强骨庄老非為養生計也養生之秘率不外是存養立命言其功還虛久視推其效無二說也公壯年學問本原于孔孟發揮充拓執古為貞宅御今為應塵實之庄老歷仕歸田中道若性瑞嘗掇之始末秀才事業無傳于人不必要言矣世宗皇帝銳然有為初年志趣超三迈五雖土木一役亦罕有以是當簡在者公晉甲科郎署工部適承其會鮮我方將經營四方進四品留用駸駸然世宗之視公大用指日矣念彼共人取途權要公上答天子下揖相公凝神抱一執此而往泊如也以此罷歸亦竟以此自信雖享有田園之奉而胸次悠然實超然于富貴之表怡怡閭里將若終身且日規日勸謀與鄉人同歸于道事之苟陷不明則亦已矣一有明焉子姓至親法不為諱失之于前復之于後與先日逆觀嚴氏今日誅亡守一不阿無異張公藝以九世聞無能改于武后之非而重高宗隱忍之過君子尤焉公不為無忍不為百忍白日青天其心其事大率如此用能滌除玄覽開闔天門斂藏于專氣致柔之淵迅通于沖用不窮之會惟公得天惟天壽公不偶然矣瑞公門弟子所愿百歲師公今癸酉二月八日公八十一誕辰也

乡父老子弟谓予知公征一言为公颂先得我心乐共此举乡人之言又曰公父复庵唐尚书讳贤秀为琼始祖公绳祖武发祥有在复其见天地之心乎天下之道蔽于是矣凝神立命无越于此复庵独观于复惟公以复得天源蓄流长父作子述诗云乐只君子胡不黄耇乐只君子保艾尔后公父子以之并书以颂予伤公之未究厥用也载营魄抱一言公言其心也荣公之寿本于复庵原其自也道其实也唐尚书公世远事湮言可略云

○赠周柳塘入覲序

善言仁者莫如伊川伊川之言曰仁者以天地万物为一体天地万物为人性所必有天地万物为人道所当行仁人性也少有不尽之分而生人之道缺矣我祖宗设官分布寰宇待守令至隆律守令亦急而峻夫其特于守令加之意者盖天地万物之性于守令也体之专天地万物之性于守令也行之切广土众民君子欲之欲我性也是故寒为之衣饥为之食争夺焉与之息有伦理焉讲明使之知所趋事为之制曲为之防犹之吾身言身则疴痒呼吸之必调言道则起居食息之惟慎是故守率守之职令率令之职而性道行乎其间矣慨自性学不明国法日久弛玩谋家利己之念胜彼万物一体之初不曰官所以行吾性也而曰资之以荣吾家也操笔而儒者操戈而盗苏老泉未若远之可忧万里京师之琼实当之间阎疾苦之情顛顛之状生灵之命悬于守令不悬于天子尤有难乎其为言者矣柳塘周公今三月莅璠一以圣贤中正之道行之即所行政若宴僚属清符牒惩恶劝善节用爱人和平之中严毅济之宛然颜赐由宓诸人矩度下车之日百利随兴百弊随革无所不罄其心矣谆谆焉教化先之举斯民同归于善公用道学飭吏治龚黄卓鲁不足为公言矣不徒从事于簿书狱讼之间而直探斯民心心相感之妙用圣贤準矱收圣贤治功穷谷深山莫不翕然有去恶惟公是从之心莫不忻然以前无有也为公颂若不属已自与已不相干前后之守则然也公认得为已何所不至二百年来民情今日始泄二百年来民心今日始安秋八月藩司拟公入覲遵王制也琼民幸公之来悲公入覲于公又不免一岁之隔赤子慈母可朝夕离乎士大夫之情与民同之征予一言为公赠予嗟吏治不贪则俗古君子不可复见于世也于柳塘见之忻然书此以赠且以促公覲事毕而来归速慰民望焉

○赠陈元山任古田司训序

圣天子寿考作人付其事于国子学在外付之府州县庠成周九两系民师用贤儒用道我朝因之重选也近年以来学校官无可为诸弟子范者诸弟子自为就师特营举业希科第执簿呼名一吏足矣三五员费民禄食共而为之铨司视是空名无补薄之不与权显迁次士子得此因亦自薄一官终身素餐为事见今日之非不求之先日之是借口为贫而任习非不可破也而祖宗设官初意无可言矣元山陈先生幼负大志一旦以资年应贡授古田学训拜命天庭充然无卑贬其官之意日语人曰君子性定于天官爵不与胡安定教授苏湖今如见也特非人为之耶吴沉诸贤相继卿相我朝有初志刚气迈予闻而嘉之愿一言为元山助元山之已知者不必言之矣夫君子讲道于读书穷理之时而不能不移易于外与物交之际是则世俗之论天下皆迷牵之而已浩然之气原自天与惟孟子发之后世因之有士气之论夫士威武不能屈富贵贫贱不能移任以天下诚非复養浩然长河东注百折而不回焉不足与有

为也以气养士无遗说矣然孟子义廉以生今人争克助之长一切利则趋势则竞无长上无谦逊莫能由孟子之浩然会尧舜之精一小人而无忌惮也皆以士气言之俗谓秀才无难管言气之无有于道也学校官不能止其用气之邪反或和其用邪之为当相率为谬周惇颐曰师道立则善人多善人多则朝廷正而天下治矣其能之乎差若毫厘谬以千里是无惑乎圣天子臣无克艰之思心膺恒难其寄之叹皇皇当宁若无一臣可为倚赖也朱晦翁告陈同父曰真正大英雄却于战战兢兢临深履薄得之若气血粗豪一点使不着也与孟子浩然之旨正相发元山正气人也予虑其或牵于世俗之说也用是即士气之直养无害配道义者以为赠元山久所已知者少有过焉吾气正而相说以解矣不必言也

○赠顾怀东晋京兆丞序

天子奉天子民我祖宗临御在外以其事付之府州县布政使统之两京二十府直隶六部顺天应天不以直隶称秩三品体貌与部寺一根本重地天子所寄以奉若天道父母吾民尹若丞其选也王化首被四方瞻仰故凡爵位服命望司府特崇重焉列圣率由未之有改至今晋秩往往六卿之亚布政使无及焉人荣且崇之亦未之有改问职分事庶富教无闻焉素禄旷官视外司府为甚彼其人之自视初不曰食浮所事人也铨部亦初不曰职业不修人也其弊起于仰望待迁之说谓官列九卿不应复尔细务又畿甸法工部理街渠御史分五城巡察厂卫廉奸犯近侍董国威拱卫宫阙奠一人府县事无侵及也今也不然有侵而为之者四者权力与府尹丞为彼侵之从而与之事可自行者谓体貌隆重不当为侵有于人者谓先例于是不能反祖制无是也而今自失之顺应之民休戚于尹丞不相关涉尹若丞今日人犹荣且崇之吾诚不知所以为崇不知其所以为荣矣怀东先生壬辰登进士第任给事疏大礼大狱诸臣恩宥与先皇帝争是非忠心义胆争光日月三十年危且贱安心处之无几微见颜面诚知吾职所至而义与之俱未有守道而失官者毫发谄随不为也志气既起塞于天地举而措之无不可也今春以银绢参陟丞京兆诗云商邑翼翼四方之极圣天子化行先近于怀东乎属之矣北上有日执赠处义悬即气节稽事功占小于大忻然书此以复非为佞也若夫昧虞廷协恭之义漫不可否事占笔涉位署惟谨如韩退之所讥者又不必为怀东言之矣

○赠赵三山德政序

天下官于民称父母自县令始其切近于民称官则一邑之人春温不称官则一邑之人秋杀亦自县令今天下令何以哉下民易雪取脂膏而囊橐之盗跖四知口虽不明其然心实视之天下同风为当然事其不然者狃于世俗行已清浊间于今为利之说执而行之上司过客乡士夫有私厚焉秀才一介儒生无势而有低昂口舌厚学校士又今人谓居官第一事也上下浑成一团私意心与口居之不疑又视为当然而行之矣贪者此其弥缝不尽然者此为要誉迁擢完全之计私厚用财物财物民之脂膏充之私厚听乡豪武断贷于此冤抑于彼今之仕也为已曾有念及吾民不暇及其它者乎我太祖视民如伤执周书如保赤子之义毫发侵渔者加惨刑数十年民得安生乐业千载一时之盛也今也不然变而杂犯其视之为当然已非一朝一夕之害矣况琼去京师万里贪泉易心毁誉淆杂予方悲豪杰之士无所待于人而兴者无其人也万历天子登极之秋三山赵君以奉化邑博任琼令旬日间一邑忻忻向荣百凡

改人视听父老谓世道一新二百年来无此县官也琼今日得有机会饥食渴饮德教流行交会之间说者之言有所感发而然非虚美也三山政绩见纪琼治录刻本其未详者谆谆然礼义忠信桑绵麻豆日为民喻劝相质为奴之俗用柳柳州方计移之里甲绝其费用纸赎捐之与民随事而应无非民教民养先圣贤有行之法三山直方岂弟实政实心待小民温然可掬赤子慈母不是过矣僚属吏胥豪家奸党先日借之为虚誉视为当然三山一以朝廷明罚勅法行之一时人快其峻目之曰赵御史爱三山者持不获乎上民不可得而治矣之说三山曰获乎上有道舍诚明而得之上吾不知之也吾不为之也三山气刚行峻知有民不知其它大率如此用能脱小民于水火之中而不免置奸豪于夏日秋霜人所不堪之地谤言朋兴愿公之去良有自矣昔人不以得民难为子产病无得于势豪败类世俗之见曾足以为三山累乎学校有知识士无私计者忿然不平司训冯先生率之乞一言为赠以释且曰请有规焉士习以赠文市利子方病之今日不得其平而鸣视旧例迁奖则举有大焉言之不可以已也为是不辞其请车攻之六章曰不失其驰舍矢如破并歌之应师生意若曰太刚则折不讲于太和元气区区鬻火强阳是务去焉庸医也持乡愿易血气予不敢为三山愿之矣

○淳安藁序

许文正尝语人有书也须焚一遭之说夫坑儒焚书秦之所以为暴无道也而文正之言若秦之与文正非与秦也自炎汉以迄于元纪录久繁文籍之盛汗牛充栋灾木费纸不足咎也其声实不中乖违正道为古先圣贤累为六经语孟蠹诚若莠之乱苗郑声之乱雅乐乡愿之乱德君子不容不深恶之自元迄今殆有甚焉使文正见之又不知当何如其为言也然文正与秦至文正之身则又有鲁斋文集行于世夫文正之与秦不得已也文正之不免于为文亦文正之不得已也瑞平昔妄有所作滥糊文章者欲效近代唐山人置瓢弃之江流之中以还造化而又私念以为出之吾心本诸性命造化赋予于我而我为泄之或于六经语孟有辅翼焉且今时俗议论自以为是牢不可改亦或有以破之暴秦有作不居可焚之列夫吾人有言莫非造化置江流以还造化不可谓无见也然天下之人赋予稟受出之造化犹之我也或感焉而践之有未尽或反焉而行之有不中操造化之予于我者相与觉焉且同志之士得有所执凡我言之未当议之未详取为我规焉我也人也互相砥切均得以还夫赋予稟受之故较之唐山人所为有大焉不犹为可耶近时文人有作必求名人君子一言置简首谓蝇附骥尾亦一日千里而借其言以信之天下后世也夫使吾言无当虽圣人吾与焉天下之人其心其性原之造化是非有公不能辞也使吾言于道亦有合焉圣人不吾与天下后世不吾与吾心具一造化自有的见不可转也夫人有言亦求之吾心质之先圣以参考焉而已矣不信之人心而信之人言非信也用是不自嫌忌取平昔所作自编叙自为一语识之以告同志集刻于淳安邑更名淳安稿云

海忠介公全集卷之四

卷之五

书一

启谭次川侍郎

复史鴈峯太仆少卿

启史方斋琼知府

复叶立斋陈熙斋诸年丈

复熊镜湖军门

启熊镜湖军门

复周柳塘琼州知府

复王七峯琼山知县

启谭次川侍郎

复赵大洲阁老

启朱镇山工部尚书

启阁部李石麓诸公

再启阁部高中玄诸公

复严养斋阁老

与锤心瞿督学御史

复余斗南御史

复谭次川尚书

与周一阳主事

复周一阳主事

启岑小谷给事

回按院张惺宇

复淳安大尹

复吴悟斋操江都院

复徐五台都宪

复李石麓阁老

复梁浮山中书舍人

复徐存斋阁老

复张笔峯侍郎

复侯星吾潮州知府

复史方斋琼分巡道

复徐继斋尚宝少卿

启谭次川侍郎

启密云凌洋山兵备

启刘带川两广军门

复朱镇山尚书

复沈万川会昌大尹

启殷石汀两广军门

启刘石圃诚意伯

复吴悟斋操江都院

复胡杞泉都掌科

复欧阳栢庵掌科

启徐存翁阁老

复工部尚书林退斋

启阁老徐存翁

禁妇女买卖行走约

复王闻源参政

复巡按龚怀川

复总督凌洋山

复总督殷石汀

寄博白大尹林仲和

复陵水大尹吴秋塘

复巡按龚怀川

复巡按龚怀川

启户部正堂郭一泉

启户部正堂刘清渠右堂陈洛南

复按院张惺宇

复分守道王用吾

奉王尧山

奉王忠铭翰林检讨

○启谭次川侍郎

闻公日有归念诚意伯人至复领求退不获之说汉张楷之谓樊英曰以子之出能辅是君也济是民也公负重望而起人之许公公之自许何如也如斯而已而遂归耶北来人询及仓事公励精过人殊为欣慰户部错认做个钱粮收头犹之工部错认做个木匠头公今所事钱粮收头外户口树畜有进步耶等而上之大臣以道事君疏通民情成就君德荐引人贤无不可者如此而归公于初心有慊然耶心有不慊必以初出为悔以初出为悔何不即此一出行之俾我心慊老成典刑外公无可望者天地万物原君子本身上事见难而退自附于知止知足之说曰既明且哲以保其身误矣公今日只欲如汉二疏而已耶贤哉二大夫俗论也谬说也不敢为公愿也

○复史鴈峯太仆少卿

礼以积财能散为贤者中行之行生二十年前会试经南都闻翁名称诚哉居廊庙济天下处乡党济及一方仁之为道无施不可也近望沙公备及与今昔耳闻不谬正欲达之左右望翁成终成始施于有政适叶札下及使归特此申候致私念仁道不大行而加不小施而损惟留意感公嘉惠段绢槩不敢领酒果拜赐矣并附谢

○启史方斋琼知府

三月间闻舟次上新河口令人探之则已发帆数日矣咫尺间不得一瞻颜范可恨可恨仰惟我公守已冰蘖视民若伤诚百年内未有太守也环海感戴何可言尽南来人因问而说云自公一身言公无可议矣然贪酷未免肆行吏胥如旧为害里甲用度徭平加征未见其大有改革过前日也纤微曲折照察不及终为不满之分此则在加之意而已水清无鱼治去太甚别是一道尽以为据而施之政事焉不可也生自入仕至今未南归俸金所入仅仅足用余无分文可债可货田业止祖遗粮一石二斗外未增一亩一升有以二事呼瑞衔进状者皆诈伪也乞台下一查治之勿少假贷上碧崖下县属并乞转此相谕人便特此申候兼致愿私万惟留意瑞南望沧溟惓惓无任

○复叶立斋陈熙斋诸年丈

贵府事生习闻之矣与今叶翰种种说无一参谬为虺弗摧酿至今日以千万人之命论之前人之罪不胜诛矣今日坐视之人能逃责乎天假贤守才足堪谋足济直前担当直出数十年群守之上生为诸丈地方庆幸久矣而当事者啧啧有言焉可怪也百凡事可以尽心得以竭力无不为诸年丈少効一二以期无负但核兵克粮言执法可矣论情则处之亦未尽是用其力而不满其食亦人心之所以不服也虚数虚粮事非一朝一夕得非情所不便而不可行者欤将相和调则土豫附成天下之事而以乖戾之气行之彼我文武区以别焉不可也大守不

久大用始终造福于潮诸公罄所闻见左右赞襄侯守益励初心宜通而通宜执而执则区区至愿耳诸事不及尽者付回人口数年殊缺候问不便也统惟台鉴

○复熊镜湖军门

王道长至拜领叶翰淳淳然地方为念仰知海滨有赖十年巨寇一扫而平不难矣从前军门每每不能立有实功实业其病有二第一是怕自己死第二是怕士卒败憧憧二念而其所谓勇往直前者索然馁矣能有济乎广中用兵见敌便败全坐士不用命一句谭二叶前后迄无能执孙子斩宫嫔法尉繚子半杀士卒行之正以儿戏将官骄子士卒故非一日万一约束加焉激而他变成败观人百谤随之是亦畏败之类也今日之事果能不蹈前辙矣乎士卒必用吾命执事能了了然信之乎如其不然良法胜筭无所用之鲁仲连论田单所以破燕曰将军有死之心士卒无生之气夫古人岂欲其死与败哉道如是也机如是也万惟留意今日之事惟此为急若其设伏用间伐谋击虚目下船所宜造兵所宜募地利寇情事之不可遥度者此则先立乎其大之后一经纶之而已无难事也朝廷公念桑梓私怀瑞临楮不胜惓惓

○启熊镜湖军门

君子成天下事类皆虚已乐听为之生非其人感公虚已下问且自念他山之石可以攻玉王道长捧叶札据愚见随付莫员外奉复矣料公自有成筭刻日见功不必更为赘论医道多端急则治其标缓急皆当固其本广寇大都起于民穷民穷之故多端大抵官不得其人为第一之害扫平之后愿惟别加之意使元阳得有底定之所焉斯为可耳瑞尝谓兴利莫如久任除害莫如募兵自以为切中今事区区致望于公此而已不然止绝于今祸将复起于后我兵中大半贼人虽一扫而尽宴乐太平生不敢以功颂也生叨转誉黄老母年八十矣不堪奔走不得已北上荆妇枢归狐死丘首道途多故欲乞一钩牌以保无虞若于事体无妨惟公惠之夫马廩给妨百姓烦驿递不敢求也

○复周柳塘琼州知府

于公原未有闻识也旧岁入京会虞坡问及坡翁称正为海外求此人物时不胜喜忡穷荒僻壤得此大贤为之困者苏疲者息矣何幸何幸下问地方事及居官矩度此等具人心布方册举而行之而已本无俟于人言况在执事高明之见尤不俟人有言遵而行之者耶今人每谓做官自有套子比做秀才不同不可苦依死本俗人俗见谬妄之甚区区惟愿明公执我经书死本行之而已如此不执虽熟人情老世故百凡通融失已失人全无用处士夫如通判廖平庵年高识邃生自幼业师也可就问余事散见奉去数帙中兹不备悉明公寄三千里之命诚不可草草为之昔人谓伊周之道得一县亦可小试况一府耶瑞不胜惓惓

○复王七峯琼山知县

承不遐弃赐之华翰捧诵之下感激倍之琼山百姓日就憔悴正以数十年来未见一好县官

也执事满怀经济小试割鸡顾此僻邑何幸何幸生亦与焉用是日日南望台下切瞻仰也今人居官且莫说大有手段为百姓兴其利除其弊止是不染一分一文禁左右人不得为害便出时套中高高者矣此不足为执事道因有感触姑一质之人便谨此奉候外条约二册尘览亦冀执事有以教之有以取之也诸不及尽者惟台鉴

○启谭次川侍郎

钞关李生政至拜领尊札公之爱我盖不特以同乡之故而已矫枉过直古今同之不过直不能矫其枉然生之所矫者未见其为过直也事期有成必不至于宋人之戒但公之言自是龟鉴不可少者感荷一念何可如之何可如之江南粮差之重天下无有古今无有生至地方始知富饶全是虚名而苦楚特甚其间可为百姓痛哭可为百姓长大息者难以一言尽也国计不可缺矣分外使用及吏胥诸人之弊若公少加意焉宽一分江南人亦受一分之赐矣江南巡抚完钱粮是一大苦事是以一言为公读外条约二册告示八件就有道而正统祈留念

○复赵大洲阁老

政府新命闻之忻忭百倍公任以天下为天下苍生不觉过喜幸也今既数月矣施为次第在公自有剂量伊周事业具人心布方册宁待请之人而后知也哉今人事权在手每每不满人意病在借口时势难行因循迁就公勿以此自安斯高出人人之上而天下与有幸矣承谕散兵事已处之停妥矣人之讹言勿听之可也荒岁无从得米事机甚是可虑议浚吴淞江兼行赈济乞留米二十万石亦计无所出不得已而恳之君父之前也惟公力为主张使得成事条约二册呈览更祈加意详教

○启朱镇山工部尚书

瑞于正月内题修吴淞江今工夫已至七八分饥民云集是以人皆以为直画成耳自未有若此之速者吴淞江则成矣常熟县白茆河隆庆二年虽开而浅狭大甚是以三年之水毕竟不能消泄且青黄不接时分尚多吴淞毕工饥民无从取食计再修白茆已于今初九日起工矣其工可成与吴淞无异望惟早赐题覆银在前疏议内取用计无不足分毫无取于民而一则可以济目前之饥一则可以兴百年之利百凡无妨老先生幸勿疑虑

○启阁部李石麓诸公

瑞误蒙主知滥叨重任才不建明不及有之然心力则竭尽矣百所经营自谓期月后可见成就未见其不可行亦未见其不得行也纷纷口舌何自而来哉何自而来哉覩思时事平生用世百念灰矣老母今年八十有一闻子风波日有忧恐不能贻亲之安贻亲以危可以为入子哉欲具苦悃不及尽惟公细加体察少假赞襄使得脱蓑而行惟罪惟休无不可也公之赐也心迹具见揭中兹不赘生当今日非特二宜去五不可留而已虽百恳而皇上百不见允焉情不可止也万惟明公怜焉瑞幸

○再启阁部高中玄诸公

区区竭尽心力正欲为江南立千百年基业酬上恩报佑已也纷纷口舌何自而起且如散兵一节比岂小事瑞亦日夕拳拳私访公问科本先后事绝无影响可怪可怪此事从古有之不平之恨一笑而散矣但生百疾举发是实不能再当官事林下何曾见一人日夕念之家乡万里老母年八十一能将之而去又能将之而来耶是以一向不敢言疾今则万万不得已矣恳之君父惟明公少加赞成人情世态天下事亦止是如此而已矣能有成乎母子天性熙熙山林舍此不为而日与群小较量是非万求一济何益何益生去意已决惟公成就本内别有余说诸事垂成中止不得其平而言非悻悻见颜面也惟公勿以为訝不宣

○复严养斋阁老

长者赐不敢辞勉拜领矣使回特此附谢生二次请休南归指日过此则万里而通问请益俱无日矣知己之恩徒为结草之念奈何奈何呈阁部诸公柬录览天下事果不可与俗人为之耶明公以为何如

○与锤心瞿督学御史

元年一别至今不一通候顽惰之罪可胜言哉然亦恃在爱下料公不我深罪也督学有旨喜偷风靡习得公可一变也冀乘便面及而今不可得矣于吴鹏峯处拜领华札过丹徒又承厚惠何感如之何感如之兹便特此附谢高明之见事行有不俟人言而知者惟执守而行不止日校文一事遂谓为职分之尽则善美兼之矣生引帆南归入山之深入林之密纷纷事不复请正期后此一毫世变不入胷中也诸惟台鉴不宣

○复余斗南御史

留都别后以冗缠未及修候罪甚罪甚仰慕之私无日忘之方幸新命可少遂也偶尔失调寒病沉重衰年得此绝无用世之念矣老母八十有一原非臣子事君之日今日亦事相凑合也事与心背奈之何奈之何百凡经理垂成中止可惜可恨然此从古有之不足为怪承谕不必介怀生已置不言矣从此入山之深入林之密更复有何可介怀念耶人便谨此奉复不一

○复谭次川尚书

冯司训赍华札至知公动止日益康裕爱我念我无殊曩昔也何感如之何感如之前者渡岭渴想颜面及有请于下执事也至今为歉矣奈何奈何谢绝冗俗清心颐神在公自是一道生抵家用公为法觉得此身此心在我腔子日与群小较论是非虽曰我镇定也而不免逆心动气矣于人必有所济所济几何耶乃知古人达可行于天下而后行之良有以也周柳塘莅琼仅数月作用矩矱圣贤非俗吏也前守未之有焉竟以上人忌言罢去南科道论止贵府赃迹琼人誉不容口矣若贵府则未知实何如也乞详示诸凡可为瑞益者统祈下及诗云母金玉

尔音而有遐心

次川复书云

承问周柳塘公此公守雄兴学造士节用爱民举行乡约敦崇礼教当于古循吏中求之莅雄一月生即北行相与之日虽浅而地方受惠实多窃尝太息以柳塘之操守乃不免于多口以柳塘之作用乃不究其所施不知造物者竟何意也同时复冯司训书云柳塘之清风善政雄人喜之吾辈颂之此执事之所知也愚奚容赘附记于此

○与周一阳主事

闻二子父产鬻之一空不觉骇痛今人之遗其子孙者计长远则置田宅房屋谓此有根着比之钱银随手便于花费不同也苏子谓议及田宅势必不能复振今一败而鬻鬻之至于尽矣贤亲体死恤生必有善为之谋者但前日卖屋银伍十余两卖那买政田银一百两已无之矣今之所卖又未必不如前之所为也寒族人未至死绝小儿四次鬻产全无一人与闻其事有是理哉伯父老年得婿自谓顶天立地终世维持及幼子今日有此亲友纷如见利为谤叔侄翁婿其亲亲者生不得辞其责矣执事抑何以为之耶维今善后当是何如统乞详示

○复周一阳主事

来札以不敢一毫肥己自誓执事之疑误矣卖者以执事为名人可乐就买者以执事为说人必无辞此人情常事生非以见利疑执事也二子之所亲者生与执事此与执事图之耳往者不可谏来者犹可追此执事分也执事责也若谓恐外人有意度之谤一切不与且不能止之不卖则不惟忍生者之无依且辜死者之负托我虽不杀伯仁伯仁由我而死执事终得以辞其咎耶二老有灵今拳拳于浮土之下矣执事念之

○启岑小谷给事

年丈行以未任有碍咫尺间不一面而别后会又未可知也至今往来于怀为歉为歉科中独年丈张胆论事为南都除去百年来积害舍贪而廉去奢从俭德声满人心口出守大郡无乃天假以此欲节用爱人不止托之空言者见年丈身耶今人做官自有俗套论做官别有一俗论了知不入胸次矣但举目尽此俗人事有难为之者一入于道一出于道杂雅兼俗半执半通是亦差步年丈何以为之耶何以为之使朝吾行之夕及天下耶韩昌黎之颂伯夷曰敢于非圣人而不顾特立独行穷天下亘古今瑞于此不胜惓惓

○回按院张惺宇

生承乏大方惶惧间诸缙绅盛称执事名号谓可相与有成人物也以此不觉移惧为喜何幸何幸天下事同而成异而败生常痛历年积弊今人指为旧规相安行之不知其为非义也所

赖我抚按一整肃之耳曾有初任事宜数端入火牌行之执事与生同一奉命同一朝廷礼法同一民生事务非如人之各自为家各自为祖为父而教法有异也火牌内事尚有当增入者时下即备具遣人会发天下事曾何彼此之间执事一加意焉而下可遵行矣至愿至愿闻苏松四郡水灾为甚生已有文令各府县勘实报执事目覩之矣果若南都诸公之言或当会以蠲免请耶何如蒙差人远候感荷感荷人回特此申谢生数日间行矣不及尽者容面请

○复淳安大尹

使至承惠高篇溯流穷源曲尽今日利病令人仰服展省馆书疏义气凛凛如见乃知渊源有自非偶然也伊周之道得一县亦可小试亦淳安人今日之幸矣江西钱粮俱入一条鞭法小民既知一定之数官亦得通融缓急应解两便尊议独少此耳余皆至当无疵驳捧诵再三因知拙刻滥称政事旧令尹之政必以告新令尹者尚缺然未备也时事近稍清明人尚苦节交际之礼指为贿赂比之先年贿赂之私借名交际不同自今期与公高下议论有见辄尽意附便相示彼此有益若仪物分毫不必见赐亦彼此心安也恨与公相得晚特此惓惓致私愿并候兴居心诚求之虽不中不远矣诸不及者惟台鉴

○复吴悟斋操江都院

承教累数百言莫非相爱至意我辈相与如是然后可称三益而不入于损也感荷铭心可时日尽耶其中有不欲面以为是者过客一节也孟子谓我欲行礼子敖以我为简今人居官舍职分事日逐奔走于外祖制不出郭迎送乃过客又出之耶事有司存不必身亲奔候然后谓之不忘宾旅也水路夫有余裕矣陆路夫马张笔翁见教区区及之生亦疑人品不同若用少则今数有余若用多者则今数诚不足非如水路一船而载可一定也兄未言及不知今数尚可少增否乎小柬说及存翁生无此意人言之讹勿听之可也此处钱粮乱如乱丝今似稍有头绪若田赋则尚未得彼所以为之之端倪也鄙意必欲行之兄前札未及下手功夫今有以教我乎日不暇给诸凡俱未能做成片段可恨忙中尊差回谨此复惟少进切望

○复徐五台都宪

令侄至拜诵华章兼闻福履日臻起居嘉胜天佐吉人为国家储才待用诚如是也卜居二计披札即如得之生死骨肉感荷何尽宗依大方初念甚壮七月内天降祸谴妻妾继亡每一思及百念灰矣即欲援例扶柩归虞冠中止初之所以烦公依公者今又在狐疑往来间也奈何奈何今日较前五六年天渊矣若论太平亦天渊也何时可待诚如来谕敝省事今亦孺子日入于井时节矣乍见宁无怵惕惻隐之心耶恐公不能木石其心也今人不徒木石且挤之又下石焉国家平日养许多秀才费了许多廩禄如斯而已矣非徒无益又害之可恨可笑人便特此奉复玄湖白石惟不负言切望

○复李石麓阁老

承谕谦虚大德藹如见之仰服仰服今天下事靡靡不立病坐当事人因循苟且日挨一日去此成彼一担当之而事无不济矣原非时有所难为势有不可为也天下以此日切仰望公以此自处而天下之事集矣复何言复何言散兵已有处无劳尊虑今可忧者水荒之后无从取米饥民汹汹未知善后之为策耳改折二十余万石计无所出不得已而恳之君父之前也惟公力为主张使浚河济饥一举两得为幸为幸存翁近为群小所苦太甚产业之多令人骇异亦自取也若不退之过半民风刁险可得而止之耶为富不仁有损无益可为后车之戒公非如此如此者承教及口头说话姑谈及之区区欲存翁退产过半为此公百年后得安静计也幸勿以为讶诸凡言不及尽高明察之

○复梁浮山中书舍人

腊月初陈确庵自北而归赉到封诰四轴举家光荣稽首万岁皇上天高地厚之恩反已茫思正不知将何以为补报地也然迟之二年饥始完事执事成全之力大矣感激并之何可言尽千里重托料执事亦悬悬然念不舍置兹人便特此奉告并附谢外条约二册呈览粗帕将意统祈鉴亮

○复徐存斋阁老

至松江日满领教益惟公相爱无异畴昔也殊感殊感近阅退田册益知盛德出人意表但所退数不多再加清理行之可也昔人改父之政七屋之金须臾而散公以父改子无所不可区区意促装上道不及尽惟谅酌之幸甚

○复张笔峯侍郎

承札教足占厚爱陆路已如命量加夫及马矣外此不可再加何如何如苏州府蔡知府因解户被各衙门人捐索改而官解百姓如出水火北解亦然各府县有申请者生已令通如蔡知府议行矣近日贵部误听各衙门之言过称银不足秤解官转回官封官印万无不足之事也此事于各衙门人诚不利于百姓则为甚利贵部一担当之而百年困苦一朝可苏息矣托爱谨奉恳解户生不改复矣决矣万惟留意

○复侯星吾潮州知府

生性苦直率好贤如渴见一善必曲为回护加意申奖汲汲然恐其不得贯通显明达之天下也况在执事人中尤不易得神交气合先有一日之雅者耶中心藏之何日忘之非浪说也生前岁以人言归入境访问得不征钱粮违道干誉之说又得铺逦保状借名于人出执事笔之说此皆上人口语若士民则颂德如一较在南都日无异闻矣夫士君子立已行政宁必人之我誉哉邦家无怨不过因人自考道之一端尔非以无怨之言尽人之道也推其极不如乡人之善者好之不善者恶之亦曰视皆好皆恶则不如于此尔亦非曰善者好恶者恶自考之道尽于是也守已方人孔门自有成法恤人言亦不恤人言君子尽其在我人言不足入吾心为

轻重意矣但今士大夫皆奔走仕途人物洗心不清百凡举止顾毁誉计得丧间杂私意论德理日月至焉而已矣官则尊矣身心何益况假不胜真终必为累执事朗朗烈烈人也此不足为执事言之矣诗云他山之石可以攻玉借人所言反观省察勉其未周防其或误又非垒土师保进德养心之一助也耶恩平王邑博琮会同人也仆人赉华札及厚贶旋马谨此附谢并致愿私惟台鉴

○复史方斋琮分巡道

执事造福于琮计七载矣一旦言别人情之常虽不容无恋恋不满之意士君子期在启发成德济天下事不在是也赠文二首承乏为之不足以榆扬美政则既知之矣诵公将来之病未竟之忧系留既去之语不觉大加感叹夫士君子职分所到万物一体之义俱之若必传舍职掌秦越天下去则过矣而不留焉有仁人之心者忍之乎人之知己莫若己之自知人之责我莫若我之自责克去任性之偏大加涵泳之力充所未周勉所未及广业崇功润泽天下万物一体之下琮人与焉则□在公发扬之而已推广之而已琮海万里京师较之中土地方情态为别尊驾渡海之后吏治民青骇人观听系留于既去之后又第一义也何以计之乎处之乎区区言别不敢更为寒暄夸毗说也

○复徐继斋尚宝少卿

纪网法度今被此老坏尽其说盖谓织造查盘自改先日之诏宦官温旨今日作俑为之不能执礼处已不能执礼处人也此等处大是差步人人不满小人欲行私意必即公议为之今日归曲直责意虽不善其所指则正义严辞不可破也党与即此抑扬遂有有用无用之说所幸遗诏功深寡不敌众彼为奸横识者不之与耳易六五童蒙吉正其时也无故惊疑自称沮抑然则必俟君为尧舜然后可以行吾志耶窃意投几之会当即出视事一则身为障蔽得以回狂势于方倒之初一则为担当得以善补过于方坏之始得君则有时首事则有权人心归向扶者尚众功烈一入焉一出焉孟子云不为也非不能也今之谓矣首权在我我乃避人独非怯乎畏首畏尾自动中官之惧独非惑乎事由中发尊翁动以调停国手自许然调停处得之者少调停处失之者多人情好谀憚不为直况在首相门下耶谀人满前不分所长别所短伊傅周召动而誉之内自生疑不能执外不闻过无由改有由然矣今日奸人得有借口吾与之借复何咎哉复何咎哉区区愤懣不平言语竭尽乞一一达之有别说母吝封示尤幸

○启谭次川侍郎

生得北通政自谓职掌闲寂无多事旦晚得趋门下领教益也如愿未几睽违继之新命外补乐可图报然失良师友远海益未始不怅然恨焉事之不能两全类如此曾悬禄米诸用不知公信而革之否生今日巡抚江南言涉有为第掀扫爬斗箩筛不收板席量减歇家脚子通关诸费节为裁革乃生管仓日所行非今日也虽板榜初定熙斋笔峯不见允行然生亦未尝不委曲区处从省减焉江南粮长十人而九人破家仁人君子之所隐也如榜所行置之无用之地及官攒侵用之需何益何益尤不可通者旧例小米用细席以其漏也大米用方席细席比

方席价增五倍禄米亦大米也乃用细席漕粮歇家壹两贰钱禄米乃壹两伍钱禄米加筭与筛皆工价高者漕粮半折色半本色廩无砖铺本色足用禄米全用本色宽一分民受一分之赐生先日已略行之非今日官于其地而始私之也惟公谅之外余同麓封诰文未就统祈留意

○启密云凌洋山兵备

湾中承教九边事如目见之昔之人人以为难者今坦然而易事矣然尚恨纤微未尽与闻一时过耳久难记忆正候鸿便求之适有新命承乏大方公乃走使直言谆诲从前富庶称第一荒芜乃至于是骇人闻听汉以力田设科农桑急务也非公详悉言之生几乎不勉于行事失先后次第矣何幸何幸使回特此附谢二事尚有进于是者尤惓惓至愿也

○启刘带川两广军门

鲁仲连论田单所以破燕曰将军有死之心士卒无生之气兵法又云人皆欲将勇不知将勇恃兵法中千百之一言相反而实相通皆是也两广韩襄毅王阳明外独推二叶二叶不能亲戎马冒矢石公骑射绝人直前倡士先浙后闽倭焰炽天身自当之经难多虑患孰是公又高出二叶之上十余年巨寇一扫而平无难事矣地方何幸地方何幸拨乱世而反之正诚非公无能也但君子论事在探其本君子行事在养其原昔人谓元气一虚百邪袭之今日之寇百邪中之一若不调摄元阳壮基固本外邪今日去明日又来今日一邪去明日别有一邪又至去邪用发散剂每发散元你不免少随发散而动发散之功日多真元之气日薄医经称急则治其标然治标之时未尝不参一二味固本之剂纵阳气下陷立可死亡乌头附子全治揆矣气苏后又未尝不汲汲日用和平丸散解酷毒镇元阳也今日果可荡平土著吾兵土著吾民严贪吏法起倡卒风除害安民急事也窃谓疾急治标疾缓疾急皆当固本用兵安民并行不悖如其不然今年曰急以治标明年亦曰急以治标日日发散其于真元之气何如哉骑射绝人直前倡士拨乱世而反之正瑞不敢为公许之矣范云忽感寒疾恐不预九锡之庆徐文伯诊视不得已如云言治之翌日果瘳云喜甚文伯曰不足喜也政恐后不复起耳越二年果卒区区意愿公为地方立千百年业不愿公为一时赫赫功圣人复起固本還元不可易也

○复朱镇山尚书

昔宦游南平公百端维护瑞知公出世俗外别为一等人物久矣河役劳瘁言者纷纷今日反归功焉事久论定振古如兹非今日也仍领部事左右廊庙大行其道有机会矣公私拙乏何足为念我祖宗建官工部居四民时地利今日错认做一个木匠头犹之户部错认做钱粮收头是以时论虽有称说好官自我为之百姓国家了无补焉君子不取也凡百又有从权济道之说究竟道不能济朝廷纪纲国家命脉始一线终滔天遂为大坏昔人谓事未有不失之于且止者从权之谓矣昔者成我之恩与生我等爱公报公不愿一等而下人物也使归敬布私惟台鉴

○复沈万川会昌大尹

虔中交与二年兴会道里不远政事如公未闻有疵议也今日之说何自而来哉何自而来哉近与五台朝夕乃知公受谗有自相与叹公之厄于所遇如此如此夫君子尽其在我而已事久论定从古而然纵使不定亦岂君子之所宜预心哉御寒莫如重裘止谤莫如自修吾儒学问其功夫止责己不责人诚如孟子三反颜子不校即媒蘖之所自用之检吾所未周即悬空之所指用之防吾所或蹈是今岁因寒之裘将之为岁岁御寒之备也因谤而益不既多乎若曰难乎免于今之世矣而改行以求通得之少而丧则多不敢为公愿之矣诗云不失其驰舍矢如破承厚意敬付私念以谢惟谅之

○启殷石汀两广军门

琼二十年来至今接有海寇之患百姓苦之心讼口詈已谓官司不能抵民不保障矣然害止濒海地方日甚一日年甚一年今正月突有船先后分入攻围临高定安万州等城破文昌乐会治屯据于中来来往往杀掠村市无人之境任彼所为其惨其害从前以来无有也平时养兵迄与不养之时无异晏游击来援亦既月余矣如斯而已矣贼伙数虽多各伙人数则寡继后至者将何以御之耶昔人称为匹夫匹妇复讎今日之讎屡矣大矣复之不可已矣明公身当复讎之任事本因仍儿戏深入安劫风声气习召之而来也琼民如水益深如火益热惴恐日夕谓府县城池尚未可保我民当尽鱼肉于贼似此景象言非过亿明公念及前后一加意焉权足为才足济无所施而不可矣琼民延颈需援不能一日若止前之为焉有兵以万无益也纵有小济兵退而寇又复来矣急则治其标今日所言所望标中之标事也标中之标且不能矣尚何望史方斋号称胆不怯贼事期必行日者海旁失事咫尺间耳已受欺诖法复宽纵贼知虚实官兵效尤况明公坐镇苍梧远琼二千里地耶纵寇骄兵万方一辙一诛赏之余而起而人自不行耳作用不同取效自异不可一槩诿也缓则治其本古法遗意家自为守人自为战道有在焉本中之本休养生息又在守令明公控制二省艰虞残破非一地也时人之论必曰难为顾彼顾此不免急东则缓西矣宰相塩梅舟楫应四面初非身历其地为之普天下之下有行之者况广之东广之西区区耶诗云依其在京侵自阮疆惟别留念地方不胜幸甚

○启刘石圃诚意伯

承教多矣以冗事未能奉复种种事须汛毕日往巡历应天面及之平生爱公念公非有所忘也散兵颇多寂无转盗之事无俟再收或有浮言置之不闻可也吴中刁讼略无分毫事情而驾为天大之说诚可骇畏生亦未尝不重处也除发府县外衙门前尝不绝七八人枷号又先痛打夹苦之候月满发驿充徒曾有解审二三起俱原告中途逃解人告称闻此重处声也生心喜之谓可以消息刁讼矣公访问可知其故楮未所谕曾无萌孽公留念及此感感容别日更有相烦也人回谨此奉复惟台鉴

○复吴悟斋操江都院

承谕诚行之可泄小民数十年不平之愤牌行解散尤是良策生已促装南归以俟后之君子而生不与矣百凡区画止幸吴淞江成功之速而成耳余垂成中止奈之何奈之何这等世界做得成甚事业从此入山之深入林之密又别是一种人物矣有怀如海忙不及述统祈体谅

○复胡杞泉都掌科

罪固中屡承垂念鄙人自揣何以克当周急有义却为不恭是以未敢踴躍然阙尊意也拜辱之余感德何已今日之事大抵无至诚惻怛之心不知忠告善道之义罪在己不在君若果異法兼济不激不疏言当其事而不为招讐患指所必至而不为远言推已及君切中情事而又同心同道多其人焉天理人情安知其无济于事耶委之曰吾皇之不我受言之损而无益是亦借口而已矣此在诸公深思亟图之也安否关宗社利害在生民与道可姑待事在得已者不同若以并死无益一语盖之进退两无所据瑞不敢以诸公之言为然矣承爱甚致私念附谢高明以为何如

○复欧阳栢庵掌科

承谕圣人无近功速化今日行之明日见效皆伯者诈术之私而已此说似矣实非孔子言必世后仁至三十年迟矣然为鲁司寇男女别途豚羔不餽价子贡谓立之斯立道之斯行绥之斯来动之斯和又未有若此速者是则何为圣人即此道法即此至诚惻怛之心为之可以见效于数十年之后亦可以收效于俄顷之前必世后仁之中自有绥来动和之妙不言其速而自无不速犹之男耕女织数月而后得衣食迟矣然自此以后陈陈相因有余粟有余布无速无迟而不得故以其初言法制未备圣人亦必有以处之非坐而待至数月也纵商贾佣功场圃夫脚嗣往兴来莫非王道亦莫非孔门事业今人每鄙书生迂腐无用勇猛能操切史书仕宦盛气于世正以书生知王道之迟不知王道之速也假如于今贼临城临村破灭呼吸乃曰候我去做务农讲武之法来其可孚医家急则治其标治标亦医家正道而非旁门邪术也治标与绥来动和作用不同姑就速化一端言之富国强兵陋为伯术儒者不屑圣人不富国强兵耶什一而彻田猎讲武富国强兵天下之于圣人莫是过也谓圣人言义不言利兵非得已天下宁有这等痴圣人死地圣人耶自谓我为天德为王道一谋画一施行大大小小求之而不可得说为矣而又不見其出手为之苟且因循日挨一日止是以一件有待不可速做借口荅人此天下所以厌儒人迂腐无用而尊孙吴管晏也伯以速道误天下儒以迟道误天下其害一而已矣诈术犹可支持目前腐儒目前日久俱无用之世主乐就功利厌仁义之谈厌腐儒也无所倚仗不得不然也今日有真圣人出焉速过孙吴千百世主无不乐之乐之非真知德义可尊而贵也乐其远在孙吴之上富国强兵见目前也许鲁斋谓学以养生为本或者以不知道讥之借口养生为富积计则谬矣朝闻道夕死可矣天下之人死矣亡矣而后可以为学耶赐不受命货殖颜子庶乎屡空未闻颜子听其饿死不为生道计也儒者迂远而阔于事情无所用之有贼临城行寇礼者有一筹不展抱守忠义俯首就戮者圣人原无此等道理原无此等忠义也吕祖谦谓莫速于圣人莫迟于申韩莫利于圣人莫钝于申韩此道此意知道君子自可得之于其速不于其迟伯道也为其迟亦为其速王道也天德也公区区说不免毫厘之差谬以千里布所见求正非敢为辩也

○启徐存翁阁老

瑞不幸有荆妇之变哀苦中忽闻尊公致仕有旨不觉骇叹夫遗诏亦有人以为不可者乎小人欲行已私变乱是非无足为怪今天下较五七年天渊矣然南北未宁水旱日甚以太平视之亦天渊也倚赖元老今日急事何至有是何至有是化隆俗美唐虞三代今不敢用为公望补其偏救其弊乘便因时一事而为一事之计则公可自为力亦天下人所见为公誉也君子不能一日忘情天下况公通籍三十多年国祿君恩天高地厚有不可解于其心者耶万一论久而定天启圣衷行止之间似当别为斟酌多后日之功补前日之过亦公厚自为计之道也闻舟抵维阳遣官办候迎致私愿惟留意

○复工部尚书林退斋

瑞赴任日正值尊师在告十日内竟不得一面而别歉甚歉甚至镇江适有此事正欲遣人上达料彼实为诈伪且念师在病中不欲以此增烦恼也欲行中止彼实有勘合实坐官船而来何自而得哉何自而得哉近日诸公动辄以此赠人私意横行非法非道犯者又有一种私人以私意怨之世道之变不知何底止也犯人口语颠倒说得之南都又说别方人姓氏据姓氏行查全无之料止是南都事彼不欲以此累亲故热刑不供也亦因瑞先说了送勘合官船的人我就题本论了他不怕是尚书侍郎是科道也以此他苦苦不肯真说今事已矣国家事都被这些歪秀才坏了此其一节部院道诸公今后不可不慎所与也烦尊师便间一谕之为后车戒瑞当此大任每临事恍然如失秀才刀官如人入暗室今此又似入暗室模样也漫有条约一本已遣人奉中有不当者万惟教之承命其人必加重刑无姑息也事完备由转咨贵部人回谨此奉复惟台鉴

○启阁老徐存翁

瑞自七月末奉命出京九月二十四日至江西会老母乃知自湖导之出疆厚给路费万里而北宾至如归莫非老先生之赐也三家别家今获团聚天地高厚愚子母感激可胜言耶老母憚度梅关瑞独至南海而转舟至南都上河乃新春四日也直至二月五日方接照会到任往返间道上无不以伊傅周召惟公颂且曰幸有是人今日倚赖盖先时共位同好谄谀权奸若无可否于其间矣终必去之调和手段已着于前即今遗诏培国脉回元气反四十多年之误而正之伊霍力量旋乾转坤见与于天下非偶然也然公以身任天下重天下亦以天下重责之一夫不获时予之辜胡虏猖獗为今日善后之图东南困憊为今日拯救之策是又天下之所喁喁焉者处中当轴其可使少有不尽之分伊傅周召出出入入日月至焉于其间耶兹差吏北上特此申谢兼致愿私瑞北望惓惓无任

○禁妇女买卖行走约

瑞顿首敬与乡士夫亲友诸先生约贺太府莅琼禁妇女出街市行走买卖初约开列二款男指男之生理女指女之生理严正剴切俗吏所不肯为者澹庵公毅然为之地方何幸地方何

幸琼俗转陋为雅此亦一机会也我辈少加意焉用为乡人倡率有以济官法之所不及而焕然礼别之俗矣今特与诸亲友士夫辈约各有妇女无论老幼各要一一遵行本府约束其差使往来亲友家及资生大小买卖各以男子充之妇女止做门内工不外出各有亲友转相劝谕诗人之称妇德曰幽闲贞一行走买卖妇女亦各闺中使用人也此等人往来闺中耳闻目见风声气习可以言幽闲贞一乎此等事我辈自为严肃闺门计也府官爱我我辈当与共成其爱八月朔三日瑞顿首具

○复王闻源参政

君子不免为世间世仕人之事谓荣其身谓肥其家也哉琼人谓科第有人徒先乡人而害台端独则不然有子有父今二十年矣饥日大参闽政又宁复有异事乡里之人致有异说耶达可行于天下而后行之大参其兆乡之人与焉敢豫为贺绸缪远意暂托回使言谢小刻六册呈览就有道而正之意也统祈鉴亮

○复巡按龚怀川

芦陵邂逅至今神采器度犹如见之以过可化以绥可来区区东粤下及禽鱼草木有沾被矣地方何幸地方何幸天下惟患无其志有志如翁其人又以代天巡守之权济而行之尚有不尽之分无能满慰一方之望有之耶十府云霓可预为贺古人有博访之说又有五听之法五听所以为博访详也先民有言询于葛藟访之而其人止是属官止托查盘官访之详而非博然此特明照中不及分数十而有一不足为翁言者笔至姑及之瑞平生有济世之念而人不与庚午告归展布万分无能及一此非怨天尤人之念终已一生止此还天不能不自为歉也区区泉石有梦不在周公忽覩云章魄营犹动孟子谓广土众民君子欲之中定四海君子之乐有此施为之本怀以故有此乐欲之情色天下惟俗见久之能遮蔽人本然之明俗说纷纭立有根脚者亦或牵之而去苟其不然性分天地感之而应决江河矣事有俟人言而后可行有不俟人言行而无不当者今何人哉唐以声诗取士三百年之中杜审言天下之狂也反席未安之前尚自不见代人之恨今请以台翁当之瑞临楮惓惓无任

○复总督凌洋山

罗旁为门庭之寇二百年矣开府至公乃能使之入我版图一鼓而擒永绝其害诗云方叔元老克壮其猷盖必如此而后可云猷之壮也日者湾中窃有大亿于公自今言之可谓能中愚者一得所恨学疏才窘有司贺文惟公运用之妙揄扬万分无得其一为歉为歉误蒙垂惠稽首升受惭感并之差官回谨致谢私附转上琼人不幸三次大举不遇如公其人尺寸无得正尊疏中捐其险以与贼之谓贼今日亦杀之矣报尽未尽之贼兵退而归大征何用夫黎岐中处而州县环之天下事有易于琼州事者乎部议及丘文庄要将五指山开十字路廊庙之上亦有心公之心者矣今日得如先年涂兵备名隸者其人不请一兵指日指月版图黎岐初非难事何也威之也化之也蚕食之也可县可所即县之所之如今日罗旁事也天下事不可无故发难端亦不可当几自失其会瑞桑梓切情并附告

○复总督殷石汀

哀苦中本府赉到华翰生废弃山林无交于人久矣门人乃能不我遐弃绸缪礼意过越于人感何可言尽耶琼崖事以二三年言门下云果若文移似亦非尽诬妄也第日月间又有清澜麻锡之变突如其来官兵就縛麾下洗海大兵已追及之穷寇又旋帆北上虽未大加剿灭彼狂奔逃窜日无安所则解散可计或亦可以称晏然于潮惠间矣门下文武吉甫为地方了此一事海滨何幸何幸肃启付本府转致谢私哀苦昏迷不能殫悉事变机要其大槩则如此矣惟台照杀伐抚绥并举不遗尤幸

○寄博白大尹林仲和

北都一面未几时而泉石安吾身矣知子博白之行乃黄生来任感恩之日先夜升刑曹主事入梦吾无心也何以来之回思子平日节槩痴人说梦尚是鸿渐于干而已无足为异有此事有此天机夫岂偶然之故哉日月之间料必有验今吏部止是一个资格这资格格了许多贤者不得出头格了许多不贤者使不退步诚如极地之说然吾人出处之小系国家气运之大有握其几不必在念所恨山修海阻不得朝夕唱和视是今日割鸡之功可否伊吕小试之事庄子曰轩冕者物之傥来也寄也今人以寄为累毁誉得丧官阶所系我心随之做官累心做官何用仲和试验之念头如动是何景象比之不动此念时分何若自知之矣圣贤无问时之达不达尽其在我自在无限受用此正庄子寄在乐不为荒寄去未尝不乐之谓何大小高下迁不迁足言哉区区所望仲和不过如此而已祖宗初原无资格吏部无端作俑而行不知遵何训令沿袭不改岁贡五迁六迁之官乃进士出门卑而不受之职进寸进尺借之口曰今日三途并用矣吏部局人也我亦随吏部之鄙而鄙吾心耶不可也不可也子官七品尚非与尔邻里时节远来绢段不得已受之矣余未开封付回人返璧新刻奉览并照入

○复陵水大尹吴秋塘

执事龚黄卓鲁辈人也生以谢客少闻外事近方得之二任参论其贤如公无复可疑者矣所恨原非能文之人矢辞措意揄扬万分无得其一执事方且歉然不满于是实为退托宁非中所自许尚不止是德盛心下有大焉者乎仰美仰美俸诵七议锡崖公谓林道干突至公应之裕如以事有条理致许即此而观宁非胸中之区画素定故应之也而区画见乎诚体此何行不得而穷之学也承惠仗旋谨此附谢瑞每私念昔人谓伊吕之道得县亦可小试区区有望又不止曰一官今日令终有俟而已统祈台鉴不一

○复巡按龚怀川

区区凡自上府而来者必问新院行事日严峻而风采有加人人同言又云亦自有宽处虽严而不为刻惟士惟民喜色欢心百来年一人而已来翰称同寅谓之为过当传闻二司近日皆不得私自取与酒席之小亦有限而不得为过无乃此其人有不便为之言欤我辈行事当自信之以吾心之理若必俗人之言转移吾事是虽或无关系之小而机之所至败大多矣二谕今

人久迷不知公发端言之恰是圣贤正当道理恰是国家正当法度而又舒锡崖持正不私唐敬亭发声征色与公行之无乃德星会聚士子反正一大机会耶士民望公如望父母落月满梁生亦时时在念台从果于何日慰此人心先年亦有按院到琼相传以为勘事而非正差若提学则正德间宋端仪二次案考各州县皆亲发落渡海虽险仔细看量天色万无一失其亦有之乃民间轻身冒利之人而非官府中之事道府同有阻言是亦过慎之意不可信为行止琼生员每三年方得一考又多是先行府官截取有赏无退士无惩戒以故人才寥落科第不多今日得比甘肃事例琼人之幸也不然明公倡先题请能使提学如公一年一至亦可惟公酌之今天下事尚是从头差到底我辈止是从中做起中起不差犹可但恐中起亦差耳执事中起不差能保其终不至差耶巡按令行禁止一省事无所不可士君子得行其志宰相居中不及此官可使事权不在已之日有今日有权不为之悔哉直已而行无复顾忌是在今日区区见并附告

○复巡按龚怀川

承惠初行条约读之读之未见有此等文字也圣贤政事士子类能言之非无此等文字无此等文字之中风流酝藉也流之胸腑躬行心得天下有言之如是无能行之者乎一十七疑巽与之中有法存焉法语之中有巽存焉见者能无悦听者能无从乎用是者十府乡井今见生意舞忤累日其不尽什然于中者事大而急又今下官人人犯者条约止言其廉不详其不廉之大一一为禁发端之初士夫礼际是虽沿袭之旧然百姓未见赐也独此先之此处厚一分母乃百姓身上亦薄去一分耶尊约及续示三端原本存顾諟每欸具开端一语疏已见于下呈览山人爱莫为助公以他山之石视之幸矣

○启户部正堂郭一泉

前至南都日承教良多至今感荷感荷然尚恨以事在苏松不得日侍左右如愿想必在来春正月年间也粮解因有解户苦被各衙门人措索蔡知府改差官解北解亦然百姓如出水火各府县有申请者生已令通如蔡知府议行矣近有官解贵部苦以银不足秤此误听各衙门胥吏之言耳我辈奉命而官将于衙门左右之人利将于闾阎百姓利公今日破旧担当利民题目人心同然日后得援今日之例江南受有无尽之福矣区区咨恳于此之故利民利左右惟公别之

○启户部正堂刘清渠右堂陈洛南

禄米改折得公主张题覆小民得存五六万米倍常喜跃生与有地方之责何感如之何感如之今年水荒甚是异常先以题灾在先九月十月复遭淹没府县亦不复再报是以改析分数小民皆以为灾数过之而有折少之恨今米价日增一日逖流刼夺势所不免二三月间又不知何处取米木今议兴工赈济乞留米二十余万石盖不特吴淞江当浚亦不得已而弭其乱也此事甚是苦恼生每思及此寝食不安限千里阻隔不得与公面谈所以也二十余万石不过京军一月支银而已事无难行而可以救江南千百万人之命祈公力为主张速赐题覆不

胜幸甚

○复按院张惺宇

领教祭赠本当迟迟良是约在二月初一日出不再秦渎近南都诸公谓陆路夫马短少陆非如水一舟而载事可一定生原疑之已如命夫单外量加之矣若舟行夫则有余裕生一向南北行不及此数非以已不能而难之人止为惜此糜费耳承谕了见执事心无彼此事求同济虽生亦宁有各自为异之心耶惟执事谅之酌之而已事行已定恐不必再加也尊差回谨此奉复百凡统希鉴照不宣

○复分守道王用吾

泉石间报有贵人书使空谷足音诚有不胜跢然之喜者也何幸何幸再及开缄捧读诵之玩之则又百姓地方拳拳在念有真切之情有真切之辞此其今时交接中所易得有者乎喜复何如今天下坏矣不特不蒙做官人之福而又反当做官人之害正以徒有其言鹦鹉从人有其言未必有其心也即言见心有如翁其人者生可无一言以为复乎今时视做官为戏场事口曰认真而心实不然昧没本心此其一也其中似是之非袭古之谬又且日群群然见矣居之不疑妨民病国可不扼腕而叹者又非可以一言尽也敬以先刻八册居官职分大槩散见于其中者呈览瑜矣或亦不免于瑕有之乎高明幸自择之续集完刻日容再致使人回谨此附意诸所不及者祈台鉴统旁及之

○奉王尧山

韶胤相与以来如兄如弟一别十年彼此不得一通音问为歉为歉继闻得贡入京用为喜慰然岁岁月月徒尔跂望兄不行之故阻滞之由未备闻也生旧岁七月内得祭告南差从前阔怀或可少遂老母北上生又仅至五羊而转事之不能恰恰如意如此令人怅恨奈何奈何万里间可少通一二纸笔而已兹因便特此申候诸不及一一者统祈台照

○奉王忠铭翰林检讨

生以事村行及归而公渡海北上矣区区别怀至今为歉北来人谓公试官事毕即当经筵进讲启心沃心虽藉之言语文字之未然大行其志卜于是矣塩梅廊庙霖雨天下指日于公属之忻慰忻慰雷上舍行谨此申候天眷方新慎为调燮以慰天下之望又万里外拳拳意也吾琼年荒盗起百凡比前一二年急促为甚台照所及一吹嘘之而事或不同矣何如何如不宣

海忠介公全集卷之五

卷之六

书二

记

杂说

◆书二◆

复沈繼山

复郭梦菊

奉分巡道唐敬亭

复唐敬亭

又复唐敬亭

又复唐敬亭

与琼山刘大尹

复刘大尹

又复刘大尹

奉唐敬亭

复唐敬亭

又复唐敬亭

复毕松坡

复舒锡崖通太兵备宪长

复周养初粮储参政

复周柳塘先琼州太守

复吴小江两广军门

复汪渠瀛广东巡按

复薛鸣宇分守道

复汪渠瀛巡按

复吴小江两广军门

复朱讷斋镇山子

复贑州军门贾春容

复王忠铭

复梁霖宇

启龚怀川

寄梁霖宇

寄王忠铭

启王荆石阁老

启邓纯吾

启通政司倪东洲

启阁下吏部

复贺澹庵

复汤阳南

奉二守陈南川书

再奉二守陈南川书

与琼乡诸先生书

○复沈繼山

许对葵任日领深意矣去年之冬延至今年之夏未得对葵人便知说也然台端气节无日不于心目之间尝恨此等人天地间有数有之而又不得朝朝夕夕如之何如之何区区爱敬具见山亭记文之中今不为赘少有可进者大抵今人生斯长斯多是脱不去一味功名富贵之习见在富贵更求富贵之上见做二品官便为一品受用见做三品官便为二品受用人欲无穷心无纪极若身当祸患除去不戴纱帽员领之外不免昔日顺境气度则亦与之一而已矣况又有言未必尽合其人有言未必尽当事体人岂无辞士君子原有身心功夫此功夫不分穷达小刻九册呈览中有识见不到之处记中复中台见未愿如也言之言之阳江千里面晤无由只今笔札之所及是亦神交之所及也不宣

○复郭梦菊

旋衢归田之日承尊意矣卒然不报遂至今日岂无便人闭门少有交接有行人而生又不知也然其心之勤未必若书之怠分守道王用吾有言官阶四品十外年宦途而归日租屋清操可知是也是也有贤如兄况是乡年之雅握手平生心胸如见可一日而不仰思之乎所恨乡井同而有一千里之遥回念京都月日之会反不可得不与一时相从刻薄致有今日然数年间日所发挥亦得区区见平生之素矣此心何尤山林人又有山林作用硕人之宽料不至求田问舍而已矣如月旦之为评也前十年能守后十人变节不能愿惟高明坚之遥望飞鸿附永矢为门下进小刻五册呈览便中亦有可教不吝金玉愿也幸也不宣

○奉分巡道唐敬亭

一丈田而百弊清矣士君子为部民久长之计无过于此况琼州开国而今无一人见有丈田之举粮差弊孔有司莫能止之万里遐荒想国初亦草草数矣千载一时然此一大美事亦一大难事不一一讲明于今无以善终于后我以为简明人以为繁杂我曰详悉人曰脱漏有之诸告示出里排业主等皆曰多是醒不得地方不可知琼州粮在此里田坵又不在此里散在二十里三十个里分亦有之大约黄册粮数一半田在本里一半田在别里地方相去或二三十里八九十百里外今丈田丈粮数之田耶丈本里田兼无粮在册之田耶丈粮数之田一里排奔走不及何埔何段上中下则茫不及知丈本里兼无粮在册之田事无大于此告示又不见一有分说界畔木板长八尺宽六寸姑以生言粮籍寄在海口二田在那社一?一石二斗八升之粮田九十三坵一埔之中散为十余处相去之远与他田间杂又多间杂又非奇零小户用板计二十块如此高宽寥落乡村能辨之乎生其少者他人田计用板少亦四五十块能辨之乎佩山县已令里排总各业主造田产坐落之册书彼粮苗坵?土名四至已足为据田坵彼我间杂界之不住界之何用部议用十排年丈今书箒弓手等金之犹难又以甲首丈里长之

田是一里之中二班丈田人也从来称丈田?册谓之流水鱼鳞一里之田一涌之田里长一册甲首又为一册非流水鱼鳞矣且彼此参错难为稽考必若以作弊疑之曰里甲同是一家矣不可彼此互而奸瞞耶是亦自生一事端而已万乞更为酌之其它小有窒碍容别言

○复唐敬亭

生所谓丈无粮之田非无粮也田在此里而粮又不在此里如生一人田在那社一粮籍又寄在海口二是那社有其田而无其粮故谓之无粮琼山大约一半本里有粮有田一半田不随粮百四里皆然极为参错翁今将使那社里排丈生之田耶抑海口里排丈生之田耶一言而事朗然明着人人知矣此与琼山人买外州县之田不同何也粮不过县也琼山之人买琼山之田粮过里也翁于此亦未谕耶谨复

○又复唐敬亭

生官江西曰丈田皆以其事责之田地坐落里分里排不言粮在浙中亦然然皆关会各县曾丈田者关复一辞而从其例非生自为之翁今又以粮在之里排任之天下事不必尽同求其无弊而已所谓及其成功一也所难者则生前云一里排奔走不及何埔何段上中下则茫不及知若翁有神智别有善处之方则亦何难之有哉谨复余一二容再言

○又复唐敬亭

丈田之举无一人不喜曰二百年来复覩朝廷今日均平之美矣盖黎田之轻亦与丈田之数今而后民田得以分其粮于黎而轻是以虽彼富家私已亦合声称便昨会刘大尹云与里长取一坵粮田形册亦不可得无以回上司之急此则有故盖各业主已赴各坐落地方查田丈田田形弓步履之而后知官府之号令反复民间议论一谓如此一谓口彼业主不能应里长是以里长不能以应县官也生一家之人亦是昨早方自村下赶回止查得坵粮数付之里长丈田未完又未具有田形琼人老老幼幼一未曾知有丈田之事万乞台少宽假之今人人趋事遍满田间想成功月日近矣又骇之以不可骤能不及知之事欲其速反惊沮其成外刘尹说及一日一报此生言之未终者一日一封二日报者二封三日报者三封若西黎都恐又不止定么三日一报也二熟田为一等一熟田为二等亦乞更为酌定盖同是二熟田收成相去远甚一熟田亦有倍收于二熟者并渎

○与琼山刘大尹

先十四日领意即以其故恳之敬亭公矣回云田形必丈完而后知今不用叹奉行之人失其初意适门子惠有弓步托之明禀于台矣问督具田形如故或敬翁别有分付欵各衙门之号令彼此不自为定致民间之议论尔我不能会同生两官江浙当丈田事亦有不能尽知况小民之愚而愚耳目所未有者乎台端果若将今日之发端警他日之百弊当俟初有作奸之人施之未开一弓百四里人每以手足何措为惧官府有归一式样妇人孺子知之人有不如式

乎有田则丈何难之有而今则视为天之不可阶而升之难矣官耶民耶人情如此何以善后弓筭书手等只以里甲中之田多厚积者充之万不得已方及邻图我自有据当之者亦自无辞从来谓丈田不利于富家小民则喜今小民怨不可胜言矣何耶何耶

○复刘大尹

承谕生终是醒之不得如此则业生今付里长之册一样而三矣人人因里长催督之急田少者间或明白田多者大抵草草如翁令生且乱画一田形以应上司之谓其中谨慎虑远者则迁延不报以待事之定谓先事可鉴徒费纸笔于无用之地今不为田形自丈之后岂得不造田形弓步粮亩四至之册是又一样而三六册矣所金丈田排年将丈之耶不丈之耶业主两报丈田人目不曾一见田形之面足不曾一履田坵之地中有奸弊罪归何人不容不丈如前一样而三九册矣民间谓只好了卖纸商人外此皆苦诚是诚是妄意谓此何等事可一日草草为之当思之思之参酌众见审而行之要必其当于今无嫌又有更改于后据业主则寸寸尺尺差当罪业主宽以月日据里排则寸寸尺尺差当罪里排宽以月日人未开弓何以付之纸上册报如此之迫急耶条开有两个月之限次年六月完报之限上人先后矛盾亦难乎难乎奉行之人矣谨复

○又复刘大尹

闻台差有老人督丈非以业主若迟迟然有此举耶琼山田西路九月中收东路则十月尽方可完收丈田事经题请谁敢迟悞谁能止之业主亦不过惜此禾穗之伤民之情也部科重农时之议良是老人奉委有一人不取钱为害者乎生未知见也生未之闻也近事查竖界牌亦以老人防夫为之台如有闻事可知矣况在督丈官府中每有好意而百姓辄以为苦为害为怨痛者托心之难其人也巡道有宽限期之议生以为二三月可完报不须六月欲速不达台端乞更酌之

○奉唐敬亭

丈田行之久矣琼山之人如夜行失涂而又风雨如晦乞今不定所往识者恨今年程方豐又遭刼财之运盖兼丈田事言之也差督多端势必至此民间之言良非浪说翁抑何以更而息之乎江南田地推收之繁粮在此田又不在此较江以北或不同言有定于先不可行于今者万乞更为酌之治人治法翁病症原有自来此处得有明白勿药有喜矣敢渎每二里老人防夫各一人督业主丈不可不可

○复唐敬亭

六安行之得意无乃江南江北过割多寡有无有不同乎江以南丈田事付之田地坐落之里排其册谓之经即部科题请大小流水鱼鳞册之谓归粮于丁粮坐落之里其册谓之纬即部科题请归号册一贮布政司一贮府一贮州县之谓一经一纬组织成衣盖不得平差赋于今

日抑可以止争夺于将来并田限田今不可得法行而良无过于此翁今又特以丁粮之里十排年为之经其根抵而反略于经乎不先于经纬何所附所愿别为酌之不必拘有先日条款盖如此前言一里排奔走不及何垌何段上中下则不及知大略已尽故不再言非于此独有所隐也今里甲人诵一户之差十里甲户连坐之令曰自高曾至我之身我从幼而老不知此田何方广狭横科田形何若上人以所不知不能罪我乎县官虑书筭弓手东走西奔苦而逃避令之执粮数请彼田排年代丈事与翁颁条款不合卒不可行今业主里甲均之迟疑曰姑徐徐待事之定人情如此望翁更为审酌置一着望化裁于人不若分寸朗然知愚贤不肖如式而行不待润泽之为善他如一熟二熟等则槌榔园鱼塘等哀多益寡亦既竭思岂其不善然亦有未合事宜当讲详之处八尺六寸他县查界版不如式民苦之翁思之不审乃至于是附告

○又复唐敬亭

亲管里长诚是祖宗制度然论今日人丁粮差属之此里而田地又多不在此里律例有赴所在官司告理之文亦以其势之所及者言也论田地坐落之里其里长又反似是亲管独不可以此律例意而推之行乎流水鱼鳞册归号册丈田之三纲五常也翁谓部议听在外便宜行事何曾执必我依之然部议又有国初鱼鳞老册为主之说欲天下之人主之也顾比之制度又为听人为之损之益之乎织造之家必先理丝之经而后梭之以纬不先之经纬将何附以乱犹治丝而棼之也欲求尺寸绢帛为九月衣裳之授不可得矣闻近日抚按文移言及翁亦稍稍有悟而又为之辞曰我先造粮册后造鱼鳞视刚峯说虽有先后而实无少异其于归粮册之归字讲之不通姑勿论欲使周四府执粮册逗凑鱼鳞谓粮册原有田形四至一检寻而鱼鳞之易矣夫田地形象不同而大槩亦或相似四至亦然且交丈互丈先后次第与今之流水又不相对合数十家之册而流水之其乱不可成生不能一一备说翁试即一垌之小小者令人逗凑数日间能成不能成而事可知矣周四府又必令里排为之交丈自丈已是一番骚乱又逗凑鱼鳞为必不可成之事生窃以为逗凑鱼鳞不如更为流水之丈反觉明白之易翁无苦此一方之人为也何也里排必取纸张必需供给又有分外取钱不可言之为也里甲交丈琼山县在分巡道脚下且不依行而别为之说翁曾不一就人之情思乎翁复言激而激之甚矣生居治下人不敢为激第恐翁先后所执二端皆必不可行之事苦此一方之人翁必有悔而无及之日故再进若曰尊申条款抚按已批准九府依行矣翁独以为不可何也则生不知之矣谨复

○复毕松坡【南吏部尚书】

瑞以二月末日起行四月初七至英德县尊差迎候二人在焉六千里之远而来人之劳矣山川险阻觉有伴护其心安先时谓无益于生有劳于人不免微有不满于公之意倏转而感一旦幸附僚案之末朝朝夕夕贤师传不是过也至江西闻公北晋计犹当一晤生以五月初四之夕抵上新河公先月二十六日北上事之不能尽如人意恰又如此公先日百尔行事诸衙门人时言之先人规模后人阶式也题知行人之便特此附谢十五之日文选忽进一不具名小柬为董胡二生求历事衙门一堂之上二十五人指视可行之乎一事私百事之私随之不

论大小是柬伪耶抑亦真耶并一问

○复舒锡崖通太兵备宪长

门下之处琼也何如哉何如哉比冰之清配玉之润而才猷又足尽发挥之畅中形外利与人兴害与人革至今言兵备海南第一人也甲科当之卿相而日久矣柰今惟有资格故公尚尔然官爵足为士君子轻重哉今二月之末生应命北上渡海计至维扬当得面晤而事又相左盛使至捧叶翰而拱揖诵之恍见颜色拳拳然闻过之求盖德盛心下有道君子自是如此尊惠本不可却但以近日上任殊厌南都虚礼今日犹然曾有告示峻绝之不可晓人分彼此谨附来人璧上北望通太大方高山仰止而已心乎爱矣言不尽意惟崇鉴

○复周养初粮储参政

门下柳塘先生弟也借有今日以挹双美光辉何幸何幸正方应命起行而华翰适至匆匆间百凡不一言悉谓此去日近一日面觐者得尽言言得尽意也其复令兄柳塘书亦俟面致之使旋谨此上复非故为略也惟崇鉴

○复周柳塘先琼州太守

我公守琼之日何如哉何如哉生不过传此黄童白叟之口写一时感德之急非有不语字减益也时共事之人萋菲不一谓琼人堕假物计中不觉其假岂韩退之原毁情状唐流今日犹然耶可怪而恨然此足为贤者累哉天下事有似损反益者今时称清明君子向用事久而论定矣他山之石非可久借攻吾玉者哉南箕贝锦自旁观论曰忌人曰害正可自君子求之已论不曰夫岂无因不可二月之末生应命行而华札适至十咏如对行李匆匆未暇和也偶便肃此上复容日勉所未能别致盖乐公之乐亦生喜为不厌者余种种未能详及统祈崇鉴

○复吴小江两广军门

人情世态瑞无用世之念久矣借誉诸公得见知于主上似亦若有天然之幸揆之先日后事可推谓能大有所为满吾愿或不然也俗耳庸目谁与我为之今已勉强上道自北流行请门下以决进止万一北上人便家人佩辞官本得托骥未尤幸种种俟面日及之迭至赆贺感激尤切言之不能尽者亦先附回使言谢统祈台鉴

○复汪渠瀛广东巡按

主恩三四及矣如天之高并地之厚然瑞今何年耶古人致事有期而今过其二杜少陵之齿发自料曰意深辞苦瑞之谓矣况人情世态见知于一时焉保有终于后日汉魏桓谓宫女千数其可损乎廐马万匹其可减乎触类而长小小补塞其罅漏或不如不为之为愈也天民达可行于天下而后行之夫岂为高索哉谓事机理势不可行于天下者不能济天下也公祖之

惠义不得辞使旋暂附之谢其行止迟速可不可俟面日请之种种今未言及惟崇鉴

○复薛鸣宇分守道

门下坐镇廉州之日声称满瑞耳矣琼州之人每每向洋领企生今扶衰北上道路之谈者与公初镇廉州之日无异问其次曰府之传犹可问其它先日今日则气忿不平而言怨矣曰贤者何故容之虽贤只管得已大抵其言亦门下言之而不行反祸之意昔人谓人君联属天下以成其身职掌所到有不洁人可洁已者哉虽君子不能无斟酌之计然斟酌必行非斟酌不得行遂止厚意稠迭使旋附谢来犹可追区区不愿门下今亦有不满之分也敬进一说惟崇鉴

○复汪渠瀛巡按

承惠勘合长单感甚感甚但本部差人赶至琼州迎生而不赍勘合郭华翁亦手书来迎拳拳言意勘合正其职掌赍书二人不与脚力南都诸公今日驿通之议又不知作何如说也大抵天下事每过于守法人称小担心反安事在疑似利已则以不疑处之不可勘合长单壁上其不面别门下者为暑热劳尊也统其崇鉴

○复吴小江两广军门

承惠导之出疆人役且令之催应付一应事厚意不一而止矣部题各于南北本兵给之勘合不及在外新例方严生疑焉拜别台严之后去三水县下水县驿各止用夫十名三水而上则生纂顾虽薪米与县驿亦无相干上会渠翁亦台端厚意也面请不得后又有小柬奉返录上外种种厚意言之不尽并附谢

○复朱讷斋镇山子

生北上三月末至南韶得会徐仰峯王如水知我镇山先生先一岁古人矣昨向晚到贵邑举家及生尽沾暑病又不得一谒如生灵像一大缺情缺事也忽阅行状益增惆悵恨生忝门下士老先生宦迹稍知一二表其实而扬以示人夫岂不可俟前途再加翻阅别复外葛帛一端少效古人鸡酒之情托回使叱名上致

○复贑州军门贾春容

在贑州日感赐多矣临行又复惠之船屋高粱大厦廓而且安与家居无异一家人鬱热之苦忽尔如脱且自湖口起二日直抵南都舟子以为风迅之极数年来未有同行小舟不敢破浪随行此亦莫非台福之所赐也舟回肃此上复附谢

○复王忠铭

生二月三十日渡海今五月初四日到上新河感冒兼之两足发疮未能即便上任近赐华札二如期拜领之矣生上变而厉精天下悬望公意亦主意也私念与公同辅太平今日之盛尽天下称赋差繁苦官吏残贪此习弊未易为未知能如吾愿与否生上任止在三二日间便遣人赍谢本北上生与公始而合中间隔多年今又复合诚可喜也种种意及吾琼近日事容他日再详细奉李王二子倚马今且病患未能一一

○复梁霖宇

自得闻高第以来日日月月喜之生之喜与他亲朋之喜异盖谓贤亲平日志趣借此阶梯可大发泄吾琼他日增一贤者士夫不比他甲第荣华俗眼与之仁人君子不与前后领诵华翰了知盛爱过为推毂之意忽领上命已于二月二十八日离家三十日渡海今五月初四日到上新河矣贱体冒暑然此二三日间亦必勉强上任贤眷自琼起先后行同二郎亦时到下处相见自南雄而下生以先一日过岭以后屡候之未到未得相遇计日筭之想一二日间亦到南京矣李王二子行忙诸凡未得详悉上任后人赍谢本北上再具奉

○启龚怀川

别后人各一方睽违之甚思公如天之上而不可即矣柰之何柰之何先岁领有华札知公离阙中将复命后又闻公在告今以五月初四日到南都又闻公补浙江掌道生冒暑得病兼诸色上任衣自行缴回南部

○寄梁霖宇【吏部观政】

自离家而来日日得与贤眷相同起止二郎亦不时至生止歇之处生先十八日过岭让支提学贤眷次日与支同后此遂至不能相候生五月初四之夕至上新河暨眷直至十五日之差差了十余之日风有便不便也今以十七日上新河起此后无里河运船之争不一月而张家湾矣生自琼而来夫马柴米系是自处船之大小不同可求其一其它视陆行事无异生行之难贤眷尤难尤难迟之又迟有以也生五月十二日上任任后例当具日题知行人之便特此再告诸公谓久之当有引年小疏自念衰老之甚不十日而有人北上矣容再言

○寄王忠铭【礼部右侍郎】

瑞于五月初四之暮抵上新河十二日上任盖足疮之痛诸冠服未便也王李二子行已有小启奉途中每思人之拙矣山林之久公家典故又多遗忘日夕以公必我一不憚指示为慰今又睽违望柰何柰何上任例当题知行人之便特此附告新任以后事宜非衙门仪注之所及并北都近事明天子注向一一明指而密示之尤望尤望不十日而又有北上之人矣容再言

○启王荆石阁老

瑞无用世之念久矣一旦误蒙主知十六年山林变而感发私计万里京师之琼恩报迭至如此山海之险前期难定于二月二十八日束装北卜五月初四之暮抵上新河咨到赴任念此成命兢兢也乃以足疮之痛诸冠服一无有十二日始得如愿奉例题知之便附启上候爰念主上改而励精千载一时之会也况又有虚怀之待天下所仰望如公之为辅乎古称治具毕张今之谓矣瑞北望台端依稀镇江口颜色也惓惓无任惓惓无任瑞齿发自料可用与否请公于廊庙之卜一语决之余不一

○启邓纯吾【原广东巡按】

生朽而无用十六年矣一旦有贤门下及华溪翁挺然拔之以今正旬末邸报二公荐章之旨二报通政三报部请不允四又报南院先岁之冬王忠铭梁霖宇亦有启而曰起用即矣明明天子意也生自知枯槁无用即古之人引年计之非可复出时矣又思有君如此即千载一时而忍负之乎二月二十八日欣然离家三十渡海至化州报陪点至电白报改陪为正五月初四之夕抵上新河十二日方得上任盖诸冠诸未便兼之左右足疮也上任例当题知人便谨此上达并附之谢区区日夕间上荅明圣下酬知己略无一不满之心矣柰年力不足以副何今日亦进退之间也惟一教之进之爱也不一

○启通政司倪东洲

生以二月闻报二月末日渡海北上五月初肆之夕抵上新河诸冠服未便两足染疮至十二日上任盖以是日方可勉为拜跪也任后例当具日题知人行之便谨此启上烦循例转达瑞衰老之年非可复当官事时节矣勉赴明命进退之间望惟明者一示决之外别悬

○启阁下吏部

瑞无用世之念久矣一旦误蒙主知十六年泉石心肠变而感激私计琼去京师万里之遥恩报迭至如此山海之险前期难定于二月二十八日束装北上五月初四之外抵上新河咨到赴任念有成命兢兢也乃以足疮痛诸冠服一无有十二日始得如愿遵例题知人便附启上候爰念主上改而厉精千载一时之会也古称治具毕张有君有臣今之谓矣北望台端无任惓惓齿发自料瑞岂不自知其非可应用时节耶可之与否公于廊庙上一语决之余不一

○复贺澹庵【原琼州知府】

门下三迁之琼日月无久也琼州之人至今在念黄童白叟皆曰贺公之不久于琼自是我琼缘分为薄盖贤人君子一有施为施为自别百十年功业可以失之一日之间来谕云云则可异无中生有而以加之公加之而至如是如是何耶大抵今日人心殊不能少似弘成先日禅宗学问视世界空而无有今日安心要诀也生初至南都礼文与先无异未同而言曾具峻语绝之不可晓人分彼此厚意敬托来人壁上今吾故吾惟公与生受不受无所不可勿以为讶种种意语有待而未尽者秋冬交候公枉至促膝及之公母负约惟崇鉴

○复汤阳南

生自闻命有北上之意曰且得与吾阳南公一叙久渴情思矣五月十二日上任会凤阿得知门下春秋虽高神力未倦田里优游怡怡熙熙益用为慰三五日之先贺澹庵亦遣使至而归矣期会拳拳一令孙所言之候盖暑退凉生至此然后为便使者曰汤公主人亲至也居同县同门下能与之携手而俱来耶至望至望惠饼食拜领之矣余壁上淳安而后赐之诸般药方用辙有效惜已失之今能并会后而又有可称神效之奇者抄示之尤幸

○奉二守陈南川书

迺者海寇猖獗中外惴恐未尝顷刻宁息厚禄官军无分毫用处无许承宣二百余兵城池仓库举以授贼矣粮饷之薄所以无怨心怠志者料素称爱民练事如执事者归府之日有厚赐也牛酒之出市井欣欣咸谓黎兵敌忾当百倍前日然乡兵打手黎兵人多物少而奉行左右又失执事美意无劳者携肉归城而黎兵所得有名无实二腿之肉闻其众嗷嗷口语赖土舍叱之而后受是酸酒腿肉非徒无益反生怨心宋以羊羹丧师卫以使鹤辱国此何等时节而犹吝嗇壅蔽若斯耶财者上之所轻命者民之所重惜所轻而欲民舍所重卫我焉不可得也恤死厉生正今日用人之诀黎兵死于澄迈之战身享殄祭妻子厚赐周县丞良有见矣生员郑德贲之死非可尽以轻生例之也居民皆若人焉海寇宁能扬扬入村落窥城市乎志士不忘在沟壑勇士不忘丧其元孔子取焉官军间能强戈向贼皆德贲骂詈所致曾射伤海寇脱军士数人正所谓一介之士苟存心于利物于人必有所济也执事不闻有哀恤之意将何以厉死难之士哉执事运筹于中俞虚江介胄于外谅有大为琼民保障者兵聚白沙而他所多缺我师迟久无为贼众猖獗益甚中外疑焉似此二事尤为不当人心可以坐生呼吸之变者伏惟执事执为匹夫匹妇复仇之心周详谋画毋以一郡生灵付武人身任其劳勿以紧急事体委庸吏再调黎兵以布要区广募勇士以乘战势毋稽迟以失事几毋疑畏以馁七气则總戎之能与爱民之政并着于时而琼民感功报德于亿万斯年矣瑞不胜幸甚幸甚

○再奉二守陈南川书

窃惟执事清白之守爱民之政任事之能琼民歌颂有素行将镌之金石纪之史志自昔贰琼政者所未有也第为民父母亦大艰难毒刻者民无望焉迺矣执事爱民之心素孚民之倚赖于执事亦重且急陈爷回我辈得安全之言既闻耳矣在今日则又以为执事又容贼俟贼饱饘自去之心而无决战之志谋勇如虚亦窃议曰畏贼如虎不用琼人而俟打手不过私已贪功之故夫海寇杀人之惨据掠之毒有甚于今日者乎苟有仁心者将食不下咽求所以处之必矣况仁能之守谋勇之师若此议论似出舛妄然揆之事迹则或有以致之盖处海寇与山寇不同山寇有巢穴海寇无定所大兵一集则彼将飘然远去故海滨之善击贼者不与贼较多寡大小而惟伺其便或接其远出之快马或乘其独存之大船诱之伺之千方百计尝以为大众之举不如乘便之捷目今寇虏肆志玩视官军快马常离大船百里外远击村落大船亦屡相离抛泊便可乘而顾诿之曰无人夫孙子之能兵妇人可试铺前等处素多击贼之手虽夺利一事坏于前人诚心之招狭鼓舞之有道今不得而用之耶巧媳妇之难于粥者为无米

也今则不加火候之功而非无米之故矣请舟粮于广梧调打手于昌感救不止于一月之远而独守白沙一区目今东掳一村西掳一村若蹈无人之境则急在朝夕之近生灵几何可久堪此荼毒耶用兵之道母恃其不敢恃吾有所不可攻贼势若此能必其不自他道以窥我守不足之城乎论兵来贼去一事民之深仇不复犹之可也上人之谋为士卒居民之备豫杀掠易于他府所得多于别方既昭然在寇目中矣此之慕利复来党与闻风继至自今以后琼将何以支哉鼂子谓一大治之则终身创矣正今日之谓也而顾不为兵行粮随无抚按明文可据然前人固有罚某罪人修理某学舍某公廨费以百外两计者又或作私情于某士夫某士夫十两二十两者上不能如汲黯之发仓粟下不可为转移之计乎值燃眉之会而行此权宜似亦得策凡此数说虽不可决云至计然千虑一得诿之曰民不可与虑始惟以候兵船为持重焉非特汉人所悲以百万之师为一使之任昔有性缓者其家失火至近亲之家取梯以救方与斯人揖让相礼坐定而后徐言取梯之故梯至而其家灰炉无存今日持重之谓矣夫职在一郡者惠及一郡则有一郡之功处置乖方则亦貽一郡之害朱砥翁莅琼要其初政亦温然慈良长者徒以摄兵之故遂致议者以狼兵杀掠多寡科其罪君子或以为确论焉吁可不慎哉伏惟执事仁民之政既专美矣今日之事尤当曲为区处之计母以事之得以自遂并权之不得自专者诿之使厚责望者得以置之议曰军旅之事或非书生所长也吁非今日难中之一幸也哉事在闻见不敢不以实告惟执事裁之度之

○与琼乡诸先生书

瑞顿首再拜敬质之诸老先生大人执事窃惟妇人处人世其大不幸者夫亡势不得与夫偕亡而抱守区区孀处也故妇人之丧其夫而寡者古以未亡人称之然至朝廷旌庆官司荣奖诵书知礼道苟以世教为身荷者褒赏之传列之举呈而进之有司冀达于上惓惓汲汲则必孀守之妇加焉何故盖忠臣烈士贞妇孝子上植天地之纪中揭人道之大下立世道之标均处人道之难而彼妇人无师友开明之功匪名义驱役之故独绝情感哀念夫子于数十年之后心坚金石行信四时处心积行所关系感发尤非浅小故也瑞甫四岁丧父时母谢氏年二十八承父志励节确守经今三十有四春秋矣一终之行无毛厘玷秽古称陶婴共姜辈直可以相上下而无愧焉者盖母幼粗识书史语瑞少学口授孝经学庸等篇质稟近刚一父性警敏不羁不事家人生业相励护持能使内外不致乏绝先后苦斜裁营衣食节费资督瑞学至今虽衰疾相仍不能一息少暇女事为疾忧计日夜同瑞寝处访问戚近惓惓然举而托之严明之师以琢以磨兼有父道瑞今日稍知礼义勉自慎饬若非速年背父者尽母氏谆谆开我力也持家有纪法教子有义方律身以正义丧父之日有所亲以日者推筭进母举焚之誓不再醮如日者语执之今日不变夫岂偶然夫士君子行善取快于心非徒取华于其名妇人洁飭乃身凡以毕天之与我而已是安足置齿牙间者假而上获旌闾之荣下获纪述之美于节行亦何所增加也瑞顾区区举而颂之人者是是非非之公本无择于途人父母而纲常之义守贞为重昔子厚游岐邠间必广询秀实逸事状色为韩太史上矧瑞荷恩罔极知之实真见之实详且辩者顾乃掩匿而不公之乎世有言及族戚君子恒不以了信承之者盖谬执讳亲之私其习久固经曰其先祖无美而称之诬亲也孔子直父子之隐孟轲宜周公之过垂训之文不少矣于父母祖先独略焉宁扬善特于亲亲避哉然则圣贤不以褒贬之权假其亲盖可见矣又其浅固有诬扬亲行窃宠荣称孝者遂致人得以诘所扬而反疵之言议纷纷不已诬

亲之善显亲之恶也亦多矣而瑞独何以用心独念吾琼先辈师法如曾白潭亦其彰彰著者徒以莫为之名经久不与乡祀其它着卓行而负屈称加美名于败类时不少焉况中闺事迹罕可得而着闻者独非君子之所宜尽心乎公议不行俗将无以为劝桐江一节汉鼎赖之瑞非罍瘠之身有不能自己者故缕缕为诸贤者诵若夫行之可褒与其言之可信与否则惟下执事以所闻见参之事在清议非敢以一毫私意为母辱图也瑞不胜屏切顿首再拜

◆记◆

修学宫记

借山亭记

乐耕亭记

○修学宫记

宫室一手一足之力也哉民日从事于官府造作之中伤其力不能不伤其财其害孰要于是俗有与人睦劝人盖屋之说受天子之民而牧之外者顾其智不俗人若哉目谓供游观之丽木心谓不为出已之财也南华之经有曰大林丘山之善于人也亦神者不胜余意欲持上古茅茨土阶之道不失赤子之心化今人心然天下事亦有必不可已虽大舜生今之世不能已之者取譬近事以例其余府学之为官五琼山三一官一舍仅有其一人间世有不同之人情乎出纳盈缩之权今非有司官不能官舍美不美不同未见其一人不得居止之安六训导独无所有祖宗九经治天下体群臣则士之报礼重初不如此不可一日安之事二三十年人安之太守敬亭唐公莅任之次年书院中有危阁改公馆而日封锁之何补也转之府学后山之麓事非创新为之通风日于文庄石室之中板其周围上下尊经贮从古文史石室贮文庄公著述世史正纲学的遗稿会稿墨板犹有存焉贮其板后圣祠地址湫隘更之前右爽垲之所合训导宇而时一新之材力不至于此创成其一其五期渐图之堪舆家有白虎昂头之忌复闲棂星之左见龙于东敌西方之口前南城麓坡陀草昧之象也辟而广之城壁立而廓然文明矣士子前瞻鴈塔后眺尊经风光物丽不可谓非身心性情一助也省牲置之所储祭品别之库有合于制先有今坠先人未有行之者今则为之后先错举皆万历七年八月日之事其修径栽植一瓦一木补葺罅陋亦事之不可已而非其大者不计一心在民亦未尝不一日一心在士其功如此士类感德之深向余母吝一言纪事之盛夫今日可以茅茨土阶言之乎非其时也势有不行因之士有天下国家之志不能待舜圣人之时母失舜圣人之心庶可小补之尔敬亭公太守当日之事爱民必其俗之改爱士必其习之正不觉声色之峻俗士言不便矣不以今之所谓厚悦其口伤民财力悦其目乎日举兴作之中不忘与民休息之意造士之功于是尤见其大貳守滨湖杨侯别驾鹤峯黎侯以调去任刑厅大东刘侯与有赞成之力皆怀川御史公怀得其人人物也于义得书虽然古人谓文人纸费梓文曰灾木今灾石矣茅茨土阶是亦不可以已乎并之为记

○借山亭记

才满天下事不立于天下天下之所少者非才也气也何谓气曰是不可名苏子称卒然遇之王公失其贵晋楚失其富贵育失其勇苏秦张仪失其辩气之谓也行有不慊于心则馁矣始资学力扩充之功终在长育涵泳之力秀水继山沈先生其主事刑部一日出有庙廊之言不死远戍鸣阳蔡二守就阳江邑中之隙捐俸构亭为讲习所扁之曰借山借之为言天地万物本同一体之义也一旦上心有悟山亭或非久居继山之所继山先尹番禺继属西部日可见之行未大也鸣阳何取于继山而期之若是日期之以气琼楼盛子必余记之夫气充体无可见而君子必此观人气在我则我大也我大天下之物为小欧阳修以谏官事宋仁宗牵复札子言今言事之臣规切人主则易继山时处其难浩然天地之间继山之谓矣夫俗说亦有一端之执养气而助之长者非善养气者也请与继山别白言之孔子称管仲于今受赐之功孟子非之孔孟有异道哉孔子取一时之急盖医家治标之论孟子言王道之全也嘉隆之中正湖广中庸之会岳老目击其后而一扫新祖法如见其短其非自在也此则短中特见之长时指之刑名目之操切如雷发声物同应之夫操切言把持人刀强斩齐而人不便也大学絜矩天下言顺天下之情不言徇一人之便孟子七篇王道天下可运之掌齐国天下莫富强焉不足置意中也王伯之害孟子自不得为管仲让今日纷纷之言邈乎未有轲氏意也操切之言言出何据瑕掩人瑜我又何别可以服之天下之人未能别白我心求信天下之心天下无有天下有望治之人心不见有行治之官吏民之疾苦尚先日也格心正本今勿论而论及其勿论道有急于此乎操夫人必痛之而后畏之情可收一切之效不能清贿赂之原本不能峻追赃之警后犹幸兴事考成窃窃然扶衰有助也求之言者之言或并大小而无有矣相公以一人身应天下国家莫大无穷之变僭人之追羊不获者曰岐路之中又有岐焉或过不及相公不可护谓无有天下事有义理义理之中又有权要不思之天下势而已矣之中不求之一二日万几之隐恍惚怨言隔靴搔痒朱子指熙宁元丰之争其说多出安石规模之下余子今亦云以此而气是曰助长之气无已则王乎孟子不操切人也五亩百亩之规为庠序孝弟之中谨交隣有道一怒以安天下之民挾秦楚之甲兵平廛市之征布时食礼用鸡犬墙桑未尝一事弛废结纓孔悝之难孔子曰若由也不得其死然请以是记相公身任天下之重恨不见此短□□闻瑞请更一一明之纷纷今日之言或不足为相公服也陆子静谓上不足以取信于裕陵下不足以解公之蔽反以固其意与今大抵相似未用子路死卫辄之事应前一死远戍死字附记

○乐耕亭记

始予未接西塾先生意一豢养之人云尔获交数岁见其诵砥行廉隅之士欣欣然美焉若有企望弗及之意呜呼休哉兹世禄之难也交益久见其闻仁笃检约之行欣欣然美焉行且钦崇勅厥躬诗礼训厥子败度维欲败礼维纵将深愧弗为焉呜呼休哉兹世禄之尤难也嘉靖甲辰之岁于瞻玉堂遗址之西墨客村构乐耕亭于上将以统率仆佃之耕非徒取名于此也一旦以其事为予诵予讶且喜曰贤哉先生乐耕之意乎而尤之者则曰不此之葺而顾彼营焉裕祖之蛊非孝也予意不然贾子称一夫不耕或受之饥一女不织或受之寒今之为民者五曰士农工商军士以明道军以卫国农以生九谷工以利器用商贾通焉而资于天下身不

居一于此谓之游惰之民游惰之民君子之所不齿也世咸以异端游手目之而不知儒生贵族特甚先生以文庄嫡裔居宝丞之荣俾自弃于游惰之域以逞无疆之欲则凡可侈可淫之物罔一不备其为园夫红女之蠹可胜痛哉视异端游手之害十百矣纳享有作为耕也且以乐名推此意木必不忍腴若饮食为谷粟之靡必不忍晬若衣服为布帛之蠹又必不忍厚若声色之娱妄若货贿之聚为厥生伤年弥邵德弥崇举凡淫侈小物为世禄子所有者咸芟蕘蕴崇之渐尽矣呜呼不贤而能之乎仁笃俭约亲覩之行义节之美行且于反官之日可期矣亭扁乐耕岂曰小补哉若夫流连光景假此亭为聚游之地瞻王堂有述亦殃也乌乎孝始而士今而农不为五民之蠹诗曰孝子不匮永锡尔类其先生之谓乎呜呼贤矣哉先生曰兹吾志也敬持以为记

◆杂说◆

严师教戒

客位告辞

训诸子说

黄恭人林氏墓志铭

龙南令鴈峯吴公墓志铭

祭黄墩江文

祭吴南瀛先生文

劝农文

○严师教戒

夫人外无师友之益而欲所行之协于道亦难矣瑞为此惧一旦召神立腔子下海之曰瑞女知女之得生于天地之间者乎有此生必求无忝此生而后可无忝者圣人我师一一放而行之非今所竞跻巍科陟臚仕之谓也女今亦小寓于其间矣入府县而得钱易易焉宫室妻妾无宁一动其心于此乎昔有所操今或为恼恼者一易之乎财帛世界无能■〈立乞〉中流之砥乎将言者而不能行抑行则愧影寝则愧衾徒对人口语以自雄乎质冕裳而有媚心焉无能以义自亢乎参之衣狐貉而有耻心焉忘我之为重乎或疚中而气馁焉不能长江大河浩浩然而莫御矣乎小有得则矜能在人而忌前有利达不能无竞心乎讳已之疾凡百所事不免于私已乎穷天地亘古今而不顾者终亦不然乎夫人非无贿之患而无令德之难于此有一焉下亏尔形上辱尔先矣天以完节付女而女不能以全体将之亦奚颜以立于天地间

耶俯首索气人其一举而终已于卿相之列天下为之奔趋焉无足齿也呜呼瑞有一于此不如速死三复斯言凜若严师丁宁夏楚之督尔上纷如直友箴规啐骂之诤尔旁

○客位告辞

君子之不能绝人逃世情也然文侯子美扫径拥篲以迎孔北海亦有座客常满之幸若不可一日无焉者情云乎哉瑞自幼少能知识意窃有执焉纷纷世态其不当予心有日矣近有一二执此行者私自谓虽圣人复起不可易也其纤节所系尚无能特然拔鄙俗以超入于贤圣之域清夜揣较犹天地间不才子也而人或以固疾之夫瑞之所守岂偶然哉其不能以恂恂而易决矣然人非圣人几微之不能自省一时之昏以怠者有之正须诸贤者提掇之力也顾无能以正道旁格方举世俗之说居不疑而进焉嘻熏莸水炭之不相能固矣陈登无客主意小人欲卧百尺楼上卧君于地瑞非敢以此介怀念也有终鲜克虽瑞宁无一曰若柳子所云河间妇耶用是惴惴以箴规磨切之道为诸贤者望故敢以此诵于下执事亦冀共成天地间一克似子也

○训诸子说

二三子之从游于吾者何为哉天之生此人也而百责萃焉古之人所谓通天地人曰儒大学之八条目知所先后其事也人非生而知之者孰能了此无憾故从其先得者而问焉其不免日程课于文艺者盖有司须此以贡士发挥而涵泳之于此与力力也其售不售不与焉今之从事于学有以圣贤自许者乎而决状元进士于科第者人恒壮之此学奚自而来哉瑞于诸子有一日之雅于经授或未尽焉而饬躬励行人之模范敢侈然自谓足以当之而无歉者然学求以复其良而已操心治心此不师而师之严切者诸子谓无以过我而师焉或可稽之经传质之子史反之清夜莹灵之气固徒曰吾惟师之从要亦蔽焉而已圣贤以识真诲人其说备在方册踊跃于讽咏而不能以自己昂昂然张胆明目直欲毫发终行之此日新之地也行之而牵于俗不免有怯心焉则志立而气不充也仲由不耻缊袍之立孟轲首大人伯夷之敢于非圣人而不顾时举而服之心胷之间往来不置或者充养之有机乎不然徒缀酸文识陈语为后日富贵故乡之计视百责于我何如纵其一举而进立于卿相之列吾为二三子丑之矣夫求富贵利达而妻妾之羞泣从焉真心也施施而骄其妻妾失其初焉者也孔子得子路而有恶声不入于耳之幸事师无犯无隐究其所以至于若此乎君子之无耻色忿而词忤焉圣人不计也二三子何以复我

○黄恭人林氏墓志铭

余与瞰江公共籍琼山居址去不十里许恭人林氏之贤闻之矣而门内朝夕不及事言其细日月有时将葬其嗣燕石君以状付余乞从先人故事为志予辞不获据状叙之感今稽昔按恭人瞰江公同东岸里居高士林翁女也燕石祖主事豹岛公与林交莫逆一日出瞰江公见翁奇之口言恭人矢与为配意与其母冯氏不合盖冯不欲以已富家之女贫士如豹岛公俯就之而为其子妇旦夕进有沮言乃翁执初不易母论豊约恭人逆知父意之有大也言归黄

门之后虽处贫则难未尝以毫末缺为夫君向学内岐其心之累脱富而贫有亡黾勉盖自入门来而妇人从夫之义无歉然矣萱堂有姑峭厉其性而恭人朝朝夕夕反得吴太安人之心出内外人难乎其妇意料之外啜菽饮水饥仍之岁有之太安人见妇有色笑焉盖恭人妇礼无失深爱之下又■〈歹宛〉榆而有感动也噉江得有恭人之后不徒外有亲师取友之资抑且内无高堂奉养之缺年二十五预乡荐历六科第进士盖又十又九年彼一时也士风恬嗇无异其先黉中之日也而恭人安之第进士又四年乃授西曹主事西曹无外差京城衣食难于给而恭人安之安之于不得之日易安之于妻妾之奉改心他图得之矣之日难我入自外室人交徧谪我恭人不为也噉江不变塞于举人进士之初豫养澹泊之心为他日有为之地恭人成之其尤可言者噉江以嘉靖二十九年部郎资及得推临汝刺史二千石一迁御而诸不同矣恭人方且不自为逸随官仆蔬艺绩纺有不堪尤之曰秀才小家照旧如是不自逸于太守恭人之日反逸于其它焉乎恭人惟俭惟勤初终一心虽百十年之久可以占知于知府一官之日何也俗言得官喜其享有一官之入享入而盛内外员不亲民知府若也噉江不幸嘉靖癸丑岁内艰服阙则赴部例也法也而恭人意独不然枕席之言若于古人知足知止先几而退有默得之今士夸功名大指又在富贵锺鸣漏尽行犹不休多之矣日无见闻闺守之女反有出于日有见闻士人者之上有之乎宦海波涛噉江补池阳晋宪副望荆襄而戒心焉上疏请田恭人不行一着为先导也归田之后夫妇如宾若加先日恭人之为噉江公敬有自来矣吁贤矣哉大抵噉江性达旷恭人性深沉达旷矣而非得深沉者加之收肃终不免于水以济水琴瑟专一之失黄氏厥子若孙于琼称盛经史精微噉江之力而朝夕检约自童孩以至今日弗使纳邪而由之正恭人之助居其多也言念恭人妻道妇道母道无不可纪奉先筵宾酒浆应对内外宜之家下人不失恩顾事事训讨则小不遗葭莩之中有急则周少或渐染流俗不以一失不勤饬谕噉江晚年益自疏放恭人又自严整过前持其家及身内外斩斩微无不谨可否相成以一妇人而天资近道有如此燕石谓家有严君父母之谓并噉江公而称之诚得恭人之所为恭人矣恭人生于弘治癸亥十二月二十二日卒于万历乙亥九月十二日享年七十有三先嘉靖甲辰以夫贵封安人后嘉靖甲子以子贵封恭人子男八其二早夭长宏宇任浙江参政次宏惠南康知县次宏宾宏宸宏晟俱郡廩生宏宾先卒宏宸近卒季宏寰亦先卒女二其一早夭一适侍郎唐西洲公孙已故郡庠生惇孙男十八喜之举人右之式之郡庠生寿之诏之建之名之立之偶之升之诰之性之及之任之修之储之之女十三一适已故邑庠生冯应会一适知府王公孙邑庠生廷瑜一适大卿夏东庵公孙百户一适邑庠生陈起元一适少傅丘文庄公孙承裘一适郡庠生杨绣一适副使林公孙林启元余幼在室曾孙男三见曾希曾女四各幼以丁丑年十二月十七日合葬于金鸡岭噉江公莹之左恭人有是全德天与全福铭曰亦有先几之见又不止于为妇女之仁翼夫迪子奉姑及身小无不及惟大有伦利牝马之贞往元亨也齐驱士人振声今日正家而定盖自有因御穷持富莫与之臻鲰年命服羽螽趾麟勿替而引命自天申金鸡之兆卜者曰气固而悠益久益伸百千万年猗欤恭人式德如新

○龙南令鴈峯吴公墓志铭

龙南令吴公之捐馆舍星霜屡易矣其乡所撰行状则鄱阳令王子汝为也公之季嗣觉以志铭久未有属为缺典乃持状诣予泫然愿有以请也予为公晚辈盖素辱公教雅者不敢以不

文辞谨按状识之公讳诚字明卿鴈峯其别号也南湖之西有峯名鴈塔公居濒之因号焉其先闽之延平人世居永安之贡川大父讳本字渊泉娶罗氏生子二长大用次繼祖以避景泰癸酉兵乱携繼祖入琼续娶滕氏生女荣姐滕氏卒本拟归闽以繼祖与荣姐留琼毕其婚嫁而归更繼祖名俊字子贤娶周氏有贤行生公公幼颖悟过人稍长嗜学不倦年十五游邑庠踰年考妣先后繼丧公哀毁如不欲生葬祭尽礼姑氏荣先适李牛人明年二十四而孀无子矢志不二归吴抚公如已子为之聘娶教戒淳切公获励志举子业无内顾之忧正德丁丑姑辞世公哀恻如丧厥妣殫力葬服丧三年乡人义之具请于郡旌焉时桐乡王公佐西洲唐公胄会修郡志载之孝义传附录诸名公诗章以美之庸以风世也已卯公领乡荐嘉靖癸未试礼闈弗第遂就谕柳城时按院谢公督学唐公雅重公文学檄统八桂书院五经师事寻委修柳州志咸以成绩蒙旌丁亥擢掌教贑州督府唐公复命修都台志凡诸谏草诗文多属焉其以才识见推于上如此公在柳时唐公以乡雅密遗缺膳百金公固辞至再唐公为之愧服在贑有指挥某罹法当刑以公受知督府密遗三百金求免公挥而却之唐公闻之深加叹赏其以廉介见重于上如此乙未擢令龙南首厘宿弊四十余条严禁令绝苞苴奖善化恶植弱锄强民赖以安有龙南书生冯尧者以强盗株连系狱公力辨其冤释之远近称明县与龙川和平接壤流贼肆劫难制初督府阳明王公剿三泐招二酋谢钺李鉴者给以冠带使戢群贼至是纵党为殃公乃建议当险置舍巡守缉捕遂持军门檄入贼巢相地二酋恐诛出迎公廉得其情因设议以贼灭贼密遣武士檄二酋期日擒斩诸贼解功行赏如期无功先加灭戮二酋悚息受命会沙头贼徐守沐等僭号猖乱钺鉴伏兵擒捕上功军门悉平余党境内晏然其以勤能效劳于上如此县中巨猾陈攸徐杲辈素党群贼以贼破尤公适小民诣县告攸并占田土公明正其罪攸怨益深遂与杲贿嘱泰和刁犯萧福捏词诬公公直之当道得其状寘之狱公复视事因浩然叹曰道不可行矣遂恳乞林致丁酉冬解组南归闾邑士民攀留无计卧辙挽舟者斥江口有远送至数百里者咸恋恋不忍别盖公能爱民如子故民爱之不啻慈母然归则寓乐烟霞绝迹城市静坐一室左右图书布衣蔬食晏如也公古貌古心孝友笃至蚤失怙恃每遇春秋诞忌日辄兴风木之悲姊年八十无衣迎养不怠没则以鴈塔地葬焉性尤好义乐施有称贷者罄囊与之不计其偿课子讲学从者云集教人以立心无妄为本乐道人善口不言人过乡人咸信而慕之凡有私鬪皆就质平因参酌蓝田乡约朔望会众举行期以反淳敦薄至今赖焉晚养静湖南疏阔世事当道有司每延访加重时有廖安者以人命诬讼公兵宪巔泉胡公诘之曰此非郡志所载孝义者乎立置讼者于法明晨命车就拜对语移时因四顾坦屋叹曰真清白吏家风也小洛何公按部至闻公名造其庐而礼焉郡推徐侯邦佐以乡饮累请公不至躬率诸生诣门敦请始一为之出其恬静足以激贪懦大率类此生平触景兴怀动必形诸吟咏所著有鴈峯集诗晚年日录共文集凡若干卷藏于家塾岁戊午泊庚申寝疾者三年绝粒歷四余旬而精明不眩乃属其二子曰汝曹知溯本源乎予大父渊泉翁豁达温雅常以琴书自适至琼以贾为业有市绢遗金者既去候其还而返之予父纯和府君端恪恭逊与人无竞邻有屋垣侵其址仆辈直之辄戒止曰被所侵咫尺耳何以较为尤轻财好苦有债负则焚券示之吾所以有今日者祖父积德不可忘也顾吾老且死不得一谒贡川之庐墓为有遗憾且德薄位卑无能 2 扬吾愧焉汝曹其谨识之勉昌门祚以毕吾志吾可瞑目矣将属纊之日晨兴与二子诀曰予数尽此日中遂起离榻考终正寝公生于成化己亥年十一月二十二日卒于嘉靖庚申年三月十七日享年八十有二吁公可谓以德致寿者矣初娶林氏生男鍾灵蚤卒繼娶林氏侧室蔡氏生子男五人元允光亮觉元光亮俱蚤卒允府庠生

娶许氏蔡出隆庆壬申年卒觉由府庠贡授钦州训导娶冯氏教谕王谷冯公之女女三人志贞适莲塘庠生张性志洁适石城王府教授周谟龙姐适澄迈县符裕孙男二人懋芳桂芳懋芳娶李氏桂芳聘都督府经历鍾王阳季女孙女四人景清景淑九娘重娘景清适柳州学正黄砺泉男鹤峻景淑适漳州通判周月池孙弘礼九娘适藤寨王霍重娘适庠生张凤岐公以嘉靖壬戌十二月二十二卜葬于白水塘那坛之原寅山申向盖鬱鬱佳城也复为之铭曰于惟吴叶延浦发祥生此哲人哀然琼阳吏隐南湖既寿而臧斧屋之封精灵永藏有谷以诒奕世其昌令名不朽湖山苍苍

○祭黄墩江文

隆庆六年某月日眷生海瑞谨以牲醴之奠致祭于湖广按察司副使墩江黄公之灵曰惟公空洞坦达朴简塞渊内无藏蓄心若其言如垂于谷如集于木飭已蠲矣而笑语燕誉回视天壤之内身心内外孙子福祿人无我先屏不废遑行罔拘牵惟公初载颖囊于玄脱颖而出恢恢乎提刀满志解牛数千甲科部秩外守贬矣公慷慨自与标表后贤亲民事业至今抚川之迹池阳之漬籍有嘉言乌台进秩十亩言还闲闲棗者容与蹠跂抚臣交荐羽用为仪公矢勿援于舒于卷质任自然嗟我人兮靡哲不愚嗟我人兮蝇宠戟隅公戏不至谗纵不涉狂彼交匪祁解龟脱组弃我迹遗芝兰满庭举酒赋诗公志毕矣公无外愿公心则夷子孙川至勿替引之令德寿岂生踰古稀福址如公几见也耶而复何咨逝不古处方何为期缅想仪度含情惨悲盖一以人之云亡为恻一以恻吾今日之依尚飨

○祭吴南瀛先生文

万历二年某月日门生海瑞谨以牲币之仪致奠于尊师南瀛吴公之灵曰惟公恬淡庞朴质美自天复庵父作流长光茂远有根源平生不能少贬一二时沉时浮为诡随态度矫激昭著述世称贤匡君活国干济为肩嗟嗟土木为之兆也因以用吾之权帝心简在严氏为愆一斥不复平生蕴蓄未效埃涓念彼共人亦贞亦媚群飞刺天公心如结言老而幼金石为坚事业无闻于后独行愿也公道则然养恬乐善熙熙田里志无外援太白若辱盛德若不足心旷神妍瑞公门弟子也瞻仰在念灵与周旋春风绛帐恍惚前后返魂无缘泰山梁木有涕如涟呜呼哀哉尚飨

○劝农文

窃惟农桑耕织衣食之源四民首务大所当知丈夫当年而不耕天下有受其饥妇人终岁而不织天下有受其寒假使尔民尽耕尔妇尽织则尔众之衣之食当有取之无尽用之不竭者矣其为养老慈幼贍生祭往之需皆于此而取之终岁之乐亦又何如倘尔耕或不勤织或若懈则无衣无食未免求揭于人苦有不胜言者尔民其念之哉今特设立劝农老人为尔农人之倡尔于春耕夏耕务尽菑畚之力秋敛冬藏尤循节俭之风相土之宜悉植梨枣桑麻之属俾野无旷土街无游民粟多而不尽食布多而不尽衣则三年之间可使足民然后农隙之暇立社以祭以会父老以乐终岁勤动之劳入以孝其父兄出以敬尊其长行道让路耕获让畔

母酗海母鬪爭母作強賊母毆殺人母從白蓮教自殞其生子弟習學各安其居以成禮義之俗豈不泐穆淳美為可嘉尚也哉本職政事之暇時一巡行郊野察爾勤惰并不多帶人役以擾爾耕爾織有喪不能舉婚不能配或家貧兒眾不能兼育飢寒凍餓疾苦冤抑之情宜為我言當與令丞共保惠焉嗚呼民吾同胞物吾一體羣黎百姓尚母惰耕惰織下情不達也哉

海忠介公全集卷之六

卷之七

督抚条约

续行条约册式

考语册式

钱粮册式

应付册式

均徭册式

通法

则例

官举等册式

谕道府州县听嘱托

示府县严治刁讼

示府县状不受理

禁印书籍

○督抚条约

为巡抚地方事照得本院谬膺简命督抚南畿莅任之始所有一二条约除积弊于相安复祖宗之成法不循常不变旧惟此民困可苏舍此不可言治为此札仰本府官吏照依札付内事理转行所属州县各一体遵奉施行俱毋违错条约开后

一官吏不许出郭迎送如城郭大阔及本院骤至一时不及知者随城内近便街道迎送俱是不出郭本院经过府县城郭虽去途次咫尺亦止于城郭内近便伺本院入如不入城府县不许出见抚按不见过客可知驿递官止于驿递衙门前伺接不许远出接过客亦然

一本院按临各县如该县原不曾经有抚按按临止随原有公所就中择其可者奉本院暂居

不许改修其摆院砚池卓帏等件亦止随便不新制本院到府外州县官不许来府见

一本院所至各属官俱用本等服色见不许如前素服

一各官参见手本用价廉草纸前后不着壳后不留余纸别事具手本亦然凡册用稍坚可耐久而价廉纸不许如前用高价厚纸申文纸亦然册用白纸表褙为壳封筒用单纸内先用一草纸护封防弊不用表褙纸凡文册俱指顶大字便览防洗补申文供招等项不许重具书册

一本院到处不用鼓乐止一伞不用看伞看马各县驿暂备堪征战健行马一匹俟本院住札日别处

一本院经过并住刮俱不用铺陈如吏书原无铺陈本院到日别处

一本院到处下程止鸡肉鱼小瓶酒等件不用鹅及金酒物价贵地方费银不过三钱物价贱地方费银二钱烛柴俱在内驿送县不许送不携家行别有牌减数

一本院凡巡历所在县驿俱不许铺毡结彩拜席等用止用本地方所出稍软厚草席百凡家火一从朴素有用银箱锺筋并华美物件言之不从是阿谀小人也剥民媚人不独丧已

一府县每有新任离任上司必遣人前途迎接新任参去任辞废事劳人殊非礼法似此之类其目尚多县之于府尤甚合行禁革若妄亿人情喜谀不可执一虞人守皮冠堂堂衣冠民表率也乃不能守此一步耶此不能守他尚何望今后凡正佐首领官某月日或离任或出城或出村落勘事便见某上司某过客从实登记同差皂隶民壮为一簿听本院吊查

一本院到处即放告江南刁风盛行非系民间疾苦官吏贪毒实有冤抑而官司分理不当者不准

一本院到处虽村落非荒野可虞地方许里老见指画本里利病及府县民事至衙门府县耳属于坦彼有不可言不敢言者以此通之

一州县理民事驿递管过客祖宗制也阿谀作俑流弊至今县官真做了一个驿丞知府之身亦当驿丞之半殊失初制会同馆出马递运所出夫宛大县无预焉咫尺天威法度尚在应天府官小夫银已行查革止以前日驿递浪费之银补原日州县今付驿递之用斟酌损益立有长单自前文到之日各州县原派答应过客银而已征者贮库未征者停征起止府分以本院发去长单付过客取应付无驿递州县原应付银革去一半量存一半应付驿递炎凉之弊本院深知之有不如单应付酸酒腐肉疲马小夫及中途而逃本院决不轻贷若过客敢有凌虐生端索取先拿家人送府县监治停应付走申本院按临有此驿递击鼓禀本院知惜民财知有国法不知其为京堂为科道为部属也驿递官行之我辈读书知礼义人且长单所定食可悦口夫足挽舟夷狄可行何事凌虐左右前后皆驿递人势亦不能凌虐也驿递毋自生事

一府县驿递凡奉有勘合牌票严加查勘隔省虽抚按牌票不准应付借勘合者外官自六品而下不应付京官自七八品而下杂流出身虽长单列肆号不应付长单亦载之者谓实有公差事非借关也实有公差虽有勘合无前路印关恐有突起诈冒不应付系虚差陈差不应付陈差谓违限久者虚差谓无差而虚填亦是借关则例备在长单本院每月每季委官磨勘一次不当者罪坐挂号之官甚者罪及驿递盖驿递官原以应付为事亦有裁革之权本院誓不妄与一勘合妄发一牌一票万一有误驿递官径行裁革具由请本院当以礼谢

一访得驿递每每过期领银借贷应付不特增利苦害且使出由吏书借口需索今后附府者于府领附县者县领俱按月初一日巳时先领银后支应过一日一时锁吏比较官坐不职吏书索常例并驿递官听而与之一并论罪其有津贴银两各县不依期前解者锁吏监追官以罢软论

一过客至驿虽去城去关咫尺道府州县官亦不得出见各驿递不许遣人传报送下程送礼非止曰取诸民以奉人取民以奉已其罪无异也开贿赂之端长阿媚之念各官目覩民艰未见捐已赈之乃加意过客亦非周急不继富义也纵出俸金事当严禁若过客系亲系故情不可已自拜各官各官即此拜谢不得出城还拜若过客穿城行自京堂三品而上官驿官差人报知各掌印官出见自四品而下并外官系亲旧情不可已者先造拜至公馆酬之驿递原不传报不许遣人探听先迎拜本院过往不出见之数非不推已也

一过客至夜泊舟歇宿去处本院法之所行能保无虞不许唤取更夫骚扰万一有事其地方人本院决不轻贷

一访得拖欠钱粮其在小民无几大抵包揽侵欺势豪抗拒包揽之人府县得而治之若势豪则袖手听之矣本院法之所行不知其为阁老尚书家也府县原有此权甘自卑琐自今以后宜痛自奋发凡有拖欠府县径拿亲人追治果为抗拒者走申本院职在粮储必为府县张主府县毋以不才心度本院隐忍不申甘为贱辱拖欠如此诸凡受寄花分凌害小民有犯毋贷不言可知

一侵欺仓库律有明条举凡纸赎等项无分上下皆在库钱粮也本院非为公为民决不支用其送过客送乡宦为人做坊牌具赆举贺一切不举若道府州县敢有纸赎等项用充人情不行申报本院知有律法决不曰此俗弊也情可原恕其隐充囊橐者又不必言矣各道府州县毋贻后悔若本院妄行取用是法司官自犯法也州县鸣鼓攻之律有明条本院不能自赦

一甲甲止是催征钱粮勾摄人犯外此非分宜然也自官民之分不讲义利界限不明里甲受害种种劳费本院不能备言俸米柴马各官百用出焉乃复取之百姓之身有此法耶有此义耶原有官船府县得而乘之门子快皂府县得而役之外此一人一人尽是赃犯会典载御史出巡心红纸札油烛柴炭府县将官钞买办今后凡上司出巡诸用取诸本县纸赎如无用及各院道具数报人役亦止于空闲徭役人借用如本院经年不至南都编八名人役可借用之类不得借口上司科派里甲若府县不得已之用查仓库钱粮具数申本院无不批给如上司

骤至一面支用一面申请

一府县官侵用里甲及纸赎一分一文皆是赃犯儒学拜见节礼独非赃耶志士不忘在沟壑为非义也教官俸禄诚薄用度樽节尚足养廉未至于志士所自许也学校礼义相先反惟利是计以此倡士何能正士师道立则善人多善人多则朝廷正而天下治矣即此一端关系不小合行禁革府县季考学月考及三等簿本院巡历严加查考缺一于此坐以不贓

一古者巡狩以土地田野行庆万古不易之道也守令六事于今行之即古之意今人往往谓诈高者位亦高世情不宜于真宜于假不知假终不能假真终归于真今后各官请以十分认真行事九分之真一分放过不谓之臆凡一应职分内事朝而行夕自磨省少有一事未举期明日举之今本院立为考语则例考语则例即各官认真次第也以狱讼文移催征为未以教民耕桑转移风俗为首谓之未非弃之也均之职分事理而非所急操守乃俸米柴马之外不妄取一分一文不妄用一分一文之谓才识乃教养听断已废之事而我举之如水利如均田谓之兴利吏胥作弊取钱民俗奢靡淫荡溺女火化无妻游食健讼喜鬪能禁止谓之革弊别有则式颁行今复言之谓即认真次第也乡愿非德言貌非才题目张大不能实落下手不谓兴革各官思之体之本院区区然参见迎送并礼貌过客一切禁革虽是正法亦使各官得以一心民务除却所假之门成彼认真之事昔人谓业擅专门今专门矣各官慎毋上负天子下自枉一生

一访得江南兵备废弛为甚近日巡江察院亦有此奏自倭寇宁息而来召募之兵及养兵之费未尝止也兼以军士民兵法度如旧废弛若此何故何故古人安不忘危况震于其隣事同一海未可言安耶寇至练兵事无及矣今后各统兵官宜日加训练甲必坚兵必利士卒期必一可当十十可当百本院一闻废弛之言辄以李光弼调发间精采百倍自许各兵将能应本院口耶本院奉命知有军法而已各兵将念之母自贻悔变故不测生死存亡本院同之本院身先士卒非徒责人不能责已

一弘治六年令官司私役民壮者照依私役军余例问罪乃今府县百般役使谓舍此更无可不用不知天顺初设民壮弘治二年其制始备弘治二年前府县用何人氏自今以后一归兵营时加训练与军士募兵一体操演在州县官照依冬操三歇三余月操二次私役一人本院决不轻贷本院提督军务亦惟行军事时然后用之余又不必言矣

一今日诸弊不能尽革大槩在文移过繁本院一时不能尽言各官自行酌量一以简省为主凡事不必抄写前案许多紧急者略节用之府县所自议说话一句而尽者止用一句二三句而尽者用二三句当用片纸者用片纸当用长纸者用长纸止使事情不遗便是好官咱做稿付吏誊不可尽付吏书以致冗琐其有供招一如刑部例简切数语起草付吏誊案若识机括事本不劳不必用吏书行移用许多说话也省之省之事由于官不由吏书风清弊绝有日矣本院喜之不胜敬之贤人君子也以俗套责人非本院本来面目各官体之

一均徭银力二差近日题准总一条鞭槩编银不得已而为补偏救弊之法一时良法也府县

官不能为百姓作主各州县尚有力差名目可恨可叹今后各州县遇当编审均徭月日即照题请事例有三五年未编者即三五年总编其有数外编余银及优免不照则例妄将人半丁粮一升作乡官生员人情及先年优免今再免者官吏坐赃问罪

一查得本院座船每府皆有一二只各院亦然本院一人之身焉能坐得许多船只且水手工食吾民脂膏各州县有均徭期迫不能俟本院议减者即将本院及各院船水手银革一半不编止存一半船上如有别用银亦革一半存一半已编者文到日追银贮库其本院门皂轿夫除上元县外各府州县派编工食银两尽革不编凡不编役银逐一开报

一本院到任上元县于正柜银数内开买办家火用银参两伍钱借办过家火用租银一两伍钱江宁县亦然二县买办人役二名借办人役二名每人月领工食银壹两贰钱八人每年共领银一百十二两买办物件用过尚在物银役银犹有下落若借办则纯然虚费矣又查得本院刷卷二三年一至提学印马年仅二三月住札各院徭役共计参拾余人工食银柒两贰钱各院至日又官银募人兼用诸如此类其目尚多本院作县二次上司到皆彼此衙门中那借人役若家火先计二三次租银预造一次之用绰绰余裕矣俗谓算计不到一世穷本院非能算计人也事理显然人人可见二县官虽至愚宁不筹及此耶财不已出痛不切身此民之所以一世穷也除二县已行议革外各州县事有类此速议申革请以古之仕为人自处勿以今之仕为已自安

一禁府不许差人下州县催未完县不许差人下乡州县未完止移文催甚提吏重治罪县官法度严明事无不济府县词状止用里长拘里长不在县原告执状付之万不得已如真正大伙强盗等事方用皂隶用民壮用皂隶民壮登记与离城参见同一印簿听本院吊查若县城中唤买办人等诸小事势不能需索者一时里长不在许用皂隶

一各州县有每区普编正副粮长共三人又或二甲或三甲朋金一二人催粮号小粮长夫钱粮完欠其机全在县官县官果贤则法之所行势豪不抗拒矣小民虐粮大抵豪家虐田使然或即此补彼或通县丈量皆守令之权得自专也不然十百其人徒为赔粮计耳所济何事阳城催科政拙为抚字也今人政拙乃颓惰不行干理鬪茸而听于奸豪有田有租天下宁容有此等糊涂事耶究竟遗累小民衙门中目见多事谓于抚字何如借口昔贤事殊不类本院总理粮储决不致粮长赔贖一合一升决不容粮长费一文一分人言金小粮以宽正副兼为费用计此又县官之贪也并及之除苏松常三府姑准照常再议外其余七府通行禁革其就一甲中金粮长即行征收又或以一甲里长征收就中金粮长数人者俱不禁

一江南刁风盛行事诚可恶第究所以皆因上失其道使之哀矜勿喜之言官守者当日诵也近有等不才官司虽系无碍牵连辄拟以不应得为而为之律况在有犯肯哀矜耶多纸赎以掩已贪夺民财为已绩视百姓越人之于秦矣今后凡词讼口告者登口告印簿状告者登状告印簿事当量情者不供止于状后批其情节存案簿前件下亲注量情发落字事当招罪者于状后备细书情节罪名付吏誊簿前件下注招罪字不为苛刻不为姑息但案卷不遗心迹明白即贤有司也果有化民成俗之方本院决不责其纸赎多寡之数其有登簿不尽一状不

存一案毁灭纸赎虽多刻而且贪人也虽已离任必行追究

一江南刁讼日盛治之诚有本焉然江南刁讼入人极深非借法度辅德礼则又不可易噬嗑亨健讼之人正颐中梗也欲去颐中之梗可无法欤法加于所当加无不可者而府县官缠簿书急礼节往往鞠之不及致详诚有如昔人梦分人鹿之云者梦分人鹿尚在睡卧中未觉也欲以之觉人其可得乎讼风日盛一日有由然也今后各官凡听讼必须直穷到底审之审之始不惮烦慎之慎之终无姑息柳子厚所谓必痛之而后畏然后君长刑政生焉诬矣而不为痛痛而不能使之畏是则有司之过而已健讼之盛其根在唆讼之人然亦起于口告不行是以唆讼得利今复须设口告簿凡不能文者准口陈不准其状诉刁唆人则或已密访或令里老开报执律加刑勿少假借夫有口告之易何事为唆讼之求而又直穷到底是是非非不能隐遁清水明镜刑无所逃也秋霜夏日气不可狎也如此而犹有犯焉有之乎斯意也严行峻法用之恰当为爱中之劳差之毫厘为劳而无爱之毒各官念之各官慎之

一士而下惟农为重已于前条略言之但今人口云重农至事有相激又似以农为贱盖彼无财帛不能嘱吏胥口木讷不能胜巧诈且人品微末上人忽之见官且如此矣其含冤抱痛不能自达于府县之庭又不知其几也名为重农所重何在民之舍本趋末变质鲁而狡诈诚有由也今后各官须坚持此念不变于势豪扩充此心不忽于微细体及其不能言之情必如古循吏给牛种多方曲全如柳宗元以佣除本悉夺归之与设方计夫士犹有作奸有惰业若农则日勤作夜颓然甘寝绝无此矣可无敬欤佃人之田有田人且得而贱之又必知两汉力田孝弟并科之意隆礼相爱惟上意向惟民趋之一归本业必返真纯济一方于黄虞熙皞之世指日矣舍此而言政事本院不知其所以为政事也

一侈靡诸事认真条略言之矣其身不正虽令不从不可易也然躬行矣而法度不继即躬行无济也姑以手本言本院革去有壳厚白纸余纸矣禁之禁之病根尚在本院之外能保其无用之者乎即其用之往往来来而民心不一矣古人谓一道德以同风俗府县官即当责令制卖之家不复制卖印簿书名时加觉察躬行所在而法度随之他如忠靖凌云巾宛红撒金纸斗糖斗缠大定胜饼卓席物金银纸马符篆等纸先经科道题革若刻丝补宋锦等绢凡属侈靡法当严禁火化溺女父子之恩丧矣可无禁欤则责之家长里老长而无妻寡而卖奸夫妇之道丧矣则兼责地方娶妇从良限之月日夫民性无常惟上所化上人加意而民不以变且化我应者有之乎天下事若此靡靡不立者非事不可立也庸人俗吏布满于天下而事不立也日诵孔孟之言效法古循良之政而事立矣事立而天下治矣簿书狱讼功在一人化民易俗知府为之功在一府知县为之功在一县万古不可易也讥察印簿本院不时吊查有不如约罪掌印官并及巡捕官生员犯约罪教官本院期在必行各官体之法立弊生若郭橐驼种树之戒此又在府县官润泽之也法立而增扰焉不可谓扰而辍法不行尤不可

一吏新参每诉顶头银无从办及参百计骗财刑不能止夫术不可不慎一入吏途心术坏矣加以先入顶头或欲盘本或为债迫有不冒死以诈利者耶今后行通减法今年数月内亦一年算凡顶头银壹两者减去贰钱每拾两减去贰两参者照减数与之虽无来参之人彼做吏一年拾两减去贰两做二年减去四两以后皆然正月初一日该满一日亦作一年算参吏照

此与之各官严加访察不许诈增报顶头原是低银又折算减为足色数登册凡儒学巡司驿通等吏有顶头者皆详审定数附府者定于府刻成书册并申各院永为遵行即一顶头之多可知吏书骗财之故不才官事听吏胥流弊至今恐无底极不得已曲为之处耳其有增数而刻刻减数私为增追者是又不才之甚之甚者也

一访得抚按兵道出巡府县每有银两私赂书吏相沿为习无处不然本院两为知县颇知所执六年间不一为此毕竟查拨问罪比有赂县分不相上下事系上司主持书吏何预愚民有此或不足怪我辈乃愚至此耶且身为府县官见吏书受贿不免痛恨刑之为小坏已事大坏已官也赂人吏书设身处地于心何若小人见利则受不足道也堂堂衣冠作此穿窬举动不亦可羞可恶甚耶其有意指吏胥为之已不与事掩耳盗铃为罪尤大今后本院巡历每书吏入先巡捕官搜检后教官再搜甚则倒卷箱一一检之直穷到底用赂之官其刑罪比书吏门皂必重数倍不能钤束之罪本院不讳也各官毋自贻悔

一本院所行条约计三十五款非本院突为一说也祖宗成法今修举之以上利国以下便民文到之日各官当日严惕厉之心痛洗颓惰之习官日加翻阅各房科吏日以本等事请官胡涂吏提撕之吏隐蔽官鞭策之并一应本院行事敢有一事一字不遵一时一刻迟误者本院决不轻贷非本院故自苛责也立立道行于前乃可必世而仁于后令行禁止不可谓非大圣人作用也诸葛孔明以严治蜀本院于江南亦云各官毋自贻悔

○续行条约册式

为巡抚地方事本院到任后曾有条约三十六款行矣近自应天转住苏州近二月稽查各府州县一应事体其间废弃成法创立新例似是而非者其目尚繁本院不及先知因之前约开载未尽随事有感别为禁约有九并考语册式钱粮册式应付款式均徭官举等式通皆关系治理合行各道各府州县官一如前约遵奉毋得违错条约册式开后

一里长老人今日府县直以贱役视之甚有县分五六百里老人不及五六十人者夫太和在成周宇宙里宰党正先之管子以里轨连乡富强齐国我太祖制里长老人听各里之讼于申明亭酌古准今譬之网纲举目张而渔譬之人欲免疾疾和平气体功先摄理脉络万古不易之道也庸人俗吏奉行不谨气脉壅滞风俗日漓有由然矣今后州县须择年高有德人充一里老人里长户有定役就中贤而明者择使当之县官隆礼相待视府官之于县各里一应公务民风责成里老持此根源工夫纲之纪之化成郡邑日摩月渐将见太和景象目下可收复矣如其漫不加意愚而不知治体者也柳宗元有言有里胥而后有县大夫有县大夫而后有诸侯有诸侯而后有方伯连帅有方伯连帅而后有天子无里胥是无天子也府县官行之

一近奉部札革库子役于均徭中编纸烛银为贪夫防也各州县纸烛银有三百六十两者府又过之本院反思先年见闻府县靠用库子里甲银满三百六十两其人可数而计也不用一分一文亦有之额为之数特非反为贪人依据地耶建平知县戴度称非义申革良是法为中人设太平王知府申革九十两四钱存四十四两事视不得已听捡者须令原告供是某处打

伤某处打伤口词在案检验既毕参酌新旧痕色取合打伤口词诬告必加重刑不曾下手即行疏放人命至重诬人以人命亦至重均之不可轻视也

一各卫所官军月粮往往缺伍陆个月甚有一年外不沾升合者夫各官军朝夕所需止此而已今日尽归操练于地方有御侮焉又非无功而食也府县官所得较官军数倍未有缺支俸米柴马银者乃军士可钦之耶除先年未领者各州县严行追给外今后一照先年事例各府州县于各仓内金一二廩口为军储廩凡官军于此支领入操官军不减支若领银一照府县官吏一体每石银伍钱府县官不行催纳致军储廩无米银支于府县官米数银数内支之每月皆卫所官军先领支后及府县官吏如官军无可支府县官吏亦不许支每月各具有无支领一体申报

一江南喜修道事佛甚至迷惑不返糜财破产比比有之民愚无知上人莫为之禁不行申明晓谕使然也文到之日各府州县境内有寺观庙宇庵堂等项查非额设系是淫祠即行改毁或即之为社学或即之为社会所或拆修公廨中有道士和尚庙祝人等谕令还俗不咎既往原住居耕作屋地听与之使之失所栖食流落他方不可也事关风化府县官行之一里老而上惟守令于民为亲郡邑事务一皆守令之所当知也知之于前行之不谬今后各府州县正佐首领凡部内某里某地方田地应开垦某里某地方某人田地系荒瘠系常年淹没某户丁多某户丁少某里某人税无田某里某人田无税某里某地方何利当兴某里某地方何害当革某里某人某人富某里某人某人贫某里俗尚何如某里俗尚何如某里某人善何如何如某里某人恶何事何事乡官某乡老某可师法事当咨访乡官某奸豪某何事为害当为民除一应事务本院不及言系民务关治理者先立款目一有闻见援笔书之防遗忘且为他日得参考地也知而真切事行随之万一本院吊查旋即发回吊查即以此送字之真草好丑不论也夫宇宙内事分内事一群一邑亦狭矣为民父母此不及知可以为民父母哉区区于此正欲民隐民情时在各官心目知明处当郡郡邑邑龚黄卓鲁其人兼本院不及知者亦或缘此有知也教官有师道焉前件并学中事务生员贤否置簿记录一体遵行

一本院到任先后年间拟斩绞等项罪人往往苦诉冤抑人情侥幸求免未必可信然一时草率一时误听十人中二三负屈或有之本院少与准理盖以府县亲民本院隔远且一应干证人员住居府县今后各府州县于一应囚犯不必其人有无诉状不必本院有无批行细加询访的系亏抑者径申本院除本院得以自专审实开豁不必言矣其它经参详者可以题请别院俱已定拟者尚有会议天下事止求个是而已民之父母顾忌观望坐视冤抑可以为民父母哉屈一夫屈一妇天之霜早随之事有关系日后本院得之先时府县不与申救者以罢软不职参论

余一应事宜本院多有不行开载者为有前院已行可遵守也仰各遵照行其有较之今日似可省可革者听各府县议申

○考语册式

为甄别贤否以儆官邪事照得本院抚绥一方任大责重分布抚绥之功于下小民朝夕赖焉本院藉之以免尸旷府州县官也稽察据考语而近日情伪日工往往习为两可活套之辞事鲜指实语无分明所有申送文册日夜阅思贤否莫定为此立为则例仰各道各府州县官照后款式注填按季申报其间多立题目不厌繁琐正欲使之无所逃于其间也于此而犹有为人逃之者无是非之心非人矣下徇已私上违国法本院定以不职论黜不轻贷

计开

某官某若府县佐贰官管水利海防管粮等项者则书管水利某官备写年甲籍贯履历脚色总后开诸事如旧例为一考语后方如式各款开填

操守 【总约书数语于下如一尘不染贪取无厌之类后分纸赎常例等款下方一一细书其事取用否计若干入已否计若干取用与入已】

纸赎无异姑别之 【今行有宪票姑存此款再防之】

秤头常例 【取否取者约某人收某项钱粮计取若干】

贿赂 【某人因某事送某物若干某人过送或贿赂全不敢举或某人以某事送某物而却之】

嘱托 【乡官举监生员某说某事听之致屈某人致坏某事或某说峻拒之或原不敢嘱托】

里甲常例 【取否取者每里计若干共若干虽取一鱼一菜亦是取】

粮长常例 【取否取者每名计若干共若干虽一纸一笔墨亦是取】

粮里供应 【有无如铺陈马匹轿伞鱼菜之类皆是】

塩引常例 【取否取者每引计得若干每岁计得若干以上止举其大槩各官所掌不同常例亦异本院不及尽知有影响知之亦不及尽言者各官宜诚心相告如上面款目该府县原无此例者则除去不书有此例而本院不书增续于后管水利管巡捕教官卫所官巡检驿通官各就所有常例书于上于下填注各官除俸米柴马外虽一分一文不可遗漏】

才识 【大槩在兴利除害内未能尽者别分款于后亦总括数语于下如英明温厚坚执变通委靡昏昧狡猾残刻之类足以有为为才足以有察为识本相兼也盖才足有为以其识见到此故能之亦有识到而懦不能行勇行而识见不到者又须一一别之】

治民 【能否否者或弛或酷能者或宽或严或宜于繁或宜于简或曾以某事某事见其可曾

以某事某事见其不可】

治才赋 【书同前治民款】

治兵 【能否曾以某事见其能曾以某事见其不能能者可大将可小将可将多兵可将少兵可陆可山可海可河或止可运筹止可调度】

兴教化 【

能否能者宽严何如否者或俗或邪何如能否能者迟敏何如否者昏懦何如上五款】

听狱讼 【亦须分别才何如识何如上数事皆男子之所当有事无足以当者亦须书其能否卫所官教官亦书之】

兴利 【以后二款不为总括语盖总括已见于才识款中也】

耕桑 【行否行者府官开某县县官开某里或通县原不耕桑今始行之利几何否者书某县某里某可耕桑惰不督民举行】

均田均赋役 【或随告丈量或通行丈量之类皆是】

水利 【三款俱照前开此款下开或原无水利或原有而淤塞今某始开浚】

开垦 【或开田开地令民耕种开山种菓木皆是】

积谷 【或罚赎或劝民出粟立义仓或令民家家皆有蓄积皆是】

学校 【兴否前教化言其才之所能此言其制之所立如修学宫建社学之类学校在教之以礼义使之记诵词章为欺诈事非兴学校也】

成美俗 【如民兴孝弟兴礼让讲信修睦之类革其不美之俗则变而成美矣似于革弊中亦可见但革弊言其事成俗言其功自是二事况教养乃守令第一事虽反复言之无不可也】

除害 【吏书门皂各官身左右人也近不能防远复何望故以之为首此全在此法度严明少宽一分事不可济尤有大者事到即行不复留滞则百姓完事而去决不送与之钱此等人自不能为弊不然关防虽严法度虽厉恐不能保于法之所不及也】

吏书作弊 【

开某房科某项弊今能革或听之或尽革或少减府官能革州县并各属吏书弊者明开之】

门皂作弊

库吏秤头 【某项正数加收若干】

里老科害 【或无名科敛或指一科十】

粮长科害 【以上四款开具如首一款】

巡捕扰害 【如诬指良民为盗或因盗而搜取他人财物能禁之否】

军兵扰害 【如强掠强买货物之类能制之否】

唆词 【或有口告簿唆词不能行或拿治而彼知所畏皆是否者明开致唆讼人得利并唆讼人不知所畏之故】

盗贼 【能革否弭盗之方治盗之法备言之】

风俗薄恶 【如不孝不友为奸为弊事佛为娼打行赌博之类此事类甚多须详细言之亦详细言其能革不能革之故】

风俗侈靡 【如衣服屋舍饮食过制游荡之类辟如蔡知府革酒船禁妇女冶容坐铺之类皆是此等事类甚多须详细言之亦详言其能革不能革之故】

兴利除害款下细目如各官职掌所无除去职掌所有而本院不及者增入

一横一行操守等横二行纸赎等照式填或增或减第二直行或单写或双行皆为填写之式耳尽行除去

一填注或以白纸或照此印板填少或单行填多或双行或多空一二行填各听其便

○钱粮册式

为稽考钱粮事照得各州县钱粮有五七年未完者有已完那借不明言未经抵补未解者有起解五七年未获批关者盖因头绪甚多文卷繁浩官司不及致详吏书因而为弊奸豪拖欠积揽侵欺日加一日后将何极本院职专总理必有提纲挈领之方庶免挂一漏万之失为此设格眼册仰各府州将属州县自嘉靖四十三年起至隆庆二年止一应钱粮先北京次南京又次各衙门一衙门之中又先其急者后其轻者解赴某部某局某项钱粮共若干明白开列于横行之上各钱粮总数填格眼内各州县下全完者将起解日期官解姓名已未获批关照式填完一半者于起解日期上添已完若干填注未完者空下格眼不许混填奉例蠲免者注

蠲免原未坐派注未坐派字其存留米若该州县管解人数多格眼不能容者别为一册前册总其纲别一册记其目全完者别一册内不填其册解北京者一本解南京者一本解各府并存留一本存留别一册者一本每本造二本一存该府一送本院每册前钉白纸照后填钱粮目录次序填写后写承行房科造册之后续完者按季尽后一日于存府册填注仍册报本院遇本院按临不必另造即将存府册送比前册掌印官亲自封收升迁事故具申本院交代明白方许离任违者定行重治

【嘉靖肆拾叁年上元县太仓州】 银若干 【江宁县长洲县】 银若干

解 【某年月日某官解某人解获批单或批单未获】 【
已完若干某年月日某官解某人解获批单或批单未获】

某

衙 【句容县吴县】 银若干 【溧阳县吴江县】 银若干门

某

项

钱 【溧水县常熟县】 银若干 【高淳县昆山县】 银若干

粮

共 【江浦县嘉定县】 银若干 【六合县崇明县】 银若干

若

干

【嘉靖肆拾叁年】 某县米若干如系折银者开米若干折银若干

存已完若干某年月日粮长某人等解获批收

留未完若干

某粮长

仓某人 【米银】 若干

米某人【米银】若干

若某人【米银】若干

干某人【米银】若干

○应付册式

为酌处驿递事照得本院巡抚江南看得民间困苦日甚一日第一是官吏贪污其次过客骚扰过客之费不减贪吏为此酌处驿递事立有长单如单应付与否及夫皂中途而逃过客请逐一填于各款之下

本院知有国法虽不能为过客私无忘宾旅亦不偏为驿递护过客幸相体谅

一壹官执有二张勘合止应付一张一实系钦差例应带家人准应付口粮借关行虽经挂号口粮一分二分该驿俱不应付一贰号官虽坐一号座船止照二座则例应付一壹官乘坐二船者止应付一船一廩给或办或折听从过客之便一不拘何等船过关米支驿不支所支所不支驿红站二字并填者亦止准支一处一口粮定银参分饭食定银贰分一称公子等项虽有勘合不应付一隔省虽抚按牌票不应付一借勘合者外官自陆品而下不应付一京官自七品而下杂流出身虽死四号不应付人夫皂数驿递钤印于上不用关如隔省来无前路印关不应付一虚差久差不应付一自五品而下勘合过二年者不应付一有驿递去处州县全不应付无驿递系州县应付一人夫驿递查照额夫多寡分出一壹号贰号参号官品止是家眷行者廩给人夫过关止照号数应付一半一长江上水全用风夫不分上下水一船头有索取赶纤看廩卷帘顺风等钱该驿查申拿治一每站廩银分为公馆饭并中火之用一凡过客公差虽夫单数当应付如别带一人行者即革其一马不应付为他人带笼货行者即革其一扛夫不应付一凡官如用伞夫在夫数之内一凡各官有解银解段疋之类止照扛验过发夫不拘则例夫数一过客如实系公差奉有勅命者加背勅马一匹奉有钦赐物件宝钞者加扛夫二名一过客如用夫马及廩粮等项不及数者请明注各款之下以便查考应付官品分为一号二号三号四号四样等第廩给夫皂马匹数目因之备在水陆夫单内

○均徭册式

为酌定均徭以节民财以便输纳事照得钱粮外有均徭一事钱粮正供有额独均徭官自为私时有增益且不如例征银包当人指名倍取厉阶不改剥民为毒本院今就各州县原差徭数一一较量损其可损益所当益大约一县中其田地其人丁其优免其今岁役当增其来岁役当减相去不远县官委曲调停存有余补不足事无不济而视民如已者之难其人也长吴二县均徭原设备用银一款借此立为通法以后年分诸事增减止借备用银调停之小民输官岁岁此数通之而百十年可一足可通行矣一切如长吴二县乡当里甲公费城当买当上江二县官夫小夫正柜外柜等项名色尽除去分均徭均费二端其事用人谓之徭其事用银

为之费又止以均徭统之刻成书册标之曰某县均徭册以后年分用有加减丁田优免有加
减先年银有无余剩因之备用一款增若干减若干随多寡备细刻一二纸续于后通法并则
例开后仰各府州县一体遵照施行已入役者亦即此数刻定以待来年行之毋得违错

○通法

如田地一亩今征银一分年年止是一分增田则增起备用银数减田则减了备用银数小民
一分之数年不增年不减山荡人丁亦然

如乡官之升转不常生员乡官之多少不一岁有优免去多者岁有优免少者多则备用银减
少则备用银增

如见年均徭应增一用减去备用银小民出银不增应减一用增入备用银小民出银不减

如役过年分有余银见年备用银增无余则见年备用银如旧

官中岁有增减小民不得知不得蒙惠增则增出虽减亦止照增的数输纳此存乎有司之贤
与否耳虽不尽然使之归于一定自是良法可常行无弊

○则例

一斗级不得已作力差如有应募人仍作银差尤便一库役用吏农府皆库吏收银州县何独
不可选用诚实有身家者便是行法之善不许更改

一家火赋役书有额数但新旧交代家火半存虽在任久近不同存数不一大约额数止用三
分之二可足今后各官离任日将所存家火数逐一呈堂内称说原家火若干存若干坏无存
若干原领银自买者若干存若干无存若干并有私行送人情弊掌印官收代者将至将原物
验估如知府额银二十二两前官存数止可一半便取银十一两补修以满二十二之数内有
琐碎家火各官用度不同者准于内少留数两给自办其有私以与人者不与离任去后觉者
虽受者系乡官亦追夺儒学照此行俱置簿案候一公宴原有祭神牲酒准每卓加银壹钱办
别馐品父老卓二人共亦照此数

一优免照则例止免本户本户不及数则止越县免两县免投异姓户免者俱不准优免册一
样三本一存县一送府一送本院俱印封收查不合例者官吏问罪免者追究以后年分如增
减不多止于添刻一叶于上明开如有一番新生员并偶增减人名数多者照前造三本均徭
册定有升官及新生员等候来年方免不准改并顶补

一乡官夫照前院定奉使及升迁回家者二县共出轿夫四名伞夫一名止准一月省亲养病
迁葬致仕者准二十日将赴任之先准半月阁老尚书添皂隶二名自五品以下轿夫二名伞

夫一名为民者不给

一夫皂门子偶一时上司齐至不足用者听府县暂借水夫铺兵甚将备用银募【无此时分姑言之】

一闰月工食银俱每年带征贮库候至闰年月分给发

一家资银有此银亦得少宽小民一分甚便长吴二县近日渐变出自丁田今仍前论家当派十甲一年普派此长吴二县事例别县原无此例者不许起派一州县事体不出钱粮者尽归均徭不许于均徭外再有编征名色有系一二甲一编尚存三五年者总作一条编总编银以后年分总十甲作一年编有某项原是十年一编未完者参筭征银编入均徭各县民多告愿十甲总编或此为便通前件如不便议申隆庆四年均徭虽长洲县减了银九千六百八十八两四钱四分零吴县减了六千七百五十三两三钱二分零若为减额过多其实先年甚是冗费本院以为决可行者今数酌之酌之绰绰有裕其中尚有化行以渐之意若四年以后本院尚此苟徭徭银必有减数决无增加此所以为可行决然也

隆庆五年均徭增减银数

田地比四年增若干或减若干

人丁若干【照前田地款填】

山荡若干【照前田地款填】

增者当增备用银若干减者当减备用银若干

优免乡官某陆某官于某户增免人丁若干增免田地若干山荡若干

某官某升某官【照前式填】

新生员各项人等某某某免某户【照前式填】

总共增免若干该银若干当减今备用银若干

乡官某有某事故除所免丁若干田地若干山荡若干

某官某有某事故【照前式填】

生员各项人等某某某有某事故除某户【照前式填】

总共减免若干该银若干当增今备用银若干

隆庆四年分徭役银某项有无增减有无余剩银若干当留入作今备用共银若干

今备用银除增减去该编若干总前有无余银共计该银若干

○官举等册式

为稽考官户钱粮事本院自南都入北数日承今命士夫赖粮纷纷然耳左右也且曰存留则全不供官十人而十贤者不免小人学道则易使时以讹传置之及入境稽查县官以官举数上粮里时欣苦害又纷纷然北都所闻无异木中间依托假借士夫不及知者亦或有之且其诸色银缓急数不别开存留混之起运不用爱子弟而注一管数家人于完欠又为无益也为此更立格式开后文到日以后年分一如式造已造者止于各户下照式约纸左右细注夫部府岁会準用数定粮银额数上系军国之需下关府县之用一斗一分无可少者仰苏松常镇四府各州县一体遵式施行庶乎查比有凭法行自贵毋得如前不便须至册者

计开

某人【系某官】管数人某或兄弟叔伯男侄某人【止用一人】

兑军米若干完若干未完若干

存留米若干完若干未完若干

改兑米若干完若干未完若干

白粮米若干完若干未完若干

南粮米若干完若干未完若干

折兑银若干完若干未完若干

折色银若干完若干未完若干

均徭银若干完若干未完若干

带征练兵银若干完若干未完若干

○谕道府州县听嘱托

抚院海示照得各府县百姓往往告称官府不知执持嘱托公行百姓受屈江南民风刁诈言未可信然致小民时有此言不无其故贤者为不贤者所累小民借口衣冠玷辱本院与焉为此仰各府州县官各立门簿一扇凡乡官举监生员等入门并差人投遞书柬者把门人即行登记执簿随行逐一填注对官言语书柬中言事其管海防管粮巡捕等官如别出公馆理事掌印官亦置印簿付之着令本官役人登记所言者不许容隐言所未及不许妄增从公从实必使诸士夫心事得以自明刁顽小民不得借为口实其有不令把门人登记并登记不实先登记后更改者记簿人同官吏一并治罪其府县官自至贤士夫家求教咨访民间利弊是谦已虚心切于求治者也本院与嘉之不禁

○示府县严治刁讼

抚院海示照得江南刁讼太甚本院已约府县官无惮烦琐不为姑息正欲变刁讼之风为淳睦之俗也近见各府县申到招词往往两可调停含糊姑息本院不能备言大抵状词准行则便得利俗有种肥田不如告瘦状之说诚哉言也乃知刁讼盛行皆府县官号而召之至论民情土俗则又以健讼为说何故为此仰各府县官晓谕各百姓今后告状须从实致词不得一语架空自取重罪其各官今后断讼除非已自讼事迫不得已陷不知者与之量情议罪并吏书作害告及官府乃官府不能铃束之过乡官安静族人家人作害其实皆是倚靠乡官名色不可执以诬告论之外此绝无相干生端波及一一执律拟罪如仍前两可姑息如状求追银则曰念彼贫难姑量追人命不曾下手亦招量给埋葬之类者定以故出入人参论不恕

○示府县状不受理

抚院海示照得刁讼惟江南为甚略无小事百端架诬盖不啻十状而九也本院已谕令各府县官始无惮烦终无姑息痛之使畏庶乎事可衰止迄今反坐招详尚有姑念贫民愚民之说各官徒知一念之差情可矜恤不知矜此一人坏千万人不能治一人之诬必召千万人之讼其间身有秽迹畏彼刁讦歸之曰姑念贫民愚民亦有之刁讼日盛非府县官召之而使之来也耶又告状人往往称府县官告不受理军民赤子府州县官父母也凡争鬪户婚虽是小节当为剖分衣食等项当为处理若先亿其诬捏十状九诬弃九人之诬而一人之实亦与其中矣况十人中或不止一人之实十人中一人为冤千万人积之冤以百以十计矣不能执我严法使诬者惧之不来乃并实者弃之使含冤之人不得伸雪可以为民父母哉惰者不肯受理懦者不能执法其事均不可通为此再行晓谕今后凡民间小讼州县官俱要一一与之问理若果无情尽辞虽小心必治甚则监之之百端苦之如有仍前宽纵复为姑念之说与不受理者一并治罪若曰多之不可胜理也夫人有痛之而不知畏者乎始不免于多终当享其逸若置之不理年年月月止是如此多而已矣民怨且詈防民之口甚于防川府县能一日逸于民上耶始无惮烦终无姑息本院的见得民情官法恰是如此各官信之行之毋自貽悔

○禁印书籍

抚院海示访得各抚院按院临将复命往往牌行府县印刷书籍为入京封帕用费以数十两

计□□□□亦有之合各府县筭不啻数百两矣有假称动支本院赃罚有不动赃罚借称无碍官银者此等皆是府县剥民充之纵是赃罚原无可作此用之理朝廷原无许作此用之法宪司官犯法法当参究念是俗套相沿办送在外使之办而送之者致之在内私人私事其来已久为此票仰某府官吏即行各州县官但有各院道刷印书籍并取送乡官长夫礼物等项即抄本院前后禁约将原取牌面申缴其有一意阿奉不恤民艰不顾国法者定行究治此等事在内谓之礼在外执律论之便是赃府州县官识之

吏部侍郎海为禁革积弊事据通政司送到西营街人陆武告状审之初执票六张后西营崇礼长安三街人等又送出票兵马司自行八十九张为各衙门行者二百二十张曰此偶未缴送兵马司者是其先日缴还者尚不知其几何几何也以五城之人当千百官大小事用度之害侵用里甲朝廷历历明禁今兵马司官也小做了一个狼之贪虎之猛以小民膏血奉迎合干上官又做了一个过送赃私的积年此与侵用里甲何异何异合行禁革兵部夫役事宜有刻本名衙门自有官定皂隶等役又加之此非也然犹一说可通姑听之今后如有部议之外仍前票扰者虽小费一分一文不及先日万分之一亦不姑恕三考役满办事想祖宗初亦进士观政举监生历事之类流今日而上银于官曰罚班曰纳办一部之官上而下正用私用妄用在焉出何典故出何年律令自今以后俱停止不许收已收者自五月初一日至今给还在四月内不给盖已费用给各人役领不可追也其本衙家火诸件除上手传下之外出此银办者退出必须不可无者一一以本俸薪银给还一如原办价分文不短是虽价直之多罢官之日卖可送人可留后人用作已小惠可又不然一船之便载借用前途不足换米换柴卖充路费可为官人不贫况至侍郎本不至是有激而愤戏谈之其伺候诸人原领此银充工食听其自散必用而不可无者一如家火对象以已银给冢宰统百官岂有吏部不能令行一兵马司听之借口科道各街人如若仍前被害可自放胆来告做百姓不可做刁顽不听法度的百姓亦不可做软弱听人打听人杀而不言的百姓不言自苦苦何日止或栏街或叫门不禁状上必明说通政司畏忌若干次告不准送字样上下有体岂有堂官不能出令一司属官乎北吏部此等年有三千余贵之多辇毂之下不禁我不知也办事官吏今后有为司所迫不出此银而祸随之许登堂叫诉又本职上任先后日各衙门诸公往往赠有礼物曰交际先日规也夫今日做了朝廷官便与家居之私不同尝谓孟子之宽大不如万章之严小猎较犹可况受其赐孟子亦误说也彼酬此答殊是虚繁却之不为已甚而仲尼不为合行告止前二件后附一供共三件皆朝廷法度中事今非违道以干百姓之誉非借此诟人之短赤子如在水火深热中如将入井部事本尚书主侍郎辅候丘尚书日久不至居一日官尽一日职故不自嫌疑突此严示

卷之八

淳安政事一

一凡居官克百姓取悦上司过客大抵为毁文?言计也夫士如黄金美玉市有定价虽一时是非或倒置事久论定爱者之口不能使增憎者之口不能使损纵已有过当如日月食焉求以更之白圭之玷磨之而圭如故矣若取百姓财事弥缝术今日存一弥缝心今日加一玷矣明日存一弥缝心明日又加一玷矣玷日增益尚可为美玉乎君子行事取快于心不当较毁文?言于外欲为美玉可以事弥缝哉

一县属各职各有分守正道令人沿于俗弊习成时套下者勿论其上焉者仅如顾募工人糊口他人之室挨得一日便计一日工而取其直失设官初意县无美政有由然也

知县

县丞主簿

典史

教谕训导

阴阳官医官

里长老人

生员

吏书

里长

库子

斗级

乡饮酒礼

家伙

量田则例

○知县

知县知一县之事一民不安其生一事不得其理皆知县之责其贪暴不才姑勿论上而朝廷吾父母中而抚按藩臬僚属过客乡士夫吾长兄弟下而吏书里老百姓人等吾子姓遇之各有正道若谓止可洁己不可洁人洁人生谤谓凡所行不可认真认真生怨取祸不顾朝廷之背否以乡愿之道待其身以乡愿之道待吾子吾长兄弟浮沉取名窃取官爵非知县也本县初意直欲以圣贤之所已言者据守行之自谓效可还至迄今四载中夜反思日日催征小民卖子鬻产未有完事之日时时听讼小民鬪狼趁利未有息讼之期感孚之道薄而民不化烛奸之智浅而弊犹存徒有其心未行其事徒有其事未见其功诵法孔孟幼学之壮行之期月而可三年有成有深愧焉俗吏非所以语我若曰称知县职则全未也

○县丞主簿

县丞主簿佐一县之事知县之责亦县丞主簿之责若未入官门先营家计官爵贿赂夺魄动心国病民冤如龚如哑又或如韩退之所谓涉笔占位署惟谨惟长官之听漫不可否事非县丞主簿也

○典史

典史掌巡捕民间盗贼争鬪小事尽属之所用应捕又皆狡猾积年若听其指良为盗为已驱利盗贼分其赃争讼罚之纸非典史也

○教谕训导

教官掌一邑之教门下皆凡民之秀所事事比俗吏簿书词讼不同师道立善人多必矣□以推之功效不浅若徒寄空名于诸士子之上模范不端程矩不立初入学则利其拜见之仪已入学则利其送节之礼非教谕训导也

○阴阳官医官

阴阳官测日晷星候别昏晓雨暘早晚节气以利一县之时医官察病症脉理识药性以利一县之疾近多纳银为之图差遣取利于阴阳医药无干涉府有上司迭至行牌取用为各上官背勅印押扛本县缺官以老人假充应之相率为伪无官直以吏农为之有何不可府惟欲美上司之观县不能止府官之意皆非当也

○里长老人

圣制里长老人听各里之讼于申明亭是一里之事皆里老之责也于民最亲朝与游夕与处凡一里之中谁善谁恶谁贫谁富谁困苦谁逃流谁人田地有无管业谁人户丁口多少彼皆明知若果不好钱无私向有天理心不刻剥好县官孰能如之尝以为若欲平治天下必自里老始当如周之里宰党正禄秩荣其身汉之三老嗇夫取之誉望之名士纪纲脉理实是如是非迂说也今日上失其道百端诛求尽出里邇事有难焉者然而圣制昭然上司文移往往事犹责之有可为也若因官府征求而肆刻剥假在县应卯以取工食有钱者偏为回护善柔者不行扶持事兼利已则同甲首作弊以欺府县事止利已则假府县名色而剥甲首百计取钱无心抚恤致使村野萧索甲首流离剥其子以厚其身竭泽而渔非不得鱼明年无鱼非里老也

○生员

我国家群士黉宫导之师儒优之廩禄复其身及其宗族待之不为不厚矣至求士之可以润泽生民还报天子者则鲜其人焉何上之人意在得贤而士之所希在荣利也夫天地所以生一物即所以生万物之理故一人之身而万物之理备焉万物之理备于一人故万物之责亦萃于一人君子之仕也彼万物之责身有之故身求以尽之如饥之必食渴之必饮有负而必求其酬有约而必求其践不得已而然也今人不以行义视君子之仕以荣身及亲当之意向一差是以百端施用无一而可昔人谓士非不修之家也至应举入官耽利禄慕荣途患得患失靡所不至不能不坏焉夫如柳子河间传则士修之始坏之终间亦有之然大槩不美之士不必献身天子之庭然后人可得而知之讲之不明守之不固穷居之所以自修自养有彰彰然著者试举一二今上人之鼓舞诸士子者尽声势也细推论之多不协义士子遂群然而曰是能作兴我辈人也是待士之厚人也然则入官之后其声势更有大焉将无慕之乎上而朝廷待士之恩下而有司义起之典如补增廩如优免如途费非士子所宜与也今越分而求且纷纷焉比之墦间之乞相去何如然则入官之后其为利更有大焉将无乞之乎谓义则与众与之助之成事可也而今凡事有与于秀才者不论是非可否辄群起而曰护我类焉习战国背公死党之风更不知孔门不比不同之义小人学道则易使秀才学道今人顾以惟难管目之然则入官之后其徇私其植党更有利焉将无胥朋比以坏国事乎施于有政是亦为政今士子之施于家者叙伦理洽恩义若之何也议者比秀才为闺女孟子人有不为后可有为意也今之秀才不为处女而为淫妇亦多矣以若所为求若所欲负天地生人之义孤朝廷作养之恩非生员也

○吏书

昔人谓一介之士苟存心于利物于人必有所济吏书王书写文移掌簿籍预县事古称庶人之在官者果有美意则及人之惠比之一介之士远矣何今之为吏者每以得利为夸惟以得利为夸故百端作弊无所不至时以狗吏呼之贱之也一为吏而天之所以生人仁义礼智之道同于圣贤者丧之尽矣非吏书也

吏书常例上而二司抚按又上而六部寺院衙门愈大其常例愈多猾吏巧于骗财执偶中之

事以愚小民小民暗于事体不知上人之心何心不知官府中内面文移是官府为主吏书为主见一人偶以吏书而祸遂谓无赂则不可见一罪偶得吏书而免遂谓有赂则可吏猾民愚弊非一日苟非上人逐一簿记所赂之事遇若事则谆谆然问是有赂与否小有犯者与者受者重刑加焉而又以身先之不可免也谓之以身先之者何吏书何等人也彼见夫内外缙绅之流开骗局以赂于人多矣而何独不为之小民何等人也彼见夫纷纷做官人裹金帛以赂人欺朝廷而窃荣禄罔朝廷以免刑罪多矣而何独不为之小民之愚何怪我辈读书知礼义识事几人也纷纷之说皆谓要做官则不得不如是然则举天下而尽不为上官之赂也吏部能尽不迁转之耶举天下而又尽惟上官之赂也三五年考察吏部能尽一黜之耶京官有分贐之费是以外官书帕不得已受为孟子谓乡为身死而不受今谓所识穷乏者得我为之分贐是亦不可以已乎潜消默化之机诚在于上不在于下缙绅之常例不去而去吏书之常例不可得也

○里长

一里长十年一役事在催征钱粮勾摄人犯他非所与也流弊至今官府中百凡用度一一责之初年所用犹微至今则日增一日每丁多则出银肆两少亦三两自本县到任以来止科银贰钱伍分应用百凡用度尽出于是用多日以用少日补之不论阉分日期淳安路通徽饶无驿逋防馆夫无额定水夫旧规银两近因倭变此路通行上者下者络绎不绝是以支应为繁然大抵应县中用度少应上司用度多若上司加意节省不取水手长夫不轻出应付牌票文册纸张不必厚美参谒迎送如法禁止文移纸札一如两浙政议以自理词讼与二分纸价兼用虽贰分伍厘亦可足也

旧例里长逐日在县应卯违卯则罚各里每照丁科应卯银每日或伍分或七八分今已革去每丁许取银三分以偿其劳朔望日查比钱粮词状牌票余日听回干自己田里事劝谕小民使归善良不许在县旧例里甲照丁轮日应里役一人轮几日问以先日事则懵然不知问以先日钱粮则彼此推调诬赖事体纷然不一今定甲首户每丁止出银三分与里长户里长户止许分管钱粮事务不分日钱粮数少者一人管或兼管数多者二三人分各甲分管或词票或催唤听自初春入役日斟酌本户人数多寡分派多则分少则兼其人名下钱粮完名下事务完则止虽朔望日不必到县本县亦止以各名下事责其人一里长近日人多不乐为以故应当里役品类劣恶官府每每贱之夫侵剥甲首略无人心狡猾百端如鬼如魅诚可贱而恶者然细推所以乃近日差赋繁需求甚上下相率为利致之善心化而为暴朴性变而成狡上失其道非独百姓之为也然亦不可一律言我所知如甘都二图吴汝文四都二图汪信夫七都上二图唐子庆公心直行虽读书人不可多及可尽贱乎爱礼存羊鼓而舞之朝盗跖暮伯夷机在我也我贱之则彼必自贱而惟利是趋矣使之化狠为良如我所欲其可得乎

○库子

一库子职主库藏旧例供冬夏卓帏供锡砚池至晚送各衙油烛今尽革去止有客供一茶遇晚供堂上一照光烛大事用烛多以支应银给之外无分毫用度然县库子比府库子库吏主

事而无干系不同每遇查盘经手钱粮则必与列旧例凡其经手银两役满数年必已领解今停革不论曾经手否止是见役领解役满则止

○斗级

本县预备仓斗级贰名每名正银柒两贰钱每两连耗参两正

○乡饮酒礼

尧舜之道孝弟而已乡饮酒礼尊重年德正为政首事也纵与席之人未必的然德行有可师法亦当爱礼存羊买死马首致千里马以隆圣治可也今当事之人每每忽略于是礼非不行而意念所隆不在是焉民不兴行风俗不美由不知尧舜之道故也又生员多系年少后生邈然不知让道眇视高年长者以故事视乡饮凡进酒供汤饌礼貌衰慢夫乡老虽愚拙父兄也生员凡民之秀纵状元进士唾手可得亦子弟也随行侍食礼所当然圣贤开口便说孝弟推其极如唐虞事功亦以孝弟当之精神命脉实相关涉非迂说也世俗浮薄不知此趣盖不特乡饮礼几成虚设而当事诸人傲慢一念去尧舜之道远矣居家出仕无一而可亦奚怪哉

一科举路费本县遇当科年连续考生员名数约二十人旧例派自见年已上三遍年出每一生给银四两又见年出办每名酒席银五钱近科止于支应银内取用不派里甲酒席银原县中私派今革去

科举路费此待贤之礼也待贤宜丰不宜俭然出自里甲膏脂与得其人是谓养贤及民取之宜也与不得其人今称所待之贤他日厉民之人也厉民之人何故剥民奉之是又当慎选其人不当滥及本职广东人广东举人七十五名闻正德末年科举生止取七百五十名场屋中每十人而取其一科举数不为不宽是年省费民甚便之士子亦因科举名不可幸得益加勉励盖省一名则省一名路费省一名场屋中诸般费用民之利也且名数既简则小试校文不得不精宦家子弟不得滥列名希场屋中请托荐拔又三场卷少考试官易于精择不至丛多而混选之精士子有所观感额数寡请托不能为奸革宿弊省民财得佳士一举而三利焉似可行也

说者谓科举数多人才尚有遗失再行减额遗将何如然此小考不精之故尔必谓多而后不遗焉中式名数亦将多取之乎今日取人较竞于一日之长取决于一夫之目是以多不得人窃谓教官于生员日课月考日夕与处者也提调官于生员季考朔望讲书月季与处者也纵目力低下未必识人然朝夕相亲近闻见参互较之提学取决于一日或胜也若提学道临考取教官提调官平日所取者参互较量或可以不至失人

近时举业习时套独第三场五策议论时务经史较前两场稍可得人主试者每以卷多日有限头场不预取数者不复检看是以末场虽有极工者头场非时套不能美俗观因之不蒙选录是科举名数多亦为得人之累

一乡士夫近日上司每发礼帖来文称动支无碍银若干送某宅上某宅上取回帖乡官举人进士岁贡生俱有之岂有无碍官银旧规出自里甲上司不可云然无碍官银其借辞耳本职到县至今绝不为此非故缺交际也取之已不足取之民不可故不为也惟上司牌至以其衙门纸赎应之间于支应银内补足些须其衙门无纸赎寝阁不行时止崔按院取银五十两送余姚陈乡宦达四月得本院纸赎四十八两零以一两零补足余未为之补者初年上司赠人不过三升五升禄米禄米赠人与尔邻里乡党义也近方以银初数钱渐数两今则三五十两有之纵出纸赎然君子周急不继富乡士夫虽家业不同要不可言急也小民衣食不足种种差役困苦百端不恤其急而益富何心哉说者谓仕途狭小加礼私结正谓后日相遇地也夫朋友通财于贫者通之今之交际有私意焉虽出之已不足道也况乃剥之贫民以益官宦闻罗念庵处女凡官府馈送一切不受天下有若人焉义利交际亦卒有明也纷纷士夫舍曰欲之惟以善其礼际君子受之借口焉朱子谓殖私财以自结于私人天下相率为利浑成一团私意不知小民之困何日而苏也

一凡乡官进士举人岁贡生上司往往批送水手长夫抚按司府衙门多一处批一名二名各为人情甚至一人之身受水手十余名有之府学建德县学岁贡生又有采录民风名目奉府牌至各县取花红酒礼夫进士举人岁贡生正经所得有牌坊银有路费银若长夫水手贺礼牌扁接踵而来分外物也执其正而取之民义也民不得而辞也分外所得送之穷民之身民何堪之闻之待士礼物种种渐至今日而厚邈之先年无今十分之一自俗眼论之则先日待士薄矣瑞尝即所闻见而论今天下之才嘉靖不如正德正德不如弘治弘治又不如成化先年待士以薄或得佳士今待士隆矣天下之人喁喁然延颈一人以苏惫困不可得当宁亦皇皇然若无一臣可倚托焉才在昔日非谓尽美也然未至显显狼狈若今日乃知昔之待士非薄士也重义不重利间有与之银者取成礼而已故其时士子利心尚轻犹有此必歉于彼乡士夫则富若此矣而欲小民之裕于衣食也其可得乎乃今小民困苦之多乃今乡士夫富足之多为之也夫士而厉民国家何取于养士士惟势利之慕不足称士矣然则士之生于先年者何幸而遇待士之薄使已无愧于士民之生于今日何不幸而遇待士之厚使已制衣若为夺之谋食若为褫之日就困惫哉

一朔望讲书君子以朋友讲习此盖不独益及诸士府县日亲簿书词讼日月间得闻经书议论或亦可以驱尘俗进德义也

一季考五经四书道学正传也我朝专以是取士故今士子虽记诵俗文习活套语而圣贤道德终在人心者有底本以牵率之而不能远去也近见时文浮靡日甚几失正本淳士子亦有意见超迈发挥精当切题者往往不能取科第小试不居前列时好之乖不知何故昔欧阳永叔黜钩棘以复浑厚一时虽遭酷谤久之而士论反翕然重焉此惟在当事者为经书作主张力而行之耳固不可谓时好如是我之所取当随风而靡也

一新进生员旧例本生办酒卓席面奉县官学官此谬举也犹之较贻节礼物称士风厚薄谬论也一入门而意向差他日耽荣爵老而不休事贿赂惟利是竞端肇是矣本职到任以来是日令里甲办无席面酒数卓纱帕三端送各生参见学官少将父兄为子弟求师之意酒礼皆

革去【家居叙伦理敦行礼义士风之厚也其待先生也隆礼貌服教训不以官之卑也而有慢心焉去之日如始至不以先生之去而礼貌衰薄来则迎去则不送冷援异情士风之厚也若人求利以啖已已以利而昏人义之害也岂曰士风】

一寺观洪武六年令各府州县止存大寺观一所并处其徒择有戒行者领之若请给度牒必考试精通经典者方许

一社学洪武八年诏天下府州县各里立社学延师儒以教民间子弟淳安寺观院庵计有二十二处其余小神屋杂置于民间山麓者不可计数僧每寺院约有十余人私居道士以数百计询访社学则一无有焉虽各村乡间立家塾延师儒然计通县社学生不及二百人民之好尚俗之厚薄有可知矣本职到任以来凡遇僧道皆谕令还俗禁斋醮以塞其得利之途各图延教读教民间子弟尝欲一如六年令尽改寺院为社学未果

今之社学即古之小学教之始也句读词章不得已为举业计正义在伦理在四维教道之正今人非不知之也鼓舞其趋向发舒其志意则若未之有闻焉童子之苦难而欲止惮绳束而不乐学也亦奚怪哉王阳明训蒙大意小学良法也附记于后

古之教者教以人伦后世记诵词章之习起而先王之教亡今教童子惟当以孝弟忠信礼义廉耻为专务其栽培涵养之方则宜诱之歌诗以发其志意导之习礼以肃其威仪讽之读书以开其知觉今人往往以歌诗习礼为不切时务此皆末俗庸鄙之见乌足以知古人立教之意哉大抵童子之情乐嬉游而惮拘检如草木之始萌芽舒畅之则条达摧挠之则衰痿今教童子必使其趋向鼓舞中心喜悦则其进自不能已譬之时雨春风沾被卉木莫不萌动发越自然日长月化若冰霜剥落则生意萧索日就枯槁矣故凡诱之歌诗者非但发其志意而已亦所以泄其??垂号呼啸于咏歌宣其幽抑结滞于音节也导之习礼者非但肃其威仪而已亦所以周旋揖让而动荡其血脉拜起屈伸而固束其筋骸也讽之读书者非但开其知觉而已亦所以沉潜反复而存其心抑扬讽诵以宣其志也凡此皆所以顺导其志意调理其性情潜消其鄙吝默化其粗顽日使乐渐于礼义而不苦其难入于中和而不知其故是盖先王立教之微意也若近世之训蒙释者日惟督以句读课仿责其检束而不知导之以礼求其聪明而不知养之以善鞭撻绳縛若待囚囚彼视学舍如囹圄而不肯入视师长如寇讎而不欲见窥避掩覆以遂其嬉游设诈饬诡以肆其顽鄙偷薄庸劣日趋下流是盖驱之于恶而求其为善也何可得乎

一年节旧例府上送节礼物过□下四衙并吏书皆有府官设或不受亦终靡费归之里甲十无二三自本职到任以来止用鲜味米酒太府约用银二两余二府三府四府约用银一两少将奉上之敬不用多品一父祖骨肉之所自来子孙骨肉之所遗蜕也烧毁父母淹没子孙与伤毁已身何异是而可忍孰不可忍淳俗火化溺女闻士夫中间有行之者禁不能止残忍至此不知何故

一淳俗丧娶诸事民间往往竞为华侈越礼费财自蹙生意屡谕之不能止所以不能止赖士

夫輩為倡率也而何今之為士者身處窮約猶有正俗意念及家甫蓄積或得一官富貴利達有巢穴焉身落其中而不能出矣內之不重不能見外為輕每從人競侈靡夸聲勢昔之口??笑富翁鄙薄俗子反自蹈之夫稱士夫則若此矣何以責之小民中流砥柱無其人俗之所以日流而莫止有由也

一援例生員朝廷恩邊急缺糧餉開上馬納粟例沿行至今名人賢士有間出焉然亦千百中之一爾爵祿駕馭天下利可得之天下之人將不顧死亡之患敗亂之行以求之矣今天下盜賊縱橫東征西起趨利故也蕭望之議入粟贖罪謂一人得生十人以喪朝廷苦盜發一征調費銀十百萬計所得于援例几何所損于援例十百千萬矣天子深居九重一時為邊計不暇計遠諸臣一無慮長久一建明似皆失策孟子云故術不可不慎農民亦然本職自到任以來凡納粟納農民皆諭歸正途厄不與起送一門簿近提學道移文府縣凡生員入衙門登記正以勵士子無求節也聞之別府縣生員干預有司甚多淳則鮮其人焉然雖鮮有干預不能絕去小有希求之事與感恩不與蓄私怨即伊川之慨宋論之是尚曉一乞字也先儒謂纔說讓天下第一等事與別人做便是自棄不能一無所求而徒欲于干預之中以五十步百步較優劣也非自棄乎昔人云此世止除君父外不受他人半點恩是詩壁立萬仞諸士子可日誦之

一公私燕會居官當先辯義利官民界限一舉步不可過越也訪得先年燕會酒席頻迭皆出里甲里甲苦之本職到任以來惟迎春送學迎舉人歲貢各官新上任里甲辦酒余事如或舉行皆自買辦舊例多舉公酒并里甲辦私燕皆革去

查得賦役成規冊載富桐二驛并遞運所船隻鋪陳水夫工食支應等銀共六千五百三十八兩六錢費用不為不□矣防館夫之設當荅應奔走非為廩給口糧諸事用銀計也今水夫銀不足用不思裁革轉防館夫之身取足焉遂至正銀一兩加銀十兩桐建二縣里甲亦因二驛當沖過費財用永豐庫子稱極重徭差半因東關禮物是民間百端苦費皆為過往使客也過往使客如法當供應百姓苦之不得已也法有明禁而上下略不一執明法少裁抑者亦不過曰情之不可已而已遂至私意沿襲荅應過往禮費日增一日小民困苦亦日增一日待過往情則厚矣待吾民亦何情之薄哉過往之厚私厚也私厚之惠小待民之薄公薄也公薄之罪大聞之閩人魏立峯【名一恭】見任布政使道往返皆自顧人夫民船不馳驛今居官有若人焉當事者欲獻殷勤情何所施粵人譚次川【名大初】任江西驛傳道凡使客過往痛加裁抑江右以此省費今當事有若人焉過客縱欲需求毒何所用二者得其一焉過往有一峯可動當事執法之思當事有次川可動使客守法之念民疾或少瘳也而二者均之不可得也此民之所以日就困急與死為鄰哉

鋪司兵在力差中是極輕者先年多收加銀蓋因府上查歷有使用罰贖各衙門差人查稽遲公文亦有使用然查罰雖嚴公文仍舊稽遲淳安縣公文遞至省城有一月余方到者計轉回有過二个月余者遞至府亦四五日方到置郵傳命為最速今則反遲矣查得先年桐廬縣吳知縣申議鋪兵集縣前總遞縣遞至縣蒙准行時公文無稽遲者后不知何故而止然鋪司兵盡在縣候遞送則鋪舍成虛設且中途無護送或有疏虞若各鋪留一二人於鋪充護送以縣遞縣每一遞仍二人幫行充護送者與在縣遞送者輪流均勞逸一可以免稽遲二可以無疏

失不然虽稽查极严徒为包当之人增工食银尔于迟速毕竟无益也

一军门加派官兵行粮并犒赏银节年□寡不一近本县奉文到止以支应银充解不再派里甲

一上司派下各官进表升任去任并故官长夫水手银两本县量将纸赎支应银充解不再派里甲给故官谓悻悻其穷里甲出之是不得已也敛之穷民附益升任去任进表官之富者非义也下司以取悦上司同僚以此相取悦贫民独何辜乎

一新官原各僚属有声报到即差吏书门皂人役前往旧任原籍迎接里甲中途供应至日具花?盛设猪羊大席钦奉颁行仪注新官赴任未到城一舍而止令人报知礼房吏前期一日备仪仗出城伺候遍谒诸祠庙如仪致祭署理公事毕将所祭牲酒与官属父老享饮而退无远迎候列?席之制也新官到任士民观望之始义利之辩亦其发轫之初滥受?席踰制劳人不美之端见矣后将何望享饮父老所以通其情制之善也不知爱礼存羊变化在我顾以里老人品微末礼废不行花?酒席制所无者安然受之修之家庭坏之初仕不知其可也今已革去一如仪注举行

一迎接旧例凡府官报到即差吏带民壮吹手皂隶人夫至其家或中途候迎至日先候谒不合礼制姑置勿论并六县计之劳人费财不为不多非有道者肯安受也人不可知礼义在我所当自守本县到任以来止差吏一人至桐庐地方投接批尚觉似多了此举至日惟太府参谒二府三府四府候便日

一参谒县百事统于府旧例小有故必参谒必带里长供夫马日用一废公事二费财劳人本县非甚不得已不离任至府初到犹间于二钱五分内支用近一切俱用本等柴薪银炊饭船夫用皂隶小溪起陆行则租马随行吏书自备饭食无丝毫侵用于民心觉爽然已定各衙凡出俱自行供应夫同本衙跟随皂快不许沾支应银亦不许中途起乡夫儒学原人役少公出量贴夫二三名止夫而已别无供应

一朝覲今人谓朝覲年为京官收租之年故外官至期盛辇金帛以奉京官上下相率而为利所苦者小民而已旧例就三年里甲中科派一里一两三八共二百四十两中取七十二两馈本府十二两馈府首领六两馈府吏府上或又取轿夫吹手民壮民壮如纳银则不止十二两之数是年催甲不纳竹木每人出银二钱共银一百六十两又当年里甲自初春日扣米蠶纸笔墨拜帖贮之铺行约至启行米可三十四五石蠶可一百四五十觔笔墨帖计数百纸计数千或正用或收价临行见年里甲出扯船夫数名各里间有馈送官又暗自纸赎中计取百端科派皆为京中用度设也夫此举在京谓之礼在外究之则为赃纵沿习成风上下一律上官未必执此为我罪也洁已守义君子之自养何如彼之甘以其身为沟壑借口猎较犹可况受其赐我亦甘以其身为沟壑应之曰不得已而然也可乎本县二经朝覲止用路费银四十八两吏十二两造册十一两七钱五分跟随皂快备原名工食外量行加贴旧例悉行禁革惟本府取轿夫则应之似亦未为合义也二司车屋逢饭等事间取之府府车屋逢饭等事间取之

县县将何取取之民上下雷同所以县中公然有许多科派一吏农两浙政议称吏农初参令里甲办花红酒菓牌扁迎送淳安先无此例止是役满领起送文日有花红送出计费里甲银七八分彼能守法奉公三年无过似亦可嘉未与禁革所革者吏书门皂顶头常例初送农民罚纸贰刀计银伍钱公堂酒席银二两盖吏农纳柴薪而来利心生矣复以罚纸公堂示之流可塞乎惟有此举故终役则为之追顶头初进则为众追酒席常例旧规含糊不禁机所必至先任二府龙可溪谓容吏书取钱犹人之纵容妻妾犯奸此言足以发人羞恶之心破世俗姑息之论即而推之则官之并公受取侵渔百姓于强盗劫财之律何如吏之妾于我犹我之妾于君夫之纵容可愧妻妾之自纵以欺其夫也独无愧心坎俸柴马丁之外非已之利犹外至之男非妻妾之夫也

一书手书写吏胥职也彼或不能自募书手代之亦其本分旧例清理军匠丁田均徭派征钱粮等项皆令直日里长出办工食今已革去独有大事造册用上多者算字计该若干工与工食小事不给

一纸笔原吏房掌之原计房科事繁简给纸难一一稽考今改预纸先用后偿如有申文各房先出纸写成至金押计用过纸一张则给与一张用过四五张则给与四五张永豐价高惟上司紧关申文方用若依准批文等项虽抚按衙门亦止用中改连古干价值不当所费不少各酌定价数开后【笔墨大事造册方给时常不给】近日文移繁用纸甚多本县于自理词讼内取兼二分纸价给用不派里甲窃意文移之繁出自近日若上司加意节省如无甚干系册籍文票比较簿损之申文只用古干不必厚美供招近又添一书册申文可并入一封又以房科不同各为一封似皆可损县去府不远只用单纸为封不裱褙依准等状附比较文簿内既省纸又易编阅稽查无不可者毫厘皆民脂膏损之毫厘莫不有益

一原二院守巡道出巡并委官查盘县有馈送吏书银出自里甲多十二两少五六两沿习成风无一无之今已革去夫身为府县见吏书受赂则痛恨刑之为败已事也乃赂人之吏书设身处地其心何如本县自到任至今吏书每每禀说若还无此祸出不测本县以事至不能辩白充军死罪可甘受不可为此穿窬举动复之纵已自办不与举行此正说也毕竟与有赂者其查拨其问罪不甚相远乃知事系上司主之此辈人撞太岁人为所愚而不知也

一农民旧例上班今听回遇有差遣方票唤挨次轮流不论差之繁简久近准其所遇吏每房三人亦似多了今听其归每房止有一人代理房事呼唤有人到则止不必本名人盖听其归农归商以图生业在县闲坐不免计较作弊欺官害人也

一比较所以稽查未完事不可已者中有可损而不损者甚多然此非下司所得专也比较各衙门日期开后每月执簿稽查一则不废上司事二则吏书不能隐匿

比较文簿各房皆有附记吏房谓有可损者如一事三四衙门比较一事双月已比季终又比无一样纸不可而必用永豐若改双月为季终则省费一半三四衙门比较者省一处则省了二簿一人之费省二处则省了四簿二人之费永豐改用改连纸则省费一半改连改用古干

呈文又省费一半凡纸白厚者多粉久则虫蛀簿者可久藏又难洗补是坚簿而价廉者当用也

年终册旧例里甲出银付吏赂府吏总计六房约有三十两之数他如户房钱粮册工清军匠册刑审录礼寺观兵乡兵民壮等册皆有上房常例今尽革去只如数给纸笔如数给书写工食往往生事拨回然宁可有再造之费不可开贿赂之门

○家伙

士大夫以官为家日用器具所不可缺旧额买办家伙知县银十五两县丞主簿教官十二两典史九两载在赋役成规册数目各官无缺用矣古由大夫而下三等之国其禄同焉品有崇卑均之以官为家其日用器具不宜甚至相远近两浙政议又议县丞主簿教官增银二两一钱八分五厘典史增银三两四钱一分五厘然将去任官家火改修造以应新官新官家伙银两必至余剩于此取之于旧额无所增也损益调停最为良法各官遵而守之可也旧例家伙尽出里甲买办费银比额数加数倍正额银各官又倍收取为已有焉如知县则家火计价值已有四五十两之数银十五两倍收入已囊橐去任时可带者尽数带回不可带者又取之以与下人并所厚士不知此何义也

一修理公廨若不加意查考樽节不免浪费浪费则里甲苦之今定守正衙东衙西衙南衙民壮各一名分宪司儒学看守责之各门子看守县内外并儒学分宪司墙垣民壮一名翻盖瓦一名督工一名共七名小有漏损各役自行检补大损坏于自理词讼中取给不扰里甲民壮以有武艺人充当既省民财又可以充防御不废民壮正事一举两得

闻之道路谓计盐课之入于朝廷者尚不足以偿各管盐员役禄奉之费官不必设是官独非冗员耶今府县官日不暇给非府县事诚多也大槩是送迎参谒重复文移若减去一衙门则省一衙门伺候省了一衙门文移窃意盐务当并之府县属户房巡盐抚按当并之各地方抚按巡盐应捕他方盐徒纵横者未知可减与否如淳建遂寿分当责之捕盗应捕不当更立巡盐事体归一无十羊九牧之弊且省民财似可行也

均徭徭而谓之均者谓均平如一不当偏有轻重也然人家有贫富户丁有多少税有虚实富者出百十两虽或费力亦有从来贫人应正银致变产致典卖妻子有之若不审其家之贫富丁之多少税之虚实而徒曰均之云者不可以谓之均也均徭富者宜当重差当银差贫者宜当轻差当力差渡夫舖兵此最轻者当以极贫并逃绝虚税人户疑而未定未与除豁者当之皂隶禁子等役编在坊并邻县图分舖兵渡夫就各邻近图分编金共户富家户下人有贫而田少者编以重差不许照丁均役仍照各贫富各田多少贫者轻富者重田多者重田少者轻然后为均平也

访之他县有将地山编均徭者淳安上地可敌中田好山得利迟较田地利加倍亦有之编金丁田遗了山地非不均乎窃意当以三亩地当田壹亩以玖亩山当地参亩人田山地并入筭

编金分于此则轻于彼小民受惠多矣附记于此

见年里长催征勾摄其本事也乃至资为百用如淳安县每丁有参两肆两之数又甚如建德至捌两玖两九重宁知有此耶均徭正银数目其本事也淳安每丁约六钱建德每丁约一两二钱不为不重矣乃至加耗银数倍徒正数十百正数九重宁复知有此耶今人遇谈无不以钱粮繁迭为叹诿曰事出朝廷无奈之何百姓亦无不以钱粮为苦生悲怨者就淳安论官民田地山塘八千一百四十六顷三十六亩每年出夏绢一万陆千一百七十五疋农桑绢三伯二十六疋秋粮三千八百八十二石九斗塩粮八伯六十二石九斗又见年丁田大约每丁科银五钱五分以天下财养一人以天下财为天下用古今通义虽近年以来日渐增益可损不损不可增而增诸臣失于料理天子深居九重不及致察然去十一法未甚远也乃今甲里乃今均徭乃又飞差大户费用不可赀计苦如淳安甚如建德然则钱粮之繁朝廷为之耶诸臣私自为之耶下民归怨朝廷所自致者何如诸臣为朝廷取怨者何如诸臣计以里役均徭充已囊橐姑勿论其取以称过使客取悦上司厚乡士夫士子者自以为事体宜然也能此谓之通不能此之谓拙其言曰不过一开口而已不知此口一开惠私一人害千万人此口不可开不过费一纸而已不知此牌一发惠私一人害千万人此牌不可发近癸丑科制策有何为臣者无克艰之思每怀欺与谤之叹今日朝廷正差绢出于桑粮出田亩天下未甚病也里役均徭飞差大户月日内迫促索银民以为厉如淳安县遇一显宦过往用银二三十两巡塩察院过用银一二百两建德县遇察院出巡用银一二百两巡抚过用银三四百两大户造船陪银一百余两别差亦陪银三四十两之类诸臣所自为诸臣所得行者不自为咎惟以其出自朝廷者用为口实其为欺与谤不既多乎窃谓可损不损不可增者而增此辅佐谏诤诸臣之责里役诸事则外列臣工径自裁损可也

一敛点收头必须丁田上户既解之后须查批回簿免侵用停留秤铤钱粮置二等子与库天平合一付库子一封自收贮如有争论取所原寺者拆较之可免抵换天平马子之弊

一县中百凡科派止照丁田不照里分盖里分中有全图有三分五分不等照丁田出办方均凡里甲中有事亦止许 【照丁】 田分派不照枝股

一征收各项钱粮每银壹两加银贰分为耗告示 【见后】

一黄册户房吏掌其事架阁吏专管收册籍遇大造往往飞洒欺隐百端作弊俱在造册时须将旧册并今收付数目逐一翻对稽查乃可造册年差则流弊十年查造明白则有十年受用不可不慎

查得通县洪武初人七万七千三百七口嘉靖三十一年册止四万六千口减额之多若此自国初自今人口不啻数倍之矣而以渐减额何欺隐之弊也然今日丁多止此差徭丁少亦此差徭丁□则散于众人而轻丁少则积于数人而重欺隐者为不肯欺隐者之害为不能欺隐者之害谓之不能欺隐者如户有二百丁只报五六丁户有三四丁者报二三丁户只一丁者尽报之隐者五六十丁册一丁不隐者丁丁着役孤丁得重役田多丁欺隐者使之一甲隐

丁则害及二三甲人一都隐丁则害及二三都人淳安县隐丁则害及他县严州府隐丁则害及他府两京十三藩之民同胞兄弟也有利于已害在别省别府然且不可共一县一?可为之耶利已害人非三代良民也任其利已害人而不为之正非三代良有司也况人存一欺隐之心则心术破坏奸伪萌生百端作弊皆兆于是今良有司良法美意展转反复迄无成功者正以民伪日滋欺隐一念牢不可改为之可谓尹晋阳损户数为正道也而任民为之乎凡事属欺隐者上欺君负国近害人远坏小民心术流祸日深一日不可行也

一虚税淳安县各图虚税极多访之乃因国初丈量亩不足数量得好者一亩可八分量得不好者一亩止五六分山一亩止得一亩弓步渐至一亩计行五七里远有之税轻重迥远访之遂安县田地一亩足一亩有有余无不足山则叫声此呼彼闻为一亩建德县田地虽□是八分不至有五分之弊且自丈量以来至今积有冲荒欺占飞洒那移之弊【说具申文见下卷末】又且流水册山场土名四至差讹为甚淳安有山无界直凭赖之语至今悬中词讼每状大纸争山必居五六四至不清无可据查业主数年一登山邻主无可凭问有经宪断数次今犹竞论者富豪享三四百亩之产而户无分厘之税贫者产无一粒之收虚出百十亩税差不均之事莫甚于此赔赍则困苦困苦不堪相继逃亡皆虚税所压为之不可不加意也本县曾行丈量时以委托不得其人富家不愿均田得以借口上下未孚事姑停止夫井田不可复矣后之君子如董仲舒师丹不得已有限田之请李安世均田之议宋林勋上本政书我朝丘文庄配丁田法无非民产谋也井田不可得矣而至于限田限田又不可得而均税行焉下下策也而尤谓不必行也弱不为扶强不为抑安在其为民父母哉【量田必清当无弊然后可不然何取于量不可以小有弊恕委托人然有弊止是欺隐如一亩报作六七分下田报作地人情喜轻有之无虚加如一亩作一亩五六分山作地地作田人情恶重必缠告改且业主各号田地通有自已亲供人欲加之彼肯自加乎欺隐亏官虚加亏民与其作弊亏民宁欺隐亏官窃以为纵使有弊或胜不量然此亦推其极而言耳非谓有弊为可姑容也】

○量田则例

一每日丈量时即取纸一张置于桌上就日升日落方所定填东西南北字又于四隅定填东南西南东北西北字此一坂内或有一大路或有一溪或有一带山或有一水畍就仔细看此溪此路此山此畍或自东而南又转而西或自北而西又转而南各随其或径直或曲折逐一如其本形模画此溪此山此路此畍方向既与纸上所写东西南北并四隅相合则大界至定矣大界至既定从而画田地之形则东至某号西南北至某号并四隅至某号方得不差不然移步转向所填东不是日升之东所填西不是日落之西东西南北并四隅皆易位了切不可拘旧流水旧鱼鳞图画盖旧流水旧鱼鳞图多与日升日落不合所以后争今从新丈量切不可如旧差错或值天阴无日看东西方向不定则且量记弓步候日出之日看定方向然后画图量田惟鱼鳞图最急盖纸上所画即地形所至那移不动可以杜绝日后争占切记不可苟且忽略【荒野看东西南北稍难至于山稍移步则转向尤难定方向丈量者不可不执日升日落為準日后查流水者则不可拘定日升日落但得四至合便是盖恐丈量人看日升日落不定故不可拘也】

一流水册中画田地山塘形像在南者如其本形画于南在北者如其本形转纸画于北东西并东南西南东北西北亦如其本形转纸画独南方不转纸画者盖流水印纸本坐北向南故在南者不用转纸画别七方须转纸方画得中周围填弓步或横或直下径步者随之填径步外周围填四至某号某业主此业主兼填户首名有五至六七八至者随所至角头填写两旁填某字几号土名某某等上中下九等就收成利多寡论如一号田有数坵上坵当作中中下坵当作上上不能總写于图画坵?内分写原若干亩今若干亩业主某都某图户首某人下某人如一号有数人管业备书都图姓名各管几亩几分此总写不能分别某人管上某人管下仍于图画分坵?内书各管人名田地山塘共一号者各有业主填田某人地某人山某人又田地山塘共号者如山占地步宽而田地步狭止坐其半總填界至不免有遗漏则填了山界至又填田地界至

一山争占者多盖由界至不明图画难晓今丈量山拆倒画不可画如田地如流水并旧鱼鳞图盖山高画其面不能画其背画其左不能画其右拆倒画使一山周围前后左右凡有号第界至俱明白在图山腰又为一号者界于山腰山又接山者又画山山下有田地者画田地山下止有一流水坑又起山者画一坑形又画山逐一皆就地形画不可少差分寸如陇大画一画如降小画一画坑画二画中点数点湾画二画不点盖像陇降坑湾之形也界画上写陇降坑湾字大小双点仔细看各界至而止不可少差分寸尖不能画盖画山面之尖则山背又无尖了止于两尖界上写一尖字若抵别图界之山则如流水上画于外写某都图界盖山在界上则一面在本图一面在他图可以画其形像也山折倒画大抵形象不能与山形合多是上狭而下阔或彼此相让地步使四至合形则当大画而反小当小画而反大当直而反曲当曲而反直多有之所以如此者盖必欲四至合故形像不能尽同也如四至是陇降坑湾中又有二三个陇降坑湾须画出两三个陇降坑湾之形流水册四至陇降坑湾下仍填中又有几陇几降几坑几湾使日后妄争者不得指东作西

一画流水图鱼鳞图凡方圆斜曲必须一一与田地山塘形像相合并四至皆不可少差分寸惟山不能尽合盖鱼鳞图山拆倒画然鱼鳞图虽拆倒画不能如其形而流水图止画一号则一一如其形体模写鱼鳞分别四至流水画其本形流水鱼鳞互相为备互相为稽考也鱼鳞图亦周围填弓步中填径步盖弓步只流水上有再填于鱼鳞图上使与流水互相查考也

一山争占者多盖由界至不明亩数多寡不均今量山可下弓步者下弓步量不可下弓步者牵绳量?绳或伸或缩须用棕用篾乃可且就三亩积七百二十步定为一亩山原有额数不可减今亦不为之增且就三亩为一亩待后酌量其山之肥瘦利之多寡增减以合额数甚至不可绳者亦须量料广狭合三亩弓步定为一亩然料量广狭必须勉强绳量数处使眼见过知若此高若此阔为若干亩见过多了熟了然后不用绳止是眼看估计方能不差如稍可下弓步牵绳者仍须下弓步牵绳受数日之劳可使千百年无争决不可憚其烦难而不可下弓步牵绳也一丈量山亦须相其肥瘦或土或石或峻或平锄发??多收减收宜柴宜木或便水或深僻数者之中参酌定为九等候本县亲自登山同众看议将原定等第并亩数参酌更定亩数

一田地山塘如一方有八九个号第不能尽写者止写两头号为界至如在东写东之南至某号东之北至某号中有几号不必尽写西南北仿此

一产业争论者极多今日丈量止以见今管业人益为业主不论前事

一救荒旧有东西南北四仓坐落在乡都图今已圯坏无存然远在各图谷既无几计济饥之功不足以偿防守之费诚不若仍贮县仓止此均徭斗级守之临时运至各都图给散之为便也

查得会典洪武五年令男妇乞觅者本里里长及上中人户量为资给不行资给者官验其所有粮食除存留足用外余没入官以济贫乏况在荒年更当怜恤资给矣劝赈贷告示见后令谓旱涝饥荒人民流移者不在此限谓流徙之多不能尽资给不可以没入官例行之非谓不可行资给也

淳安县虚税极多百姓每因不能陪纳轻则逃流甚则被苦而死若丈量成事则税与亩敌无陪与代矣今事停止原代陪虚税银今复计处增益其陪代虽多而图分稍殷实者本图里通人户自计处陪纳其一人虽有一二号产业全无管而他号有管亦将有盖无不开在本县代陪之数其十二都上一图经丈量数次果系虚税太多决非欺隐一号全无管者准与开报不以有盖无止是一号内得管一半无管一半者以有盖无不开报

优免本县原将各?各甲乡官生员吏农造册印钤工房收每有一甲已免别有户籍在别甲者至均徭等事又冒免可即工房册查之别县寄庄户原县已免至本县又告重免可移关原县查之胡建德谓节制其优免一丁之数则贫民受一丁之惠节制其优免十丁之数则贫民受十丁之惠与其滥免以滋富民之奸孰若节制以苏贫民之困权衡最当当事者切不可谓多与优免为无害于义而听其求请不据则例为之节制也

军门钱粮苦无所出是以盗矿取利以应差役据言亦可哀悯但小人趋利彼势寡则恬静彼势众或缺油粮或矿利微小不免呼啸行劫嘉靖三十九年假道劫六都一图徐副使徐提举家财焚屋杀人先后打掳人村取油粮砍伐竹木亦时有之彼等稟状不可轻信哀悯遂忘防守驱逐也按矿乃天地自然之利官开以应朝廷诸用军门不得已之费减省吾民一二利之所在人必趋之且免盗掘接济之害不亦可乎说者谓官开则必立官设衙门取掘矿夫役种种费用十倍矿利矿利尽日且必并其赋于吾民宁受盗开之害不可受官开无穷之苦瑞琼人也遯思采珠之苦诚若议者之言年年戍守珠池防盗采临采照丁照亩起珠夫起供给官府诸费大约民间每珠银一两可买者计采珠并进珠交珠之费有二十余两之数官开诚不可也宝产于地反不得取之以济国用少纾吾民天地自然之利反生劫夺接济重为民害私开为盗盗开为害官开为正正开亦为害廊庙上当事诸公不知何一无所建明一无所处置至弃此天地自然之利使民不蒙其利反受其害也

一县中一应修理并各衙有事做工如担土石扛木锄草打扫等项止用皂隶工多兼用民壮

再多兼用犯人决不用火夫盖火夫数少守宿轮班勤如有不知此意照旧例误用总小甲执此稟告

建德县除修理本府上下七衙府学五衙并朔望行香纸笔四季考供给赏分派五县外下程酒席心红纸札摆司修理等项使用尽是见年里役每丁用银大约少则四两多则六两其河下夫役则通县轮当不论见年计自正月初壹起至十月尽轮一周每四年轮流五次大约每一年每一丁用夫银三钱五分每一年三钱五分计十年则有三两五钱以此轮流夫役算入见年里役则民间每十年一次里役大约每丁用银九两有奇矣淳安县路通徽饶比遂寿分三县僻处不同夫役亦是见年出办每丁大约多则四两少则三两比之建德所费不止减去一半本县自到任以来每一丁只收二钱五分支应百凡用度尽出于是是建德之苦比淳安倍蓰十百矣恭王谓楚人遗弓楚人得之待物洪矣君子犹以狭小病之有去其刑而可矣之论建淳均为严州属邑视其冲繁困苦而不为之协济也于心安乎古昔公道大同用力不必为已用财不必藏于已是以其时礼让成风民德归厚若事在不可以已本县当举淳民而分役之矣但建德之苦皆由近日兵部札付滥出上司应付夫船牌票长夫水手贺礼牌票滥作人情以与诸人酒席下程比前倍蓰然前人未尝称饥饿于严州也百凡官用丰美倍前然前人未尝谓严州为鄙陋不足观也是亦不可以已乎宋臣谓屠杀牛羊剥禽鱼肉以为膳羞食者甚美死者甚苦使见其号呼于挺刃之下宛转于刀几之间虽八珍之美必将投筯而不忍食人皆有不忍人之心上之申请求免下之纵不得请自我义裁无不可者胡建德所议额编长夫于使用之中寓阴损折干之计诚良策也独四县协济一议则论今日不追求前日论下一节不论上一节所谓徒欲以已所受害而分害于人未得为可矣推究其极则胡建德所议未为至当若只就今日论遂寿分不待言矣本县亦当在协济之列也时士民有只当顾我县之说若以为本县所议不当更为建德县处分者非正论也本县如前所云非迂说非墨子兼爱之意今日风俗浇漓日甚民情不可挽而之善者皆私已一念横于其中私已一念甚之则为盗贼为杀人无所不至若在一县私一县之民推而究之则一膜之外便为胡越无往非容私之地矣本县自莅任以来见一图每私其一图之人一甲每私其一甲之人父私其子而为之伯叔之子者则多欺且骗之人私其身为之弟若侄者则多欺且骗之狱讼繁兴苦不能定每中夜浩叹痛恨于私已之炽盗贼奸宄由此而生公道大同不可复见也乃复以私县之念作之也可乎士民之言殊失吾意故再识此用以广其万物一体之公而剖破其尔我之妄也

海忠介公全集卷之八

卷之九

淳安政事二

筑城申文

量田申文

均徭申文

均徭稟帖

金大户申文

均徭稟帖

陆行稟帖

稟鄢军门揭帖

協济夫役民壮申文

交印申文

兵备道军政条约

徐继人命参语

方淙争谷参语

吴吉祥人命参语

吴万人命参语

胡胜荣人命参语

邵守愚人命参语

何耀宗争坟地参语

保甲告示

保甲法再示

招抚逃民告示

定耗银告示

加二分耗钱粮

无耗钱粮

谕里老告示

劝赈贷告示

淳安县禁约三十一条

○筑城申文

淳安月为查理筑城御患事案奉巡按御史王批呈仰县应筑墙垣将分定里通土筑等因及蒙钦差总督军门胡批申前事奉此今该本县海知县屡次拘集里通人等欲兴工筑各称与其为墙垣不若即为城池一劳永逸卑职随到各方相视果系地土疏恶县西北贰方依山时有水气浸渍县东一带地势洿下筑土为墙势必不能坚久县南一带居民临溪溪深地高筑石平岸即可为城用石筑墙与用石筑城所费仅多十分之一若为墙垣三五年间必复修筑诚不若凿池筑城一劳而可永逸也况县治去矿山三十里而近时有警报三十五年倭贼五十余人各方掳掠道经县后过徽州府时在县居民惊散县治止存县官学官吏数人自杭州府至徽州府水行陆行淳安皆必由之道古人设险守国必其上可以树干櫓集士卒设有不虞居高临下胜算在我土墙藩蔽内外于御侮或无大利也卑职带同里通人等再行丈视周围计九百丈筑砌高一丈七尺垛高五尺共二丈二尺下阔一丈三尺上阔九尺南临溪一丈七尺全用石砌止垛子五尺用砖东西北下三尺用石砌上一丈四尺全用砖计将八百丈分八百个通年一百丈付居民之有店房在县治者领筑县东北二处其全帮山者止外面砌筑之功原系消乏称三分里分领筑帮山少者五分甲分领筑又少者七分甲分领筑县东一带洿下砌筑功力北平地多十分之三则以殷实甲分筑之其等第亦视帮山者分三等县南一带临溪筑基之力虽多然筑平岸址即便是城与不洿下不临山功力无异则付之中平甲分有舖店之家扛担土石并冲筑功照丁亩数起夫雇倩砖工石工灰砌舟运之费照丁亩数起料银两选家道殷实立心公直能干耆民何一仁等一十六人分方督筑其有创筑不如灋不坚久者督筑之人自行复修此合通县里通士民日久计议如此为便土墙日前之功不可经久具由申详本府蒙批该县先议筑土墙行催一年之上未见完报今始改议筑城何也且筑

城大事未知民情财力若何仰县再审通县粮里果愿筑城还须区画周当通详上司具批词由缴今蒙前因清审粮耆里老黄叔亮等众称原议筑城各情允服为此具申

尝谓县无城守亦若人之治家内有堂寝器具藏谷粟货财而不为之限以藩墙蔽以门户万一祸出不虞后悔何及镇之丹阳不得已筑一小城以卫县治后又重复续为一城以卫民居近事可鉴人情惮于出财小民不知远虑固不必区区问是乐从否也但近日钱粮繁迭催征苦难更加城筑则古称封人虑事分财用平板干称畚筑程土物略基址具糗粮诸事计所费过万金苦难何如鄙意欲八十里中好甲分计费出银五两丑甲分计费出银三两二两淳民喜讼本县于词讼中酌处帮助通以二年中为之似或可以使民不觉劳费而今已矣后之当事者非诚别有区处筹计优裕不可轻举轻议也

○量田申文

淳安县为乞清经界均赋役以极民疲以息民争事据槩县里老方惟德等连名呈称本县洪武额定流水田土规设丁户钱粮自彼迄今业移籍改缘淳安僻居穷谷屡遭水泻山崩多致地推田涨贫户不堪差税逃徙他方产业间有存者里通占耕可开垦者富家修砌因而据为已业及诡寄飞洒那移界址改换册籍有力大户山地开垦成田厚收薄赋积及今日有田者无税无田者反当重差逃户钱粮洒派存户苦乐不均民穷为甚呈乞转达通照杭绍等府均平丈量立规定业庶使赋役均平民得安生逃流归复一邑幸甚等情据此案照先据十二都里通何富宗等亦因亏折田亩虚供差税告蒙巡按浙江监察御史周处批行分守道查报行府转委本县查勘本图原额官民田共七千九百四亩零复查得荒熟等山地成田补数外尚欠七百余亩不敷额数难以完报据呈有田无税无田差重及执佃寄洒那移山地开垦成田未经升税等情事同槩县正宜通行查理奈世远人亡册籍不完契号改易无凭查定且山崩水决去处原系消乏称三分五分里分者本里无从处补若欲存抚疲民招回逃流均平赋役诚莫若槩县丈量通融补算一劳而可永定也缘干税赋合无容令卑县亲诣各里金督管保书算量手照依见管田地山塘坵?从实丈量吊查原号金定今业勘视原被冲涨可开垦者督令开垦山地成田者报升田赋以裨不足果系虚税无管者即与除豁凑成原额县总更正流水号册鱼鳞形图清立各户实该钱粮永为赋税如此则经界正苦乐均而争讼息矣卑县未敢擅便拟合通详

○均徭申文

淳安县为軫念重大民隐事抄蒙本府牌面前事备仰本县官吏照牌备蒙批申内事理即查该县原申均徭令七甲为首编起果于众心乐从民无异议方与议夺中间若有窒碍难行亦当照旧规申府毋得拂乱民情致滋烦扰又蒙朱批曾否通将七甲人户细审务须廉审酌断方无遗议也紧待转报再查二甲均徭提编似乎稍轻有何别处或与一甲均徭更换何如等因蒙此案照先据本县一等都?第一甲里长张文光等连名呈前事已该本县再议申详去后今蒙前因查得节年粮绢并应年丁田及近增袍服工料等项虽是比较繁多然犹似近十之法独见年里役每丁约用银多则四两少亦不下三两应年均徭少者一丁一两二钱多者一

丁至十余两是以民间不苦朝廷正差独苦均徭里役富者破产贫者逃亡图图有之是诚未可轻议也先提编了二甲均徭后又提编了五甲均徭所以致今重并今适改革之际当为画一之规酌处调停使可久行无弊正其时也访之别县有五年方轮一次均徭又五年方轮一次里役者小民将四年所积应一年重差当一年重差得四年闲歇重不能损酌为处分诚长策也卑县六甲已行补役不堪再应均徭自七甲为始则七甲虽云五年二次均徭似乎稍重而一甲仍旧十年一次均徭不至过轻正合一甲挨在五年内尤为均平之说且万一后有提编七甲去一甲远甚不致僭并似可久行而七甲之人告称先当三十六年里长应三十八年均徭实则自三十七年七月便行着役僭年重差至今困者未苏逝者未返欲将四甲为始五甲次之继以一二三甲则六年以后仍尔重并欲将四甲为始挨次至十甲方以一二三甲继之则一二三甲均徭又经十有五年方着二次盖提编去了两个甲分那前趲后今日欲为处分非偏重了数甲偏轻了数甲决不可能无十甲之人均平如一彼不轻此不重之事也又欲仍前补役则均徭银多寡不同二甲人户至今消长不一县事之难者难乎钱粮之完难乎事在追征而安静不扰也以一甲之人应一年之役苦难完事若以十甲之人应一年之役追并之苦勾摄之繁事将何如今欲查照旧规追银补役则补役不可行任其重并则用其二而民殍用其三而父子离君子用其一当缓其二重并不可行自一省论一省原不为一例今不可同自一府论数县原有抵牾今不能不抵牾也拘集里甲问以均徭十里之人未有不执其甲分之苦以为告者盖均徭里役之费流弊至今日甚一日遡之国初或倍蓰或十百或千万年年均有厚费甲甲均之疲困是以人各有词互相较竞畏迫喜缓各自私已筑舍道傍何时而定所可行者若不追论既往自今伊始期可久行则七甲虽云五年二次然中间已得三年闲歇当以七甲为始六甲为末若谓人情每苦重差可使有太轻不可使有过重则当以四甲为首一二三甲为末卑县未敢擅便拟合申请

○均徭稟帖

淳安县稟原本县申覆均徭甲分以四甲七甲为始并行申夺者盖均徭里役在今日是极重差役或僭年或并在一年使民鬻卖男女妻产逃流死绝恒必由之是诚不可轻议今乘改革之际当思经久之规止论往事轮该一甲二甲然或顺序或更换皆犯僭并之累本县曾通将十甲逐一排写逐一较量将以三甲为始然三甲近于二甲疏歇未久故不用三甲将以五甲为始又以六甲方行补役六甲僭于五甲故不用五甲较之较之思之思之舍四甲七甲外再无可行定者矣今四甲七甲之人又行告免夫四甲七年两次均徭中得五年闲歇七甲五年二次均徭中得三年闲歇苦求缓役乃欲一甲二甲之人均徭里役丁田三事僭重并重情可通乎事可行乎以一甲二甲为始以渐至后四甲七甲亦是僭并小民不知远虑止欲苟缓一时以四甲为始轮去虽一二三甲独得十五年二次之利然四甲七年二次去十一年二次不远四甲已自无词今赴府争告不知又是何人也愚民因此忿争彼心虽明不肯下气输服人各私已何时而定为此具稟伏乞内断于心一言以折卑县幸甚在今日均徭里役是极重差使又加以丁田每一丁连耗亦将有一两之数虽相去一二年亦且不可何则困者未苏也况并于一年僭于下年本县建议上司以四甲六甲之人告诉故仍用一甲充均徭不忌三差相并是不思孟子用一缓二之说今日三役之轻重何如也时以均徭过期不能再行申请然一年三役重并则以后九年三役俱是重并若不速改是促十甲之穷民而均使之逃亡也

○金大户申文

淳安县为急办鹰平杉木以资工用事抄蒙本府牌奉浙江布政使司札付奉钦差总督军门胡批呈前事仰县掌印官作速清查黄册丁田最多殷实上户从公定朱批大户四名开具都图年貌密封送府揭查取解等因依蒙行该知县海欲遵清查黄册丁田最多者金取但访得淳安富者田亩固多而多田者未必尽富盖近日钱粮繁重百姓多以田致累富家多卖地与山开垦成田以避繁差此则实享田利而册无田税也田地利微税重山迟久利厚税轻曾有相讼者审得止五分山税计栽养仅三十年卖银三百余两者较之田地利盖倍蓰十百矣以故富家竞买好山栽木此则家有蓄积而田地亩数又不甚多也黄册田从实报丁多隐匿多是合众人之田注于户首一人之下查照黄册金取则当事者亦必照其户内之田均派众人是贫而田少者亦与大户之列说者又谓众轻易举正不知近日钱粮繁飞差频迭贫富均惫然富者出十百两虽或费力亦有从来贫人一文则剜却心头肉也诗云哿矣富人哀此茆独为此卑县查册有多田兼博访素有蓄积之家金正户四人稍次者一人朋之共八人中有年老有丁少者盖家富足则有家仆有钱不患无人也缘蒙仰县查金密封事理无从审取年貌今将正身的名都图理合备由申禀施行不特买木一事当金富户的名凡金粮长征收粮绢诸事亦当金其实是富厚之家的名庶或有逃绝赔贖数目不至兼累与富共户家贫而田少之人也

○均徭稟帖

淳安县稟卑职自莅任以来访求民瘼合县皆称近日夫马支应过多上司派下馈送人情过厚银力二差数倍输官小民不胜憔悴日甚是以计议将力差连人申送银差据数征收盖卑职于民最亲不能远去庖厨见其生不忍见其死闻其声不忍食其肉比之上司见牛未见羊为使客上官交际计得以行其过厚之心者不同毅然行之正名正义意上司无不允悦也近申解徭银未蒙收准且以理势谆谆为卑职诲爱人无已之心卑职知之感之铭于心刻于骨矣卑职反思时丁战国孟子故有顺天之论若今则圣明在上济济布列皆我辈读书知礼义人也非礼之礼非义之义一时趋染一觉悟而同归于善矣况台下权足为才足济中流砥柱无不可者乃欲与时俯仰以成无道之天耶从权枉道当辨其机区区诚不敢昧没本心以事台下矢心天日敢自许为台下忠臣无一毫欺慢掩隐比他人象恭滔天或径庭也伏惟台下体之谅之发回徭银更请定夺须至揭帖者

○陆行稟帖

淳安县稟本县于本月贰拾伍日奉到广西提刑按察司使侯火牌起马先奉云南表文进贺自严州府起陆路经淳安至歙查得自建德县至歙舖舍止是传通公文原无使客往返是以夜无公馆可栖宿日午无中火舖其路崎岖榛芜可通人行不可车马淳安已上难行尤甚此路原少人行自杭嘉湖经有倭变至今此路一通来者源源不可复塞从淳至歙租一马用银一两过客以此为利水行故作陆行折马有之卑县自到任以来止给以船不与以马以此省费今奉前因此必因进表日逼而欲急行也然得轻便小船秉炬夜行与陆行亦无异此路原

非常行官行与公差二三人单行不同桥梁渡船诸凡不便万一骤雨山坑水发阻不得行因急而反迟于水者有之陆行实是不便而未经常行者或未知也况此行一开启日后多费之祸为此具稟如卑县说亦可通前官至府乞本府以此意阻之宁与以多夫与以火炬则客不阻行民无厚费建德县之利抑亦卑县之利也淳安已上至歙路极崎岖遇紧急一马费银壹两柴捌钱方可得人夫小轿价亦数倍上上下下客亦苦之水路既省财费客亦安便当事者遇陆行者须极力阻之切不可开此陆行之俑使为民厉也

○稟鄱军门揭帖

淳安月知县稟伏读壹下札付云凡有益于塩政者我三司并府运州县等官具帖详报又云素性简朴不喜承迎凡饮食供帐俱宜俭朴为尚母得过为华侈靡费里甲又云方今民穷财尽宽一分则民受一分之赐务宜体亮谆谆然不一而止仰知台下为民为国言出由中非虚设也第今时风俗喜谀恶直今时居官人利害得丧动其心因一人疑千百人乐于为谀不乐于为直台下奉命南下浙之前路探听者皆云各处皆有酒席每席费银三四百两金花金一道汤一进下程则山禽野兽人不能致者备焉供帐极华丽虽溺器亦银为之与台下颁行条约大悖戾夫都院出理塩政我祖宗以来未之有亦希阔事也事出希阔则疾若者望车驾而赴诉贪酷者望车驾而改心百姓得希阔之遇焉可也乃今府县恐以不周致罪极意买办里甲惮于出财怨口嗷嗷百姓不沾希阔之恩反苦希阔之费是母乃官属承奉台下乐为谀不乐为直误认台下之心坎卑职先任福建南平县教谕时阮军门道经南平供奉过盛了峯骇之乡官进礼敬军门之说了峯荅云此极是害我尔塩法通滞卑职知其端未知其悉不敢妄为之说独此一事耳闻目见尝私谓纵使台下日后一不收受然物既买办必有花消里甲咨怨谁则当之官属以今时俗例度台下窃恐台下又苦官属利贡谀不利执守礼法事不及知而悔无及也害有甚于塩法之滞者是以敢竭区区为台下诵之为此具稟

○協济夫役民壮申文

查得所申協济夫役分派六县摆司一节该本县知县海议得古人轻任并重任分建德县申议虽为立县计实得古人均平之道本县往返府城日久耳闻目见为之惕怵惻隐不宁于心人皆有是心况建德县亲临父母其情尤切者耶所云典衣变产卖男鬻女等说皆一一据实之言非过为痛切求动人听求减已役为私计也第淳安县路当徽饶使客络绎不绝据本省论之塩法察院出巡徽州此必由之路且无驿馆夫无通运所防夫无荅应水夫旧规银两丝毫出自里甲较之建德冲疲减十分之五比之寿遂分经年无一过往不役一夫不差一船一马者天渊悬绝矣若欲均平本县似不当再協济桐建也若细细较量分数寿遂分協济其十本县亦止当得其一然苦乐当均居者行者又当区别曾院道出巡本府分派四县出铺陈轿伞出民壮吹手出下程等项供应后去有失期之罪先去又旷日持久租屋租物雇人供已比之家居者不同铺陈交纳有使用及其领出新者易之以陈好者易之以丑计所解铺陈价值几去其半建德居者处其逸与各衙门各舖行人役日夕为亲四县行者处其劳与各衙门各舖行人役为疏先年止减建德县水夫浅船不令各县協济或有见也四县当与桐建较量使费然后得为均平淳安当与遂寿分较量冲否然后得为均平建德与四县又当较量行者居

者然后得为均平也然此说与建德县所议虽云欲仗均平然以已所受害分害于人不探其本而齐于末下下策也闻之长老皆云民间之苦近二十年比前二十年为甚近四五十年比前四五十年又为甚严州冲要自昔而然院司往返出巡亦自昔而然何今日繁苦如是四十年前独不如是在县在上司若穷源探本据义撙节于已据义撙节于人复前四五十年之故则今日之民可比昔自建桐不告困四县不增役而六县举相安矣费用得已不为之求已徒欲以已之受害而分害于人得为可乎且遂寿分三县虽云僻处然民间赋役日增一日民亦劳止突为加役怨将何如又查议本府并经历知事照磨役用建德县民壮分派淳遂寿分四县建德民壮听该县收回就作河下接通皂隶一节遵依查得原立民壮盖取古者寓兵于农之意为防守地方计也积弊至今以之供差遣供使客迎送知为人情计不知为地方计其为失计关系不小况本县民壮贰伯伍十名海防扣追一百四名工食本府并清军管粮理刑一十四名共去一百一十八名止有一百三十二名存县本县临近各处矿山时有警报本府近又取七十七名团操本县时以不足防守为惧层申请发回今建德县又欲四县鸡派本府守宿跟用名数四县孤悬山谷又无城池比之建德尚有一所官军相帮防守不同建德附府四县远涉居者之与行者劳逸相远即之团操七十七名增工食又增月米本府应捕十四名三倍工食付建德县人包当悬绝可知然此特加费民财耳若论防守则地方为重差遣迎送事在可已为轻未可轻议派拨也除俱备申本府外为照前议事宜俱未敢擅便拟合通行申禀为此理合备由另具书册具申伏乞照详批府并议施行

淳安县为给由事准本县知县海关准本县关奉府帖奉布政司札付蒙钦差巡按浙江等处监察御史袁批淳安海知县方呈给由而已为升任之状倨傲弗恭不安分守等因备关到县卑县伏而读之自责自思日夕惶惧君子有三畏者谓圣言大人皆天命所当畏惟小人不知天命而不畏故狎大人侮圣人之言本院糾察一方上有德位可钦下有刑法可惕卑职奔趋下风亦窃有志于君子者也何至无知如是古人谓事亲孝故忠可移于君事兄弟故顺可移于长卑职素昔虽不以不孝不弟自居而检点未周不能以克孝克弟自尽今日检点未周忠顺不足罪莫大焉正当俯伏受责复念本院周赐贫生不令远谢各县官送至淳安者钩语分付已远了不要再远送了知本院未尝以过礼责人德之盛也越境奔趋旷废职业或重罪责为此略叙心迹在职待罪伏乞宽恩原宥等因准此拟合申禀为此理合备由具申伏乞详夺施行申塩法察院袁

○交印申文

淳安县为印信事准本县知县海关卑职于六月十五日闻迁官报迄今未奉札付近七月又闻塩院袁举劾本卑職与劾列未奉有命君子难进易退然去就际亦当分明闻之道途皆谓近时事体凡被劾须自退避卑职自揣自得官后每自誓上不负吾君下不负吾民中不负平生所学不介不取抱守终身今日不应应行事宜去之日如始至或不须嫌疑自避也虽事关庙廊宰相待罪昔有是说卑職若欲离任须交印信交仓库钱粮与者据明文然后可与受者据明文然后可为与者之受也昔者承乏得凭知县事由我皇上之命今者未奉命而可黯然去耶卑职处今适当去就之际烦为转申合干上司速降明示使卑職得有凭执罢斥改调勘问退闲惟法是听等因准此拟合就行申禀为此教场图

见图（省略）

此近日台宁兵备道阵法必有所本而来浙中多用之淳安临各矿山无城池所赖于民壮乡兵者尤急操练防守是不可不加意也出师必有营有阵止而无营则无以自守行而无阵则无以制敌地之险易不同卒之多寡不一所谓阵法固未必皆一一可用也然习之有素然后临事能以应机譬之学突然苟面虽不可预料而行动机变则不可不预知也知之未必尽皆可行然非熟之于目得之于手亦岂应之以心哉【此丘文庄阵法说今隐括之】

○兵备道军政条约

一中左右三营各兵五人为伍立一伍长五伍为队立一队长五队为哨立一百总五哨为营立一千??息合三营一十五哨为军以把??息官统之每营选一哨为冲锋三哨为战兵一哨为策应每哨选一队专习鸟锐四队专习牌镖钯钩镰长短鎗等械弓弩各随便熟兼习每伍伍长一人专用大旗或笏笏或镖牌左右四人用长鎗二短鎗二或用长鎗二钩镰铁钯各一五兵相杂常时合营操演遇警别有分布

一操日旗鼓前导先右营次左营次中营鱼贯肃队而行千百总各依本营监押把??息官随后统督至教场两边札定候本道将至辕门把??息官千百??息出迎连放三炮各营呐喊三声将台上升大纛毕本道升帐将台上举号笛各官千百??息队长以次参见毕巡风官率兵士报风毕把总禀开操毕率各千百??息队长归营操毕各兵依队伍团坐候比试试毕行赏罚未试者不许离伍赏罚毕各仍归营把总官禀下将旗放锐呐喊三声起营如前

一每战一进一退五十步即要止齐两翼务相夹持不许搀越乱进恐堕贼计

一大操中军举号头一声各把??息官哨循序回营毕中军官禀开操旗台上放起火三枝吹打中军列旗鼓导大纛前至正南信地各营以次吹打起队赴各信地安营毕吹打止中军放定营炮三声各营兵齐呐喊三声中军举号笛各营把??息率官哨齐赴纛前以次摆列中军官执旗趋帐前跪禀云请宣令即趋还将原颁军令高声宣布毕中军掌号一声各把??息官哨回营毕中军发哨马探声息回报击梆三通各营官兵皆坐食毕中军举号各营兵皆起立中军举信旗发甚营兵出战该营把??息举旗相应即举号三声本营兵呐喊三声各营兵皆呐喊相应本营吹打先摆三迭阵势已整吹打止第一第二迭慢鼓徐行止齐第三四五六迭擂鼓疾趋接战每迭俱要止齐游兵张两翼随之战胜鸣金迭退如迭进之法至本营而止中军举号吹打收游兵归营毕出战正营中军举号吹打变连环阵势已整吹打止第一环慢鼓徐行出阵前止齐第二三环擂鼓疾趋接战每环俱要止齐游兵亦张两翼随之战胜鸣金环退如环进之法至本营而止中军仍举号吹打收游兵归营毕中军举信旗发某营兵更战该营把??息举旗相应中军吹打前出战营兵随后哨掣动分两行遶出更战营兵之后更战营兵渐次台上至前战营地毕吹打止更战营中军举号呐喊吹打摆阵出战收回及游兵进退俱如前毕中军官趋至帐前跪禀操练已毕请收队旗台上掌号吹打各营亦以次吹打分两行收至原札两偏信地中军亦随列旗鼓迎大纛凯还毕

宣令

将士们听着今日老爹按临下操乃奉朝廷命不敢尔私将士们凡遇征剿只可进前不可退后

如有阻挠兵机者如有擅出辕门者

如有抢掳民财者如有擅杀良民者

如有临阵退缩者如有争夺首级者

俱以军法从治 【下阙一叶】

劝善以保其身切不可迂事视之

保甲十家牌格式

淳安县某都某图第几甲甲长某保长某左甲尾某人

一户某男子几丁 【本身年几岁某年几岁某年几岁某年几岁作何生理】

一户某男子几丁 【凡一内有八九十丁者俱尽数填写】

一户某男子几丁一户某男子几丁

一户某男子几丁一户某男子几丁

一户某男子几丁一户某男子几丁

一户某男子几丁一户某男子几丁

右甲头某

一丁者免挂牌直日巡夜二丁者该直一日四丁者直二日如丁多者照前分派巡直周而复始甲长于各户下填注巡直日期以便查考

牌两面俱粉一面书前十户人丁一面书圣谕六言孝顺父母尊长上和睦乡里教训子孙各安生理毋作非为

一词讼易天与水违行讼君子以作事谋始说者谓慎交结于相与之初明契券于交易之际讼无由生矣然此特言其一尔淳安县词讼繁多大抵皆因风俗日薄人心不古惟利是私见利则竞以行诈得利者为豪雄而不知欺心之害以健讼得胜者为壮士而不顾终讼之凶而又伦理不悖弟不逊兄侄不逊叔小有蒂芥不相能事则执为终身之憾遂媒孽讦告不止不知讲信修睦不能推己度人此讼之所以日繁而莫可止也

隋梁彦光为相州刺史每乡立学月必策试有劝学异等聪明有闻者升堂设饌有好争讼惰业无成者坐之庭中设以草具由是风俗大改淳生员间有与人争讼者然或一言而服或未造庭而自认已曲或原非讼者之田谓已田不应多有亩数逊以与人十人中七八人如是本職喜之服之尝谓此虽各士子志向高迈与俗迥远而淳士风稍厚学校教化之功不可诬也若小百姓皆如是讼事可稀少县官亦省许多事而必欲已胜必欲利为已有至死不口服可痛也本县每遇里老人等谕令劝各人户有子弟令就学为金选社学师此虽县官正事亦为息讼计也淳士子少讼讼亦易折服士风亦可取矣然至富家生员监生则争胜略与小民无异而又不然问所以苦不相让因荅言而逆其心大抵皆为家有许多产业若一件被人争去则利其弱而讼取者接踵矣此则因利心蔽真心也夫昔人有行一不义杀一不辜而得天下不为之因为彼计并此之不合义者而护取之私心固曰争胜而取强也可乎

淳俗多讼大抵是先因口舌先因一事讼官成隙以后遂互媒孽讦告终不休止昔人云丘山之憾一笑可散蒂芥之讎千河不收人若能宽裕其心念此非杀父兄事也言语讼争何孰之有诵以直报怨之言得失在仆之语久之而心有明焉昔之如孰如敌欲其死不欲其生者真可漠然无迹而不留于心矣淳俗好胜姑以胜道论本職每见讼者求胜多通贿赂求情嘱百计取财为讼事费此则败行之甚也败行复孰纵讼事得胜而我落孰人下矣昔人谓好色是色鬼迷好货是货鬼迷淳民喜讼是被讼鬼迷也迷不能返不知何故淳俗好讼求胜人也然胜人在行已有德在名闻称贤逞讼者在今日就俗见论亦若胜矣畏讼者不敢与校而逊之亦有之矣然人人心恶之在背后称恶人则指之甚则遭访拏陷刑辟不得其死究竟胜乎不胜乎

一人命淳俗多以人命诬人此事亦因上人用意过致之律图赖人命未决罪止拟徒二三年原告人官府每以苦主宽之被诬之人则凶手也若被检二三次所费不知几何也受刑责百般苦楚不知几何也轻视人命使人轻于杀人人命不可视之轻重视人命使人妄事图赖人命又不可一例视之重而不知别明系图赖者不可不加重刑以儆后也须研审干证系真实后可检验若轻检验则被诬者受亏图赖之人反得胜

一服毒舍天地所生之身父母所遗之体以诬人人未成罪而身先亡矣先年有服毒不给埋葬碑文流风远矣小民之愚不知轻重不知何故

一翻案曾见霍渭崖奏疏称讼不平者原讼者诉之县被讼者诉之府原讼者诉之司被讼者诉之院县之判曰某曲也府翻焉司之翻曰某曲也院翻焉小民耳目为之眩惑吏胥案牘由是混淆然又非特此已也兴讼启争实因于是盖小民不顾理义当否以讼输为深愧县判曲

转变情词诉之府府判曲转变情词诉之司院司院判曲于此犹欲翻招于彼司院去百姓远不知所以逆其苦告谓必有屈也纵情辞不可强通亦少假一二况又多是转委府县官被委员亦曰上司原告不可尽抑也观望上人亦欲假借侧闻之人说被委人有说上司原告虽甚没理亦须扶持使后人闻风可告至我处问理诵我廉明而我得闻名于上司矣言之可笑可鄙不足道也小民好胜谓再诉于上纵不大赢亦可小胜将不讼之乎告愿某官问理彼必德我为彰名也得胜可料将不讼之乎轻于准理翻案使民争讼之道也狱贵初辞县官所问正初辞也天下乌乎定孟子曰定于一凡事皆然官自为政人逞已私事体何时而定乎县官于民最亲上司止当责成县官不可轻为翻案

一供状曾见刑部供案情节不遗词极简短今在外衙门供状每舖叙许多无用说话遂致吏书得以暗藏字面出入罪人官不能究窃谓当即问官所判断语为供不用书手可免百般奸弊而上下沿袭不改自生事可怪

一止讼问之识者多说是词讼作四六分问方息得讼谓与原告以六分理亦必与被告以四分与原告以六分罪亦必与被告以四分二人曲直不甚相远可免忿激再讼然此虽止讼于一时实动争讼于后理曲健讼之人得一半直缠得被诬人得一半罪彼心快于是矣下人揣知上人意向讼繁兴矣小官问事怕刀人两可和鲜俗以老人和事笑之四六之说非和事老人乎易噬嗑亨健讼之人正吾颐中之梗利用刑狱也可畏讼而含糊鲜之乎君子之于天下曲曲直直自有正理四六之说乡愿之道兴讼启争不可行也

一疑狱两造俱备五听三讯狱情亦非难明也然民伪日滋厚貌深情其变千状昭明者十之六七两可难决亦十而二三也二三之难不能两舍将若之何古称与其杀不辜宁失不经与其失善宁其利淫处疑大槩也即此推之窃谓凡讼之可疑者与其屈兄宁屈其弟与其屈叔伯宁屈其侄与其屈富民宁屈富民与其屈愚直宁屈刁顽事在争产业与其屈小民宁屈乡宦以救弊也【

乡宦计夺小民田产债轴假契侵界威逼无所不为为富不仁比比有之故曰救弊】

事在争言貌与其屈乡宦宁屈小民以存体也【

乡官小民有贵贱之别故曰存体若乡官擅作威福打縛小民人不可以存体论】

上官意向在此民俗趋之为风俗计不可不慎也

一各衙门日日听讼迄不能止讼者何失其本也考之龚黄卓鲁专以德礼劝谕鲁父子讼者而孔子系之三月岂以孔子而不能别其情哉求其心也虞芮争田文王决之鼠牙雀角召伯辩之圣贤未尝不听讼也其转移化导之机则别有所在而不在于是今上司每以未完责下下司惟求完事以避责感化之意微了事之情切狱讼日繁而不可止不有由哉今时风俗健讼若圣贤当于其间当必有止讼之方而不徒听讼之为尚也

○徐继人命参语

桐庐县民徐继有妹徐氏嫁与戴五孙为妻母汤氏将银参两借与戴五孙营利继屡取无还

吏潘天麒顶父里长管造黄册投戴五孙家歇戴五孙遇继将银买酒请继说起前借银参两两相争闹继就不合用石乱打将伊推落塘内身死又用大石将尸压沉具告按察司批府帖县问拟徐氏因奸谋杀亲夫凌迟处死潘天麒奸夫斩罪继谋杀人从而加功绞罪申府解司驳批杭州府刘推官审问隐下奸情改拟鬪殴杀人绞罪申司转详巡按杨批允后又蒙都察院招送大理寺驳回发仰桐庐赵知县建德林知县遂安罗知县会审仍问徐氏凌迟潘天麒斩罪继绞罪至四十年二月蒙巡按崔临府会审徐氏哭诉已生有二子一女岂忍至此等语致蒙驳批分守道行府转发淳安县究明参审得戴五孙之死止是徐继因取银三两致争打死与潘天麒潘小毛并无相干本院审批建德县胡知县参究曲尽其情矣原拟天麒小毛同行谋死尤不可通者此是极大之恶极难行之事极不可对人言之语谓天麒徐氏谋而行之可也乃徐氏以之谋于其兄天麒以之谋于其仆非有多财可以结人心而缝其口者事可行乎天麒徐氏果行谋杀恐不若是之愚而谋及多人也谓徐继一时气忿打死可也与妹与仆从容坐谋此正天理不泯之时时出从容事不为利天理在人不应遽至无所可否惟谋是依若是也恋奸夫谋杀亲夫妇人淫惑亦间有之但徐氏与五孙生有二男一女丈夫可弃母子天性于人情似当念其子女因念及其夫且徐氏于天麒谋为之妾尔研审众证谓天麒充农民未参五孙虽贫天麒非富两人家业不甚相远天麒有正妻在上徐氏为妾其苦其乐尚未可知也徐氏何所利而必欲为之参看前后情节止是因取银忿争打死天麒小毛皆是畏刑捏招恍惚成狱殊非情实

○方淙争谷参语

淳安县民方淙与方希正等借何孟敦稻谷三十六石权贮伊仓西首方天禹等各亦缺食借何孟敦仓谷二百一十石因运谷相遇言辩扯扭致谷漏撒在地方淙告府准批究明招报招详未示间淙又赴按察司告蒙准批县查实究招详报行间随蒙本府批招参详阻谷扯袋方天禹等似有抢情姑依拟各赎决发落实收领状缴参审得时值凶荒方天禹方淙等借谷济饥其情皆切而天禹诸人系淙甲首其贫尤甚天禹等谷数不足自合与何孟敦理取为当乃阻夺方淙之谷致使袋破漏失惟知利己事似用强非良民也然借主孟敦称天禹等第二次搬谷与方淙搬谷时适相值可证有借契得谷与原数尚欠壹百壹拾伍石伍斗可凭铜锣器械众证皆称荒岁护送食谷防他盗各处多是如此在天禹初次搬谷则然非第二次运谷与方淙相值而后然也不得谓之白昼抢夺方淙借谷防借者之多即运回本家运至别处天禹可无疑矣乃即孟敦仓廩自东而贮之西方淙亿料天禹执批满取急来搬运与天禹再来搬谷时适相值迹似方淙临时夺借是天禹之情有可原也淙告府县状并在县对理并无一言及天禹素为盗警府县天禹等亦无素为盗警府县案卷天禹等素不为盗方淙非不知之也阻夺漏失由于得谷不满借批之炊亿度之差方淙又非不知之也方河方卸老打伤几死有何伤证府状只称打倒其词轻司状称抢杀几死其词重先后不同显是诬捏但方淙之情亦有可原者饥者求食其情均切而天禹等贫户小民尤汲汲然一不得谷怒言相加扯扭不歇比平日甲首礼下里长贫户逊让富户事体大有不同且袋破遗失之谷方淙执称不怕天禹不陪天禹自谓被淙夺去三十六石漏损几何二家忿归两不检取一半得之路人一半混之草土方淙无处取赔是以致有诟告方淙二十九日在县对理已自输服初三又有司状淙称二处并告并是假手他人情词过当不过希图准理或亦是也方淙明有借契而因阻夺致漏

失谷不满数情不能已是曲不尽在方淙天禹明有借契而谷不满数二家运谷时候相值曲亦不尽在天禹孟敦原说仓谷日久或有消耗不曾尽执契上数目与天禹曲亦不在孟敦各犯之情均有可原者

○吴吉祥人命参语

建德县民吴吉祥与义父吴湘堂叔吴镛各居另食吉祥投吴湘家佣工吴镛到山盗砍柴与吉祥相遇扭搯吉祥抽柴一根乱打吴镛身死吴湘告府行金推官覆审吴澧又告分巡道批府行委建德林知县问拟吉祥雇工人毆小功亲死者斩招解发白推官覆究吴澧坚执吴湘主使吉祥打死等情改拟吴湘威力主使人毆打律绞招详巡按杨批允而巡按裴改吉祥毆死题奉审决至嘉靖三十六年减刑郎中余会审改拟吴湘斩罪致伊不甘具本辩行都察院转发寿昌彭知县审勘委是吉祥毆死申府蒙批吴镛狱情反复不一又与审录大异帖委淳安县会同遂安县再加详究参审得大镛之死实是吉祥夺柴打伤所致节次经审俱拟吉祥抵死人无异词其致此狱再详者盖恤刑一出罪人各怀求什之之心适遇湘与吴拱翠讦告成讎之后吉祥倚靠拱翠故极口称冤拱翠当是见年里长审录紧急一干证人出已顾倩拱翠应对官府众人随声和同复讎有机故对众誓证观拱翠从前皆称吉祥毆打至与吴湘讦告之后改称吴湘其情亦可见矣吴湘计使吉祥脱逃遂诬指吉祥打死似亦一说可通但审吉祥孑然一身绝无父母妻子亲人吴湘果欲诬指吉祥则凭依邻里縛送官司力证其罪尽可脱然无累也吉祥口气似非痴愚之人万一因计令脱逃之言悟已必至抵罪之故远迹不返罪将谁归大湘必欲以已之罪移之吉祥不当出此下策也细审吴澧词意止是不欲吉祥贱人抵伊父命故牵扯吴湘不肯休歇不告奴仆而诬指主人以求抵敌今日人情之常据吴澧止告吴湘遂以为案恐亦未得吴澧真实之情也计令脱逃吉祥心穷辞遁对众誓证拱翠假事复讎再三研审参究无异

○吴万人人命参语

遂安县民吴万有嫂吴阿伊有菜园一处与万住屋相近园外有水坑一道原用石板一块布桥往来青香挑粪去园浇菜因失桥石行走不便叫骂万闻骂声令义男法才将伊扯到家内万用手足打踢一顿后方仁等将青香扶回气绝身死告府批分水县检究覆委寿昌李知县检审申解本府覆审各犯执词互异况尸伤前后不同帖仰建德胡知县覆检审万妄招先毒青香等情遇蒙巡按崔临府审驳本府委官再检蒙府批仰淳安县从公检究参勘得青香之死系是大万毒打所致无可疑矣惟服毒一节则难拟定如万所诉谓伊氏毒赖审得伊氏老寡寡媳幼孙外独有青香一人种菜担水舂米运柴百凡使用一日无青香则无人使用矣与万无甚深讎毒死青香自剪手足此必无之事也若谓吴万打伤青香自料必死因下毒为脱身计然初五日打伤至初九日方死方仁等初七日送青香还伊氏万去阿伊家十五丈余地步青香步行回不用人扶伊氏肯收领青香不谓必死也万何故即以决死视之因用毒药下毒药则必死无疑万虽能辗转巧计图赖伊氏然事亦在两疑间出此入彼难于先料万虽打伤青香死生尚未可知本家义女如幸不死万得干淨脱身矣于事未可必或得脱身者万不之求乃于必死之中巧为之计自置其身于危险地耶万毒青香凭一冬莲说耳冬莲称分水

建德县检验未曾到官寿昌县检验到官畏刑不得已随声招认所称豆腐花恐豆腐花亦非伴毒之具也伊氏自称青香回并不曾说及万下有毒青香果被万毒怨恨深矣该县差里逖审问万请方仁等送回面见主母何故独不一言及之万能买里逖曲为掩蔽送回之人均是二家共亲方仁系是方氏亲父众口所在或难买之掩蔽也里逖可买青香真心能禁之使不言耶狱贵初辞严州之俗人家多蓄砒礞断肠草毒菜虫一遇忿争取诸左右故服毒致死比比有之本府县先年有服毒不给葬埋碑文可知此风沿袭日久犯者非青香一人也阿伊与万为雠自称初八日到青香床头见有一碗心甚疑之将碗去出破碎初九日死或因此所致则阿伊亦疑青香回日自服毒也安知初五日之毒非青香自服因所服偶少或呕吐出故不死耶遂安县初问情词并里逖众人之口似或可信也独青香自服无人见证难为拟议然以罪疑惟轻之义推之则谓万以毒灌香因为脱计恐属穿凿非情实也缘事干人命卑職识见卑浅未敢擅便谨述前后情节并尸伤连人解审

○胡胜荣人命参语

淳安县民胡胜荣与兄胡胜祖胜佑弟胜荣邵时重争山胡胜病死捏称邵时重打伤本县汤县丞检验胜荣见得检无致命伤痕与胜佑外甥邵镛共谋买朱开桶点搽仍用火烘蒙府仰掌印官再一鞫检参审得凡人被打伤死其血凝聚多是隐隐骨中微见于外重则血晕紫红谓之紫则兼带黑色轻则红色淡红色然血凝聚于骨其红与朱脂色鲜明显著不同曾经检验者能辨之所以凡检尸先用酒醋蒸罨使脱去污浊伤色易见报伤时又对日罩以油伞值天阴雨看色不别白则改检初开胜祖尸桶头颅上鲜红连片远四五丈地旁观之人皆以朱脂之色疑之诘其所以胜荣称是汤县丞检毕朱判封条封尸骸致之视其封条又是半破日眼朱色淡薄独非三人共事之时自疑其用朱之过将外面扯破封皮置于桶中以为日后解释地耶所点之朱和以胶脂役经火烘是以虽洗刷数次盆水已红其骨不免红色后用磁瓦刮之头颅硬处红去无迹至于缝痕松糙骨红迹则存然朱脂色与打伤色一隐一显一凝死一流活悬绝可辨村民止欲置人于死用朱过多不知尸伤原无此等显显色也打伤胸膛骨色当在外今红色多在内此亦是村民止知图赖人当下手时不知此骨孰向外也两图十通人等皆称初检未见有此伤色看得胜祖尸色鲜明显著虽幽暗处不能藏朦瞽未甚者亦或可见众目所视父子兄弟间有不能曲为掩匿者初检官岂容不行查报初检件作岂容生计隐瞒加刑胜佑辄吐情实邵镛谓报已争产之雠胜荣胜佑谓报已争山之雠初检无伤因用朱脂涂搽皆实词也天理在人不容终掩

○邵守愚人命参语

淳安县邵守愚与弟邵守正共承祖遗塘壹口轮年养鱼嘉靖三十六年轮该守愚屡次被盗八月二十三夜一更时分邵守正约同程周去塘盗鱼守愚带同义男邵天保执鎗去塘捕盗程周窥人影步声即背鱼网去脱讫邵守正被守愚一鎗戳倒当叫一声再加狼力连戳五鎗身死次早伊母宋氏告县蒙洪知县审得若是误杀不宜连戳六鎗似有雠恨遂安朱知县审问守愚连戳六鎗似非误杀寿昌彭知县问拟守愚依同居卑幼引人盗物若有杀伤者依杀缙麻弟律绞解府转详巡按御史王蒙驳回分巡道看得招情亦欠合律行府转委本县检究

参审得宋氏词内告有指鱼看鱼夫纵盗鱼律不致死之说检得耳窃亦有塘泥在内则与程周同盗之情似实又称六人谋杀一人口舌之多岂能久不败露五人出财买一人独认财物实迹焉得久不外闻况邵守正亲兄弟邵守中守和男邵太礼与守愚等系同宗兄弟住址相邻耳目切断询访三年杳无可据则计哄买认之情似虚杀贼不死贼必反伤其连戮六鎗者盖亦未知其死与未死多戮使之必死亦势所必至也守正被戮岂无痛声然止一痛声未有别样说话黑夜敌贼危迫荒忙兄弟相盗思虑不及恐不能就一痛声而辩其为兄弟他人也登时杀死未就拘执似不当以同居卑幼引他人盗已家财物有杀伤者依杀伤缙麻弟律绞论罪

○何耀宗争坟地参语

淳安县民何耀宗与何孟荣等合有土名阵岭坟地一处嘉靖二十六年何孟荣贪图风水将父何民彦尸棺安葬始祖何环坟右后何仲荣思有克荫不均告蒙院府断令迁葬何孟荣执不肯迁耀宗将祖母王氏尸棺压葬何民彦冢上何玄辅玄龙亦各将父祖尸棺浮殡坟傍何孟荣捏各将母骸骨盗毁抛散具告按察司批寿昌彭知县踏勘各造新坟有案昭穆令各迁移孟荣不服又告分守道批委本县勘问参审得何氏阵岭坟山左葬太祖考妣右葬高祖考妣共四穴已于其下开生坟八穴正为后日子孙定计也何孟荣乃不遵派定次序惑于风水逼祖盗葬自何孟荣一葬之后人人不甘财力不敌如何玄辅何应宗何玄龙则浮殡何民述何民魁鲁氏柩于上财均力敌于耀宗者则逼葬王氏于下迭迭塚墓形如鱼鳞皆孟荣一葬后之况孟荣葬父之后弟何仲荣何季芳告克荫不均蒙察院裴断令迁移各出田貳亩卖银合葬父母孟荣抗违至今何民彦一穴当迁不待今日而从定也孟荣告称祖坟地一丈八尺所指何民彦葬地尚在一丈八尺之内焉得复有何包三等地且坟地葬祖一派子孙混该得分未分界止包三焉得指地私买明是孟荣谋地独葬不协众心故将已死何包三名目巧为抵跽小西地何澜子何民厚等已葬三穴何浦子何民述等已葬三穴似已均平耀宗果有掘弃尸骸则张氏尸骸自先压葬于民彦之上矣耀宗原无将张氏骸骨毁弃不必待族长何玄辅说无此生人之言而后可见也■〈扌 弃〉木银三十两孟荣始惑于风水则背弟盗葬其父今日得银则悵留在已告官使用派弟均出孟荣有利于已则为之且与原议已出葬父弟出葬嫡母并庶母费用之约不合三十两内留起三两为荣迁父使用恐亦不当与也耀宗不甘于众人得分之地孟荣独擅其利自合告理为当乃暮夜谋葬不会人知虽未掘至何民彦塚穴而悬绳直下压何民彦塚砖三寸葬已祖母乃压伯祖之上情皆可恶其生坟二穴尚未葬柩何耀宗谓与何孟荣祖共造者何孟荣谓是何耀宗祖独造者断二家各承一穴就迁王氏何民彦于其内其何玄辅等阵岭浮殡尸棺尽令起去再勘得阵岭小西二处地步已尽日后子孙俱不许再行殡葬以滋争讼

○保甲告示

察院近行保甲之法止论居止人户年至十五以上尽行开报为保为甲不论原管都图册籍盖原该管都图人户今有迁徙又有他方来此为工为商雇工流寓之人故又立为保甲之法以讷奸细联涣散使尔等出入相友急难相救亦即古者井邻里邑比闾族党之意也尔等可

照发去式样照依居止次序编甲若街道狭窄去处则编东一户为第一西一户为第二又东一户为第三西一户为第四若居止星散参差难以齐一者各随其居相近者为一甲多或十余户少或不及十户但取守望之便不必分析割补拘定数目多者接纸再填四五户于十户之后遇有寺观去处即尽其寺观内之人为一户甲内有新来人户增入新去人户开除旬日雇工人止觉察来历不书论年月雇工人书入去则除之各户人丁年貌有册牌上止书花名一甲择一有行止才力为人信服之人为甲长三甲或四五甲择有行止才力为人信服之人为保长日轮一人领牌觉察各户动静遇有面生可疑之人踪迹可疑之事即便举觉一户每三丁出一人巡夜户有二丁亦出一人巡夜户止一丁者免领牌巡夜之人于是日是夜外出则轮及别人其人回日行补一户每三丁出一壮丁为乡兵余人才力稍劣虽时常习武不充乡兵如止一丁二丁愿为兵并本县自行选金该图自行保荐者不在此限每人随便各备好坚利器械甚至贫不能备者亦备坚好木棍遇有警各甲或鸣梆或击锣每三丁出一壮丁救援追捕户止一二人者止于自户门首声援不远出其巡夜领牌之人各里通总甲自于格眼下筭一月三十日某户该某日填写即是一户一人一日一户二人三人一夜也保甲之法大略如此其间或有本县思虑不及窒碍不可行者则在承委人自为通融惟安常懒惰不金报不举行则不合式若实心举行甲有联络户有利兵领牌有人巡夜有人酌量多寡人无不均之愿则无有不合式矣里通保长人等仍于稍暇召各人户各乡兵习学武艺本县到图试有武艺志肯向前者给赏去县不及三里者调到县同在市乡兵操习凡到县操试者日给米一升日中给果饼克午饭实有武艺志肯向前者给赏再念保甲之法令尔等互相亲爱互相保守身家联属涣散敦行礼义甚美意也尔等如或冥顽不听晓谕不依约束惟欲目下偷安不体谅上司为尔计图长久有隐瞒一人不报官登册里通??息甲并所隐人员编甲之后有警不出救援并保甲长不率领救援者各治重罪尔等试思无自外保障自贻罪悔

○保甲法再示

保甲之法令尔等相亲爱相保守身家甚美意也不差遣不烦扰于尔等一无不利闻尔众多不乐为一金为兵辄难色怨言尔众果冥顽不灵如是耶尔意岂不以一编为甲则有觉察有巡夜不得如旧闲逸近六都一图三十一都三图被矿徒刦掠为鉴不远若先事防御岂至如是二里之人悔之无及尔众又不鉴之尔众冥顽不灵惟图目前不思远大此其一也又岂不以一金乡兵则有患必我为敌如倭寇如矿徒皆舍死之人也我则欲生焉能敌之夫倭寇矿徒为衣食计而来也为图生计何云舍死惟我兵望风先奔彼得直签冲突势若不顾生死而斗者若我气壮直前彼必退避易地则皆然直前则彼死我生退避则彼生我死此必然之势平时不愿金兵临寇望风奔溃尔众冥顽不灵惟图目前不思远大此又其一也其间向敌亦致死者正因保甲之法不行故单身被害若果互相救援则击首尾应击尾首应击其中首尾俱应谁能我伤不幸而死上为朝廷保地方忠臣木下为乡邻救难义士也死无愧心远有芳誉视之懦夫怯士愧色强辞苟生人世者相去何如自古皆有死民无信不立知惜死不知取义尔众冥顽不灵图眼前不图远大此又其一也姑以一事譬之淳俗喜讼好争其来久矣至今亮发争忿服毒自缢比比有之小亦犯刑宪破家基而不悔忿争闲气比之御侮出之礼义之勇者何如乃矿徒临门束手伏死倭奴经县远近逃窜争讼气何其壮遇寇气何其馁反而用之功业过人远矣由今不变甘为无名枉死甘为健讼刁民本职尝试思尔等讼争之壮气

逃贼之懦气全行可怪逆施可惜尔众冥顽不灵图目前不顾远大此又其一也正谓尔等偷安日久蔽痼不明故再以礼义谕再以远大之计为尔辩说若仍前不听报甲隐下壮丁金兵临危退缩必以法律从事前日矿徒穷民计图衣食情犹可恕今刳村杀人罪不容诛尔等可一心力防捕拒捕者随即杀之不死于敌必死于法死敌为忠义士死法为愚顽民尔等试思母贻罪悔议者谓王阳明行保甲法至宸濠之变又征募客兵当之谓此只可立为之法不可验之行事利于自守不利远攻夫良法迟久而后验习俗偷生苟安已非一朝一夕之故矣浹肌肤沦骨髓岁月焉能骤变我法未成他患适至势急不得不别计应之同井之制已矣乎不可复见矣取其稍近古意还淳朴修为和睦便益御侮法莫有良于是者必若以迂阔视之则客兵之害甚于盗贼者何时而已王道之所谓出入相友守望相助病疾相扶持者何时而成耶是不可见其末遂不深探其本计目前之功不思尚有远大之利而谓保甲之法为不足行也谓保甲法于御侮有大益者盖此法行则人各有亲爱邻里之心知进退攻击之法平时相亲爱临难必相救援假使倭寇至一县则一县足以御之至一图则一图足以御之至一村则一村之人又足以御之矣家自为守人自为战何事客兵无馈饷之烦费无过兵之骚扰韩退之谓征兵满万不若召募数千法诚莫有良焉者但人情偷安日久不能责效于三五年间耳若谓此法是不可行则古昔居为比邻党族州乡出为伍两卒旅师军者亦迂阔事耶同并法验于前保甲法亦无不验于后之理也

○招抚逃民告示

淳安县知县海示谕各都图逃流他方人等知悉尔等割舍乡土远离了平日所聚会的亲戚交游远离了平日遇时节所擗挂的祖宗丘塚者非独无天性不忍之心与人殊也盖因不能赔贖钱粮些小产业贱卖与富家者再无可卖或本身或男女写作奴婢于富家者再无可写衣食不充钱粮何出妻啼子号苦恼万端而里逋多科尚未已官府刑催犹不息吁天无由所以忍割天性之爱含泪逃流他方以求衣食以避繁刑非事稍可已而尔等为之也今本县丈量田山必有一亩收成者方与一亩差税无则除豁自此以后无赔贖无虚钱粮尔等可回还原籍赴县告查迷占产业取贖男女无业者本县将荒田给助工力与尔开垦区处住屋牛种与尔安生不能耕作者照乡例日给银贰分或用充荅应使客夫役或用充修理夫役各随所能使用凡尔新回之人给与执照待三年之后生理充足然后科派尔等本等身役多方区处必使尔等各得安生

○定耗银告示

淳安县为征收钱粮事原本县各项钱粮耗银多寡不一盖因各上司衙门兑银轻重不同也然轻重不同存乎其人固有彼一时重此一时轻者小民秤纳钱粮与各里逋多是各项总兑多寡不一深山穷谷之民易为收者所骗矣况因其轻重不同朝更暮改小民岂能遍知里逋户首因其不知而多收耗例比比有之今定自四十一年四月为始凡各项钱粮尽是正数外别加二分作耗一钱加二厘一两加二分十两加二钱一百两加二两此法一立虽有一项钱粮上司秤兑甚重一时上司秤兑钱粮甚重止是将轻者补之二分之耗一定不改甚至不能补者金富户里逋领解盖二分耗中数也兑轻则剩剩亦不多兑重则赔赔亦不多且銳重系

贪污者为之此无许多时分无多项或补或赔亦易也外缺官柴薪马丁斋膳夫虽是解银亦不加耗盖数目不多太甚亦以轻者补无可补则库子当之不增耗以致事体不一也为此示谕里通人户凡各项钱粮纳者止出二分作耗收者止取二分作耗外有多取者许不时赴县呈告以凭重治

○加二分耗钱粮

一田地山塘银水夫马价袍服秋塩粮丁田课程胖袄浅船织造料价等项凡通县钱粮俱二分加耗

○无耗钱粮

一本县柴薪马丁并缺官柴薪马丁家伙及县学斋膳夫缺官斋膳夫家伙其本县均徭除织造外其余俱无耗中称金富户里长领解库子当之甚言其不可增耗致事不归一贪人得缘为奸尔其实将轻补重止有余剩决无不足至累领解之人余剩耗银代充消乏图分虚税钱粮【议见户属】

○谕里老告示

圣谕孝顺父母尊敬长上和睦乡里教训子孙各安生理毋作非为之言凡民间日用常行之道为官为长所以教养小民者明而备矣今后坊里长老人将领去近日名臣注赞朝夕为民解说中有不知遵守者和言劝谕务使必行里长每月朔望日至县老人每月朔日至县至日本县即据圣谕考察各里民事小民不遵守圣谕是里长老人不称职也小令省改大则罪责其有凌雪小民多科钱粮者如律治罪另行选补

淳安县知县海示谕盗掘矿人等访得近矿山村落居民屡被尔等掳掠毒害人各有身各有家人毒尔生破尔家尔心何如我县官与尔等皆天地之民也当相爱相生不当互相残害故谕尔等使尔各回本乡各图安稳生理若仍前所为是终日取祸亡也尔等念之反思之母自贻悔

○劝赈贷告示

访得各图富积谷粟之家每每乘荒岁勒捐贫民质物典当倍约利息其贫甚虑无可偿者虽倍约亦固吝不与夫当凶岁小民菜色羸形妻啼子号甚者颠仆路衢展转沟壑少有人心者见之有不能为情者尔辈独无恻隐之心至是耶贫民富民均一天地所生之民也一偶而富一不偶而贫假使以尔等处贫者之地贫者处尔等地步亦如尔等坐视待汝略不加恤尔等无从取食亦将怨之否耶恨之否耶人皆有不忍人之心尔辈偶以利心蔽真心故令里老人等将本县言意劝谕尔等量将所积谷粟借贷贫民不许取利积厚德以遗尔子孙其有念人之急不取其利亦不取其本而直与之者本县以尚义名目书扁鼓乐奖之列名县志如仍前

略无恻隐倍称取利许贫民指告以凭重治夫积财而不能散者昔人以守财奴鄙之尔等将为尚义之美抑将为守财奴之陋财积无用德积庆及子孙尔等念之

○淳安县禁约三十一条【节次告示俱撮其要于后以便小民遵守】

一通县诸色钱粮每正银一两只许加收二分银为耗一两二分十两二钱百两二两秋塩粮纳银亦照此收耗

一均徭凡本县柴薪马丁家伙斋膳夫分宪司府馆三坛门子舖兵七十三名俱无耗惟织造每两加耗二分与收钱粮同

一禁甲首不许与里长户轮当里长每一官丁许出银三分与里长以偿应役之劳仍旧多取应卯银者甲首不时首告

一禁里长户不许分日轮当里长止许论丁田分管钱粮事务钱粮数多者数人分通年管数少者一人管或兼管

一农桑绢于夏绢内带征不许该催里长并催甲硬办【每疋带征农桑绢六寸伍厘零连车垫共银一分八厘零】

一禁催甲不许出酒席绢匣锁钥布袋银与粮长不许起科竹木银并常例送官吏

一禁编审均徭审见役丁田里通不许科敛常例送官吏书手门皂

一禁造黄册里通不许科敛常例送官吏书手门皂

一禁各图里长总甲不许起科火夫过山常例送官纸价送吏

一两厢火夫只是轮流守宿并本县遇夜出外执灯笼一二对前导迎祭习仪用数名其本县一应担土扛木石锄草打扫等项止用皂隶民壮并犯人不用火夫

一禁各图酒舖不许卖酒改卖饭将酒器送县镕毁领回改造饭旋

一禁各有店屋之家不许住歇娼妇违者拆毁其屋娼妇通解

一各地方凡有赶唱妇人到图里总人等实时锁拏送县以凭通解回籍

一禁收割之时不许将酒腐到田扭换谷粟违者呈治结草舍者许诸人即行拆毁

一各图违乡禁盗砍山场柴木违乡禁放牛畜践食稻麦粟豆者即拏送县治罪

一里老须时常劝谕小民趁时耕种其荒弃田地者指名呈告本县即将所弃田地给与无业小民耕作

一禁通县人民不许设斋醮祭佛致费财用不许竖造佛庙违者里老人等劝谕之谕之不从许诸人告治

一禁溺女伤自己骨肉

一禁火化残毁父母身体

一禁库子不许送各衙油烛供锡砚冬夏卓帟

一通县凡有冠婚丧祭俱要照依家礼仪节行丧事不许请僧道设佛婚礼不许多用盘盒猪羊糖饼不许厚礼物谢媒媒人索取谢礼者赴官告治

一禁吏书门皂不许取顶头银

一禁粮里长舖行人等不许馈送礼物菜果

一各图有教唆词讼之人许诸人指名首告

一民壮凡解府过京者金殷实富户其余每名一全年只许收七两二钱为工食其有在府团操并台州等处征守者止是将在县民壮工食扣补量远近劳逸每名或抽一两二两津贴不许再于正户身上加取七两二钱除温州海防在外

一丁田银凡浅船颜料皮张等项凡属工房三办加派钱粮俱尽在内以外更无钱粮节年多寡略不同小民不能尽知无闰月年止纳银伍钱柒分有闰年止纳银伍钱玖分与里通便是

一凡有事打点衙门者虽是分厘银些小货物亦与吏书门皂等受人一同治罪枷号二个月

一凡典借银谷多取利息者许被害人告治荒年借贷尤不宜多取利

一凡原逃流今新复业人户准免本身差役三年后生理完足方行科派终身免其代陪虚税钱粮

一秋粮止纳折色每石该银二钱五分止纳司广二项米每石该银五钱八分二厘零三项??息纳每石该银伍钱八厘零塩粮照时价纳

一田地傍有树木遮蔽田禾者即令砍去枝叶干甚者连树砍伐

海忠介公全集卷之九

卷之十

兴国八议

拟丈田则例

流水鱼鳞图

申军门吴尧山并守巡道请改招详文

示谕

延平条议

○兴国八议

兴国县知县海为地方时宜事卑县自到任至今据所见所闻事体有当兴当革者谨条具于后共八议??大乞裁度施行卑县不胜幸甚

一屯田永乐二年拨军下屯大造屯田黄册军民各有定分诚足兵足食良法也自是而后军无耕作之劳倍收子粒之利事犹可言弘治末年因出清查事例各军生奸指邻近民田报作已力开垦遂增余田名目查得屯田原一千余分三十亩今余田数约六千余亩当正田三分之一查得隅都虚粮一千八百石以田多人少自国初至今无一亩一坵开垦民坐都坐里有虚粮屯军原不住屯佃户何利何取工食独为之开垦致有余田若是耶军田大率间杂民田中四旁非尽山地何自开垦军之余田乃民之虚粮册籍已成征收日久小民赍粮无能辩诉犹曰往事可诿也目今军人生奸得惯沿袭而来凡屯田系是水冲沙涨水涸抛荒往往指邻近田为已田原有之数一佃其田百端生害无事则子粒倍收万一花费拖负运兑损数军粮重事料上司必为追理又捏讼佃户拖欠已粮一年不完佃户拖害一年不已是屯田之为害于民自有屯至今无止日也窃以为请前日之余田补民田之虚赍此其善之善者也次之若于事体无妨革去军人名目止此佃田之人输纳子粒而其输纳也或并于县官或上之卫所随宜行之下之小民无军人之扰上之屯粮无亏欠之累一举无不利焉第不知于事体何如也

一地利昔人谓江右有可耕之民而无可耕之地荆湖有可耕之地而无可耕之人盖为荆湖惜其地为江右惜其民欲一调停行之也兴国县山地全无耕垦姑置勿计其间地可田而未垦及先年为田近日荒废里里有之兼山地耕植尚可万人岁入所资七八万人绰绰余裕也访之南贛二府大槩类兴国而吉安南昌等府之民肩摩袂接地不能尽之使农贸易不能尽之使商比比游食他省是一省民也此有余地彼有余民目亲覩身亲历听其固然而不一均之也可乎即今吉抚昌广数府之民虽亦佃田南贛然佃田南贛者十之一游食他省者十之

九盖远去则声不相闻追关势不相及一佃南贛之田南贛人多强之入南贛之籍原籍之追捕不能逃新附之差徭不可减一身而二处之役加焉民之所以乐于舍近不憚就远有由然矣今日若张主有人凡愿籍南贛者与之除豁原籍而又与之批照以固其心给之无主山地荒田使不尽佃仆于富户民争趋之矣民争趋之则来者附籍不归未来者闻风仰慕不数年间南贛无余地村居联络可以挟制诸巢之寇吉安等府无余民衣食不窘可无为逃流为盗贼之忧一举而合省之民均有利焉是亦抚绥一盛举也

一隘所奉文查议各地方隘官应否禁革兴国县先年止设隘长总小甲无隘官千百长不能诘奸缉盗专一吓骗商民巡检官每年下乡巡查又往往需索过堡常例虽卑职自到任以来痛加禁革然而深山穷谷假称盘诘借口骗人其弊其害尚未知其无之否也且隘所又多设之无用之地既非大村可守其村又非高峻阨塞可据其险料是先年里老人等虑有乡兵之扰奸计以客户充隘长总小甲等役故亦即此客户随田耕作星散寥寥数人为居之地为之也此等客户居税户之庄所资税户之牛谷大槩无妻子无家当一有警闻子子一身挈而去尔有万分之害无一分之利尽举革之无不可者但隘长总小甲乡兵之名也因有此名遂有此害御寇诘奸乡兵之实也今日不能爱礼以存羊他日必不能因名而责实查得寇自雩都来者牛柅小护二岭势得百二近岭无人居当金近二十余里内居民充乡兵警报趋守其余皆无险峻间有险峻而旁多岐路守此出彼守之无益再查得寇自宁都来者入兴国十余里村名营前约有四百余家又一路入兴国二十余里村名山寮约有千家除近县十里原不附隘所人村不计余若方山里白石村蓝田东里多村惠化东中下都温陂村蓝田西下都长径口村长信里胡家刘家相近二村恽院团里恽院燕山相近二村六处多者有三四百家少亦近二百家二百家可起兵二百余人通前二岭共十隘先年十八隘附近此十隘者迁之余八隘除革即险为隘则有居高临下之势即村为隘人人各顾身家可无逃避退缩之忧若夫民心不乐为兵则在县官加之意鼓舞之而已盘诘骗财过于常例则在县官加之意禁革之而已鼓舞之严禁之而又非大警报巡检不许巡堡非大警报隘所不许盘诘无故不得查点乡兵无故不得召唤隘长方无事设此名而若无则地方无扰及有事因此名而责实则地方有赖若谓尽可除革因噎废食无其名孰任其事守望相助之俗终无可成之日矣且无乡兵必资缓急不得力之客兵客兵擄掠之害视贼有甚焉卑职未敢以为然也

一均赋役古先圣王九两定民业九职厚民生而其取诸民也又定为九赋之法盖别内外远近多寡轻重使适相均称也查得本县官民粮一万三千二百石有奇自嘉靖三十年至三十五年岁止派征银八千三百两三十九年遂派征银八千九百六十九两四十年派九千九百零二两四十一年派九千七百二十六两四十二年派九千二百零七两即四十年较先年加银一千六百两嘉靖九年布政司颁额刻石民粮每石折银伍钱捌分四十年每石征银柒钱八分五厘四十一年银柒钱六分六厘四十二年七钱二分三厘即四十年较先年加银二钱五分近年役银虽减去瑞金湖陂巡检司弓兵四十名雩都胙袄银七十一两又增代雩都弓箭弦条银六十八两翎毛银一两二钱举人水手银四两六钱黄蜡银五两一钱府柴薪增六名府皂隶增二名增府马丁银四十两增府谷斗级一名银十八两水西驿铺陈一名原六两今十八两廩给库子原六名每名银二十两今增共八名每名四十两先驿馆夫五名每名三两今每名十五两通运所防夫五名先每名三两今每名十二两又新增铺陈库子银十八两

小溪驿水夫二十名九牛驿十五名横浦四十四名南埜二名水西十二名通运所九十八名攸镇十一名今名数如故银数日增卑职自到任至今县民每告称近日赋役日增民多逃窜零都里分虽少田广粮轻里甲富实户户齐足本县犹以人各私已将疑将信及查户口则名虽五十七里实则不及一半嘉靖三十年以前犹四十四里今止三十四里卑职到任后极力招徕今亦止得四十里其间半里一分二三分里分尚多通十排年计之该五百七十人今止有四百三十二人其间有有里长而全无甲首者有有甲首而止存一二户户止一二人者以故去县二十里外行二十里三十里寥寥星居不及十余家问其人又多壮无妻老无子今日之成丁他日之绝户也人丁雕落村里荒凉岭内县分似此盖绝少也夫民庶无减于先年而粮役增焉犹不可也乃今民数减前秋粮徭役则增倍于昔以粮计无一亩田输七八十亩粮有之以丁计一丁供三四丁之差有之满望造册年除豁县中又以失额不理所欣其偏有轻重犹甚奈之何民不穷而盗盗而逃也哉乃知前日之言皆不得其平而鸣疾痛则呼父母穷困则呼天真情率心间有过当之言而非全私已也窃谓君子大心体天下之物举凡天下之人皆不当为分彼此况在一省一府自笃近举远之道论之情尤切也今后当粮役之先伏望批行司府查议清查各县之丁粮虚实各县之人户富贫将各县实征丁粮并原赋役委官磨算要见某县止当尽某县差粮某县差粮当取某县津贴若干又某县当津贴某县若干上下四旁均齐方正君子有洁矩之道而天下之情无不平矣伏乞裁度

一红站马船江西均徭均平尽以一条鞭法行之银止总数役无指名以此小民得止输正数较之他省有一倍再倍三倍十余倍输当者相远便民良法也独红站马船又编正户正名募人自征取夫募人为利而来积年趋利人也少有可投之隙必生倍取之奸先年往往以过往繁多府道院取用借口倍取小民不识官府前后事用百端苦之今任之募人前任之募人也查得吉安南昌等府此役亦用一条鞭法南赣独不然必曰路冲军门住札多兵事也南昌亦有军门巡按三司住札在焉用度料不减于南赣南昌正数可足南赣正数万无不足之事也在南昌足赣州不足是则上之人不能加意裁节而已上之人加意裁节万一事出不可已势在不可裁可增加役银不可编设正户盖增银小民输官有定额标之正户募人得有倚望而垂涎焉任意贪取为害深也马船因有正户正银外有官吏常例兵部差人诸费今红船马船编矣正户有名矣止征银官给禁募人私自征取量加南京路费金人赍解是亦一条鞭法也一条鞭则便民编正户势必为害似当速改

一招抚逃民居官幸值全美县分安之不使逃流不幸适当疲惫去者招之使来将去者抚之使得安集县官第一事也即兴国一月论逃绝户极多问其故则虚粮不能贖重役不能供也而其去无还心则拖欠之粮数未除重役之差银尚在追征如故数年并之还之尤不可也是以招徕为难次则富豪之债轴老帖存焉又其次则先年词讼或被人诬扯或自己细小错悞案牒存焉分数多少不同要皆小民致逃故也卑职到任而来查得五十七里半里并不可为里甚多间行乡落人烟寥寂村里萧条耳闻目击为心恻久矣查追原业本县可得行之债轴磨害本县得与豁之其不得自行者粮役之拖欠词讼之未完也夫虚粮拖欠或非上司得专若夫未完徭银无人可取无次丁可赔其中经收人告是豫代原有指赔秤头今日不得准理先年案牒府为多守巡道次之其间壮者逃老者死存被告无原告存原被无干证完之不能存之徒开吏胥骗局瑞尝谓假称逃绝与除豁则滋刁猾之效尤果逃绝不与除豁则又不能

招徕之新路当细为酌实速为蠲除蠲除酌实本县得请事非本县得专也又今见奉文量田约在五月内可完事荒田无人承丈者颇多窃意无业复业之民可即此给之三年后实有收成依例报税收成稀少则听之亦复逋流抚穷困急务也伏乞裁度

一哨官查得先年原无哨官有之始自嘉靖三十三年冬季三十六年夏季停止四十年冬季复取如故奉文皆云金取家道殷实有武艺之人一人之身二端不可兼得各县止是以殷实之家奉行尔每一金点泣告扳扯累月日不能定若置之充军徒罪然问之则曰一季不止七八十两费用富者变产破家问所费则曰处处常例也本院到任以来减去不止一半矣而未尝无也夫机兵百名原有百长三四十名原有总甲每一队原有队长至团营又有把总诸员统之何事哨官膏粱子弟无武艺堪倡导一季而更与机兵心非亲爱非身之使臂臂使指也于操战无分毫之益各机兵酒食之需各统兵诸员拜见之礼各衙门人役常例之索开一骗局不小也似当裁革

一革冗员有是事然后是官设焉先年增设夫岂无谓也哉然前后之时事不同则前后之官员亦当酌处兴国县先虽五十七里近则户籍空悬民多逋僉半里一二三分里分为多先年设清军县丞一员管粮主簿一员又捕盗主簿一员典史一员无所事四十二年巡按陈考察日卑职曾以捕盗事归典史裁革主簿申详今未示下查得四十一年刑科侯给事奏请裁革四十二年礼科邓给事奏裁革欸开一切人浮事者可兼可并非冲要而设驿递非要害而设巡检者皆可裁革查得兴国无大清军事务主簿一人清军管粮兼之事未繁琐又儒学生员止七十余人教谕一员训导一员似亦冗矣其一员当裁革自贛吉二府论东界宁都东南界雩都西南界贛县西北太和西万安北卢陵东北永豐兴国怡居其中万一诸巢寇发奸细生焉各县盘诘之矣一巡司弓兵三十名巡检官小权轻所济何事况巡检百余年以来住县城不至寨所徒有巡检之名若不生事无一分之事弓兵虚受工食若不生事了无一分诘盗之劳夫有一官则有一官之费若一官不安其分则又有一官需索之扰一官之费分也理也于民不无所妨一官需索之扰时变然也通弊也于民则为大害昔人谓宽一分民受赐一分窃谓捕盗责之典史主簿一员当革清军并之管粮主簿县丞一员当革儒学当革训导一员衣锦巡检司巡检一员回龙巡检司巡检一员非要害均当裁革伏乞裁度

○拟丈田则例

丈田当行事欸

归粮

丈田不可行事欸

严法

丈田非欲人不为欺乎欲人不为欺而使势不得不出于受欺之人之为上人未之思立法不

善非受委之人故自为欺之罪当只田地坐落里中僉人为之凡公正书算弓手须家道殷实素信服于人之公正人揔管丈事公正人尤急若里多有田地则僉二人一正一副二人非谓轮流管事二人共管一事自有宽舒不劳之处二人共当一事之罪又自有担当之美其里有田地少人户则借之邻图邻图谓熟识田地与本图之人无异也弓手用三人绳丈蔑丈竹竿丈弓丈但每日查其步数免其有长短之差而已各听其便算手用今官教成者一里一人亦是田地里之人无则邻图再则城市一里一人庶专门而精

又有公正业主照之可万无失先计不敷则再教之如琼山一百四里须得一百四五十人过数乃可完丈而总于县中算之弊端百出官府不能禁止瑞已先知其必有今日也先期排年会踏一里界至两界之上佰邻里排年定之一挨地方次第用纸一张尽纸如改连赃罚之类通县如一以便日后可钉可阅不有参差粗画一田地山水人村栢榔园之形上书某一大埔某一小埔某一中埔某零碎栢榔园亦如此记田埔栢榔园形详于山水地今丈田所急在田巡道照崖陵等例栢榔入编均徭所急在栢榔也书总土名又书其埔的的别小土名土名人所常呼之名又书即名某某谓人亦间有呼之备书之何盖恐今以一名报他日官府查问人又以他名对或生遗漏之奸兼亦难为查考谓之粗谓无许多画手草草大臬取之人人可能而云虽粗草而大槩皆具其不挨次第先者画之于后后置之先此亦粗草流水鱼鳞少有颠倒即当作弊之罪两界会同邻图里排讲定多钉深入地木椿一面书我界一面书邻图界

又业主亦先自丈已田用小片板为牌须写得册式上条款许多字下方不过四寸五寸业主名黄册户首之名也旁人田四至亦照此牌户首名写牌或油或他隔水之物涂之庶虽日久不溷其字牌以绳牢悬于小椿之上深插田中直至县官覆丈册报完日然后收起不插彼来而此不来事有耽阁来者今日来而明日又复来独受扰矣定界悬牌官示之以一定之日其日不至者治之悬牌而亦定之日谓业主或不及知四至户首之名亦或田之塍畔不明也公正丈田所可依于业主者土名四至而已弓步田形上中下则能保业主今不欺官乎能保今无差谬乎公正人顾我公正之名而思其义不可潦草随业主脚根后反当罪也起丈定日起则一县同起如琼山一百四里正月初一日发弓则一百四里之人尽是正月初壹庶其报完虽田有多寡不同不至相去之远公正业主书算弓手十排年各有司存弊则各当其罪然公正业主系是总管一切他人作弊公正业主罪不能免发弓跳坵跳段非流水鱼鳞是作弊矣

每日听其顺田次第或上而下或左而右田有湾斜象形难定费心详勘者每日多多少少各听其人力量之便每号或一坵或十余坵三则同听为之每号田里通等公论公正人酌之定上中下则又最上者谓之上又最下者谓之下又上又即上上下下又即下下必如此定使上中下则之中又有分别而五且不迭字而混也上中下乃一府一县之上中下非止即此一埔一里而定也丈至有栢榔地方公正等里排眼同查勘数株起税非谓有一万而一万逐株数也数之有法如一丈数有一百株绳至十丈即是一千由此推之则虽千万之多顷刻而数之完矣又须开具老树若干新树若干出地几尺者若干与后开荒田共一册同是一日封报每日天明即到田中起手晚则止八格眼叶数完者众花押封起次早送官一日一封一日一报底册公正等自封收如有查考之故任其自封自开每日打榔之后公正犹至犹不至者公正小纸帖开名同未满格眼几号几号未报之田送官以凭惩治里分出五十里之外别定之日不

然县官起丈十日之后即到中路某里某里覆丈则前十日之远后十日又如四厢之近劳逸亦参相得也然不先有一定之期使人寻问县官所在则亦骚扰起丈定日日到必践其言万不得已如琼山西黎一线牵入而长则定作三日四日县官覆丈之日别行加意无不可者一日一封不许私下开封所报之册县官亲任收取封锁之劳因一而可以致傲于百者正赖初时振肃声也覆丈不必待多报完报有册便可行覆丈初公正各于起弓之处钉椿埋石记识县官只寻号照悬牌不可令原丈人指引以致耽阁其日举丈之事覆丈亦县官亲任其劳不亲而差官代覆亲去而高坐田岸之上令人代至田中皆弊之所为生而害随之矣荒田别为一册恐其乱正册也亦具田形四至以待召耕防有指熟为荒也琼州地大抵地多而额数甚少地无虚粮万分之一亦有里通人等肯为认纳只照黄册额数更是明準茫茫无可下手不可丈有鱼鳞纸幅之图田形四至举目而见可日报之册原有千字文次第四至田形即是鱼鳞流水部题亦止说?册不曾说及幅纸之图无亦可丈田人底册须与报官之册形式如一庶可磨对事后给之纸张官银空言而已矣先给之为便报册用十张则给二十张报册用百张则给二百张底用亦给之纸盖底册即小流水鱼鳞每排年各一收贮之谓中说千文次第盖未丈之先一里领一字号如琼山东厢一领天字二图领地字丈田之日册之第一格眼上书天一第二格眼书天二第三格眼书天三余如之许其十余坵作一号亦可者随人之便官册亦有省减号数之便也

右丈田当行事款

丈田完则造归粮之册矣初丈起每完一号筭手即筭一号积步苗粮书手一一誊之格眼册之上一里丈完之日又总记土名某埔田系是某里某人户田各上中下弓步苗粮若干别用白纸开誊附之格眼纸册之末一县总完之日如琼山县一百四里县官又总一百四里之数合之上中下各为一筭又合之黄册额数之总多有余步分别补之中下之田中下得有增步盖使之可与上等田敌也如周礼不易之地家自亩一易二百亩再易三百亩之谓必过相敌之外然后上田得与中下分有再余步数业主自报已田一如公正开报之式此皆县官覆丈覆筭有明白者未合县额之先顾先定有苗粮之数何此公正业主等人人已知合县额之后即此上加之而已明出告示上中下各步若干缩筭若干苗若干缩步筭该若干粮若干缩苗筭该若干伸筭业主执之自筭已田而明白无疑矣书筭人等虽欲再为先日飞洒之奸亦不可得如此而后为便不如此书筭人朝朝夕夕恐不免乘间为弊也瑞先巡抚应天之日朝廷每有蠲免恩典则州县钱粮又改换仓口其年又通一会计会计属之何人属之平日惯为作弊之人也民间输数年年不同书筭为奸日深一日江浙亦然事与粮得过里百端飞诡无异窃以为天子富有四海灾损几何免则直免之而已弊何从生若得粮不过里亦如粮不过县之例飞诡绝矣黄册之年里书亦无骗钱门路先与相公户乡诸公议定后举疏未及上而归今若得请焉各业主分□各□□粮数日就各里输官如不可得则合□□而筭之输官照是旧日之例丈完粮册虽□□中□造丈田人为先之数县官一查核合总登之册纸之劳而已粮册之造殊非县官难事

右归粮

丈田之事不过如此而已矣有纲有纪本自简易先日人称今得均平之美今谓极苦而怨何古人言执简而御繁大抵天下以简御繁繁者可明以繁御繁治乱丝而棼之之道也县有黄册苗粮之数在焉里通业主何为乎日开日不合式今买田人契上只有苗米总数琼州田与上方经丈之田不同未丈之先必不能得坵坵着有粮数册有有名无名二样日人不及知以此相磨对也不知册多官必不能自为磨对必付之人无名为弊实与有名无异纸旗不可过风雨易混乱一有悬牌足矣纸旗必不可用多差小官覆丈日人多而精不知富户无一不是要出钱求减苗粮之人小官无一人不是要做生端讨钱之事里甲互丈已混乱又有别造鱼鳞图长每有一班人民间又有一班费用奔走之苦若造鱼鳞纸图亦非领旗在岸上并村中造者可能今议定诸琐琐尚有言之不尽者一切不行知有不易简则弊作害生而天下无可丈之田矣

右丈田不可行事款

丈田议之定矣先丈百端作弊其孔穴已开人人知何者何者必县官不及知必县官力查不到之事百计千方今非严刑峻法胡然而天行之必不能有效昔之论治者曰直一诛赏之余而起耳董仲舒谓视亲戚贵属在诸侯远正最甚者忍而诛之如吾燔辽东高庙乃可夫不忍于作弊之人愿于吾民受作弊之害忍之乎一有宽纵怠忽十举而十无成后悔无及

右严法

以上丈田事大槩备矣有未尽者田必覆丈县官盖无一日不在田亩之间也比前间出勘事不同是必米菜随行手下人担水而□其取之民天下无弗与之火而已吏胥随行之多尤当严禁不然今日明日又明日虽不为扰而自无不扰之事矣屯田有杂之民田之中者矣其别自一埔别自一区不必言虽有间错当别为一册民田四至书屯军某人田军田四至书民某人田四至加书军屯民字以为别归粮之日抽出算入屯田军册之上丈田有痴算法如二百四十步为一亩一步是一格眼二百四十步是二百四十个格眼也二十四步为一分二十四步是二十四格眼也书之纸上或以灰炭画地而数其眼即便可见其歪斜其零碎不成一眼则培补算痴算人人能知之则人人皆自算得已田算手不能欺之矣丈田尺尺寸寸不可差错横步直步有别如有田直一百步横步二十直少报一步只少得二十步横少一步则少去一百步矣横步尤宜着意秧地担秧去仍做一熟田者报田止下秧两熟俱不栽禾者报作地写入荒田册上明开秧地绳用棕细破鹅毛管如丝少杂之遇雨遇水方不伸干亦不缩每步为号亦以鹅管丝横织棕黑管丝白间之更有分明弓步着一钉于脚下使转则入地走丈不致那移一熟田反胜二熟有之然上等只当以二熟田为之一熟虽极好然只一年一得而已当自中则起下下又则一熟二熟俱有之公正人等酌定作弊人谓县官不及知必求不及知之所在知之作弊人谓县官力查不到之事必寻力查不到之事查之书算乘间为弊必朝朝夕夕册在我手我虽不亲书亲算亲眼监督县官能此而丈田自无不均之弊矣

右余议前四款不及言者附见于此

○流水鱼鳞图

见图（省略）

？就此小纸写之使人照此如式云尔官中当用大纸如荆川连顺昌等纸一张截而为二各随地方所有之便东西南北如此写县官一坐堂查册南即其面向北即其背后东即其手之左西即其手之右如琼山县一百四里通公册底册皆然县官查对亦便可免不致错乱其余俱要一一如式写不得少有颠倒中有只写户首名者其田系是户首之田也前说上写户首名者谓黄册只有户首之名也今听其写户下人名者恐其兄弟叔侄日后有争兢也

井田不可复矣限田又不可复矣下策之良无过丈田盖丈田则无虚粮虚差小民虽无田而得自生理无先日官中苦恼矣乃今无一处不称丈田之害弊端百出与先年黄册飞诡无异民间出钱奔走无日而息甚之如雷州四竖激变黄旗逃流他方者无数人谓丈田如遭一大兵火良是朝堂美意宁知今日反成毒害乎其一是书生平日不知有此而朝更夕改多为之法致有骚扰其一是贪毒之人借此名目为取钱之计若能先知势必至此南之田北之地一一深求其丈之之故而讲明之着为一定之法必如此而丈如此而丈少不如法黜官治罪议定后行不先之曰听外便宜行事为此通融之语以滋外官生事纷扰之害今日宁复有此乎今日宁复有此乎

○申军门吴尧山并守巡道请改招详文

赣州府兴国县为土豪大户欺骗买木银两返触打抢事缘本县问张魁张豹等事参稽前后情节迟留数日极加详审虑魁豹称是张尚书公子官舍或有后言是以比凡百姓事慎之又慎审之又审情真极无枉申解本府蒙问拟不应罪后张魁复诉分巡道本县犹谓致不心服或有故也加详访每逢人必问所以见得供申无丝毫枉屈是以别具文申军门分守分巡道并赵推官今赵推官却又别为一问今日卑县有不得不言者民冤之甚而合县之人不心服也张尚书书柬无一衙门不重迭投递过往赣州士夫无一不请托为解求未可尽以嘱托公事当之然张尚书居南昌张豹犯事在兴国县张尚书纵有神智焉知千二百里外事魁豹若果张门家人投托权豪正为挟势骗财计也出门而欺常情常事昔人谓狱贵初辞张尚书遥度之言可信本县申文乃无一字可信本县申文无一字可信张魁诉状乃无一点一画招虐本县居官颇久了知衙门宿弊到任以来极留心察访诸人今谓尽无分文嫌于夸诞窃谓万一有之未至于张魁所诉状也且魁豹在县气焰可畏皂隶唤之则不来不唤则又突入登堂辩说原装官舍气象少与犯人作伍肯与人以银乎今日纷纷书柬魁豹先日原有此意也泰山可倚何故剥囊与人本县恶其横而诈魁豹知之供申出本县意也魁豹亦深知之与书手以银解脱何罪种种招情极出亏枉此本县所以同合县人不输服也参稽情事成本部院之误批允者赵推官成赵推官之误问者锺齐朝黄春槐也春槐愚稚子丧胆权贵语言出入不足恠齐朝积禾致富今且托口观望上人出不得已咎赵推官矣巨猾老奸可轻纵乎魁豹得利而去然系南昌人氏非化外之民王法度不相及也上司职重在锄强抑暴本县权微专牧養理幽抑视民冤而不为言知奸发而莫以告上慢残下可以为民父母哉夫士君子行政要

在服人之心不在服人之口今日魁豹叩首谢恩而去矣然其良心发见心口相语未必不别
有说也元规元雍输银服刑矣然母子弟兄与泣冤于家庭隣里亲友与恤冤于巷野未必不
别有议也法可执于庶民不可行于乡宦俗有是说然论道理法度不如是也有官守者不可
与俗同谋同道也本县有不得不言者为此复备由具申

○示谕

谕老人

赣州府兴国县为推选老人事钦奉圣制老人里长听各里之讼于申明亭老人原非轻任近
日府县官奉行不谨不加礼貌遂至身充里老之人亦自轻贱不肯学做好人不公不法刻剥
小民加一老人反生一害本县今日省令各里里长排年地方人推选实是年高有德之人充
当斯任照旧同里长听各里讼本县隆礼相待不敢如前轻视尔等尔等身为老人须慎自爱
惜不可妄取小民一分一厘一升一合公直存心均平处事捧圣谕孝顺父母尊敬长上和睦
乡里教训子孙各安生理毋作非为六事朝夕为尔里内之人劝谕必使遵行凡一里之人谁
善谁恶谁贫谁富谁困苦谁强梁谁户是虐粮虐丁谁户是漏丁飞诡县官远而不能察尔等
近而知之真者一以公心直言为县官告使县官刑赏不差政事恰当是尔等能称斯任也如
或不然是加一老人生一大害也律有明条本县必不尔贷

○延平条议

教约

规士文

申海南道陈双山文

驿传申文

驿传议上策

驿传议中策下策

无策

杂议

教约

延平府南平月儒学教谕海为申明教约事照得当职虽尝有志于圣贤之学而质鲁力薄终未能至于其间环顾其中无可以表率人者但志图补苴一二而例之所得今官也一无以为诸弟子励焉夫何以称用是悚惕强自飭躬求足以为观法地矣外有一得可持以为修进助者取为诸弟子论之本职钦承明命请以严师自处诸弟子今有一日之雅当以从令自画一一遵信而强行之本职籍成以免尸旷之责本职幸矣如其不然亦岂敢以姑息从事轻则威行夏楚重则兼请黜降是亦今日事也为教弛日久诸弟子之不信吾说也先为诸弟子严之

一学问之道朱子所揭于白鹿洞学者五教之目父子有亲君臣有义夫妇有别长幼有序朋友有信为学之序博学之审问之慎思之明辩之笃行之言忠信行笃敬惩忿窒欲迁善改过修身之要正其谊不谋其利明其道不计其功处事之要已所不欲勿施于人行有不得反求诸已接物之要大槩备矣诸生率此而行夫何学之不进第今人虽知圣门之教有在而每援事之无害于义从俗可也自恕则于此不能无戾试举一事如册报类减年岁甚者冒他方籍顶他人名原厥心未始不以通弊自诿也然德之不修机实此在孟子曰学问之道无他求其放心而已矣盖言所知所行无非为存心设法也损年图进此心已陷于不诚不一之地矣更学何事君子之过也如日月之食焉请为改图约诸生五日内一一将年甲籍贯三代脚色从实写报本学请提学道另行更造册籍诸生凡素行类此者亦痛自湔洗勿以恶小而为之庶乎不远而复自此无不慊心之事集义以生浩然之气为贤为圣异日为国家建伟业无难矣一圣门之学在知行德行属行讲学属知慎自修飭者决无不讲之学真实读书者肯弃身于小人之归乎是故知行非有二道也然今称德行文章则当有辩孔子曰过我门而不入我室我不憾焉者其惟乡愿乎居之似忠信行之似廉洁此其为人之槩也今俗则惟此是誉诸弟子宁无若柳子所称一凡人颂之自以为喜而陷于此者耶至吾辈之所谓义气人者又自可笑非傲慢强悍不逊不弟之为则出入衙门把持官长攻讦他人长短逞凶图利之行孟子养浩然之气平日以不见诸侯自守或人申枵之对孔子曰枵也欲焉得刚诸弟子请干此辩之今后凡一应优免诟告等事不由本学申请并先行稟说者纵有司见容本职亦不汝贷

一文也者所以写吾之意也吾平日读书体认道理明白立心行已正大光明吾之神也作为文不过画师之写神者耳孔子涵养至到论语之言莫非中和气象孟子善养浩然之气论七篇者曰泰山岩岩焉盖自所见所养出之莫加亮末于间也孔孟之文天下至文论语七篇后人作文之法也今则舍此不务不求之心而求之讲章墨卷临文则取夙所记忆者改窜首尾影响模范就文求题则题意不可得求人则人品不可知将举而见之行事间所言又无着实地步夫朝廷养士盖欲异日为天下用诸士日逐营营必小有裨补后可乃今一生读书作文于家国身心无毫毛补益谓何哉昔之评诗者曰可惜一生心用在五字上愚于此亦云竟为滥恶之物以欺人非工之良也舍其梧檟而养其贰棘则为贱场师焉请试思之俟本职酌取数篇为式日后仍踵前弊不流之胷中而取之他人者纵极词华亦加朴戒一学以知为先读书所以致知也昔辅汉卿会粹朱子平日教人之法定为六条曰居敬持志曰循序渐进曰熟读精思曰虚心涵咏曰切已体察曰着紧用力兼之前博学审问数事读书之法无越此矣今与诸生约将四书本经通鉴性理分为十二分应月考又自一月中分为二应朔望讲书又分为三应日课诸生自量资力次者减性理再次者减通鉴再次者减经非甚不得已必宿号宿号者两日背书一次复书一次毕讲书用辰时三六九作课用巳午时将作课发落前课

不在号生员去学十里内者朔望赴学背复半月以前书送半月以前课在十里外者月考赴学后一日背复一月书送一月课发落月考在再考次日辰时取便村居生员也发落课亦同考用二十九日凡位次俱是本职编定无得搀越将明唱名平明命题唱名过至者责准考封门后至者从不到考者论作课规矩亦同诸凡程限正欲诸生着紧用力而又不失于骤迫若居敬持志四事则作文背复有可验者就先人之已试而立之法非作无益也诸弟子行之

一体用原无二道明经体也以之商确世务必有道矣第经术槩言其理世务非一一自其事而讲求之有不能中肯綮而尽事情者昔胡安定以经义治事分教苏湖其弟子多适世用今之三场五策正其事也乃今则徒悬括帖以应矣朝有多士而世务无赖者亦奚怪乎诸生如经史稍通堪居仕列者量将边防水利等事每月约讨论一二本职就中命策考试否亦于背复时诂其所以然今之攻议世务举伯者之说也自谓适用而不知其谬多矣昔孟轲以辅世自处谋事齐楚则曰非吾所及至推其极亦不过强善以俟后人一步而已诸生慎之

一孔子曰君子不重则不威学则不固盖内外交相为养尽飭之道莫非进学养心中急事也今后诸生凡遇一应圣寿正旦等事并在学家居见官闲处拱揖拜立皆必如礼其有放纵不检者除在学科责外本职访知亦行重治

一冠婚丧祭之礼废久矣所以久废之故正以无士人为之倡率也盖小民未尝学问知礼义见越礼者之耀俗从而効之无所纷叶于世者则废不举遂致斯礼渐尽今后生员之家值冠婚等事敢不行稟并不依礼而行者痛治之其以父兄托词者尤可恶夫本职拳拳于诸生者冀淑天下人也乃今不能淑一二亲父兄耶诸生异日将为朝廷治平天下也乃今不能小小以礼齐家耶此等人不足与有为可知矣

一古者执贄以相见明有敬也矧弟子之有求于师者可无敬欤然受命以教与此则又不同盖师生分定朝廷为诸弟子求师不待诸弟子将敬而后求教官为朝廷设教不谓诸子不求而不教也诸生参见拜揖外不许更执货物以进凡俗例所云送节酒食饌先生者俱不许举行夫朝廷设有教官将谓为尔诸生益也宁曰剥诸生以肥教官耶伊尹耕于有莘之野而乐尧舜之道一介不以取诸人也一介不以与诸人也诸生欲以道义自处请先以道义处人

一学校类置公堂银两盖于生员之冠婚入学帮补起复等事酌为科敛以充学中费也夫冠婚等事诸生宁无小费乎有力者当而助之义也今反科剥其道何在或又谓无公堂银则诸师费用无自出尤之可也一应上司彩帟于何取之夫上官果贤则诸生以文章为事歌之咏之传之序之又不然而行人口碑之贤者得以光不朽矣而贤而歌颂及焉是诸忍见一路之哭灭是非心矣且今帟文历颂其美私居则痛讪其过匿怨友人孔子耻之本职诚不欲诸生为此不情举动也延平多贤上官然执帟文而归正贾谊所谓墙屋被文绣可痛哭流涕者而诸生独何喜为之今日以革公堂为急帟文次之上人有缘是怪责者责在本职于诸生无与也

一诸生接见上人会典诸书明有礼节今后于明伦堂见官不许行跪学前迎接亦然本学在

郭外接官不许离关门出郊野宪司官至本县一见后不许再同有司行三日揖有犯于各衙门罪人也亦勿得免冠叩头奴颜哀免自贬士气盖不特本职力能为诸生立一赤帜位尊者德必大其遵制尤笃诿之曰一介书生可以生于人可以死于人有不得不舍礼以媚人焉是亦以小人心度君子腹也诸弟子无恐

一凡一应祭祀等事礼生并赍诏书人员俱本职秉公自行编取诸生但有言及者必加重责其因之射利又不必论矣

一乡贤名宦孝子节妇朝廷旌之礼之所以彰先德励后人也有未举者诸生商确举之举之未正者商确请废之知而不言异日将何以直言天下事耶学校公论所自出诸弟子行之

一诸生人众本职稽考不能经久记忆今立大簿二扇一稽德一考学稽德簿记诸生某月某日行某好事某月某日行某不好事责几礼貌得失附焉考学簿记月日背复何书全记并记多忘少责几记忘相半责几记少忘多责几考课之记如之写字敬简附焉岁终执此历历稽验参酌书之三等更为一大赏罚诸生失之前宜补之后不可当顽钝无耻之责有厥初求一于终不可当始勤终怠之责

一诸生住居学左前后右某街某巷第几家城中某街某巷第几家约去学几里某村第几家约去学几里书馆如之师某与某生员同会一一具帖同年籍送学俟本职投之于簿此盖非独以为号课呼唤之节诸生家之所行学之所习亦或缘此有知也

一学吏职在供写文案今后纸笔费用俱系本职区处敢有因帮补等事索取生员一钱并为生员改洗文卷决无轻贷夫上人每每贱吏正为趋利酷也我于人无不爱且敬况尔之有劳于我耶第本职养诸生如父母深闺养处子任尔纳赂生其利心学校地光明洁淨容尔一贱吏私为污秽埋必不然也尔慎思之

一凡所示条约无非欲诸生立有成就父兄爱子弟之道也子弟独无爱父兄之心耶本职无似辄领今官睇目而视昔之教戒我者不在上矣昔之箴规我者不在左右矣识见昏愚心志怠忽是将奚赖孔子于商赐有起予之叹恶声不入于耳于子路致欣幸焉诸生如不以我长而难言匡之翼之予之福也本职离师友得此其感报当如之何以上条约大槩也本职初至学中某善可兴某弊可革尚未尽识容与诸生会议并参酌提学道教条别为更定

规士文

举世衣冠往往通用惟有生员衣冠皇祖特为留意襴衫之制中用玉色比德于玉也外用青边玄素自闲也四面攢阑欲其规言矩行范围于道义之中而不敢过也束以青丝欲其节制谨度收敛于礼法之内而不敢纵也绦總下垂绦者条也心中事事有条理也圆领官服以官望士贵之也惟有头巾制度未定一日皇祖微行见士戴一巾问此何巾曰四方平定巾皇祖曰四方平定必须民安乃将巾前而按一掌作民字样遂为儒巾曰朝廷養士本为安民以作

元服首重之也而今儒巾倒过来看隐然是一民字其两飘带则头角未至峥嵘骞翼未至展布欲其柔顺下垂不敢凌傲之意云嗟夫圣祖之待士如何隆重而望士如何殷切也吾少时乡居见闾阎父老闾闾小民同席聚饮恣其笑谈见一秀才至则敛容息口惟秀才之容止是观惟秀才之言语是听秀才行于市两巷人无不注目视之曰此某斋长也人情之重士如此岂畏其威力哉以为彼读书知礼之人我辈村粗鄙俗为其所咲耳若闾阎其行闾闾其心言不根道义信口开阖身不守礼法任意举动三五相聚则恢谐嘲讪鬬口舌之工一二浪游则淫邪狎昵作苟且之事少年恃其才学藐视师长霸者挺其刁悍挟制有司或小不忍而动大怒轻递呈词或一人事而约众人同行嘱托说正话者则笑为道学吹求其短必灌以狂泉不诡随者则恶为古板厌弃其人不资夫丽泽孟子曰其子弟从之则孝弟忠信管子曰礼义廉耻是谓四维此谓八行即无论士有百行此八行者关系名检不细士日以八行自点检如此语言得无不忠信乎如此举动得无丧廉耻乎夫禾之高出曰秀十中一人曰士士肯好修同学见其人而爱慕居乡熏其德而善良官于内则为朝署仪刑官于外则为缙绅师表此之谓秀出此之谓士人也不枉父母生长此身也不枉朝廷作养此身他日属纆之时将平生履历打筭一回也不含羞于地下也留赞叹于人间百年易过此身不复再生一息尚存此志岂容少懈某平生立志不专向道不笃循省过端千疮百孔自治不暇何能训迪诸士第谬持风纪于诸士有师帅之责不得不以正言相教戒今日士风三事尤当首戒特拈出与诸士谈之余作小秀才时见同学长者竦然恭敬不敢在傍高言大笑不敢在班乱序先行迎骑于长者道傍勒马同席于长者告坐隅迂分付唯唯听从使令踈踈奔走夫礼非以尊人尽吾道耳不循理非以慢人自弃其道耳尊长尚存谦虚卑幼岂宜倨傲况尊长之年轮到我身卑幼如斯果能堪否故夫子责原壤以幼而不孙弟为首过孟子谓尧舜之道只在后长徐行诸生未必皆然有则改之其次公论出于学校近日学校岂无公论之人但有一种浮薄之习以爱憎为毁誉以口舌代戈矛意所不快造作谤言写帖匿名或无水而起风波或因小而张重大或聚谈人家是非或编起同庠绰号此等士风最坏心术不知诸士有此习否有则改之至于结党一节尤干法纪夫朋友之义过失相规未闻同恶相济士平日自爱重人未有先侮士者况天下处处衙门自有重士体面乃借斯文之名倡义气之说或一士见陵于乡党则通学攘臂争告于有司或一士见辱于有司则通学抱冤奔诉于院道不知经史果有此道律令果有此法卧碑敕谕果有此许否乎夫斯世之人未有孤立而无类者一民被刑则百姓聚扰于公庭一卒当诛则三军聚扰于帅府下至于工商吏卒里老无不各有同类无不各重同讎势必至于私党横行纪法尽废此大乱之道也且士之贤者未尝不非笑其同类而朋党既成去者以不去者而薄行甚者以势相要骂相激以利相鼓舞奈之何不强相从乎夫士也诸类中之贤人乃不以道义相先而结党以为诸类倡余甚悲之某身非缙黄家亦士族而惓惓如此者以士君子之行望诸生不欲以姑息儿女之情相煦煦也倘礼法当如此则经史法律备载之矣诸生其绎思哉

申海南道陈双山文

福建延平府南平县儒学为区处兵后地方以绝后患图久安事缘本职会试未第曾具奏蒙兵部奉圣旨行抚按守巡道从公计议后授今职母老在堂便道归省且冀得一至台奏所未尽并不可先言者一一诵之事或可成也时台下往雷州府候清军察院旋琼与本职起日相

值不得已更日求见奈门者拒之咫尺间候二日不得接思凭过期始渡海北上中途每思及此深用怆然今已至任未得言者请为台下言之夫琼州府州县外旋黎岐中处正皇甫规所谓虺蛇入室焉者台下试思天下有此等心腹疾而能一日安者耶无黎则三州十县可宁谧去二三万黎人安五十六万百姓加五七年功成千万年逸台下试思天下有此等用力少获利多事而可舍不为者耶黎溃则三州十县举受祸然以三州十县制为则又千溪万径皆可施功五裂四分柄执在我台下试思天下有此等反掌易事而可曰不可能者耶然自国初至今日竟无一人担当此者何其故有四全无志者不必论大约今人官居类传舍至任未久迁擢竞心影响间见黎岐难处遂终以难视处黎五年七年事也慕荣途之速心蔽迟难之一见先入为主一也询访未的妄信人言谓黎岐地方阔山岭峻林木茂密通之为难妄信人言谓黎人强众出没千百为辈十发十中敌之为难英雄豪杰当先为而不为是则无故二也平素攻举子业未尝留心经略民事区处犹难况兵戈危险不知其易妄意其难思及存亡呼吸心胆丧矣不复为谋三也其有思得其方志立功业者又虑黎平我去后万一事出不虞邀功起衅人将置我何地目前成功后当显祸四也自国初以至今日言者屡矣迄无能取信上人者何其故有三雷同平黎之说懵然不识地利险阻兵行法粮随费致上人以白面书生笑之一也津津然说平黎易究竟所以见其一不见其二说东遗了西中南差了北上人因其二尽疑其一二也志书历载诸人议论然其人亦有可为地步言之不行母乃议事易处事难致上人以纸上空谈视之三也二者皆非矣台下诚能以必为为志于本职奏疏上兵部图说治黎策一道少致意焉且于不可信之三求其必执此说之故于不担当之四深求众不担当之由彼此参互不用其三借三以壮吾胆鄙笑其四借四以深吾谋将见反掌事烱然台下目中矣夫一时之爵孰与千万世功名一世之荣孰与千万年甫食台下欲不为之得耶本职言尽矣然尚疑台下有憚心焉宁非谓提督府不与我以他方兵粮乎夫本职云调广西土兵广东汉达官军量拨一次大征银粮之半此据人皆可行言耳若台下兵备之权则不然盖琼民游荡并无衣食弃为盗贼者甚多练集五六月可成精兵借州县民壮工食权宜区处给其始资黎地米山货木价给其终兵行粮随殊无难事又宁无谓兵事一举存亡呼吸谁则料之乎夫本职云用兵良亦以势不在我或生奸人玩侮歆念大约此举先易后难随机鼓舞止用一抚字自可了事本职思之日久考之日深问之日多事决可成成无后患台下请壮胆行之本职初官遽不得上人意这等世界究竟做成甚事业母老在堂归期指日中有言未尽者俟到台日悉焉奇货可居无越于此台下幸勿犹豫以黎为奇货此细人趋功名之心也一时欲激双山姑用此语

南平县儒学为学校便宜事准本学教谕海瑞关照得卑职嘉靖三十二年十二月二十日到任看得儒学中一应事体有酌之义义当改而行之不可照旧例照旧例害正道者未敢擅便谨条具移关转达伏望俯赐裁度卑学不胜幸甚等因备关准此拟合申禀为此合行备申伏乞详夺施行

一教官生员凡迎送参谒上司官我祖宗相继作有礼节与他衙门员役稍假一二盖寓作士气意也今一切不行日就委靡沿习非一朝一夕亦非一处士之号能通变者固曰事之无害于义从众可也然子羔不径不窦先儒谓夫子最属意焉不幸先夫子而死不见其所成就子路不悦于夫子者最多先儒乃曰吾人当学子路酌义趋时大人君子有定见矣初学生使之

望尘拜跪于作气之道既已失之守未定而辄曰变通随时舍礼从俗今日从之明日又从之从之又从浮沉逐世迄何所底止哉夫今日舍礼以媚人他日必不能守道以正世我国家何取焉窃谓今日教官生员于祖宗礼制当一据守行之过则亢不及则污也

一宪纲教官生员一见后即回学肄业盖以学必专静而后能有成不与有司同礼节所以专其业也本职会试曾道经梅关灼可七八里行则喘促拘挛望者起憚心焉行必求息故上下有息肩亭延平城跨岭衙门据高峻地每一迎谒所历不止一梅关也矧一省必由之路候迎上司或半日尽日而至或二日三日而至一刻参迎伺候常用百刻大槩一月尽有半月奔走夫人精力有限谓不失纷纷礼仪又不失职分公事是亦欺心而已延平险地上人当有怜恤之心因之废公上人当为轻重之辩窃即宪纲推之本道宜逐日伺候他衙门当免抚按当迎送他上司教官生员曾谒见者其时来时去当免分巡道延平府官迎送及朔望之揖不可废其间忽然起突然归些小礼节当免夫以下事上理所当然朝夕于大人君子之门亦严憚求仁之助也而可如此耶因之废公事违祖宗制有不得不然者惟上人谅之若假之以济其宴惰之私则上人自有明法卑职不能避且不敢怨也申提学朱

申文

南平县儒学为议处驿传事蒙本县抄蒙福建按察司分巡武平道僉事吴议处前事牒行本学时集学生计议稽查旧制乃知七县所议不同有故盖自近年不能裁革关文多出牌票官当民当同一疲敝二害难为权量故一偏之见致有异同实非官当便于永沙尤大苗当便于将顺也为今之计只当议裁革不当议官当苗当盖能裁革苗当国初行之而验官当正德年行之而验无利于前不利今日之理不能裁革苗当时无染指之患后无冒破之忧若差胜矣然应付不堪必至逃避逃避误官事必如初年水夫之变水夫不能裁革恐亦必如近年借倩夫保顾募夫保均徭夫保改置纷纷不已也纵就中较量夫保纳银付管厨官吏支应又差为胜然剥削贫难称过使客彼此观效日私日贪譬之马堪百钧?之千钧之重或徒而前或转而后不出夔之一身不能使马前行一也使智囊晁错日夜筹之民不得受一分赐矣裁革事在道院然孟子谓有司莫以告是上慢残下本县父母斯民当以裁革请不必轻重二端为无益议论也且仁爱之心人人有之上司官不与使客裁革为途费计也小民困亡莫为之恤无乃见牛未见羊欤本县正当历叙支应之苦破亡之状于以上闻不可更为若此可利若彼可利之议致上司遂谓得便而行之也又查将乐水夫银三千三百余两属驿只支一千二百三十六两余二千六十四两解支他驿顺昌解支他驿亦一千一百有余今二县乃欲以本县之粮尽编本县之役似非古者轻任并重任分之意皆私意也南平今告困矣益之锱铢民不堪命去将顺贴银只金九千一百九十五石粮充三驿用不特不可行且不能行似不必议驿传之议无过于此合并驿传议一册牒呈本县更参众论施行

驿传议上策

官于延者皆以至难区画惟驿递一事延之疲于驿递有更仆未可尽者谗曰时世至此无奈之何而已窃谓一举可苏一人可定事若反掌人多昧而不察尔何则国初五马三驴之法海

内通行行之于延而民不告病者盖国初人心纯实居官者多不贪已不贪不以贪恕人不自私已不私不以私待使客责下礼貌据典制无今日谒问送迎多方求备所以应付文牌不得已公遣外不妄给往来士夫与法例合者然后驰驿二司官坐司坐道少越职往返上行下效萌折干侵刻之心者若远去焉驿递中自然省事使客过往而民安焉今考国初八闽科第之盛百仅一二官增数员而近日又减去市舶司镇守太监传食人员国初今日略相等也议者不求国初可行之故而日易月改官当民当百端求济谓国初事简法严彼此一时不可执一例论夫谓事繁宁朝廷近多差遣谓灋宽宁朝廷近有改革致支应过多耶只此官员只此事务律令宪典二百年画一奉行谨人自为私是将何咎然奉行非难事也以近事论进与倭奴交刃立有死亡非素负谋勇者不能堪谓之难或可听讼以求民隐情伪有万非心胷清澈者不能照谓之难或可莅政临民事文牒旁午非才艺敏决者不能应谓之难或可文牌应付与不与我一反掌间尔顾曰时势难为孟子谓为长者折枝语人曰我不能为非不能此以难诿矣万一倭奴压境变出不测尚可望为民一御侮耶受人之直而不任人之事亦可怪矣且事可筹划未甚厉民难之不为可也舍此之外更无良灋乃坐视人之困苦哀疲立有死亡而莫之救长人者何心长人者以何为事而若此耶官当民当之法尝有以譬之夫马力百钧负之百钧可也增以千钧欲马之奔趋前进决不可得民当则小户不相津贴泊户勒为多取身亲为之不谙驿事过客欺之而苦为逼勒加之鞭笞假贷鬻产苦难尽谕或告讦纷纭或弃家逃避当事者苦其不行也谓千钧引前马前足不能起转而官当然领银候日迟久得银染指者几逸其半赔贖查盘丧身亡家是千钧引后马稍前进然数步而蹶较之引前之不行一而已又不然不知减马之负而徒转徙不已不出马之一身不能使马前行一也议者又咎用度不足尽由冒破夫天下无不弊之法支应之用既简奸猾之骗必微譬之吾用十两彼冒破其一用至百两彼冒破者十矣况过往纷纭易为奸弊百两冒破不止于十耶故凡百孔千疮莫可救药皆不能节省为之也且今上司官尚有折干越取利者人之所趋声应气求捷于影响贻之以下观之化而欲其不为法上之取其可得乎探本穷源是不当责人而忘自责也宋人谓小民之家方其穷困计其衣食之奉宽然于十金之中及衣食既足心志之欲日以益广是以愈求而愈不足为今之计惟当求之穷困十金之时不当求之嗜欲日广之后是故求复国初之外官当民当虽议事尽其变防弊极其周皆下策也

中策下策

议者或谓上策大不近人情行之丛怨构祸不能一日安乎其位非通论也夫昔有杀一人以媚人不为之者支应之苦有因之投溪因之自缢破家亡产比比皆然今及子孙哀怨之谈嗷嗷未绝媚人不止杀一人矣而独忍之宁无仁心者耶安位与否已非君子所宜较量矧执此之故未至此乎请以中下策论举其可行者证之愚曾道经江西驿传道谭次川裁革事闻之颇悉应付多寡因职级卑崇关文数多从革损非公牌票一切涂抹不付驿上官显宦不能如愿有愤弃关行者时以过刻归之矣谤者之口不能胜誉者之舌今升广西大参彼下谭数等而行者自谓厚交矣罢黜不显亦多有之一切借关有节减无涂抹无能尽复国初之旧然百钧之马百钧外增数钧尚可竭力前步虽无舒适亦无丧亡故曰中策然论裁革时第一人也谭能行之江右今不可施之闽中岂通论乎前院赵玉泉府县无送迎谒问士夫驰驿无今日滥与滥行也时夫保贴用多五六两少三四两迄今称便夫便于徭户必不便于过往不能无

少逆矣谤者之口不能胜誉者之舌今再勅浙江彼下赵数等而行者自谓厚交矣罢黜不显亦多有之水夫外犹须贴用非专意节减也百钧之马百钧负尚增数百目前勉强终必疲亡故曰下策然居今之世难乎其继也谤赵之口不能胜誉赵之舌矣况中如次川上如国初法将誉之者天下有同然焉谓不能一日安乎其位岂通论乎大抵今人不能克己私贪成习故以已度人因之妄动得失之念殊不知人心之天万古一日虽牴牾于旦昼汨乱于习俗一有触焉终必发见发见则盛大流行继之试以已论下程酒筵接踵驿递必曰财不已费厚自纳交矣清夜独无剥削细民动心不忍者乎又无曰以此媚人非动必如正者乎人以裁革加我或不能无慢我之愤然清夜独无曰以正自律不为谄谀者乎我有此念人有此念可知苏式有云所谓从众者不从众多之口从其所同然之心裁革应付盖众多之口举不悦其心之所同然者同然之心固在谓裁革不可通行也可乎哉长人者幸执而行之毋杀人媚人人不可媚徒自愚也

无策

下策类于无策无足取矣舍上策中策无可行之理者延固穷困之家不当妄为百金之奉金钧之马不堪千钧之任也近日十室九空聚为盗贼见其端矣谓立有死亡岂虚语哉二端无利无不利不可行均也必欲较量于二端之中则亦有别夫官当只以水夫之银为之官当胜矣今既征水夫又编夫保遂致名与官当无异所费实则倍之盖其征有水夫银在官矣立之夫保事有所诿矣官吏遂认官银为已物月不如数支給驿中事务指为夫保分内事不登循环供应尽以?之夫保债主谓有此官银也取息必如应官时不得已所书之质使客谓有此官银也廩粮夫马百计折干俗谓财不露白今露白矣孰能保群盗不仗戈夺之夫在彼在此只此支应假使苗当不征水夫银之在民不得全数敷用乎虽有贴户不供之病然贴户正户同体小民善者可以理谕取悍者得以法惧收比之奸强染指嚙不得出一语不同又或谕之不可惧之不得然民财赋自出之地财在民间譬之邻有富室今不吾与他日或可求贷举乡人而贫窶焉左无可哀右无可丐将不散之四方转之沟壑耶及至察院查盘又云冒破夫水夫有余何故立之夫保正谓计粮征银增至一石再至二石三石此不可以论于国法也阴以赔贖寄之赔贖破家复罹酷法是群盗不特夺之且杀之矣若苗当得以全财为用虽多赔贖了无后灾苗当无官当之害矣然苗当虽便于民不便于官不可久行昔曾苗当而变夫岂无故盖时如出巡朝会关文垒至一二日间费计百两小民无从出银逃避支应逃避悞官事是以有水夫之变官当则当此急迫之时得以并据上下月银为一时支吾之计官当不便于民然出水夫银一人夫保又一人徂公赋茅朝四暮三民不觉也苗当至悞官事官当民至破亡而事不上闻官得供应苗当势必变而为官当苗当不必言矣请以官当议之夫征水夫谓官当矣均徭又金夫保不已之取无名之费夫保当之大约官银用以一夫保已银常以十可以谓之官当耶窃谓水夫可增夫保不必设今议欲少纾夫保工食一两征十六两付厨夫供应夫君子议事必为久行计为奸贪防水夫合七县苗通派均役也抚按二司通知其为几钱几分也若夫保金于均徭虽以粮多者为之有夫保不金他差然他差用一分夫保百倍尤沙永大又以去驿远只金数名有不均矣不均必偏累且驿递供应论人之巧拙遭之繁简一两工食用至十余两二十两三十两不可预定上人所知工食之数纵知赔贖未知已甚若此也因有夫保染指官银历历非一日矣夫保之银又征在官夫正价一两付照票必一两上人纵知未

必如票必不曰十六两也且他日应付不敷将官自赔贖耶自十六两之上召原纳者增至五两增至十两势必有之应付有余必无扣还原纳之事征银在官徒为贪人橐囊计矣且水夫有数今年余用来年可减如某年收三钱几分某年减二钱几分是已夫保银不登数将何以为筭而减之水夫计粮通征减则人人蒙惠夫保偏累之役值减征所减又非偏累之人非不均乎且所谓徒资贪人弊有甚者上策不可明?壬矣万一有举行其中举行其下者出焉节损多寡恐亦无召夫保而还之事也何也驿用数目小民不知其为几何夫保纳银上人不知其为几何也簿籍不明易生欺弊于此有贪人焉财在民间且千百计图之酷罚峻刑略无恻隐银征在官固囊中物也何所忌而不取之耶此则议法未尽之弊非法久而后弊生也为今之计当除夫保增征水夫四钱不足增五钱伍钱不足增六钱每值不足以渐增益盖水夫有报官实数势不能以奸骗不佞夫保将欲骗之倚何人以勾当公用耶较量于无策之中增水夫银为胜矣且正粮一石银伍钱旧额水夫几与正粮敌矣外复加益大桀小桀国法盖未尝有是也昭布册籍宁无心恻而思以济之下如赵中如谭又上而如国初法行之者乎爱礼存羊几或有在议者又欲以驿事尽付厨夫愚又以为不可夫夫保初佥亦云供应之劳而已厨夫均徭之一也安知数月后不变而为夫保之赔贖异日查盘又不至以夫保当冒破罪耶前院驿官日给银二钱五分吏日给银五分正以满其私念免蚕食也今官吏取银如数只奔走送迎驿事别有长管别有蚕食失初意矣窃意驿官以供应为职银宜付之驿官出纳支销任彼透用上司责其支应不责其送迎彼以供应为职则有盈缩之权异乡穷官俸仅三石非若徭佥夫保人得借口侵刻贪者无如之何矣况驰驿折干国有明律驿官持印得以申之府司司之抚按又非若夫保厨夫付之无可奈何而已增水夫后其间事有可论者盖如此然非可行之道百钧之马使负千钧之重终亦必亡而已故曰无策

杂议

夫清驿传几由正已事在裁革固矣然驿为利孔因成弊穴其间事端丛互不逐件讲明而祛除欲裁革尽善难矣除杂见四策中者不必论余未备者条具诸后行者酌焉

一裁革就察院论察院多坐省城裁革必待挂号历数驿而至院者为害不已多乎欲裁革必先遍颁则例夫马廩粮本省某等样官用若干乡土夫某等样官用若干差遣人员某等样者若干携家眷者若干无者若干参酌详明毋使遗漏驿官使客少越则例必当之罚执之坚若金石行之信若四时则下属奉行得有依据他省来客不得执伊原文矣夫是之谓善

一则例既定然夫马廩粮过客不能尽同不同何以稽之凡发轫驿逋先给夫单过者亲填用数仍用见扛发夫之例则例数只许其减不许其增站短行忙有不用中火者用否亦亲填注如是则使客不意驿人我骗必欲折干驿人不幸过客可欺妄登虚数夫是之谓善或又谓今上司官不可以此肘掣夫官有崇卑则奉有隆杀如或不得已多用自募人充之亦制于法不得不然也此盖不特可以免挟带之弊而敛黥货之心者亦由之矣

一支应有定数驿官必无过与矣然上司既发火牌逋驿必须办候候日迟久宁无夫马中火费耶宜行各该上司凡发火牌必须自酌行期明书某日某时到某驿某逋运所于上各驿逋

依期办候其不能预定日时者按临后昔办悞至驿人先候并原有定时驿人先为谄媚者必各罪之此若无大破费然一人悞用其一十人悞用则为十积之不已有至千百者允况驿用毫厘莫非小民膏血毫厘有不可轻耶驿禁折干此良法也然常见听差舍余有强步行者问之乃知彼役于官家用无所从出折干步行不得已之故也行促折口粮别图饮食时亦有之窃谓支应既有定价彼虽折干亦其本分非越取也然至上司府县官则又当以法从事盖前院定有三二钱之数非为折干计也亦以体尊者奉宜厚有能撙节减一分民受一分赐矣乃因之以为利丧廉耻节长贪墨风矣阔略于承差舍余网密于上司府县夫是之谓善

一禁文牌不得二纸并行应付良法也然其间有不得不行之故以延平论如武平道差一人至省或解册解卷用夫宜多或他上司寓此顺差此人至兴泉只有公干用夫宜少全用其少者则夫不足扛全用其多者则至省毕事而兴泉又不可行盖文牌宜先起处应付无从中应付之例又逋运应扛夫驿应轿夫旧例也然小轿夫亦逋运支应曾见察院委官公务驿关有随带吏书给口粮脚力之文夫脚力小轿宜付逋运今付之驿彼有逋运应扛关宁无执驿关支之驿又并逋运取之耶纵彼不取驿人宁无执脚力文登虚数耶人扛一船可载者亦时有两关并行折干其一之弊此皆给关不明之咎未可尽罪之行关之人也宜凡给文牌明书某牌夫若干至某驿止某牌执至某驿方起夫若干前牌夫单即以后牌续填于上明书顺差之故陆行夫若干舟行夫若干驿舟可以足扛者明书舟行逋运不得再给一切可以生弊之故一一详之关文必如是而后议法详明防弊周密可以尽裁革之善矣

海忠介公全集卷之十

卷之十一

四书义

御制祭葬文一

◆四书义◆

生财有大道生之者众食之者寡为之者疾用之者舒则财恒足

富与贵是人之所欲也章

先进于礼乐章

子路问政子曰先之劳之请益曰无倦

子贡问政子曰足食足兵民信之矣章

有安社稷臣者正己而物正者也

乐天者保天下

巧言令色足恭章

学问之道无他求其放心而已矣

无违樊迟御子告之无违

○生财有大道生之者众食之者寡为之者疾用之者舒则财恒足矣

圣王之治利天下国之利裕如矣夫利天下言民也利国之道于利民得之言利者可以外求为哉传大学者之意盖谓君子以一人治平天下有天下必有为天下用用之不可以已也有天下而讳言利不可能也必先有以生其财于先然后得其财而用之于后力财在民酌量在君生之有大道焉圣王之治遍天下而井里之矣于以爵禄夫天下也于井里之中为养焉官不必备其为养则寡井里之政又尝遍天下而程督之矣于以应天下之务也于疾作之农取给焉量入为出其取给则缓损益盈缩权诚悬焉凡以为天下之人利之而已然天下无不耕之人则天下皆十一之税寡食舒用行乎其间以十一入者况又未尝以十一出之者乎以比利民道尽天下亦以此利君道尽国家岁入用三通三十年存十极之虽意外之灾频仍之患百千万年我取其陈济于是矣天下无强惟休国家因民之休也无强惟用此之谓天地自然

之利有道之长无越于此舍此言利天下有利而能无出于民者乎竭其源而欲流之长焉拙于谋利者也足民之外更无理财之方国治而天下平不易之道也收有土有财之功免亡身殖货之祸圣贤不计利害义理之周自得于利害之尽后世田不耕授事有借口民自为生为疾君相一无与矣乃纵欲不恤其民锱铢茧丝则出于上明于大学之道诚意正心所自来也曾有之子国之不亡幸也日甚一日日见天下奉一人不一日见一人养天下吁天下何取于蒙于大学之道曰君曰相也哉

○富与贵是人之所欲也章

物交不失其定君子之得养于素为之也夫仁人心而万应之所自也君子素养为定抑何物之有累哉夫子揭之盖谓天下物有在物之道人有在人之仁吾尝会是观之知应物之能无随于物者不偶然矣夫人有不欲富贵者乎无恶于贫且贱者乎乃君子特与人异欲不必于富贵有不处之者恶不必于贫贱有不去之者信于义命之真不信于人心之妄君子抑何以得此哉得之此心之仁苟使君子自失其仁实丧而名浮矣何以永君子之誉哉然仁养之为盛全于养然后能全于仁是养也功在未事之先功不分于有事之际仁不息心亦不可息夫岂一朝一夕曰作曰辍袭为之也哉观之君子之素危微省克事心之始事也君子不一息废于其始尊奉优涵事心之终事也君子不一息怠于其终以此而终食时之近而有忽心无有也以此而造次而颠沛时之危而有震心无有也况其近不至于终食况其变不至于造次于颠沛境有变迁仁无出入我素为定又何富贵贫贱一时事能引之而去也哉夫人无会于本原徒其身外应是无惑乎理欲交战之为心而卒趋富贵矣然则君子反于动中求其仁坎心性在人无内外之判君子于仁亦无为动静之分静无下手功力于动有存而夜气平旦自惺惺法矣去有妄复无妄功始于动验成于静夫子以终食颠沛言仁非遗静也静存动察外与物应之谓动即此动无失吾退藏于密之真即之谓养之静夫亦岂曰空虚寂灭之中而又自为一存存之法耶动而养静之先事也寂而存静之后事也一静也天地间动静无始君子之养如环无端横渠欲去外诱以为定明道谓索照而反其鉴学者不能体验于物我应感之时徒探讨于息缘断念之际吁惑矣

○先进于礼乐章

圣人述时人之论谓已不同于所趋焉夫礼乐有初也时论失之远矣夫子肯苟焉与之趋耶其言曰厥初圣王治天下则有礼乐矣礼乐何始乎人心之自然为之天下周旋于和敬之中得以复反于性情之正周监二代不能无戾于古然文胜之中质有存焉流至今日人心礼乐离而去之道无是也方且自以为得曰君子则然武成初曰曰是则郊野之人而已无闻知不见文物之美守区区不能今日之为盛习染之深倡和之妄吾兹有感于今日之世矣如有用我我举礼乐为天下用人心世道吾将借周初推古始于庶几礼乐之中求礼缘情立乐由心生情文之会优为之?渐之使心后进之于礼乐并与其本亡之吾无与也记曰虞夏之道寡怨于民殷周之道不胜其弊夫子岂不欲大道之行中和成化身朝夕见之哉化行以渐之心为□不倍之义时也而亦莫非道也转移消息之机绥来动和之妙夫子有成筭矣后世不知郁郁之文意有所指仪文制度一取武成之故为之夫君子创业垂统为可继也乃传代三百十

四王遂有先野人后君子反其祖始之说正以其惟文之重天下见文不见质贻之为不善尔鲁论之赞尧曰焕乎其有文章茅茨土阶先虞而君者尧也必如是而后可以言文特非焕郁之文则同本之有无有出于二言之表而言之者乎知焕郁之文不可同知夫子从先进之说矣

○子路问政子曰先之劳之请益曰无倦

圣人尽贤者为政之问躬行之外无他说也夫教养惟政以身率之而政无遗用矣外此宁复有他说哉子路行行刚强视天下无不可为者为政之问将尽政事而日见之政有本原在身不在政未之知也夫子告之曰君子之政于天下也以兴行望天下然兴行在民感发其性真模范于德义机在君子望天下而求之身无有焉不可为也一人为天下教当以一身为天下先君子之政于天下也以力穡责天下然力穡在民率作其初心鼓舞于不倦机在君子责天下而听其所自为焉不可为也一身为天下养当以一身为天下劝夫曰先之六行之时书六刑之不率举之矣夫曰劳之九职之转移夫里之布粟举之矣于此非尚有遗说也道本诸身而子路喜于有为求之政谓政正天下取之身不足也有求益之请焉转移化导之机身心感通之妙勇者莫为悟也夫子抑将何以加之答之曰先劳尽天下之道矣子尚有疑于先之劳之之说乎夫人有先劳之功不见先劳之效是则吾有倦心而已先之而倦非先也劳之而倦非劳也子诚于是亦惟始于是终于是所以先之也所以劳之也此心也无一日不在于民于此而先于此而劳斯举也无一为不出于心有至诚惻怛之真不见隐显久暂之为间则先之劳之分充足无余天下之道蔽于是矣我无不尽之心民无感心之应政无作辍之累治无化成之功无之也先之劳之外尚复有可以益子者哉夫先劳言身也无倦言心也说者谓勇者喜于有为不能持久夫子以是言之以救其失诚是也然圣人之言上下兼尽根极要领政事之大端节目举不外焉伊川谓认得为已何所不至若不属已自与已不相干与此正相发吁一体万物而尚有至于倦乎饥之仕也为已不知少有此意否苏子谓学医者人费未试之学而骤出之于政不可也为已而至于费人有意于费人也视医之限于不明有间也吁子路之喜于有为为人也不为夫子所喜后之费人利己喜于有为夫子视之如之何

○子贡问政子曰足食足兵民信之矣章

圣人之政举其周不能周则存其大也夫足兵食以成其信政无不周矣至去食惟存其大圣人之道可以常可以变矣如有用我执此以往夫子意也子贡问政有感答之曰惟天降衷人得之以成其生曰信彝伦日用之常信行焉国家理乱所由系也子知为政之道乎正此而已外此井里足其食井里之政寓军令足其兵无非为信道计也上有保爱之勤下有固结之应君子为政兵食信缺其一不可矣夫子言政不言时道与世移子贡疑焉曰去于斯三何先夫子答之曰时则有难矣通在君子因吾食信之民退守其可别为之计一道也食与信则不可去过此以往未之言也子贡又曰天下之至不可尽者时也万一兵食之存于先者今又不可得也如之何通之夫子曰去食去食必入于死非计无从出而死之也人有生之气有生之理气不死信不待生得已兵食生存其气不得已去兵食死存其理外此而弃国负君生不如死君子爱民之政无取于是也处常以兵食存信处变去兵食不失信于民伙往不为信道计

道之变而未常不常盖如此孟子谓浩然之气塞于天地之间正此有生之信直养无害合而助之也无食存信死一时之身而不能死其千万年之气死一国生天下死一人生千万人后世不知此义爱一身一人一国之死乱臣贼子接踵于世乱亡相寻无惑也张巡许远至今闻者莫不兴起得全江淮以济中兴可以死视之乎朝闻道夕死可矣圣贤原论道理不论死生卒之得道而死死之未始不为生也后世谓死义可以责君子不可以望民庶暗于夫子信民之义害道而祸人国矣

○有安社稷臣者正已而物正者也

人臣品类贤者大槩有三焉夫辅君治而达之天下则臣而已三人贤矣各一道也大人斯其準乎孟子之意盖谓君子之仕于天下也必有利于天下然人品不同事功由异不可强也予尝以是览今古观天下事君人不足言矣有安社稷臣者仕不为身家谋心存王室出不为利禄计志在立功业自先君迄今日天地与立焉而其心快于是矣事专报主勋在一人所及有限也等而上之有天民焉均是人也以天民称天以万物一体之理付之我以万物一体之理自负君举天下惟吾所欲为我举天下荅满吾所赋予气志既从覆天下矣一官一秩于人必有所济所济几何耶彼无愿于是也取必于人焉得人人济之大人有大焉人以大名天下一人而已浑融天理无私不足言也尽道其间圣人立人极矣英华神采动之乎气机功化威灵自修于廊庙君无非心民有耻格余事也已为天下用不以天下为天下期有臣如是极于是矣悦在社稷知有人君达行天下知有天下大人无是也至诚之德洽人心文明之化光天下回视二人可得而同之也哉有仕于此取法于此舍大人无可为矣孟子抗礼王侯平治自任天民其人也物正之说无乃学圣未至无宁一节自居耶乃所愿则学孔子也孟子意也虽然身家在念名利熏心即世俗论富贵利达窠穴焉而人域于其中矣身在窠穴则心不在国家头出头没存焉者寡举明主于三代尧舜君尧舜民尚可言哉初之不审无一而可安社稷且无望焉愚于是有感

○乐天者保天下

无所为而为其容德乃大矣夫仁之为大何为而为之也哉谓天下有遗于其心之外吾无信也孟子言之盖谓天下有纯乎无以议为未可曰尽道其间者以小事大有之矣曾何礼法之可守仁者为之道不安于尊卑大小之常机自融于至诚惻怛之际吾固曰乐天之心也然是乐天也满腔子惻隐矣恢恢乎天地之为大也太和元气流于四时物何所不包人何所不化虽中天下定四海未身亲之天下之人精神心术会于是矣今日存神之功他日过化之迹曰小补之也哉乐天言仁者之心也保天下言仁者心之量也然汤卒有葛伯之师文王卒有昆夷之役畴昔之乐何在交隣有道一怒而安天下之民转之于恤矣天者理而已矣其大无外春生秋肃无非教也易曰汤武革命顺乎天而应乎人君子不可以执于一论

○巧言令色足恭章

衰世昧心之事圣人之所深恶也夫出门而交是虽言色之小心为之也昧其心而为之宁不

为君子之所恶也哉夫子之意盖谓三代直道而行有其事事如其心吾尝以是望天下而今不能无慨于此矣以其一二言之人不能不与世为酬酢言色恭行焉情之不可已本自有当然之则也乃巧好为言容悦为色周旋举止悉邪为之夫岂独无人心者哉以为不如是不足以取容于人为有迎合之私忍自怀其心情之正羞恶之良丧于是矣左丘明耻之丘亦耻之有面目天下有公好恶焉世道之衰此其一也夫人不能离人于独朋友之伦行焉道之不可已非可声音笑貌为之也乃皆有憎恶面为交好若初未尝有怨者夫岂独无人心者哉以为不如是不足以纳交于人在小人则穿窬之盗也自谓得计羞恶之良丧于是矣左丘明耻之丘亦耻之情疏貌亲天下有公好恶焉世道之衰此又其一也天下臣负其君子悖其父其所由来者渐也是怵起于一念不直之微迄至乱亡相寻之地人心世道交际之小而国之理乱系之春秋好谀悦色非此难免夫子不得已以巧令之可耻作之正以生理本直之真借之为沦肌浹髓转移之自也昔人谓今讲来讲去又只讲得一伯术特非上之为教人情世态有相激焉言教之直而又不免使之日入于罔是以下有甚焉者乎真想在襟尘念自息今虽不必如汉阴人羞子贡而不为夫桔槔不为之矣尚有巧令足匿为之鰓也乎纯白备而道载之不可不讲也大人者不失其赤子之心而直道行于下矣诗云鸢飞戾天鱼跃于渊请以是足夫子作人之意

○学问之道无他求其放心而已矣

不免从事于外凡以致养乎吾内也夫心之为大也已则失之矣能无求之于外乎学问人心合一之道孟子揭以告人盖谓讽咏于诗书典故事物惟其所在而考求之谓之学仪式刑今之君子日与周旋不知则质之疑则辨之谓之间古先圣人以二端教天下天下后世听之人间世一学问也学问言外也夫曰求之于外而已乎盖天之生此人也赋之仁德具于心既生之后蔽于物欲形而后有亦或拘于气禀心放而仁非已有矣古之经典先王精神心术在焉事事物物天地间又莫非仁之呈露也既放之心危微精一考之于此而可见今之君子精神心术比方古人天地间事事物物我先觉也既放之心操存舍亡求之于此而可明讲习讨论之功切磋琢磨之益君子尽其在我而已夫岂有他哉学也者学吾之心也先圣人得心所同然于古是以有古之学学非外也问也者问吾之心也贤人君子得心所同然于今是以有今之问问非外也学问之功为求放心而设然则厥初天与靡不有终生而知之安而行之曰圣人也无事于学乎曰下焉者就学复其初上焉者涵泳从容得养于正圣人之学与人不同圣人不废学也放其心而不求怠于仁者也维彼视学问为辞章视为爵禄阶级甚至假之以快其遂私纵欲之心扇之以炽其伤善败类之焰失圣人问学之意矣道问学之功为尊德性而设与此同义朱子乃谓能如是则气质清明义理昭著自能寻向上去此以之解他书一道也以之什此是即非存心无以致知而存心者又不可以不致知之误林次崖谓朱子平生所得在是所失在是见非于陆子静亦在是吁学者有会于是陆子谓乱道之书满屋吾无与也任自读书无差步矣朱陆之辨焕如矣

○无违樊迟御子告之无违

求臣节于子道之中圣人复有望于门人焉夫臣节系国家子之能孝而节无不尽矣大夫无

悟得不复之门人也哉且昊天罔极天下孰非报德父母之怀无所逃于天地之间君臣则有不可过差之分分所不可而曰吾用吾情非孝矣三家念亲不免陵君一旦其孟问孝夫子止无违一言答之言孝亦言分子于父母曰匡救曰成美尽是矣微引其端不竟其说正欲懿子闻耳入心不能以自己也而思家庭平日发悔悟之良心其不能思无违谓无违于父母之令耶抑无违于义理之大耶亦必中难而有问二说横中而天机之明有自矣志继无能于懿子夫子能以自己哉樊子在御之日备自一时之荅问述之师弟子敦学商求则然言无出于二言之外意尚先日含蓄之中也无得于懿子抑何以复之樊须盖须及门讲业日不出夫子德义之外目击时事大抵必同夫子德义之心言在人子意望三子臣节之明荅酬懿子切心我鲁霜?之渐卒之家庭伯仲不闻改辄之为生事葬祭徒是空言之托夫子如之何哉如之何哉虽然夫子之道也大有必后世仁之规模有绥来动和之妙用夫子之得邦家而三家夫子礼法中人矣可以过化存神可以同流上下还至而立有效仅于归郛讙龟阴之田其小得之诗曰匪兕匪虎率彼旷野予于是为夫子感三家之不可一言悟也夫子仅以无违二字荅之何学记之书开而弗达则思之义也开则人有不能不思之端弗达则人不能自己致思之实不能不思君子之善于使思毆之也昔之评文有曰文有涵蓄又或曰言有尽意无穷作文之法亦是如也

◆御制祭葬文一◆

荣哀录

御制维万历十六年十一月初二日皇帝遣广东布政司分守海北兼管海南道左参政徐应奎谕祭南京都察院右都御史赠太子少保谥忠介海瑞曰惟尔高标绝俗直道褫身视斯叱由已饥寒耻厥辟不为尧舜矢孤忠而叩阙抗言争日月之光出百死以登朝揽轡励澄清之志迨起家于再废乃浹岁而三迁岩石具瞻卓尔旧京之望素丝无染褒然先进之风综铨务而议主惩贪领法台而政先厘弊若金在冶虽百炼之愈坚俟河之清奈九泉之莫及特颁祭葬爰贲始终不昧尔灵尚其歆服维万历十六年十一月初五日皇帝遣广东布政司分守海北兼管海南道左参政徐应奎谕葬南京都察院右都御史赠太子少保谥忠介海瑞曰尔介节清风老而弥厉直声正气歿且犹生迨兹归窆之期益軫遗簪之痛载颁谕祭特示眷思惟尔明灵歆兹渥典

祭文

维万历十五年岁次丁亥十二月乙卯朔越祭日辛巳太子少保吏部尚书杨巍太子少保礼部尚书沈鲤户部尚书宋纁兵部尚书王一鹗協理京营戎政兵部尚书傅希塾刑部尚书李世达工部尚书石星都察院左都御史吴时来掌詹事府太子宾客礼部左侍郎兼侍读学士王弘海太子宾客吏部左侍郎兼侍读学士教习庶吉士朱賡吏部右侍郎赵焕户部左侍郎温纯总督仓场左侍郎胡执礼右侍郎孙丕扬礼部左侍郎兼侍读学士于慎行右侍郎兼侍读学士徐显卿兵部左侍郎杨俊民右侍郎萧大亨刑部左侍郎陈瓚工部左侍郎曾同亨右侍郎李辅通政使掌司事工部右侍郎张孟男都察院左副都御史魏时亮左佥都御史詹仰

庇大理寺卿孙鑑左通政赵世卿右通政黄尧念左参议田蕙右参议李观光陈大科大理寺左少卿李尚思右少卿许子良左寺丞李栋右寺丞吴定谨以牲帛之仪致祭于明故资善大夫南京都察院右都御史赠太子少保谥忠介刚峯海老先生之灵曰惟公廉贞之气鍾于南方挺生哲人直毅以月嘉靖末年以敢谏着威触雷霆分甘刀锯圜扉长系正志从容先皇嗣服首拔狱中廷尉纳言中丞出抚剪右锄贪士民歌舞居无几何增口孔多若火于水世情则那龙蟠虎伏十七八载光不终舍恭荷宸采起佐铨务进总宪章帝曰遗直镇我南方曰予有吏职墮于贿惟汝片王以戢魑魅曰予有民俗以侈移惟汝束帛以挽浇漓公介益坚千仞壁立侧耳生风豺狼屏息部都荼毒莫如火夫痛行裁革民用以苏一心精白报我轩尧庶几百辟是式是标方公乞骸先后七疏皇揆慰留民望所聚天胡不憖一梦逍遥讵来自南天子辍朝乙酉之冬丘公观化公胡为者相邀泉下畴如二公旅室萧条灵旆千里孰临孰招居者持奠行者心恻官居鼎鼐赆资群恤公节良苦公行实端公事已定公名已完以葬以祭增秩予谥朝士争请皇恩示异余辈谊则寮友景行如何生不可即寄此挽歌尚飨

维万历十五年岁次丁亥十月两辰朔越二十二日丁丑南京都察院右副都御史王用汲经历司经历江沛然司务厅司务蔡如川照磨所照磨潘元度南京河南等道监察御史方万山党杰李一阳田一麟潘维岳黄正色王藩臣谨以刚鬣柔毛清酌庶馐之仪致祭于明故资善大夫南京都察院右都御史刚峯海老先生之灵曰呜呼惟公挺生琼海万夫之特鸣铎南平长揖郡伯眼空一世天植孤操两宰剧邑抚字心劳不侮鰥寡力抗疆御人醉我醒爰腾清誉声闻上驰粉署攸司日划宿蠹峻却羨余惟时多艰职竞斯力气夺朱云群工动色忠言逆耳身罹狴犴圣主宽恩何怨何叹肃皇晏驾乃忆比干曰旌骨鲠中使赐环游历卿寺超秩朱轮三吴秉越■〈豸契〉獬销魂直道难容人言繼起不容何病抽簪故里天启睿圣图惟旧臣海滨应诏风采犹新总宪留台执法不忒无纵诡随纪纲南国黔首归仁当宁切倚屡疏未愈一夕乃死呜呼以公之俭何啻公孙躬被大布麤粝是飧以公之操何啻伊尹严视一介千金不陨寿宜天保为国具瞻夺我黄耆胡然而然都市惊心缙绅失望讵闻廊庙南顾悼丧呜呼谁云无后而传不朽譬彼钟山霄壤司久贤愚好丑朝菌冥灵人为公惜乃公则瞑汲等生乎公后夙仰高风共事一堂觐德惟躬肃肃其仪岩岩徽立允矣君子是矜是式倏尔长逝百计莫留忆公慷慨虹飞云浮敬奠一觴聊申私鄙公灵不昧陟降庭止尚飨

维万历十五年岁次丁亥十月丙辰朔越二十六日辛巳侍生南京刑部尚书今改礼部姜宝刑部右侍郎杆江都察院右副都御史王用汲大理寺寺丞周希旦谨以牲醴香帛庶馐之仪致祭于明故资善大夫南京都察院右都御史刚峯海老先生之灵曰呜呼世有一身而系四裔之望一言而垂千载之休者是唯振古之英杰奚止斯世之拔尤先生以珠厓之产海南之胄而挺立乎流俗何异沙砾之琳球方其令淳安与民同疾苦而不为身谋也威不能怵势不能加虽以鄢中丞之骄汰而视之若狂风之摧鹜浊浪之浮沤迨夫郎司徒职钱谷母论守秩秉操翹然与诸曹异即其上封事犯颜批鳞慨然轻茅焦之鼎鑊而甘夏侯之幽囚盖自靖以献天子致身以效明庭南冠而縶若将终身夷犹也而霆砰电射又奚足为公忧既而穆庙当璧谓羔羊之节足以坐镇雅俗而疾风之草足以兴起懦柔出诸囹圄置之清要奉玺书而抚南陬也庶几慰苍生之素望而展匡济之宏猷制下之日豪强敛手菜佣嬉游令式一颁非特部内凜然相戒欲成其美凡驾四牡而歌皇华者亦莫不撤声乐而减从驺不知者以为毛举

猾务或矫枉过正而知之者以为国奢示俭屹然砥柱乎中流虽不合而去遵海而处欣然耕钓是娱而朝野斗仰愈久而愈绸越数载而赐之环即扁舟就道由留京少宰而掌御史台者殆已历乎二秋为国家肃宪纪杜私交动止罔失尺寸虽同患难之故人不少借而裁力役革冗费惓惓欲风百僚以?藁而鲜闾阎之穷愁两载间乞骸之疏七上力请生还故土不忘乎首丘顾宸衷之眷念忍老成去国而温谕屡下方殷切而慰留忽一疾之长夜怅白云之悠、身骑箕尾兮还列宿气作山河兮巩皇州盖古之遗直而名垂不朽亦天之笃生而为国贻庥年踰杖国不为不寿志在泽民不为不酬人生至此亦复何求虽一旦易簀上自荐绅大夫士以及田畯佣贩竖子之流莫不咨嗟惋泣怵然欲挽公之驾而不可得而公已含笑于僊游宝等撰芜词以寄恻采江苹以为羞盖为国家惜台星之既折而非特为侪辈贯索之丧俦呜呼哀哉尚飨

维万历十五年岁次丁亥孟冬丙辰朔越二十八日癸未侍生南京兵部尚书参赞机务阴武卿吏部尚书袁洪愈户部尚书王友贤礼部尚书姜宝吏部侍郎何源户部总督粮储侍郎方弘静刑部侍郎李江提督操江副都御史王用汲太常寺卿沈玄华应天府府尹石应岳光禄寺卿杜友兰国子监祭酒赵用贤太常少卿王世懋鸿胪寺卿王鉴应天府府丞许孚远通政司参议沈节甫大理寺寺丞周希旦翰林院掌院事左谕德刁孔教光禄寺少卿王执礼国子监司业孟麟礼科给事中朱维藩兵科给事中杜縻刑科给事中徐桓谨以牲帛庶羞之仪致奠于明故资善大夫南京都察院右都御史刚峯海老先生之灵曰呜呼琼海周环朱明南甸灵秀中开笃生俊彦奋迹贤科筮仕黉泽长揖上官抗颜师席旅膺民社两绾县符恫瘝赤子若饥得哺劳心抚字玉洁冰清时当世庙入侍承明含香粉署折槛彤庭危言正谏宠辱不惊天威震怒如雷如霆累紱南冠酷对狱吏身犯龙鳞亲履虎尾日月回光弗湛斧钺穆皇睿圣时维显庸置之卿寺夙夜在公有虔东钺开府江左甲帐辕门威命是荷奸蠹肃清权豪气挫直道忤时孤忠自许未竟风猷中道齟齬惟圣达聪搜访老成海隅日出咨女中丞两朝遗直一代忠贞其亟起用以協輿情公拜稽首犬马余龄伛偻再出勉慰苍生云龙既逢九五利见擢贰铨衡爰掌台宪赤芾葱珩清霜紫电公孙布被晏子狐裘身先朴俭力挽颓流悬车告老七疏乞休皇心柄用温旨慰留如何遘疾一卧不瘳呜呼公之秉节素?羔羊岁寒松栢皎日秋霜公之半仪野鹤昂藏明珠南海翡翠越裳年垂耄耄后嗣不昌或云报德天爽其常呜呼禄位名寿公俱克全千秋不朽含咲九原卿等陪京旧侣接羽鹄池雍门增感蒿里兴悲念今追息能不凄其呜呼辘辘丧车白马素旗山川悠远道路逶迟魂归故里公也知之苹蘩共荐聊以永思尚飨

维万历十五年岁次丁亥十一月丙戌朔越初三日戊子旧治下晚生南京吏部尚书袁洪愈礼部尚书姜宝国子监祭酒赵用贤鸿胪寺卿王鉴太常寺少卿王世懋光禄寺少卿王执礼户科给事中吴之鹏浙江道御史李一阳河南道御史江有源山东道御史黄正色户部福建司郎中路云龙刑部湖广司郎中汤聘尹广西司郎中王键兵部武库司主事王致中刑部浙江司主事沈瓚光禄寺主簿朱胤徐国子监典籍吴聘鸿胪寺鸣赞曹鲤序班李承命应天府儒学训导华复元谨以刚鬣柔毛香帛之仪致祭于明故南京都察院右都御史刚翁旧公祖海老先生之灵曰呜呼士植高世之节而勋猷显赫一世者岂无自哉殆由徽降星毓刚大之气得于天者已定故随所设施辄无不行而不为流俗所挠夺也公崛起南海之滨鸣铎黉校

弦歌花封胥以精诚运用至以郎署上章指斥乘輿搜剔城社忠犯人主之怒奸邪破胆海内莫不震动虽蛮夷亦且闻风而畏矣当其时公且不自有其身也而何囹圄之足忧迨皇帝离明一照闵其忠而用之俾秉钺南服摧抑势要子惠元元母论豪右敛手而贤士大夫在部内者相戒欲成其美至于定编法轻徭役迄今利之又浚吴淞易菹??汝而膏泽愈广赈贷惠流离之民而措之衽席口碑彰彰在人磨也今上以留都根本重地起公于海畔而任之以台宪慨然矜雕瘵之民裁革冗费非所谓国奢示俭矣乎留都屹然倚以为重而遐方嘉赖之其内秉铨揆为群辟表率盖公之精诚其得稟于造物者独完而其设诚致行盖直贯始终顺逆幽显而一致是以睹蹇谔而黜座格心师清操而百僚励节想风采而万世兴起即上拟古人犹或难之詎非三代而下称安社稷臣者此其仅覩哉呜呼公今已矣公精诚在天地事业在朝廷声名在宇内公论在人心而愈等忝为苍赤尤不能忘情也谨陈辞致奠聊慰公于幽寂呜呼尚飨

维万历十五年岁次在丁亥十一月丙戌朔越祭日丁亥南京吏部右侍郎何源文选清吏司郎中李学诗主事钱士完考功清吏司郎中朱廷益主事周应治验封清吏司郎中王秉正稽勋清吏司郎中陈文衡司务厅司务程淡谨以牲帛庶馐之仪致奠于明故南京都察院右都御史刚峯海老先生之灵曰惟公正气清标命代挺生劲骨坚凝有若朱绳珪璋懿度三朝为祜邇惟肃皇赫赫圣武公批其鳞倾肝沥腑折檻丹陛碎首青蒲忠恳类焚懃直愈黯朝右目拭薄海颈延鬱为时栋伫济巨川中丞峻秩爰抚内甸铜墨奉约魑魅形潜凤辉远览鹏翮息抟帝曰咨哉百辟具瞻纁帛交贲蒲轮自南综铨九流管辖三台闕澄秽剔凜着风裁华嵩表峻虚席上台胡天不吊曾不勅?心遗纓弁頽范皇德奚毗呜呼我公进不谋便退不求名其大者抗万乘而无恟目其小者严一介而不违心行足以风百世而不苟沿袭于俗志欲以济四海而不遑周其一身盖烱乎方寸潇然四壁若与人俱往矣而姤节在青史完名在宇宙谁谓我公之遽沦源等夙奉光仪元龟是凭徽音不作孰为典刑敬奠椒浆有涕如零公神洋洋来格来歆尚飨

维万历十五年岁次丁亥十一月丙戌朔日钦差提督学校巡按直隶监察御史通家晚生詹事讲谨以刚鬣柔毛庶羞清酌香帛之仪致祭于明故资政大夫南京都察院右都御史刚翁海老先生之灵曰呜呼天地有正气而常锤结为伟人盖代不数有而挺然于今者独惟有公之一身当肃皇之末年储位之虚久矣孰敢触忌以上陈公独抗疏而批鳞其濒死者屡矣而气则浩然其益伸迨穆皇之嗣统也首被眷顾之殷勲时东南之凋敝也遂迪公以抚循奉简命而南来惟民瘼之诹询锄强剔蠹而阡陌危者以救宁鞭赋定役则为不世之永利而疏无穷之深仁出万死以抗敢言之节而凜凜秋霜殫千虑以敷惠民之政而盎盎阳春至于一介不取一私不可干者在自是为疏节而在清世为绝伦及赋成于归去若终身于海滨乃皇情之注念肆?任乎旧人思陪都之重任藉以坐镇而澄清始晋贰于天曹而宿弊之尽厘既总司乎风纪而宪度之肃贞一切饬奸而蘓困者尽画一而维新权豪有所弹压而疲瘵恃以安存是公一身之出处诚有关于世道之重轻讲采风而入都也闻公有引年之思岂虞其游帝乡而来白云生民无禄乃人之云亡而忽奄然于靖寐或亦鲜天弔而厌嚣尘盖天地之正气终以还之天地不可留也而其耿耿不磨者则恒昭日月而并乾坤呜呼明兴二百■〈㐁 冀〉以来若公宁几人哉而不与众俱沦此讲所由不泫然于叹逝而徒寄仰之慨于云云也敬致斗

酒之酌而侑以斯文尚飨

维万历十于年岁次十月丙辰朔越二十二日丁丑侍生南京前军都督府诚意伯刘世延谨以豕醴庶羞之奠致祭于资善大夫南京都察院右都御史刚翁海老先生之灵曰锺灵秀于琼崖蕴刚大之正气言率直而行方秉道德之纯粹初职教于遂昌罔屈膝于天使隆师范以正俗激志节而靡坠再为令于淳安若牛刀之小试独节用而爱人缓催科以抚字蜚清誉于枫宸寻汇征于近地效骨鲠以致身辟邪说而弗忌甘鼎镬其如饴奚敕?韭粉之为意追清猷而有光视孝肃而无愧际上下之泰交历中外而底勩均赋役为条编革积弊而兴利藉忠亮之元老总宪台之重寄洞表衷以皆真合始终而一致繫社稷所倚毗忽彭竖之为祟意一疾而缠绵止七旬之有四呜呼天乎公□□□□□□□濯与造化而同游岂习恠而变幻固功德之兼修延久幸亲炙尤荷绸缪每谭经世之略恒先天下之忧胡上升之太速不苍生乎勉留痛公之深摧五内而易已思公之切或一梦而可求尽朝野而为念溢涕泪于长流呜呼哀哉尚飨

维万历十五年岁次丁亥十月丙辰朔三十日乙酉侍生钦差南京守备掌南京中军都督府事魏国公徐邦瑞協同守备掌南京后军都督府事应城伯孙文栋提督操江兼管巡江掌南京右军都督府事崇信伯费甲金南京左军都督府掌府事定西侯蒋建元南京前军都督府掌府事定远侯邓世栋南京中军都督府安远侯柳震南京前军都督府诚意伯刘世延南京左军都督府管府事署都督僉事侯之胄南京右军都督府管府事署都督僉事任大同南京前军都督府管府事署都督僉事李栋南京锦衣卫掌卫事署都指挥使梅应魁谨以刚鬣柔毛清酌庶羞之奠致祭于资善大夫南京都察院右都御史刚峯海老先生之灵曰呜呼天生公以治世兮公承天而时行饮沆瀣之至洁兮濯沧浪之至清挺劲节而特立兮尊师范于泮黉别利器于盘错兮理剧邑而化成拔荐剡而汇征兮司粉署而有声不枉尺而直寻兮抗直道以峥嵘断车鞅而不少逊兮振朝阳之凤鸣知有犯而无隐兮甘鼎镬以就烹斯社稷之倚重兮与日月而争明荷圣恩之浩荡兮宥残喘而更生再赐环而剔历兮不以贵而自荣积弊划而兴利兮民安堵而乐耕抑豪右而众忌兮谢鞅掌而东征岂琼崖之久淹兮注宿望于皇情思老成之在野兮下纶綍以蒲迎佐冢乡以飭治兮总台宪于留京建无前之伟烈兮彰有象之太平方济川之攸赖兮握王铉以调羹乃时侵于二竖兮遂日迫于三彭胡苍生之不禄兮惊梁栋之遽倾邦瑞等安所仰而矜式兮咸悼丧乎典刑临凄风而腸结兮对停云而泪盈共陈辞以致奠兮庶来格于微诚呜呼哀哉尚飨

维万历十五年岁次丁亥十一月丙戌朔二日应天府儒学教授王都训导曹育贤杨元龙希简华复元项陞张朝立生员李汝奇金殿等谨具香楮之仪致祭于资善大夫南京都察院右都御史刚翁海老先生之灵曰维皇穹之翊运卜圣祚之恒延发奇祥于海岳锺间气于琼巔清风凜秋霜而并肃劲节贯烈日而争妍希仁接轡长孺比肩当肃皇之末季值储位之久悬爰抗疏以批鳞历九死其不迁海宇嘉其忠直冲外颂其敢言迨穆皇之嗣统首注念而特宣时江南之凋敝厉秉宪以安全康辑乎岛寇甫息厚恤乎疮痍民艰吴越沾恩泽过于裴公之抚蔡租庸画一功加于赵代之均田奈直节当忤廊庙而芳躅休致林泉然老臣之声愈隆故今上之眷注益专寻起贰天曹而群工祇慎既晋掌宪台而百僚具瞻权豪有所弹压神京因

之肃然位既高列六卿衣无华而食无鲜恩独宠渥九重室如罄而囊倒悬魏相诤方其大节毛玠未拟其清躅施設未倾乎素抱说言尚纪之清编以三朝所自树虽百代其独传胡彼苍之弗慙而典刑之遽湮都人悲痛途旅愤悵茕茕孤衬千里南旋风云凄其灵輶日月惨于中天岭猿??口悲而踟躅江乌长泪而呜咽都等悵仪刑于既远感化泽之独偏薄言走奠具述微虔庶诚意仰孚于冲漠冀忠魂降格于幽玄尚飨

维万历十七年二月十五日钦差总督两广军务兼理粮饷带管盐法兼巡抚广东地方兵部右侍郎兼都察院右佥都御史侍生刘繼文谨以刚鬣柔毛香帛之仪致祭于明故南京都察院右都御史贈太子少保谥忠介刚翁海老先生之墓曰呜呼古称天下奇男子者公非所谓其人哉天下皆男子而或洪涇依违如脂如韦逐波而流随风而靡则男子而妇人也若公者其挺琼山之崑崙毓珠海之洪浩刚大塞乎天地鸿庞挽乎世道屹砥柱于中流回狂澜于既倒而褒然擅天下之奇者乎公巍科奋迹振铎南平长揖郡伯气节棱棱庠序而奇于教也及宰淳安再移兴国家仆负薪惟民禔福邑宰而奇于政也繼司粉署批鳞抗疏斥指乘輿雷霆震怒鼎鑊如饴繫囚靡顾斯郎曹之奇节哉洊登卿寺拥麾江左浚淞溥泽锄强植懦■〈豸契〉獠魂消豺狼气挫斯抚镇之奇标哉萋菲交侵徜徉泉石特起铨卿风猷赫奕裁革浮华讴歌四溢奇勋岿于八座矣爰总宪台纪纲振飭冰蘖自持布被粝食杜绝私交仪刑百辟奇采表于三台矣呜呼公真天下奇男子哉不知而诋公者或谓沽直要誉矫情戾俗而公固率之天性盟之幽独不自觉其奇也知而惜公者或谓四壁萧然一嗣不足而公固以天下为家万世为续乃益见其奇也兹焉贈谥葬祭皇揆鉴其忠尸祝俎豆赤庶铭其德勋业镌之鼎彝而声名垂之史册则公之彪奇蜚异者永永霄壤无极矣于公复何憾耶繼文西江筮仕北觀联鑣业已心奇之嗣是仰公作用愈出愈奇今观风兹土欲瞻依而不可得谨述公之所为奇者临风寄谏共为天下悲尚飨

维万历十六年岁次戊子三月甲申朔越六日己丑钦差刑部云南清吏司署员外郎事主事朱天应谨以香帛牲醴庶羞之仪致祭于南京都察院右都御史海老先生老大人之灵曰公真天下奇男子哉抗疏世宗批逆鳞言今昔不敢言九死不回公岂直捐生以博名哉既而开制整颓风振纲常惩贪剔蠹公岂博美官而已哉归老无绿野堂再起励金石操岂欲修前人未有业补前生未了事公之所为时人异之骇者骇忌者忌而节益贤公真天下奇男子哉其尤则冰壶与秋月腑自总角而宦成一辙生乎后者匪公之匹孰识公之心哉公为天造朝廷之福而天胡不颐公之身公为国正万■〈衤冀〉之统而天胡不永公之传天将厚我公以亿万载为寿以百世忠臣义士为子天应■承天命钦恤兹土慨泰山之既颓嗟典刑之日远望南告奠公其哉尚飨

维万历十六年岁次戊子三月甲申朔巡按广东监察御史蔡梦说谨以香帛之仪致祭于明故南京都察院右都御史忠介海老先生之灵曰于惟先生沧海储精忠荃贯日节介凌?初宰百里循良蜚英泊陟云署谔谔显名肃庙在宥丹葵向倾抗章逆耳几触轰霆庄皇践极下诏特征翱翔天府朝署增荣出镇南甸治化蒸蒸屯高未究绿野遽营于昭今上柄用老成佐衡总宪风肃度贞引年封疏屡见陈情圣心益眷悬车未能喁喁苍赤思见太平云胡一疾骑箕而腾呜呼士风日靡群趋冥冥先生于世砥柱中擎何不百岁儒立廉兴俾朝失鉴俾士失型

比于忠赤卒殒商京长孺戇直不久汉廷孰与先生遭际盛明没有荣施赉及泉莹梦说凤慕芳躅窃愿御膺幸兹接部密迹门庭高山在望大木已倾临风一恸束刍告诚尚飨

维万历十六年岁次戊子正月乙酉朔越十日甲午广东布按都三司左布政蔡汝贤按察使林乔相参政邹学校应存卓徐汝阳副使徐应奎王泮易可久王民顺龚一清参议吴显卢一麟僉事郭子直许国瓚署都指挥僉事邵曾和耿宗泗耿大烈谨以刚鬣柔毛庶羞之仪致祭于明故资善大夫南京都察院右都御史刚翁海老先生之灵曰惟先生之挺起兮锺正气于两仪擅高世之卓识兮负山岳之英姿批骊龙之逆鳞兮濒九死而不移倘奸雄之可诛兮甘鼎镬其若饴紧精诚其贯日兮亦天地之所助也值国是之既定兮正君子之道长也方庄皇之当阳兮而先生之向用也镇名藩而开府兮保厘万里屏豪右其寒心兮疮痍俱起辍疆圉之勤劳兮入持风纪歌朱鹭而避绛驺兮行行且止年未逮而请告兮时哉屈伸怀东山而悬车兮海曲投簪际明主之嗣德兮图任旧人起先生于田间兮昌言觐闻既总宪于陪京兮封事时陈为百僚之表率兮正是国人屡乞骸而勉留兮简注方廔胡昊天之不憖兮夺此直臣汝贤等恭承嘉命兮炎州分职景行謇谥兮每怀矜式期永寿之无害兮长卫社稷嗟哲人之既萎兮讵来何亟埋玉树于片壤兮有恨如何顾身骑尾兮气作山河想高风之后后兮千古不磨酌枌浆而遥酌兮敬束生刍庶英灵之不昧兮听此楚些尚飨

维万历十五年岁次丁亥十二月二十八日钦差巡抚南赣汀漳等处地方提督军务都察院石僉都御史旧治生秦耀谨以牲醴香帛之仪致祭于明故南京都察院右都御史刚峯公祖海老先生之灵曰呜呼惟公苍峦砥柱海为梁棱棱劲气琅琅刚肠赍育却步焊镬遁芒毋宁破觚毋宁毁方长揖豸冠师儒道光庖刀百里抗贵剪疆华省晋陟引颈勒章万死一生爰录嗣皇留都县纛鲜组岩廊天启喆后蒲轮载张行不俟驾快睹明昌帝眷耆英洵命焜煌总宪栢台浴日扶桑群吏兢?九烈寒霜谔谔封条数彻帝旁勉奉温纶易箴宦场唯帝曰嗟锡典旁洋颶风輿衬水国梯航传业匪嗣典刑在邦永世匪躯万古流芳名归竹帛神返穹苍一杯明水歆我大荒尚飨

维万历十六年岁次戊子二月乙卯朔越十七日庚午广东布按二司参政晚生应存卓副使晚生易可久谨以牲帛庶醴致奠于明故资善大夫南京都察院右都御史刚峯海老先生大人之灵曰呜呼惟公夙秉正气挺生海邦浩然天地气节文章始事先朝鸿渐羽仪中外扬厉风教力持治平一疏鬼神所泣先帝知人能容公直大渐遗诏竟用公言反否为泰转坤旋干被命廷尉繼陟银台平反出纳治用康哉侃侃中丞出抚畿服为国为民仁覃义尽剔蠹除奸夬夬顽壮赤舄南归苍生失望圣明嗣服遗逸大征公膺召命海内颺颺倚重留都授公少宰持衡秉轴守正不改再总南台苞桑有系忠荃扬眉奸雄屏气金瓯方注乞休屡陈恳留至再勉慰赤心胡不憖遗金陵星陨完名全节大块神民失怙恃世之龟蓍朝野潜涕九夷歔歔卓等滥缘持节来镇公乡讵传万里惊怖彷徨首丘旅衬电逐星飘摇摇湖海挺挺云霄嗟公之生望系四海嗟公之死名垂百代廉顽立懦接踵伯夷陈词奠系我长思尚飨

维万历十六年岁次戊子十一月初五日钦差整饬海南兵巡提学道副使孙秉阳谨以刚鬣柔毛庶羞之仪致祭于明故南京都察院右都御史刚峯海老先生之墓曰惟我先生锺南溟

之秀丽萃臻海之精英緬惟其挺生也夙稟奇资卓涵巨志究极百家之旨趣驰神邹鲁之奥归识者觐公王韞山珠藏泽辉媚自尔殊矣繼也鹿鸣秋宴名荐乡书初试师儒守正歟高不屈两寄百里慈仁徧树棠阴迨入郎曹忠精益着以故直声布闻帝心简在不数岁而起擢匪次佐廷尉而平反之功奏矣位中丞而绥定之业昭矣晋秩六卿秉枢铨部注厝壮国威而风裁肃下僚矣何扬历中外之烈炳灼于三朝之若此也总之不越先生刚方之气劲直之操辄试而辄辉且媚莫之掩鬪焉者此其说在璫山称高而祈之为峯嶂层叠也在溟海称深而引之为流派千万也顷者先生总宪内台再疏引退而帝眷弥笃时赐温旨勉留之方将需先生以鼎铉之业而先生则观九原而长逝矣是岂臻之秀有时而秘川之精有时而涸耶抑先生厌世之溷浊耶秉阳钦承简命分镇而南式先生之庐拜先生之墓追先生之芳名丕绩时切耿负而躬遭竟无其缘其如可悲何敬仿束刍聊伸薄奠夫亦以展吾仰止之思而泻吾瞻邇之情也已尚飨

维万历十六年岁次戊子正月乙酉朔越初二日丙戌旧属晚生韶州府同知新升南京礼部祠祭清吏司郎中张东旸谨以牲醴香帛庶羞之仪致祭于明故南京都察院掌院事右都御史刚峯海老先生之灵曰呜呼古称直臣代不数人在汉则为汲长孺在宋则为包希仁越公崛起追古人而作寺于今公起璫海之南尝教南平令淳安即毅然以师道自任且以一强项令而仰抗乎上官比稍迁户曹职非言路顾独愤权奸之窃柄请上方而诛之咸黜公朝阳之凤亦危公婴逆鳞而捋虎须竟犯颜而下吏甘九死而捐躯赖圣恩之汪濊脱狴犴而驰驱乃跻显位出镇南邦矢志愈坚直声益壮天下想其风采神明相其寿康爰兹再出实简宸衷晋义冢宰百官是统擢中执法百僚震竦盖微独有顾太康慑伏弹压之实抑亦有秦襄毅糾劾姜紘之风今公荣名考终盖棺论定议者谓公有杨忠愍之直諫而天全其生有王忠肃之无欲而心纯乎正余则求之古人谓与汲长孺包希仁亘千古而齐名呜呼公归九泉神为列星衬归璫岛名重汗青旸兹一奠特述公大节之炳炳者如此将窃附于知言之列不敢猥随俗而悲鸣呜呼尚飨

维万历十六年岁次戊子春正月乙酉朔越十日甲午广州府通判陈儒林柱邦推官鲁点塩课提举司提举朱世昌南海县知县?克允谨以刚鬣柔毛庶羞之仪致祭于明故南京都察院右都御史刚翁海老先生之灵曰嗟乎先生凝乎琼海之秀凜乎天地之刚浩然独立名振朝堂天植鲠性困而弥彰始而振铎确守宪度士焉服其直方繼而宰邑所至廉介民焉尸祝不忘入主民部批逆鳞触忌讳举天下所不敢言者先生独言之而凜乎丹凤之鸣高冈出抚吴地开崧河抑强御举天下所不能为者先生独为之而挺乎翠栢之傲清霜蕪松谢事林泉徜徉室如悬磬图史坐忘被召总宪南都激扬条陈诸务指摘枿房盖先生主之以无欲行之以自强子輿氏所谓富贵不能淫贫贱不能移威武不能屈者庶几乎其足当儒等备员斯土素仰休光宜阶台鼎以副赞相胡为一疾遽尔云亡盖棺论定千载流芳悲哉旅衬过此五羊青刍一奠祈鉴于觴尚飨

维万历十六年岁在戊子二月甲寅朔越十三日丙寅琼州府知府周希贤同知董志毅通判左懋贞推官黄履初谨以香帛牲醴之仪致祭于明故资善大夫南京都察院右都御史刚翁海老先生之灵曰呜呼有苍山之秀出兮或风雨之可亏有灵木之挺翠兮或霜雪之可摧惟

公夙秉刚气百折不回以文章起特科之选以节义振风气之衰造士而斯道立于南剑牧民而清操彻于九閤主户曹而切玄修之谏抚畿甸而斥巨孽之非此其以身许国固期言无不合也激烈为朝阳之鸣凤慷慨为向日之倾葵言尽批鳞之荇忠犯垂斧之威幸圣明之仁厚委蠶露之身归虽退居于林下然而致主之心犹惓惓其未改也及乎再出而上贰天卿总持台宪一疏而诸费尽省再疏而力刺群匪百僚待命以凛凛万姓鼓腹而嬉嬉胡为乎朝野之纲纪方肃而营中之星宿遽微复遗言旅衬之速返毋滥冒君恩之宠绥呜呼若公者真可谓始终一节而死生不违者也贤等夙闻风采慕若蓍龟兹牧公卿私淑是资覩丹旌之遥至怅空帟之凄凄乃择人为公貽燕翼之嗣将立产垂裕后之基盖虽为天下者不自顾亦安可使祖考血食之无依今公已矣英风在兹廉顽立懦百世可师临棺一恸盖为国家失柱石下为苍生失怙恃而匪以哭吾私也呜呼哀哉尚飨

维万历十六年岁次戊子十一月初五日署琼山县印定安县知月黎可耘谨以刚鬣柔毛庶羞之奠致祭于明故南京都察院右都御史刚峯海老先生之墓曰呜呼公其真伟人哉砥行植节立名仗义司直道于寰宇负正气于穹壤荣问彻华夷而罔间休声与日月而争光方其署学事而独持宪纲陟邑宰而不尚趋承识者已卜其伟度之非常载事先皇遭时不遇率至于批逆鳞而不顾曾何逊乎鸣凤朝阳迨其督粮漕疏河道便民裕国惠德在人犹不可忘肆我今上念公之精诚嘉公之夙望将常倚以大用暂托重于南堂清操益励公正不回为朝家之柱石为廊庙之栋梁节费足民捐俸助仓苟有利于社稷则身家乎奚遑谓宜掇揆端辅明圣不日跻斯世于虞唐胡为乎天不憖遗哲人乃尔云亡若可憾乎谋远而日还实已谅其效短而忠长侈荣光于葬祭赐谥荫以表扬嗟皇恩之浩荡??堂凉荡而肩当公真伟人哉呜呼粤山秋兮海水茫乘白云兮归帝乡公虽逝兮名不忘入公里兮亟景行瞻遗仪兮竟彷徨聊一奠兮其来尝尚飨

海忠介公全集卷之十一

卷之十二

御制祭葬文二

挽诗

行状

赞

传

附三进士申救疏

◆御制祭葬文二◆

维万历十五年岁次丁亥十二月乙卯朔越十一日乙丑之辰年家乡侍眷晚门下生詹事府掌府事太子宾客礼部左侍郎兼翰林院侍读学士王弘海翰林院修撰杨起元翰林院编修舒弘志翰林院庶吉士萧云举林承芳吏部稽勋司郎中黎邦琰户部广西司郎中周裔先户部湖广司员外陈履户部福建司主事黄守谦户部贵州司主事洪敷诰户部司务蒋行可礼部主客司郎中吕兴周兵部武库司主事梁云龙工部虞衡司主事陈志颐都察院经历姚光虞试中书舍人袁学贞行人司行人许子伟国子监博士邓修贤国子监助教王显先鸿胪寺序班冯师孔锦衣卫指挥陶复谨以香帛之仪寄奠于

明故南京都察院右都御史赠太子少保谥忠介刚峯翁海老先生之灵曰呜呼三才参赞谁何可当赖此浩然至大至刚上匡君德下济群氓危时仗节平世建明非高非深赤子本心习非瘠欲竟为浮沉上帝愍世降此伟人举世望之山岳嵌岑肃皇御极伟人在职慷慨叩阍孤忠鯁直不恤其身批鳞之逆万死一生不回其德逮事庄皇亦以直方抚定南国遏恶摧强惠此羣黎民以康既乃罢归萧然奚囊今上求旧起自岩薮旧几千里曰善之首?服大寮清蠹濯垢凡百有位视此黄耇闻命若惊不驾而行一麾始至万姓欢并贰铨总宪丰采棱棱群工咸畏是则是程寒暑三周屡疏乞休惟帝乃德懋哉其留天不憖遗遽即于幽我皇震悼朝列怀忧繫公人杰刚而不折匪为名高性之为烈槩以中庸或云未協廉顽立懦伯夷之节孰于公焉匪必其全或三或六可以为贤致君泽民终罔后艰以之淑身身其罔愆乃若公者可谓绝德匪身匪家心如铁石奸邪摧心魑魅屏息如斧之严如绳之直匪世之人海徽之神世福扰扰不足为陈不朽者名岂必于身瞻仰昊天上为星辰海忝公后学景行惟恪忽闻讣音涕泪零落人之云亡山川惨薄思暮如何勉企先觉呜呼尚飨

维万历十五年岁次丁亥孟冬丙辰朔越廿二日丁丑乡晚生南京户部陕西司郎中周裔登湖广司郎中王貽德江西司主事梁鹏兵部司务王珽大理寺司务苏民怀国子监助教陈善

行太常寺典簿翁思佐谨以牲帛庶羞之仪致祭于明故资善大夫南京都察院右都御史刚峯海老先生之灵曰呜呼惟公禀天地之正气诞挺乎南服瑤海汪洋而荡日兮浮乾坤以浸沃五峯巖嶮以刺天兮含灵秀而上矗公生其间岂偶然兮鍾扶輿之清淑猗我公之秉德素比洁于羔羊同寒松于岁晏皎白日之秋霜始发矧于百里嗣着节于岩廊批龙鳞而抗疏与日月而争光激危言以正谏思植立乎纲常苟皇情之或睽虽九死其何伤世浮湛以取容已独行而不顾众娥眉以巧咲忍效顰而学步俗滔滔以日下兮回狂澜而障之风飏飏而日靡兮树云旗而反之岂不知脂韦之合时兮盖不能为此态也宁与■〈𠂔〉兰而同槁兮又安忍佩夫萧艾也嗟世庙之遗直历三朝而再起建节钺于东吴每令行而禁止视赤子以如伤励臣心之似水听口碑之载路厥洋洋其盈耳荷今上之特知为庙堂之毗倚晋华秩于孤卿位聿登乎三事惟晚节之益坚见慎终之如始朗吏部之?壶总留台之风纪佩赤芾之葱珩冠进贤而至止镇雅静于??多浇付宠辱于两置既崇雅以黜浮思还淳而返朴若长孺之慙忠方子西之蹇谔乃世道之攸赖胡九原之不作呜呼老成兮萎谢松栢兮凋零爵贵兮二品寿过兮七龄生无余财以遗子孙没千载其有令名公今乘彼白云兮骑龙上征身骑箕尾兮光为列星气作山河兮翼赞皇明实为国而伤悼兮岂私痛而沾膺陈芜词而下拜兮荐生刍而写诚尚飨

维万历十六年岁在戊子五月癸未朔越有二日甲申乡侍生王弘海晚眷生梁云龙晚生王显先门下晚生许子伟谨以香帛之仪致奠于明故南京都察院右都御史赠太子少保谥忠介刚峯海老先生之灵曰呜呼天地生人惟有此心人心作用惟有此?凡此真心厥赋惟均抱真以还惟公独然四岁而孤母训是循性秉刚介学究本原乡愿力诋曰师圣贤焚如世态匪染胸襟特立独行砥柱回澜筮登仕路平黎建言民物已任若救溺焚秉铎南平明执宪编礼以作士膝不屈人两宰疲邑端用条鞭家僮负薪里胥归田罔见上官知有下氓淳安三载挫折愈坚兴国岁余京秩孤寡事我肃皇慷慨批鳞九死不回甘饍如饍荷知穆宗一岁数迁扬历华要寻抚应天芟强植仆矫俗革滛而功最巨淞江开湮磊磊难偶浩浩随归扁舟阜帽十有六春虽则屡荐若将终身会值圣明特起海滨始拟银台帝更宪巨趋命在途寻贰留铨遂总南台弹压司权厘汰夫役若解倒悬煞有用世力不逮年七疏不允栩栩登仙家无长物原宪之贫嗟乎生稟间气出启泰元孔刚孟浩近代谁伦于世无觊于身无牵亦惟高风人人自怜民悲丧考士悼摧岑当宁震惕若失济川赠谥祭葬渥典频繁于公何加輿望长殷海等居同里闲仕接官联周南咫尺絮酒莫伸顾瞻矢谏涕泪沾巾匪为吾私斯世斯民恪守典刑庶公如存尚飨

维万历十六年岁次戊子正月乙酉朔越十一日丙申乡侍生侯国治金诏李凤黎天启邹可张梁桷欧大任陈万言莢志尹霍与瑕陈俊张廷臣霍镇东陈堂方亮工曾士楚黄鏊黄在素梁士楚王原相陈大猷姚光泮黄应龙金节梁钺易道源年侍生何思赞孙濂麦琛区次颜萧应韶李光宸郭棐谢良任年家侍生郭盘谨以刚鬣柔毛香帛之仪致祭于资政大夫掌南京都察院右都御史刚峯海老先生之灵曰天地正气曰清曰忠弥漭宇宙胡始胡终呜呼千载而上夷齐龙比千载而下瑤管刚峯掇巍科而酝经济位上卿而际遭逢泽宫之遗训炳炳垂范庙廊之具瞻岩岩且崇两都出入在在令望生平出处子子孤踪公之宦业即举其一丈夫所难以身兼之孰不逊功当世庙之神圣虽百察其景从乃以郎署之散秩效前修之朴忠微

瑕必摘伏奸必攻批龙鳞以极諫甘九死而从容宁忍首阳之饿宁蹈剖心之锋呜呼北海之避遇非明世贵戚之任异姓不同公则明良间值必尧舜其君而有犯无隐事使皆宜必尧舜其民而惟恐疲癯幸天心之扶植荷明圣之优容顾命赐环晋抚吴会之枢要返初再起遂掌留院之峻雄衙如禅室唳明月之孤鹤庭无宿讼扬甘棠之贞风任流俗之铄金秉吾彝之降衷既清一已以及寰中望重三朝之寿考表端庶正之肃雝胡天不勅?心倏尔考终失著蔡于畿辅軫皇念于九重呜呼万古此天地则公之正气斡旋乎苍穹万古此朝廷则公之正气羽翼乎宸枫万古此君子则公之正气同者有所恃以无恐异者有所畏而不敢内讷繁棗梓之忠贤实朋游之宗工空瞻归棹哀奠征逢翩翩去旆迢迢海东然公不待生而存不随陨而亡者则耿耿乎为日星为河岳而无穷也呜呼哀哉尚飨

维万历十六年岁次戊子正月甲寅朔有十九日年生张学颜王赞襄陈表锤倬吴应龙张璜唐恪黄可久陈维瀚梁必强王天麟林震等谨以心香清酒致祭于明故南京都察院右都御史刚峯海老先生之灵曰道岂在评行贵敦彝有耻则可教树功为吾师千载如公诚所谓闻道其人与称公者谓公赋气刚大与道合资慷慨磊落大着于为诸生时而且赫奕于今兹谓公操饮贪泉一砚自持匹圣清于首阳等包肃而上之谓公孝无间言忠重华夷矢一信之靡他濒九死以不移闻大勇于曾子养浩然于子舆谓公言黜浮夸美无侈词垂桐江之一丝而奚翹大丘之讼者望庐谓公既皎皜于尘寰亦敛铄于家居语默庶中其则卷舒亦惟其宜千载如公诚所谓闻道其人与好事者流亦纵訾颐谓公笃于行谊薄于闺闱不知道苟有当虽孔门三出其奚疑谓公廉如仲子行匪希夷不知道苟至当虽冒俗议其奚辞谓公居乡受馈不知待以举火者往往德公之余谓公祭葬从简不知衣衾棺槨之外皆非吾亲之须而亦称家之有无凡公所为当于孔门中求之则又有曰丘文庄唐西州之文章邢湄丘暨先生之节气扫末季之糠粃诚后学之师儒然文节点义皆道之士苴而列先生所以主乎是者则皆可指而知嗟微斯人吾谁与归先生事定于盖棺名成乎鼎彝侪辈奠生刍之一束藐乎其不可复追他日有谭及公者吾侪共应之曰先生闻道乃先乎吾嗟嘻吁良心在人讵能泯诸尚飨

南京蘓州府百姓范世浦等一百名奠呜呼上天毓秀璫山孕灵正气凝结神明挺生泰山北斗景星庆云批鳞世庙朝阳凤鸣雷霆赫赫含笑赴刑风霾世变天佑忠贞穆皇践祚拜命南征立纲陈纪植善锄勅条鞭汰冗民歌治平躬飭武事波涛不惊吴淞之役胼胝劳形饥民十万就食如云功成三月地平天成厥为萋菲畎亩乐耕隳十五载圣主励精诏求遗直安车蒲轮幡然就道銓曹贰卿凡我赤子稽首郊迎勤勤匪懈咨访民青未几总宪秉轴持衡风裁凜凜激浊扬清身先节俭返朴还淳上无墨吏下无横民苍生父母社稷干城胡天不吊柱石遽倾龙归瀚海星陨留京家无担石资不满羸惟遗清节千古令名易箴之际赖有同寅松栢竞操金王和声临丧执紼用竭悃诚奏请恤典白骨沾恩敢和声食俯顺民情公岂无知子我士氓民失怙恃谁不茕茕清等僭荐泚采苹临风遮道呼天泪零英灵不昧来格来歆忠魂陟降圣世永宁尚飨

维万历戊子冬举人侄孙海迈谨以牲仪致祭于明故资政大夫南京都察院右都御史叔祖之灵曰惟祖□惠懿行掇魁东粤淑教善政蜚声士林启我后人觐德愈馨思昔澄祖甲科御史宽祖乡荐郎官讵不占荣而未留卓迹濶祖备登秋榜沂祖幸游太学讵不勗美而徒诒一

经何幸我祖大夫躋崇阶都奇遇鸿名白于寓内而光大前人哉君相之眷注方殷生平之底蕴方展而未竟胡莖莖七四而遽捐宾客哉天祚吾家我祖亢宗燕后天祚本朝我祖福国泽民而胡夺之速哉往岁夺吾叔祖存虚止于失梧州之望而今夺吾祖也至于失天下之望谓何哉南都一梦既乏冢嗣复鲜戚党潇然一衬以归为侄孙者弗克执紼修涂以报厚德歎何如其为情哉所幸者公论已定正气日伸恤典之恩遣得人而忠介之英灵永妥族子若孙将蒙庥荫于未艾又何憾哉迈临风薄奠徒写心曲而仪刑我祖以不负雅海薪家道之复昌则固有隐愤焉而将慰我祖于九京也呜呼哀哉尚飨兵部尚书郎梁云龙于海忠介公为外室戚末以万历丁亥冬之六日闻公卒于留台不胜哀簣欲奉使命为营葬事不果因誄公行谊从里中诸缙绅举公奠而流恩也深瞻风也切复束緘帛远致子思孚扶服僊輶而吊之曰古之所谓大丈夫真男子者故尝闻其语乃今于公而见其人夫丈夫而谓之大男子而谓之真者非于吾性分量有所加本来面目有所增也自世以妾妇害大以乡原乱真而所谓大丈夫真男子者始寥寥落落穷宇宙而罕闻惟公质稟刚贞中流■〈立乞〉砥力排纷纷俗态必欲全其天之所以与我之理而毅然以圣贤之学责诸其身素位而行独持清介即都尊显涉尘坌而不为身谋不为家谋生死于斯世无所觊见谓孤竹子之芬志在救时敢于任重惟知尧舜其君尧舜其民即百折不回鼎镬不避见谓莘野氏之伦与物无迁洞见性真接引后生谆谆靡倦居恒无疾言无遽色即横逆颠沛而无鬯气无忿容无絺辩见谓柳下先生之温律诸孔夫子之时中虽云未協而完节以生完节以归其于形也庶乎克践可以参天地而表人羣龙岂阿好哉盖以左右最久睹记最真欲学之而无一能故不觉其咨嗟慨慕敢谓公造于圣而得三子之全此固出于龙一人之口契于龙一人之心而一日克复天下归仁实千百年不可磨灭之同然尚飨

维万历十六年岁次戊子仲冬月朔有七日钦差督造坟茔兼赍谕祭文行人司行人门下乡晚生许子伟谨以刚鬣柔毛牲醴庶羞之仪致祭于明故资善大夫南京都察院右都御史赠太子少保谥忠介尊师刚峯海老先生之墓曰呜呼我公生平大致已扬扨于人人或状而赞或纪而铭先后奠章轴楮无筭莫非盛德之流形而所不能尽扬扨者则公至诚动物之心盖公之学戒惧于不睹不闻之地而独觉天理之真公之行蝉蜕乎自私自利之涂而独追乎邃古之英士论始疑而竟信公道几蚀而綦明故自显爵锡之嫵谥褒之雄文重典慰藉之而因以见公之得君自兴国祠之淳安像之蕪松金陵之属咸俎豆之而因以见公之得民自交口颂之交章直之挽歌唱词揄播遐迩而因以见公得中外之朋情公素所重者忠孝廉节而皆为公有公素所轻者爵禄名寿而皆为公膺即此生之志遂而九土之日暝俾后公生者咀之有余味闻之有余馨子伟叨承钦命载妥公灵虽靖恭之常职寔报德之夙心所旦夕祇事蕪以追譴救臯者惟公所嘿相焉兹匪陈牂荐竭虔诚以对越者惟公所厘呜呼哀哉尚飨

◆挽诗◆

吴县朱良性

蕪州府吴县朱良知

应天府生员许光祖

蘓州府学生凌霄汉

蘓州府吴县叶于乔

蘓州府吴县叶绪昌

吴县李文秀

吴人姜谧

吴人凌一鸾

吴民叶韶荪

琼州府儒学训导戴应良

○吴县朱良性

批鳞玉阙丈夫奇正是风雷示变时万死一生千古事孤忠独立寸心知神飞琼海乾坤老泪
满江南草木悲幸有圣明公道在会看殊典勅名祠

○蘓州府吴县朱良知

批鳞直夺比干志苦节还同孤竹清龙隐海天云万里鹤归华表月三更萧条棺外无余物冷
落灵前有菜羹说与傍人浑不信山人亲见泪如倾哭公柩前止见菜羹故云

哲人逝矣泰山倾载道弦歌总哭声南国甘棠思德政雷阳枯竹动民情忠扶社稷轻荣辱功
满乾坤任死生屡疏承恩留白骨英灵千载佐平成

○应天府生员许光祖

江南十月雨如倾总是悲号道路声云冻霜寒敷政肃月溶水澈莅官清剑剗义胆言何壮星
殒忠魂气尚生谩道姓名光国史于今草泽口碑成

○蘓州府学生凌霄汉

生平正气肃朝端胸次忠清世所难忠似赤葵倾烈日清如秋水挽狂澜时多俊乂无尸諫人

有萋菲幸骨寒千古芳名光史笔应留精爽照长安

○蕪州府吳縣葉于喬

海上生人杰才鍾天下奇諫書光日月聲價震華夷孤介水如澈寸忠山可移公今騎鶴去千載有余師

○蕪州府吳縣葉緒昌

南都秉節望如山總憲重來父老歡楊綰相唐驕侈格長孺在漢覲觐寒功收治水三旬易策救飢民十萬難今日僊輻向琚海野人酌酒泣江干公治吳淞救飢民十三萬故及之

○吳縣李文秀

義皇風度出明時葵藿丹衷百世師邦國乂安猶戮力經綸未卷忽乘箕琚崕白雪封茆土柱石青天樹羽儀昭代古良天下老千年遺像鎮華夷

○吳人姜謐

海父真人杰三朝第一臣寸心惟為主百計只安民折檻彰忠迹埋輪讎佞人最憐貧與獨青史泪痕新

○吳人凌一鸞

簡命吳淞續禹功頓令萬派水朝宗力排豪貴驅妖鰐為拯民窮副袞龍疏抗三朝辭激烈身經百折意从容聖明注念嘉忠直會見恩光下九重

○吳民葉韶荪

聞說童謠有海龍公來胼胝浚吳淞孤忠獨斷群情靡一齒能令萬派從星殞海天光耿耿月沉秋水色溶溶應知仙夢游江上千古烟寒鎖曙鍾

○琚州府儒學訓導戴應良

中丞高塚麒麟卧聖主殊恩雨露盈直事三朝人共避疏傳千古氣猶生堂堂忠介垂天語肅肅松楸拥地靈我亦微官系滄海吊公不覺涕交零

◆行狀◆

明故资善大夫南京都察院右都御史赠太子少保谥忠介刚峯海公行状呜呼公正气直节独行敢言业已简在帝心昭于国史即愚夫稚子俱能道之安所事状顾有隐衷微行足以师世范俗而或出于士人之所不尽睹记者不佞龙忝在戚未事左右最久亲炙最真宁独忍不搦管详之而令泯没为公讳瑞字汝贤其上世以来未详在国初以军功世广州卫指挥某者隶籍番禺今为番禺人洪武十六年荅儿从军海南着姓于琼遂为琼山不再传而族氏蕃衍明经纷起有讳宽者以经行闻领乡荐知闽中县事即公大父也宽从子澄登成化十一年进士为御史又有濶举于乡皆名贤子八深浩泌淪潮浴瀚俱庠生瀚即公父也以公贵赠承德郎尚宝司丞加赠中宪大夫南通政司右通政母谢氏封太安人加封太恭人赠公警敏豪宕不治生产公甫四龄而赠公捐馆太恭人年才二十有八矢志励节日夜与公偕寝处口授孝经学庸诸书长就外傅为访择严明师托之其贞一不渝似栢舟而慈训孚翼则有断杼和丸之风故公尝自谓勉自修飭若非冲年背父者母氏之力为多然公立志之坚任道之勇则故其天性然也公生而颀秀挺拔风神迥异稍知识直欲学做圣贤而纷纷世态皆无当于心以圣贤教人千言万语只是欲人识其真心率其真而明目张胆终身行之卓然不牵于俗者圣贤也昧其真而馁其浩然之气不免与俗相为浮沉者乡原也非圣贤也今天下惟乡原之教入人最深世俗群然称僻性称太过者多是中行之士而所称贤士大夫善处世者或不免乡原之为乡原去大奸恶不甚远今人不为大恶必为乡原而孟子功不在禹下当以恶乡原为第一公盖囊括叔季人情物态尽于乡原一言故其平生所学惟务识真必为圣贤不为乡原力破夫无害从俗之说猎较受赐之说仕不为道为贫之说以为此皆圣贤偶有为而言今纷纷为俗夫庸人借口岂不大谬居恒着严师教戒召神立腔子下海之曰瑞乎女知女之托形于天地间者乎天付完节女须完之母宫室妻妾动心母恂恂易操母财帛世界而中流才砥母对人语雄而媿影媿衾母质冕裳参狐貉而有媚心耻心母疚中而气馁母矜能而讳医母自许穷天地亘古今而不顾者而终或不然有一于此不如遄死公执此以往终身诵之自谓圣人复起不能易也然犹见时之人纷然举俗说以进惧夫纤节少徇竟亦天地不肖子于是复撰客位告辞与同志者共砥淬而自号曰刚峯以代箴傲云乃若居室之间人所忽易公独谓于此不谨性命之理即为之壅阂而不流君子造端之道谓何以故位内位外刑家肃然一切男女仆役至老死不踰阃阈相往来处伯仲嫺婭恂恂怡怡而坐立跪拜则惟礼是嫺有从子鹏与公年相埒同铅槩同寝食起居又同上春官然言必名事必禀母敢几微嫺狎司徒郎二溪杨公于乡为先达年最长而于公之门为侄婿相见间公纔弱冠必持叔丈礼不以长故贵故稍假在郡庠时独与一二同志辨学明古即郡博且严敬不敢问馈遗常例琼人士庄为道学先生相率师事公惕然为作训说以诏之曰今之学者决状元进士于科第人恒壮之此学奚自而来圣贤以识真诲人其说备在方册惟潜心玩味而踊跃于讽咏时举仲由之不耻缁袍孟子藐大人伯夷之敢于非圣服之心胸往来不置或者充养有机耳其程文艺则曰文不过如画师之写神者耳穷一生读书作文而于国家身心毫无补益何异宋人所谓可惜一生心用在五字上者乎故公之用心匪特耻为声诗即古今文词要以阐发性灵而止虽不稟古则而自成一家大率如其人云嘉靖丙午督学林公始刮目公文已廉其行谊大加奖赏适有所出妇许讼公且诬装资林公诘问以出妻令其可嫁为对至所诬装俱不辨惟称贷倍偿而已林公益重之已酉督学蔡公继至试题有不曰白乎之句手公卷珍翫移时因询知公微隐事叹曰兹所谓涅而不缁者非耶是岁公举广东乡试甫应癸丑一科会试不第而当四十强仕即毅然自决曰士君子由科目奋迹皆得行志奚必制科遂就教而琼方平剿黎岐安戢

未定公始举于乡所答平黎策问尝有开道立县之议得者已才公经济至是伏阙上书复申前说其略曰琼之黎自弘治十四年迄嘉靖二十年二十九年凡三大举矣臣尝以为弘治间开道立县可无嘉靖间两次大征即今大征后开道立县可无岁岁鵬剿年年守戍闻者跼之已下兵部议覆献图说计便宜灿若指掌而议竟寝已授南平学教谕始至申谕曰教官非塾师比职钦承明命请以严师自处诸弟子有一日之雅当以从令自尽乃首揭朱子白鹿洞五规辅汉卿会粹六事并摘乡原忠信廉洁之似孟子不见诸侯之守孔子申枨刚者之辨反复启迪以发其真心作其浩气母论诸生讲读升散必宿号舍即其家冠婚诸事亦稟请循礼而行母论行□大节所系乃兢惕即减年微细亦曰即此已陷于不诚不一之地更学何事相见拜揖外不许更持一货物进而参谒礼仪断断执会典宪纲力以其身为标帜明伦堂不跪道傍不跪迎送郭门不出上官至一见后不复同有司作三日揖郡守诸大夫视学升堂教官谒左右踞公居中挺立诸大夫色赧语侵曰安所得山字笔架来盖指公也公志在行道而一入官区区礼节不见谅谓此阙陷世界何能有济遂告休郡丞某恚公甚欲听去太守某独媿悔曰彼所执竟是吾误也时大司空朱镇山公为闽学宪闻之取赴正学书院修书公力求去镇山公慰留曰平生所学谓何所出谓何只争一跽耶公乃留按院至延率诸生候郭门有分守道某先进见公长揖不踞而谁之侍者以海教官对随令侍者物色公接按院作何状已按院进公礼如前分守公闻之吐舌曰今世有若教官耶夫会典宪纲故事皆废格而独创举于公虽若不无骇迂而理有同然则固更相叹服谓当于古人中求焉用是抗颜于南平四余年所如一日而守相台察以上咸鉴涵之矣闽中苦驿传不命有司而独檄公酌议公谓驿递之疲千疮百孔尽由近年关文冒滥所致今当一切裁其不合法例者而复国初五马三驴之法此为上策乃若因臧级崇卑以为应付多宥??而借关不行中也禁止迎送劳而就中稍为调停节减以求谐俗下策也盖中策下策公已谓非国初之旧然皆掇时急务故特举之以为闽计明裁革必可行乎而公之由县令以至巡抚则固从上策矣戊午春擢知淳安县事一履境睹痛苦万状询所以叹曰天下事都被秀才官做坏了岂直不才贪残剥充囊橐即贤者亦乡原正道交战胸中穷竭膏脂博交延誉乃辄归咎朝廷征赋烦不可为何也征赋即烦各有定额去什一未远而额外无名可省不省朝廷为之抑诸臣为之耶于是申飭所行事宜而先为明其意若曰知县知一县事也上而朝廷吾父母中而抚按藩臬僚属使客乡士夫吾长兄弟下而吏书里老百姓人等吾子姓遇之各有正道若谓止可洁已不可洁人洁人生谤谓凡所行不可认真认真生怨取祸不顾朝廷之背否而以乡原之道待其身以乡原之道待吾子姓吾长兄弟浮沉取名窃取官爵非知县也而丞而尉而师儒而里老而生员而吏胥为各申飭谓自吏胥而上谁不身任民物之责与有民社之寄独奈何自营私为也即其所宜着为洁令名曰淳安政事盖自信其粹乎圣贤中正之道我祖宗颁行画一之制相与执守之其自奉也俸薪外丝毫不侵虽家僮亦令樵采庭甚清闲吏书无事亦听其从农从商里甲故用银每丁至四五两公只征二钱有奇百凡用度取足于是至上官檄县取金馈境内士夫旧多委曲应之公惟于其赍餽内理焉有则送无则已抚按出例阴遗其吏书谓无此则祸且至公独曰充军死罪宁甘受安可为此穿窬举动耶津要知厚有馈问外官入京有父际谓要做官不得不如是公独曰尽天下而不为上官之赂也岂尽不迁又尽天下而惟上官之赂也岂尽不黜安可自其身甘沟壑也淳故多淫祠社学独缺公毁祠宇以为社学欲尽如洪武六年令乃止而作兴士子以道义不以势利间有援例上粟必谕之归于正焉维时都御史鄢氏挟权相总制八省鹺政威焰赫甚其子过淳安索夫马不与怒提輿台非理凌虐甚至倒而悬之公不顾密

执鄢关防诈伪中所去申文得鄢批悉捕按如法先是鄢宪令巡历所至务为节省而其实不然大率有司皆穷极淫靡以事之动费千百计程只一日当至严严守相戒盛为供具以待公独上稟帖曰传闻所至与宪牌异欲从宪牌则惧招尤欲从传闻则恐违宪下邑疲敝未知所从鄢匿笑而署日照宪牌行然迂道去不过严矣严守闻鄢且至而中止疑之已知公具稟之故虑祸且不测盛怒待公入见辄踞坐击案曰几大官敢尔詈不待口公惟敛容长跽无一语辨气稍平起揖而退亦无后言迨鄢事竣严诸官故无害太守见谢曰好了淳安百姓难为汝难为汝然鄢虽媿屈公而阴嗾其私人袁巡鹺曰不驱海疆项何以持风宪体乎袁既受颐使而按淳又见公迎送不远供应不隆有所钧付不唯唯应谄曰汝即欲学府官样还未还未已而公给由申呈驳云方呈给由已为升任之状不准考竟论然公无事可指摘寻有通判嘉兴之命又以袁论之故仍以原职改调公听调赴部朱镇山公貳铨曹矣隆冬盛寒公见犹服丝且敝朱公曰即贫不能制一官服耶公始易一黄石绢朱公为言公清望于冢宰严公而其邻邑兴国适缺令遂改公补之公抵任察地瘠民贫岁征不满什之伍弊在浮粮乃条八事上南贛都御史吴尧山公次第请行而独急清丈清丈甫毕而报升户部云南司主事盖镇山公力也公将赴部太恭人怯北寒思归亟不得已发王恭人携二男三女扶侍以归轻身挟二仆北上既视事日见肃皇帝晚年玄修大小臣工率勉强道服将事乃慷慨上言天下第一事以正君道以明臣职盖为身家心与惧心合臣职所以不明求长生心与惑心合君道所以不正故以尧舜禹汤文武之治责君欲洗数十年君道之误以皋夔稷契之辅责臣欲洗数十年阿君之耻其间批鳞逆耳侃侃数千余言自许于有犯无隐之义国史盖详载之公是疏出一日而直声震天下上自九重下及溥海内外无不知有所谓海主事也者疏始入即访同乡庶吉士王先生于玉堂公署相见间自分必死首以后事为托询其所由袖中出奏草一通人方危公而公且谈笑自若至所遗后事惟白金二十两曰死于尔乎殡还我首丘足矣已而对酒论文谈古今治乱兴衰之故甚悉至语及士大夫立身行己惟以事事认真集义养气为主徐而曰今之医国者只一味甘草处世者只两字乡原治古之盛何由而见语毕从容赴朝房席藁待罪鼎镬自甘绝无几微可怜之色王先生者即今宫詹忠铭公故尝为予言之嗟夫死生之际亦大矣而公就义从容若此岂市直沽名徼■〈彳幸〉于一试者哉疏入为乙丑冬十二月逾年丙寅数月不下时有厂卫人在公左右侦食息暨所如往而公则终日子子匍匐待命会上方烦懣一日忽下公诏狱论死中外相顾失色而今尚宝何公为司时上疏力救公亦几死然窃闻公疏入时上创览怒甚抵其章于地已复取置御案日再三读为感动太息称有比干之忠又密谕辅臣华亭公云今人心之恨不新其政此物可见也他说的都是语在华亭集中然肃皇帝曷尝有死公之心哉谳狱虽上竟留中意亦渊矣已腊月几望肃皇帝上宾庄皇践祚首奉遗诏出公于狱复原职寻改兵部武库司主事丁卯改元晋丞尚宝四月丞大理右七月转左适有波罗之役奉使回首公遵令甲行出使礼三司诸公率以乡官忽之而公自处甚峻学宪罗公尤相齟齬至以郅沮太恭人旌节事公亦不为之屈十一月升南京右通政复迎太恭人就养而王恭人始偕耒已巳春正月改通政司右通政提督眷黄六月升右佥都御史奉勅总督粮储巡抚应天抚故与按并弹压一方欲有规画必衡隲后行公则谓抚按各有专责不得越俎相侵乃独以昔所为教南平者令淳安者令兴国者稍加润色扩充为督抚宪约意盖主于斥黜贪墨抨击豪强矫革浮淫厘正宿弊令既布严乎烈日秋霜风物顿易郡邑吏凜凜竞饬若非往日人赅者则望风解印绶去权豪势宦敛手屏息至移他省避之有显者赅其门第以居闻公明日将至一夜遂易而黜监造中贵某素骄横侈纵出入肩舆八人骑从甚

都一见公即内媿贬损一能自安所用肩舆人遂减其半吴故有松江汇震泽入海濒江田亩灌溉弘多已被潮啮淤为陆议浚者屡迄无就民有谣惟是海龙王始开得耳至是公议开实应民谣而按院某者先是恶公压已每事不与之商议乃于此举故为相左且欲按剑寻其后公不顾毅然独以身任之措处公羨召募丁作乘轻舸往来江上督畚鍤不旬月报竣计费甚省且役成而民不知劳按院某惊讶窃叹曰万世功被他成了至今姑苏民无不德之独以公在任不久未及大究其施为憾焉江以南贫富相倾弱者率投献田地豪家以为奸利而此离瘠苦之状接于目侵占忝夺之讼聚于庭公气勃勃下令受献者悉退还或许赎即恩厚如华亭相公家亦义劝其退田不已盖公尝论欲天下太平惟有井田一法井田之卒坏而不复惟有亟夺富民田一言至于不得已而限田又不得已而均税下下策矣然犹井田遗意故其两制疲邑皆用清丈兹又令献鬻还赎意亦仁哉顾势豪沿袭腹诽唇稽竟以夺富民田中公而舒戴给事章交至解抚事专督南京粮储方巡抚候代而粮储裁革实以计去公也公以庚午四月回籍闭门却扫为终焉计自始仕至此十八年所禄入廩买居第一区值一百二十金祖田十亩外无益惟万历乙亥治太恭人葬事兵宪陈公助贖金始斥置墓田数亩耳居恒称不给而交际所入辄周戚里贫乏未尝自私邦大夫戈戟相属谄民瘼问行政得失必纚纚为正言之耻面谏亦罔及其私曾有吏书筭田亩阴为公减一亩八分公清出不谓其厚已必鸣而正之山水诸癖一无好而惟喜读书其所著述如泰伯等论多破除俗谬而犹喜引进后学家居十余年日为课秬文说经义或馁困时以手撑腹言无倦厌即相送出门犹立谈移晷也平生煞有用世志尝读严子陵传至横足帝腹事叹曰吾人一身备万物之理则当以万物一体为已任士君子出处何常视所遇何如耳有君如此安忍负之乎归未几而荐者踵至都谏雒涇坡等会荐有忠贯日月望重华夷之语而吏部具覆奉上命遇有员缺相应酌量起用逾年万历改元癸酉又奉上命遇有两京清散员缺推补时盖籍籍望公起矣嗣是御史若詹若龚若梅若王都御史若郭给事若王各疏荐而最后甲申冬十二月邓按院纯吾报命荐如会荐然上曰海瑞既屡经荐举查有相应员缺即便起用不逾月推通政司左通政上又曰再查相应员缺起他逾年乙酉正月起金南台都御史未至以为南吏部右侍郎举朝搢绅无不羨主上特达之知而海内闻公起亦谁不举手加额独惜其起稍迟莫盖公是时年已七十有二矣公以二月闻命即束装就道或劝公盍姑辞诸公则谓主上有特达之知臣子不可无特达之报区区虚袭奚取焉遂启行自琼台至蚬岗家仆皆徒步有一小僮亦祇携附前与不与马又自五羊至上新惟坐一小船寂寂过多无知者五月履任冢宰一月林公未到公署部事见兵马司票取坊上人办公燕百物又见该坊送各衙门取应票共三百余纸叹曰夫以五城之人当一京千百官出入用度之扰诚难而苦矣吏部既长六曹安可不念先百姓遂张示禁革故办事官吏有输银公费并新任有贺礼一切革尝思念方今主圣臣良万载一时而吏治民风犹如先日因疏引骸骨并陈一日治安要机谓欲安百姓先守令欲督守令先司道欲督司道先抚按而望于阁部诸大臣归本于君身治安之要诚无易此顾独愤贪残满载论劾不止者盖起于改枉法赃八十责绞律而从杂犯准徒许赎非重刑决不能惩以故援霍文敏请复枉法律疏而因及国初尚有剥皮囊草特以明其言必可信而观者不察遂谓欲复剥皮令焉且历举今政以责难于君曰愿皇上以茅茨土阶之心居九重金阙持智者行所无事之术御一日万几见尧舜母见天子意真语切而近于戇即帝心亦且难之盖疏上为甲申二月而是时则又有南右都御史命矣公用世极锐上用公亦极锐浹岁三迁咸属睿眷自此疏一出忌信参焉而梅房御史遂凭借雌黄房则大肆诋击公质不胜房惟是彭君遵古诸君寿贤顾君允

成三进士疏乃足以发舒正气而培植善人耳公于时虽拜命履都御史任而归志已决屡疏乞骸骨第国是未淆主眷未衰火甲夫差方题议未定时且大计故迟迟焉大计若于爱憎丛烦是非难一公独与冢宰李公秉公持正毋纵毋苛众咸服之至于火甲止为地防守原无杂差今则一京千百其官率于兹焉取用虽节题革亦竟废公乃一正之于官民界限使官不侵民民不病官摠之为简可照烦一册使上以稽下下以应上留都民若弛重负出汤火矣而公意犹以未尽如京师为歉云比大议既定归志益决貽不佞龙书曰七十有四非做官时节况天下事只如此而已不去何为龙复曰此两语足以决去就矣盖六乞骸骨不得允竟以丁亥冬之十月十有四日卒于留都恻哉卒之前三日兵部送柴薪多耗七钱犹扣回病不药临危男仆犹不入内无一语及身后事独抱真纯以还检篋内廩禄金一百五十一两绫紬葛各一微都御史王公麟泉率诸御捐金治具何以归乎子侄兄弟既无一在侧虽有二媵四仆又愚弱不任而更衣沐浴含敛悉都御史王公左右襄治则诸御史噫嘻公何以得此于诸公哉南诸搢绅见公卒相顾悼曰天不佑善俾正人气夺百姓奔相告扶服悲号若丧慈母十一月六日讣至亡论识不识更相悼曰安得复见若人上闻为之咨嗟缠惻申命秩宗考典礼祭八坛水衡致金钱它窀穸遣行人许君子伟往治葬太宰议赠官加太子少保太史易名谥忠介盖上之笃念直臣恩厚如是哉公生于正德甲戌十二月念之七日享年七十有四配王氏封安人繼封恭人前娶许氏生二女出后娶潘氏不越月亦出侧室二丘氏韩氏人之口实公者谓公此处认真太过至六娶七娶不知公娶惟三而慎选辄易则侧室其出其死抑亦所遭不幸乃其中尚有人不能堪者而公且安之也子男二长中砥次中亮皆王恭人出一十一岁一九岁以公在狱时殇逝晚又生一子中期丘侧室出三岁而殇从弟珩有仲子中适伦序应繼公虽未立而起官时属以家则繼者必此子也女三长适莲塘张筠次适林知县子林岳皆许出三适郡学生周维诚王恭人出呜呼公之出处生死其关于国家气运吾不敢知其学士大夫之爱憎疑信吾亦不敢知第以公之微而家食燕私显而莅官立朝质诸其所著严师教诫一一契券无毫发假孔子所谓强哉矫而孟子所谓大丈夫乎古今一真男子也论者槩其性甘淡薄有采薇之风天挺忠贞有扣马之节谓道似伯夷信矣然其视斯民由已饥寒耻厥辟不为尧舜言动必则古昔称先王莅官必守祖宗成宪挫折不磨鼎镬不避即伊尹奚让望之如泰山璧立就之如春风太和接谈无疾言无遽色临难无郁气无忿容垂楚子弟挹臧获亦不见其厉色严声即柳下惠奚加特其质多由于天植学未进于时中任事不无或过而隘与不恭盖亦有焉嗟夫公所莅咸口碑尸祝所至争枳道塞途瞻望之处留都时有不识姓名远方老者求供帚除一月两月去又有相率求貌公像以去学士大夫亦有焚香事公每事必卜如罗浮叶綱斋者而不佞龙居门下既弗克护公归又弗克严事公谓何哉公始至留都遗诫曰吾尝怜贤亲不砥柱中流落入俗套三复斯言凜若严师教诫在上矣是用投泪短述深自针砭耳乃若所以不朽公于幽而劝天下于明者则以俟夫立言君子

兵部武库清吏司主事晚眷末梁云龙泣状

◆赞◆

海刚峰先生道像（省略）

赞

维万象之森森此象应不可少即大生之??纍??纍此生曾不自小碌碌画地而趋不风旌于起倒的的照之以天靡黷闇乎煦饱民则隐隐瘝痍而拯孔殷国则望望尧汤而计太蚤四海仰之洵如不可刊之铮铮不可淄之皜皜明德耿耿青编造物悠悠共老

同邑门下生许子伟撰

◆传◆

海忠介公传

今天下冠带之伦其以贤豪自命者非少矣然往往趣舍异路而言行相诡或借为中行之说阳押而阴为辟而不自知其窜入于乡愿之中或见谓功业有道途可指取有名节可戾契凌厉恣睢而苟为高而罔致严于簠簋之饰其平居之所慕说盖棱棱若异代人不可及乃其行事之概未及盖棺而论定矣名不虚立士不虚传壮夫义士非其仁心为质蝉脱尘■〈土盍〉不畏义死母荣幸生则胡以毅然称大丈夫哉余有感于忠介海公云公生于岭南为吾乡之琼山人名瑞字汝贤别号刚峰其学一切以刚为主其谭说理道雅尚节槩非阳浮慕之而创为名高者自辞受取予进退以至拱揖逊让居室饮食务画地而趋嫔阿之态侧媚之行绝不以缙于心而染于躬用世之志老而不衰至缩朒倪ì骤而致通显者则塞耳而不愿听谋国之忠持已之介终其身断断如也自为诸生时即抱当世之虑琼世苦黎患每为经画区处事宜始以计偕来伏阙上平黎策意在开导置县以免征剿守戍之苦识者相与壮之已而就吏部选曰仕亦各官命耳何择为选而得教谕南平以倡明师道为已责首揭乡愿忠信廉洁之似孟子不见诸侯之守孔子申枨刚者之辩以广厉学者而作其气抗学官礼于台使者及监司使者务守会典宪纲独立行一意而已台使者监司使者相惊叹以为古已僊淳安令至则讲民所疾苦蠲除不俟日身自饭粗粝羹藿僮从悉令樵采者俸之外无所取时相严党鄢某者以都御史制八省鹺政出行部张甚诸县道咸盛供帐为敬惧失其意公挺然不为动至按其生事者闻于鄢而置之法鄢貌喜而心御之公时升嘉兴府通判矣鄢之私人某窥鄢意以他事摘公从旧职论调兴国地故单薄岁税不入民苦浮粮为患公自为八事上之中丞台次第施行而独急于清丈以苏贫民而均其赋已升户部主事时肃皇帝恭尚玄修大小臣工率勉强道服从事公慷慨上言天下大计谓今日君道不正臣职不明欲洗数十年君道之误则莫如以尧舜禹汤之治责君欲洗数十年臣道之误则莫若以皋夔稷契之辅责臣疏凡千余言多慨激上震怒投其章于地已详阅意若为动者留蹕月不下会上意有所不可遂下公诏狱中外缙绅相顾失色亡何肃皇帝崩庄皇帝奉遗诏以原职出公狱寻改兵部主事已晋丞尚宝丞大理南京通政入为左通政遂以佾都御史抚应天时公威名藉藉中外墨吏望风解印绶去权豪怙势之家率相戒毋敢犯公者吴故有松江汇震泽入海濒江田灌溉弘多已被潮啮淤为陆公斥羨募工乘轻舟往来身自督畚鍤开浚之不旬月而告成又吴俗以贫富相倾弱者率献田于其豪以为奸利输不毕入其俗日告讦无已公廉得其主者名断击无少贷悉令受献者还其田或许之赎不使富豪有侵夺名由是吴赋无复逋负者盖公尝论欲天

下太平惟有井田一法井田之坏而不复也惟有亟夺富民田一言至于不得已而限田又不得已而均税策斯下矣然犹井田遗意故其令疲邑抚三吴皆用清丈及令献鬻还赎母俾苦乐不相等为安養生殖至计然公竟以夺富民间府怨而议者亦以此中公遂解官归杜门时不能温突意萧然也交际所入以周族姻之贫者邦大夫时过从问政纚纚为言不少懈耻面谀亦罔及其私里居十余年而九卿若台省前后荐公者无虑十余疏今上锐意太平起公南金都御史旋以为南吏部侍郎公至而疏乞骸骨行陈治安要机谓今日贪墨为奸亮不可纵欲使百姓安乐其于守令务极选欲督守令先司道督司道先抚按而致望于阁部大臣及归本于君身中多责难之语疏甫上而又有南右都御史之命浹岁三迁俱出特简海内士大夫举手相告以为主上特达之知而言官如梅如房目公为迂阔诋公甚力章亦寝不下公疏屡报闻竟以丁亥卒于官卒之日无一语及私贫无可治棺槨都御史王公率诸御史相与捐金治具讣闻上为震悼命礼官议谥谥忠介且锡之祭葬存没之赉于数为优矣公之始至都一意省约罢无名于官之可去者其理根排枝搔牵爬垢见为毛举细察要以惠養元元母耗败财用而裕其力盖世人之所视以为迂而公断然以为必可行者南都民故苦火甲夫差公力为厘正使官民不相扰为简可照烦册以便遵守民若出汤火而公意犹以未尽如京师法为歉科条甫备而天不愍遗公已捐舍岂天不欲斯世蒙仁人君子之泽耶悲夫当余官翰林时公以户部主事言事自分必死过余谈治乱兴亡之事甚适又相与论文对酒已乃出二十金遗嘱之我死必以此殓我公没于南子侄兄弟无一在者而余职侍帷幄无能视含敛诺责之是媿独计公之精忠大节所以传不朽者固自有在而余以公意气之交能道公之实其详而且信者宜莫如余言故因友人梁君之状而为之传云

赞曰海公者非唐所称杨绾流耶方绾之相唐而大臣减音乐勋贵撤驺从方拜命而转化乃尔此岂有声音笑貌也乎哉乃海公之砥节砺行而缙绅又多遗议何也夫谓公意不可一世则可谓公无用于亡则不可因其不可一世也而遂诋其不得用于世则又不可乌乎行为国栋德足世仪惠以达名介而远利刚标口碣挽我叔季若海公者吾不得而见之矣赐进士第中顺大夫詹事府掌府事太子宾客礼左侍郎兼翰林院侍读学士王弘海撰

◆附三进士申救疏◆

附申救疏【万历十四年七月】

吏部办事进士顾允成彭遵古诸寿贤谨奏为邪险宪臣扫灭公论乞彰干断以快公愤事臣惟朝廷者天下之平也圣天子照临于上贤公卿百执事评决于下如青天白日毫末洞见虽有深怨积怒无所庸其毁虽有巧心峻舌无所文其辩孔子曰斯民也三代之所以直道而行也臣往者见南直隶提学御史房寰本论右都御史海瑞大奸极诈欺世盗名诬圣自贤损君辱国姗笑戏骂无所不至虽然辞可文也难掩其实人可欺也难枉其天瑞之口可掩而天下人之口不可尽掩也当其时朝野闻之无不切齿抱愤臣等欲请上方之剑久矣未几而陛下俯从吏部之覆留瑞供职臣等谓皇上之明如此寰独无人心如彼亦必终有悔悟之时犹可少缓其罪乃寰不知皇上优容之过近又论瑞如前臣等见之益不胜骇愕不意人间有不识廉耻二字如寰者臣等义不甘与寰同朝敢先为陛下白瑞与寰人品之槩而后正寰一一欺

罔之罪臣等自十余岁时即闻海瑞之名以为当朝伟人万代瞻仰真有望之如天上人不能及者至稍之学得海瑞直言天下第一事疏其大有功于宗庙社稷垂之千万年不磨盖从万死一生中树节于我朝廷者陛下盖已谅之亦无俟臣言也以房寰视之曾有万分之一乎且臣等伏覩陛下风励臣工孜孜不倦其于赏廉吏罪贪墨尤三致意焉固天下所翕然向风也今瑞之廉与否寰之贪与否行道之人孰不知之寰起自寒贱初尚矫饰以图荐剡及稍得志遂贪污狼藉私橐巨万货甲乡间浙人每谈及者无不掩鼻视若臭秽今其田宅货产之侈与月旦乡评之丑皆万目所共视也自非兼并营私欺陛下以剥小民何以致此瑞剔历膳仕食辛茹苦垂白之年终不使廩有余粟囊有赢金以负陛下为寰者一闻其风直毛发竦然愧死无地矣乃欲强面目而反噬之耶且人固有食秽自肥而幸于人之不我攻者矣未有执已之贪而不畏人攻反欲攻人之廉且昌言于君父之前而无忌者此而无罚臣恐陛下赏廉罚贪之意布之十数年而方信于天下者以寰之一疏败之而有余也且天下人为寰甚易为瑞甚难寰身享贪饕之利而反得笑瑞之迂拙此臣等之所痛心也夫皇上念瑞先朝直臣拔之海濱委以留都之风纪使坐镇雅俗近日章疏如囊剥之说愤世嫉邪虽似太过陛下犹谅其朴忠容其狂戇不为浮言所摇此陛下始终爱惜人才培养气节之大意而天下诵之史策书之以为古今盛德事者也且陛下临御以来自阁臣以至台諫以正直老成而起用者非一人矣而天下屈指则瑞居一焉瑞之列于正人久矣初瑞巡抚南畿时所至如烈日秋霜抨击豪强则权势敛迹禁绝侵渔则民困立苏兴水利议条鞭一切善政至今黄童白叟皆雅道之近日起自海滨无不曰海都堂又起转相告语喜见眉睫寰言闾阎骚然几成大变何其敢于面欺也近在留都禁绝令送裁革奢侈躬先节俭以示百僚振风肃纪远近望之隐然有虎豹在山之势即使寡才而其英风劲气振江南靡靡之士风而濯之以清冷之水者其功安可诬也寰独心伤陛下之明排海内之议关天下正人之口而夺之气乎昔司马光言小人欲倾君子其御之之术有三曰好名曰好胜曰彰君过而已今观寰之诋瑞千有余言大槩不出此三术之外其曰大奸极诈欺世盗名非所谓御之以好名者乎其曰侮圣自贤举世皆浊已独清非所谓御之以好胜者乎其曰贬夺主威损辱国体非所谓御之以彰君过者乎臣请一一正其欺罔之罪寰之评瑞也曰乡愿曰穿窬曰鄙夫陛下试察瑞之为人果同流合污阉然媚世之乡愿乎果色厉内荏惟畏人知之穿窬乎果患得患失吮痂舐痔之鄙夫乎此其情实相反有是非之心者皆能辨之而寰颠倒是非巧饰奸言以惑陛下夫瑞若可以为乡愿为穿窬为鄙夫则虽指鹿为马亦何不可之有此为欺罔罪一自古正人君子忧治世危明主有其君痛哭流涕者矣有讥其君不及齐文宣者矣后世不议其臣之过而嘉其忠且以为君之能容也而诵其美非独此也周公之戒成王也而惟恐其有商王之迷益之戒舜也而惟恐其有丹朱之傲古圣贤之私忧过计类如此今瑞之疏曰一介寒生且以圣人自许圣上所居何位可曰中人耶夫不欲陛下为中人而欲陛下为圣人此正尧舜其君之心也寰反指摘而诽之至曰贬英君为中主不知与瑞之所言类乎此为欺罔罪二夫以瑞之狂而陛下能容之君仁则臣直此天下臣民所以归美于陛下也寰之言曰将使百姓怨我皇上之失政寰之意将谓陛下果有失政因瑞昭揭之而民始生怨耶抑谓陛下果无失政因瑞之言而民妄生怨耶此则防川之说其渐不可长者昔汲黯为諫议寝淮南之谋苏武为属国系匈奴之颈瑞三朝直臣四夷共仰今之用宪台而反以中国为无人必逐去直言尽取庸碌如寰者以充位然后有人耶夫直言敢諫谓之贬夺主威忧治危明谓之损辱国体此与秦之以忠諫为诽谤妖言者何异信如寰之意世之甘言谀词颐指气使者乃所以尊主威铺张太平倡为丰亨豫大之说者乃所

以崇国体耶此为欺罔罪三古君子不得已而矫世则往往有偏重之论故孟子之宽大不如万章之严小此非瑞一人之言乃先儒救时之言也其非孔孟之受赐者盖痛近时之鄙夫托孔孟之说以文其盗贼之身故有激而言之意曰以吾之不可学圣人之可云尔今寰乃指此一言为孔孟之诟而曰指孔孟为贪夫又曰臣不得不为孔孟而讎瑞其辞岂不强乎如察其情则大相矛盾盖天下固有词然而意不然者如书有漂杵之文诗有子遗之咏此类是也今瑞非受赐之说其意岂真以孔孟为贪而孔孟之非贪天亦岂待一房寰之辨而始雪乎瑞之意以愤世过激之言破假托圣贤以便身图者之窟其言虽非孔孟而其情其理则不失为孔孟之正脉也寰之意明知此言非为诟孔孟而发而佯为不解其意又反从而形容之曰以孔孟为贪夫其意欲辟瑞而无其端得此一言而执之以为辞盖以已敌瑞已不胜瑞以孔孟敌瑞瑞将杜口矣此之谓假公而济私言若卫孔孟而其情其理则孔孟之罪人也不然寰教诸生以学孔孟其可学者多矣何必先学其受赐乎天下之学术卑污苟且悖戾孟者亦多矣何必先辟其不受赐乎今为瑞者不幸而以非受赐之一言遂掷之于吾道之外为寰者幸而得辟孔孟贪夫之隙为城狐社鼠于吾道之中是孔孟乃诙寰报讎之人孔孟猎较受赐之一言乃为寰肆谗之具举天下之人心莫不为之扼腕不平愤其强辞夺理而寰犹扬扬然自任于皇上之前曰瑞攘臂疾呼而攻孔孟臣为孔孟而讎瑞彼谓天下之耳目果可以空言欺也其为欺罔罪四寰谓瑞不仁不知无礼无义臣等谓瑞巡抚应天江南数百万生灵戴之如亲父母可谓至仁当世庙时一疏格君心定国是挽回一代气运为万世人臣忠君者之法可谓大义去就进退一惟君命是共可谓知礼爱君爱国一念皎如白日不以毁誉生死眩其心可谓太智惟僻爱小民则仁之过嫉恶太严则义之过如寰之横逆又何足难尚与之较量是非则礼之过虽有辨疏曾不足以发寰万一之奸则机智变械诚不如寰臣等方谓瑞认仁义礼智而过不谓其犹有所未足也此谓欺罔罪五今士君子见一长者则语言恭谨不敢稍涉于恢谐何者敬之也况天威咫尺臣子承之踧踖不遑此岂狎侮之地而寰矜夸张放备诸谗状如所谓开辟以来求第四圣人者如所谓瑞之疏想是闭门读程策而有得者取臣下居常宾主酒席戏笑之言着之章奏殊为不恭之甚自古臣子对其君父曾有出一戏言玩侮朝廷如此者乎此为欺罔罪六国家持公论者惟科道而寰乃得幸进先据其穴固自谓我可言人人不得而言我矣然为朝廷主张公道者尚有辅臣有吏部有都察院诸大臣在也今寰乃敢于陛下之前反言听吏部都察院之指摘何寰之理曲而气更壮也夫寰诚巧而合俗瑞诚拙而忤世然天理常存人心不死堂堂天朝君子满庭明有礼乐幽有鬼神圣贤有名教史册有公论天地神明昭布森列彼岂视部院大臣皆誉阿而毁即墨者耶盖彼且不难于欺陛下又何有于诸臣其为欺朝廷无人罪七臣观寰所指证瑞罪不过曰器皿易袍故靴易带起官不辞而已此皆琐屑之谈不足置辩就如寰所论不近人情亦不失为贤者之过也夫以寰之诋瑞吹毛索瘢宜无不至而所据者不过如此臣以为适足以明瑞之无他瑕玷而寰之阴险窥覷亦无所用其伎也臣再观寰本惟辟严刑用言官二项类乎公然皆拾他人唾余而曲终奏雅求解免于公论正圣旨所谓屡经建白摭拾余言者也何难察哉夫寰之本情在于妬贤嫉能危一瑞足以自安胜一瑞足以自豪而乃造贬君辱国之谤欲以激皇上之怒称蒺藜秦蔡泽之事欲以起阁臣之猜援孔孟为羽翼令学士箝口而不敢言借舆论为粉饰令缙绅同声而不敢斥如鼓炉以燎毛累棋而必坠此劾章中之大奸侠也不意青天白日之下有魑魅魍魉如寰者出于其间也夫天下无两是之理瑞正则寰邪寰正则瑞邪非罢瑞以谢寰则罢寰以谢瑞陛下既谅瑞之孤忠必烛寰之欺罔据寰疏中谓生儒有如瑞者必将加之朴责褫其章缝令

不齿于学校矣夫陛下方重瑞借其人以风天下而寰乃欲逆销天下之节气抑慷慨之士如瑞者令无容足之地是陛下之所褒乃寰之所必斥也士君子之所师乃寰之所必摈也以如此妬贤讎正泼恣无耻之人而宴然居师表之位驱天下士风而入于欺罔谄诈之俗臣等有裂冠毁冕而去之必不与之并立于朝也臣等新进小生发天下之清议虽寰有奸如山不可动摇然公论既明人心既快寰虽顽钝无耻亦何面目一日复立于东南诸士之上乎臣等何讎于寰何私于瑞但天下之公论鬱而不宣一海瑞尚不足惜正人有如海瑞者相继而指为邪则君子之道日消矣一房寰尚不足畏邪人有如房寰者相继而妨贤能则小人之道日长矣妬复否泰之机于是乎在不可不为之深虑也古有太学生击鼓上书者臣等受国恩不敢在太学生之后且瑞在先朝轻一身之死生以报国而臣等辄重区区之进退不为瑞明之是无人心者也故不避烦琐冒渎天听伏乞陛下以臣章下之大庭询之广众如果臣言不谬乞将寰去之不疑将瑞任之勿二使天下晓然知上意之所在则君子之道日长小人之道日消三代直道复见于今而朝廷永享平明之治矣

南京户科给事中徐常吉谨奏为糾劾贪肆臬臣以明公道事臣接邸报该吏科都给事中张鼎思论劾方面官员丘浙等蒙皇上特为赐允将诸臣处分惟房楠房寰独得留用夫房楠年力虽衰官箴未败皇上留之可也若房寰者亦得留用此臣之所未解也臣备员南都南中之事人所切齿无过于房寰臣请得为皇上陈之房寰者今江西副使也始任歙县即有贪声续补漳浦不闻改辙既汇缘以入台端遂侵寻而督学政是宜振肃风教以端士习乃溪壑之欲未厌径窵之路潜通其子房应斗遍游又中其亲翁严范大通关节贿滥滔天名教扫地以致士子有阿房宫赋之拟庶民有此房出卖之标其同年沈思孝劾之曰脍炙师儒之任大开贿赂之门此岂妄语哉臣以为若寰者幸生累代宽仁之后得逃鼎镬使在国初当以大贪污戮矣海瑞者肃皇朝之直臣也以肃皇之明圣尚且容之房寰何人乃肆为诟骂盖闻房寰故纵其子恐瑞之论劾故先发以制之也其形之章疏无非褻嫚之语嘲谑之言此閭閻细民所不屑道而乃以之陈于君父之前臣以为若寰者幸生我明忠厚之朝得免斧钺使在汉代当以大不敬诛矣其时进士顾允成等目击其疏心愤其奸遂上疏论列其事皇上怒其出位言事为之放回原籍皇上盖谓其言之非职而未尝谓其言之非是也及寰之事体败露秽迹昭彰三吴之口腾若沸鼎寰亦无如之何乃上疏以暴其事皇上为之允其奏将徐熙载严范褫去衣冠臣知皇上之心盖欲其法之行而未尝不疑寰之为人也乃人为寰解者则曰是事也乃寰不知也臣以为房寰而诚不知则所通关节必无征验既无征验则通贿之人虽为至黠安能无故而受人之金也行贿之人虽为至愚安肯无故而与人金也知其无是理也臣闻强暴不侵贞节之女贪秽不干烈行之夫使房寰而一毫关节不与人通则其行贿者不禁自止何至三年之久而犹有徐熙载等也其通贿者亦不禁自止何至三年之久而犹有严范等也臣又知其无是理也臣请得总房寰而论之其虑海瑞之欲论其子也则先发以制之疑顾宪成之为其弟也则捏书以诬之惧其赃私之尽败也则劾其亲戚以掩之是何其机械之巧也二举人退矣三进士锢矣是何其辛螫之毒也顾允成等论之而不去沈思孝论之而不去张鼎思论之而又不去是何其根株之固也臣闻君子小人自相为伍房寰之所论者非批鳞直节之臣则锐志力学之士也其论寰者非批鳞直节之臣即锐志力学之士也即房寰可知已如是则寰虽不贪尚不容于尧舜之世而况加之以贪乎今在廷诸臣方攻当道之豺狼而臣乃欲问城社之狐鼠臣独何心实以房寰贪肆无忌积有岁年今既经论劾而又得独留公

道不明官常不正莫此为甚是以不得不为皇上言之然臣之所论皆其形之章奏着之耳目
人人所共知人人所共愤者若其暮夜之受白昼之攫臣犹未暇悉数之也皇上倘不以臣言
为谬乞勅吏部行房褫罢斥以舒众心之积愤臣不胜惶恐之至 【
读徐公此疏乃知忠介公受诋之故可与三进士疏□□发明故并刻之】

海忠介公全集卷之十二